


中國方志叢書·華中地方·第六號

據清·道光二十四年刊本

影印

江蘇省

京口山水志



成文出版社有限公司印行



10106012

中國方志叢書·華中地方·第六號


據

清·道光二十四年刊本
清·楊榮撰

影印

江蘇省

京口山水志



成文出版社有限公司印行



10106013

中華民國五十九年三月壹一版

京口山水志

全二冊

發行人：黃 成 助

台北郵政信箱二二六〇五號

出版者：成文出版社有限公司

台北郵政信箱二二六〇五號

台北市羅斯福路三段279之二號

電話：三七〇一三二號

印刷者：東南印製廠有限公司

和平西路二段70巷83弄29號

內政部登記證內版台業字第一一四七號

東

白

山

北

圖

板存鎮江小
西門外打索
街善化書局

京口江山稱天下第一向無專志南徐州記京口記其
書并佚歷代圖經屢修屢變小姑彭郎臆說寔多此山
水志之所以作也首序郡邑山水以邑爲次一切建置
以及藝文分列各山水下無可列者附錄於卷末四邑
之中徒邑獨詳予生其間見聞較悉之故識圖偏隅猶
復未能周知殊媿孤陋匡予不逮以俟博雅道光甲辰
小至日楊棨

京口山水志目錄

卷首

郡邑

卷一

丹徒諸山

卷二

丹徒諸山

卷三

丹徒諸山

卷四

身... 金

丹徒諸山

卷五

丹徒諸山

卷六

丹徒諸山

卷七

丹徒諸山

卷八

丹徒諸山

卷九

丹徒諸水

卷十

丹徒諸水

卷十一

丹徒諸水

卷十二

丹徒諸水

卷十三

丹陽諸山

卷十四

丹陽諸水

卷十五

金壇諸山

卷十六

金壇諸水

卷十七

溧陽諸山

卷十八

溧陽諸水

卷末

附錄

補遺

三十一
五

三


--	--

1000
1000
1000
1000
1000

1

京口山水總圖









儀徵界

金山

正平山

蒜山

陽彭山

山窟獸 山鶴

山檀

山龍白

山夾

山黃

岡龍分

山香

山州五

山王曹

山鑪鐵

山論

高資
炭渚

白容界

圖

三

丹陽山水圖

孟河

武進界

丹陽界

江
港邑

九靈山

繡球山

經山

沈山

李家山

九曲河

蕭塘
港

蕭港

柵口

縣城

陵口


七里河口

呂城

瀆


白鶴溪


珥村



金壇山水圖


武進界





深陽山水圖





京口山水志卷首

郡邑

鎮江府在禹貢周職方氏為揚州之域春秋時屬吳謂其地為朱方左傳齊慶封奔吳與之朱方是也至魯哀公二十二年吳為越所併地復屬越楚靈王使屈申圍朱方執慶封其地屬楚秦為會稽鄣二郡之地漢初為荆國劉賈所封至吳王濞誅以其地併入江都國武帝又分屬丹陽會稽二郡之地後漢吳丹陽二郡地順帝紀永建四年分會稽為吳郡獻帝建安十四年孫權自吳理丹徒號曰

京城十六年遷都建業以此為京口鎮晉平吳又為毗

陵丹陽二郡地晉志毗陵郡統丹徒曲阿武進延陵毗陵暨陽無錫七縣元帝渡江

都建業於京口僑置徐兖州宋元嘉中以南徐州治京

口南兖州治廣陵自吳至陳皆為重鎮隋平陳廢南徐

州為延陵鎮移名於京口為延陵縣屬蔣州開皇十五

年罷延陵鎮以蔣州之延陵永平常州之曲阿三縣置

潤州於鎮城蓋取州東潤浦以立名隋末杜伏威竊據

其地唐武德三年伏威歸化改江都郡之延陵縣為丹

徒徙延陵還治故縣屬茅州六年輔公祏反復據其地

七年平又置潤州領丹徒縣太宗朝分天下為十道潤

隸江南開元二十一年又分天下爲十五道江南東道

潤爲會府天寶元年改潤爲丹陽郡

潤州類集天寶之後謂丹陽者潤州

或曲阿非兩漢六朝之丹陽也

乾元二年又爲潤州始隸浙江西道建

中二年合浙江東西二道觀察置節度治潤州賜號鎮

海軍節度南唐杭潤二州皆有鎮海軍額宋改鎮海軍

爲鎮江軍政和中以徽宗潛邸陞府元陞爲鎮江路屬

浙江行省浙江道明改鎮江路爲江淮府尋改鎮江府

直隸南京 國朝屬江蘇布政使司潤在唐初領縣六

丹徒丹陽金壇延陵上元句容至德以後割出上元句

容兩縣入昇州領縣四宋熙寧中又廢延陵一縣爲鎮

領縣三元明因之不改 國朝雍正八年割江甯府屬

之溧陽縣來屬領縣四

據史地理州郡各志元和郡縣志太平寰宇記嘉定鎮江志至

順鎮江志乾

隆鎮江志

丹徒縣倚郭本朱方地吳錄云朱方後名谷陽秦以其

地有王氣始皇遣赭衣徒三千人鑿破長隴故名丹徒

秦漢屬會稽郡後漢屬吳郡吳大帝嘉禾三年改丹徒

為武進晉太康三年復曰丹徒屬毘陵郡宋齊以來屬

南東海郡隋開皇九年廢丹徒縣入延陵屬江都郡唐

武德三年復為丹徒屬潤州

元和郡縣志太平寰宇記嘉定鎮江志

丹陽縣府東南六十五里舊雲陽地秦時望氣者云有

王氣鑿之以敗其勢截其直道使之阿曲故曰曲阿屬
會稽郡漢景帝四年曲阿屬揚州王莽改曲阿爲風美
縣後漢復曰曲阿爲揚州治所吳嘉禾三年復曲阿爲
雲陽晉太康二年復曰曲阿屬毘陵郡梁改爲蘭陵縣
隋開皇九年併蘭陵入曲阿屬潤州唐武德二年置雲
州五年改爲簡州唐志以縣南簡瀆取名八年州廢爲
縣復隸潤州天寶元年改曲阿爲丹陽縣同上
金壇縣府東南一百四十里本曲阿縣延陵之鄉爲吳
之地輿地志秦漢屬會稽郡後漢屬吳郡晉元帝時屬
毗陵郡宋齊梁陳皆爲延陵之南界隋開皇十五年於

此置金山府大業末亂鄉人相保立爲金山縣隋亡沈
法興竊據江表於此置琅邪縣唐武德二年李子通破
法興改琅邪爲茅州縣亦隨隸其年九月杜伏威爲吳
王縣名不改伏威入朝後縣陷於輔公祏公祏平縣屬
蔣州八年併入延陵縣垂拱四年復立金山縣隸潤州
又以東陽郡已有金山縣改名金壇取邑界句曲之山
金壇之陵以爲號 同上

溧陽縣府東南二百四十里本春秋吳濼渚邑以在溧
水北故名溧陽吳越春秋伍員奔吳行至溧陽卽此秦
始皇置溧陽縣屬鄣郡漢武帝元封二年廢鄣郡置丹

陽郡統縣十七溧陽與焉孫權移丹陽治建業析溧陽置永安改永平尋復晉武帝太康二年改永安爲永世惠帝永興元年析永世置平陵晉志周玘創義討石冰分丹陽之永世置平陵凡六縣立義興郡以表記之功宋武帝永初元年復隸丹陽郡文帝元嘉九年省平陵入永世溧陽隋文帝開皇九年廢丹陽郡置蔣州十一年析溧陽置溧水縣並屬蔣州十八年併溧陽入溧水唐高祖武德三年蔣州廢以江寧溧水二縣置揚州又析置溧陽縣九年揚州移理江都以溧陽隸宣州肅宗至德二載以江寧縣置江寧郡溧陽改屬乾元元年改

江寧郡為昇州屬縣如故上元二年州廢復以溧陽屬
宣州昭宗天祐二年隸潤州宋太祖開寶八年復昇州
仍以溧陽屬自後真宗天禧中以昇州為江寧府高宗
建炎中改建康府元世祖立行省於建康改建康府為
路文宗天歷中改集慶路明太祖改應天府 國朝順

治二年仍為江寧府溧陽並屬不改縣在元初陞為溧
州復陞為府為路旋省為縣成宗時又陞為州明初始
改為縣至今仍之雍正八年改屬鎮江府

元和郡縣志
太平寰宇記

景定建康志至正金陵志順
治江寧府志乾隆鎮江府志

京口山水志卷首

京口山水志卷一

丹徒楊棨撰

丹徒山

北固山在城北一里杜佑通典丹徒有北固山李吉甫元和郡縣志下臨長江其勢險固因以爲名蔡謨謝安作鎮竝於山上作府庫儲軍實樂史太平寰宇記南徐州記云城西北有嶺陡入江三面臨水號北固劉楨京口記曰回嶺入江懸水峻壁輿地志云天景清明登之望見廣陵城如在青霄中相去鳥道五十餘里劉義慶世說新語荀中郎在京口登北固望海云雖未睹三山

便自使人有凌雲意若秦漢之君必當褰裳濡足一名
北顧南史梁宗室臨川王正義傳武帝幸朱方正義修
解宇以待輿駕初京城之西有別嶺入江高數十丈三
面臨水號曰北固蔡謨起樓其上以置軍實是後崩壞
猶有小亭登降甚狹及上升之下輦步進正義乃廣其
路傍施欄楯翌日上幸遂通小輿上悅登望久之敕曰
此嶺不足須固守然京口實乃壯觀乃改曰北顧一名
土山太平寰宇記甘露寺在城東角土山上晉書蔡謨
傳謨統七千餘人所戍東至土山西至江乘劉禹錫詩
土山京口峻鐵甕郡城牢張萊三山志土山業然隆起

晉唐以來郡治據其上梁武帝改名北顧者是也

案嘉定鎮

江志云北固山即今府治與甘露寺是蓋山有三峯前

立郡治後建甘露寺中有元武殿明萬曆十二年知府

吳搆謙於治後附城築垣又建虛臺一與甘露寺對邑

人李一陽記云世廟末島夷亂海上突至潤當事者倉

卒築斷北固嶺距城自守知北固前峯本與中後相連

今其勢稍斷者嘉靖中之所築也修志者不察遂謂山

止二 甘露嶺一名龍埂在山東 走馬澗在山西

石壁在山後京口記云懸水峻壁蓋指此壁間別出一

峯曰石帆 陸游入蜀記云此山多峭壁如削然皆土也

國史以為石壁峭絕誤矣案黃震乞浚甘露

港狀有曰北固山純土如粉獨其北峭石壁立奇枝疎

人蓋游觀者所不見豈北固之所以得名與放翁謂峭

壁皆土蓋但 觀音洞在石壁下內有明龐時雍書雲

據山南而言 房風窟四字 國朝康熙乾隆中

車駕南巡屢幸此山山上有行宮又

高宗御製詩碑 御書聯扁

宋謝靈運從游京口北固應詔詩玉璽戒誠信黃
屋示崇高事爲名教用道以神理超昔聞汾水遊
今見塵外鑣鳴笳發春渚稅鑿登山椒張組 倒
景列筵矚歸潮遠巖映蘭薄白日麗江臯原隰黃
綠柳墟囿散紅桃皇心美陽澤萬象咸光昭顧已
枉維繫撫志慚場苗工拙各所宜終以反林巢曾
是縈舊想覽物奏長謠 唐王灣次北固山下詩
客路青山外行舟綠水前潮平兩岸濶風正一帆

懸海日生殘夜江春入舊年鄉書何處達歸雁洛
陽邊 吳筠登北固山望海詩此山鎮京口迴出
滄海循躋覽何所見茫茫潮汐馳雲生蓬萊島日
出扶桑枝萬里混一色焉能分兩儀願言策烟駕
縹緲尋安期揮手謝人境吾將從此辭 李白永
王東巡歌十一首 丹陽北固是吳關畫出樓臺雲
水間千巖烽火連滄海兩岸旌旗繞碧山 皇甫
冉詩悵望南徐登北固迢遙西塞限東關落日臨
川問音信寒潮惟帶夕陽還 竇常詩水國芒種
後梅天風雨涼露蠶開晚簇江燕語危檣山址北

來固潮頭西去忙年年此登眺人事幾消亡 宋

王存詩晚登北固頂俯視南徐城廢壘何茫茫山

川迴縱橫千載竟誰有六朝空戰爭豪氣不可問

古墳人正耕 釋法平詩不負南徐約來看北固

雲金焦兩山小吳楚一江分雨意生蒼壁潮聲起

夕曛半生流落恨此日重殷勤 明葉向高同程

蘿陽登北固詩共有探奇癖相將永夜游潮來人

語亂江靜蜃烟浮萬井傳宵柝孤燈辨客舟不禁

懷古意惆悵海門秋 張祥鳶詩孤雲縹緲赴江

天白石紅亭樹杪懸一道澄波開斷壁千林黃葉

下寒烟鵬盤寥廓秋風急山缺西南落日圓萬里
中原勞北顧蕭梁陳跡酒盃前 杜濬詩西郊諸
嶺見北顧稱其名石壁從空下江天插水生鳥飛
孤閣半人上翠微平有路金焦令辭山更遠行

國朝陳之遴詩危磴侵雲策杖遙琳宮積翠擁峩
堯烟開鐵甕生殘照風起金山急暮潮飲馬幾回
虛割據臥龍從古混漁樵六朝佳麗依稀在花月
春江響玉簫 余京詩北固嵯峨枕碧流登臨霸
跡憶孫劉百年戎馬三分國千古江山一倚樓鐵
甕日沈殘角起海門風靜暮潮收故宮舊壘知何

處野荻寒蘆歲歲秋

甘露寺在山上唐圖經嘉定鎮江志並云唐寶曆中

李德裕建

李衛公祭言禪師文云因甘露之降瑞建仁祠於高標其瘞舍利石函記亦云余創

甘露寺寶刹三山志郡邑志則云三國時吳王皓甘

露年建考南史梁武帝登此山僅存一小亭無寺可

知各志之誤固不待辨惟寺有梁天監十八年所鑄

供佛鐵鑊或疑寺始於梁不知武帝幸北固在大同

十年見南史本紀其時山尚無寺鐵鑊斷非為山寺

鑄矣况寺中尚有宋陸探微所畫菩薩師子何獨以

梁鑊而據為梁所建也曾改類集李衛公鼎建甘露

寺聚境內奇物實之鑊與畫像想即衛公自他處遷

此又有據周繇殿鎖南朝像句疑寺非始於唐者不

知像即指陸探微張僧繇畫像言若云塑像何寺無

之以之入詩太平寰宇記在城東角土山上晴明軒

成何語耶

檻望見揚州內有梁武帝天下第一江山六字

案武帝書

久佚宋淮東總管延陵吳璠重書

國朝程康莊別駕重摹勒石

很石蘇東坡甘

露寺詩自注寺有石如羊相傳謂之很石云諸葛孔明坐其上與孫仲謀論曹公也又施注輿地志石羊巷在城南吳時孫氏隧道也劉備詣孫權權與俱獵因醉各據一羊陸游入蜀記甘露寺有很石世傳以爲漢昭烈吳大帝嘗據此石其謀曹氏石亡已久寺僧輒取一石充數游客摩挲太息僧及童子輩往往竊笑也蔡寬夫詩話甘露寺壁間舊有羅隱詩版云紫髯桑蓋此沈吟很石猶存事可尋漢鼎未安聊把手楚醪雖美肯同心英雄已往時難問苔蘚何知日

漸深還有市廛沽酒客雀喧鳩聚話蹄涔時錢鏐高

駢徐温鼎立三方潤州處其間隱此詩婉而有味元

符中經火詩版不復存石亦毀剝矣

案羅隱詩係題潤州妙善前石

羊自注曰傳言吳主孫權與蜀主劉備嘗此置會云

隱又有錢唐遇默師句石羊妙善街甘露平泉碑並

見昭諫集石舊在妙善寺未知何時移此郡邑志云

明郡守滕謚建亭覆石石毀于宋所覆疑放翁所謂

充數者

今並亡

鐵鑊東坡甘露寺詩註寺有大鐵鑊二按

銘梁武帝時所鑄張邦基墨莊漫錄北固山有六大

鐵鑊梁天監中鑄蓋有文可讀云天監十八年太歲

己亥十二月丙午朔十日乙卯皇帝親造鐵鑊于解

脫仙

古佛滿漫減

字 甘露種以荷葉供養十方一切諸

仏以仏神力遍至十方盡虚空界窮未來際令地獄
苦鑊變爲七珍寶地地獄沸湯化爲八功德水一切
四生解脫衆苦如蓮花在泥清淨無染同得安樂到
涅槃城斯鑊之用本在亨鮮八珍與染五味生纏我
皇靜照慈被無邊法喜禪悅何取漫一檀爰造斯器
因成勝緣如含碧水漫一發金蓮道場供養永永無
邊其後又云帥吳虎子近禁道真槩懷於佐陳僧圓
丞宋又漫令宣令鄭休之義不可曉疑當時幹造之
耳又一行云五十石鑊然形製不能容今之五十石
蓋古之斗斛小也始知二鑊乃當時植蓮供養佛之

具耳亡今陸探微張僧繇吳道子畫版東坡甘露寺

詩自注畫師子一菩薩二陸探微筆施注潤州類集

寺有張僧繇畫菩薩陸探微畫狻猊又米芾甘露寺

詩序寺有張僧繇四菩薩吳道子行腳僧元符末為

火所焚人皮鼓明嘉靖中湯寬戮海寇王良皮所

輓亡今雷音堂即禪堂米芾書額今為朱文公祠長廊高

下依山結構吳琚書天下第一江山六字勒石此間

又有明米萬鍾書宏開鷺嶺四字北軒杜牧周繇俱有詩

東軒周繇有詩西軒元至正間建三軒俱廢清暉樓

雨華樓凝虛樓三樓俱見曾文類集今廢木末樓一名石帆

明季建 藏經閣明萬曆初建以貯正統間敕賜大

藏經典有正統十年二月十五日敕諭 畫材閣明

陳繼儒書額 取米芾南山 可作畫材語 凌雲亭崇禎中建 鐵

塏李德裕建 米芾有句云 神護衛公塏 李衛公祠在寺中舊有

公所植檜與柏潤州類集甘露寺有李德裕祠堂畫

像及所植檜蘇詩自注衛公祠堂在寺手植柏合抱

矣後燬 國朝乾隆中重建三賢祠僧入蘇公軾米

公芾 唐語林劉侍郎三復初為金壇尉李衛公鎮洎 西三復代草表云山名北固長懷戀闕之心地

接東溟卻羨朝宗之路衛公嘉歎遂辟為賓佐又云 甘露寺某僧道行孤高以方竹杖贈焉公所寶也及

再鎮浙右問杖無恙否僧曰已規圓而漆之矣公嗟 惋彌日又云公鎮浙西甘露寺僧主知事者誅交代

常住什物爲前主僧隱沒金若干兩公疑之僧曰居
寺者樂于知事前後主之者空交分兩文書其實無
金羣僧以某孤立欲由此擠之公乃立召兜子數乘
命關連僧入對事不令相對命取黃泥各令模交付
下次金樣僧既不知形狀竟模不成數輩等皆伏罪
又云公南竄怨嫌並集途中感憤有十五年餘車馬
客無人相送到崖州之句甘露寺僧允躬頗受知允
躬迫於物議不得已送至謫所及歸作書言天厭神
怒百禍皆作金幣爲鱈魚所溺室宇爲天
火所焚談者藉以傳布由允躬背恩所致

李衛公

重瘞舍利石函處在鐵塏下玉壺清話潤州甘露寺
熙寧四年春江中漁者見神光累夕起于溷廁間一
旦其廁無故自圯長老應夫再營之方築基墾土去
地數尺一礎覆土中刻曰有唐太和三年正月二十
四日于上元縣禪衆寺舊塏基下獲舍利石函以其

年二月十五日重瘞藏于丹徒縣甘露寺東塏下金

棺一銀棺一錦襪九重皆余之施也余創甘露寺寶

刹重瘞舍利以資穆皇之冥福也江浙西道觀察等

使兼潤州刺史李德裕記 法序塏在寺東梁道人

法序舍利塏徐鉉有記 廣照禪師塏在走馬澗上三山志應

夫字廣照熙寧中主甘露寺 接引大佛殿在山下明天啟中釋

真嶽建 北固山房在山中峯內有元武殿 笠庵

在山東麓崇禎巳卯太守程珣書額 大士庵在山下其右有大

悲庵今為劉猛將軍廟 生生庵在山後明崇禎中太守程

珣建王士正有生生庵題名記見集中庵今廢

宋徐鉉潤州甘露寺新建舍利塔記維皇宋二葉
改元五祀潤州丹徒縣令王紀改築縣牆掘地得
石函驗其刻文梁大同五年道人法序瘞真身舍
利於此函中銅龕一龕中銀合一合中銀瓶二舍
利七粒存焉而銅龕復有刻文則唐貞觀十二年
再加營奉掌役者張遇獲之以獻遇也感貞應之
在已念妙門之可修因投郡之慈雲寺削髮爲沙
門易名閏真精心苦行誓復前迹廣募衆施疇咨
協心數年之間克果其願卽以端拱元年夏四月
八日遷致於郡之甘露寺東隅建浮屠焉獻狀而

來求志其績粵聖人在上欽若靈心政無不修神
靡不舉元貺交感坤元效珍用能使幽瘞之質煥
然景彰騫崩之迹蔚然雲爛然則澤及微隱福被
含生其可知也是郡也揚州之都會京口之重鎮
六代之風流人物綜萃於斯三吳之山川林泉肇
發於此高深自改氣象常存是寺也北固山之陰
崖贊皇公之遺跡崢嶸飛閣迴瞰滄江邐迤巖房
周行數里闕植之作遠邇雲臻故真師因人之心
相地之勝獲此空隙建茲崇封材用工役必求善
良規模制度必據經法其高七十尺其周二十步

八隅瑩玉五盞凌霄冠星珠於觚稜海日先照圖
雲氣於焚燎宿霧常棲中嚴睟容肅然月滿旁續
靈變煥若霞舒游居之徒莫不稱嘆愚嘗見釋氏
子爲此役者多矣如真師者其涉道也淺其居處
也卑上無許史之托下無猗陶之助苦節以感物
積微而著功不溷民不愆素而能事以立亦可尙
也故嘉而志之 蘇軾甘露寺陸探微畫師子贊
圓其目仰其鼻奮髯吐舌威見齒舞其足前其耳
左顧右躑喜見尾雖猛而和蓋其戲嚴嚴高堂護
燕几啼呼顛沛走百鬼嗟乎妙哉古陸子

唐李德裕早春至言禪公法堂憶平泉別業詩昔
我伊原上孤遊竹樹間人依紅桂靜鳥傍碧潭閒
松蓋低春雪藤輪倚暮山永懷桑梓邑衰老若爲
還 張祜詩千尋構重險高步出塵埃日月光先
到山河勢盡來冷雲歸水石清露滴樓臺况是東
溟上平生意一開 盧肇詩北固巖端寺佳名自
上臺地從京口斷山到海門迴曙色烟中滅潮聲
日下來一隅通雉堞千仞聳樓臺林暗疑降虎江
空想渡孟福庭增氣象仙磬落昭回覺路花非染
流年景漫催隋宮凋綠草晉室散黃埃西蜀波湍

盡東溟日月開如登最高處應得見蓬萊 周朴

詩層閣疊危壁因成千古名幾連揚子路獨倚潤

州城雲近銜江色風高背雁聲僧居上方久端坐

見營營 許渾送無夢上人歸甘露寺詩飄飄隨

晚浪杯影入鷗羣岸凍干船雪巖陰一寺雲夜燈

江北見寒磬浦西聞鶴嶺烟霞在歸期不羨君

又懷甘露寺自省上人詩

自注上人嘗有戰功

心悟覺身勞

雲中棄寶刀久閒生髀肉多壽長眉毫客棹春潮

急禪齋暮雪高南冷一回首山碧水滔滔 又甘

露寺感事貽同志詩雲蔽長安路更賒獨隨漁艇

老天涯青山盡日尋黃絹滄海經年夢絳紗雪憤
有期心自壯報恩無處鬢先華東堂舊侶勤書劔
同出鷹門是一家 陸龜蒙紀夢游甘露寺詩昔
臥嵩高雲雲窗正寒夕披裘忽生夢似到空王宅
峩天一峯立欄楯橫半壁級倚綠巔差關臨赤霄
闕捫虛陟孤峭不翅千餘尺疊掌望罌恩分明袒
肩釋凌香稽首罷瞭曉缺三字高戶乘北風聲號大
波白光中目難送定驗方可覲樹細鴻濛烟鳥疎
零落碧須臾羣籟入空水相噴激積浪亞寒堆呀
如鬪危石跳音簇髀鼓濺沫交矛戟鳥疾帆亦奔

紛紛助勁敵思非水靈怒卽是飢龍孽怯懾不敢
前荷襟汗霑霖迴經定僧處泉木光相射巖磴雲
族栖招柯露華適逍遙得真趨邈迤尋常跡山腹

貯孤亭嵐根四垂帟誰題雪月句乃是曹劉格

自注

愛樹亭有故
太尉房公詩閩闕一枝瓊邊樓數聲笛吟高矍然

起若自蒼穹擲短燭墮餘花圓蟾挂斜魄自從神

錫境無處不登陟忽上南徐山心期豁而獲豈伊

煩惱骨合到清凉域暗得胡蝶身幽奇盡相識奈

何有名氏未列金闈籍翻慙州頂童得奉真如策

雲濤觸風望毫管和烟擲聊記夢中游留之問禪

客 周繇詩盤江上幾層峭壁半垂藤殿鎖南朝
像龕禪外國僧海濤侵砌檻山雨灑窗燈日暮疎
鐘起聲聲徹廣陵 又東軒詩每日憐晴眺閒吟
只自娛山從平地有水到遠天無老樹多封楚輕
烟暗染吳雖居此廊下入戶亦踟躕 又北軒詩
曉色宜閒望山風遠亦清白雲連晉閣碧樹盡燕
城水淨沙痕出烟消野火平最堪嘉此景爲我長
詩情 杜牧寄題北軒詩會上蓬萊宮裏行北軒
欄檻最留情孤高堪弄桓伊笛縹緲疑聞子晉笙
天接海門秋水色烟籠隋苑暮鐘聲他年會著荷

衣去不向山僧道姓名 曹松詩香門接巨壘畫

角間清鐘北固一何峭西僧多此逢天垂無際海

雲白久晴峯且暮然燈外潮頭振蟄龍 孫魴詩

寒暄皆有景孤絕畫難形地拱千尋險天垂 面

青晝燈籠雁墜夜磬徹漁汀最愛僧房好波光滿

戶庭 羅隱甘露寺火後詩六朝勝事已 埃猶

有閑人悵望來只道鬼神能護物不知龍象自成

灰犀然水府渾非怪燕入吳宮未是災還識平泉

故侯否一生踪跡此樓臺 又甘露寺看雪上周

相公詩篩寒灑白亂溟濛禱請功兼造化功光薄

乍迷京口月影交初轉海門風細黏謝客衣裾上
輕墮梁王酒醖中一種爲祥君看取半禳災疹半
年豐 宋梅堯臣詩曾非遠城郭寂爾隔囂氛尙
有南朝樹能留北固雲川濤觀海若霜磬入江濱
衛國丹青在孤堂綠桂薰 曾公亮詩枕中雲氣
千峯近牀底松聲萬壑哀要看銀山拍天浪開窗
放入大江來 蘇軾詩江山豈不好獨游情易闌
但有相攜人何必素所歡我欲訪甘露當途無閒
官二子舊不識欣然肯聯鞍古郡山爲城層梯轉
朱闌樓臺斷崖上地窄天水寬一覽吞數州山長

江漫漫卻望大明寺惟見烟中竿很石臥庭下穹
窿如伏獬緬懷臥龍公挾策事瑯鑽一談收獅子
再說走老瞞名高有餘想事往無留觀蕭公古鐵
鑊相對空團團陂陀受百斛積雨生微瀾泗水逸
周鼎渭城辭漢盤山川失故態怪此獨能完僧繇
六化人霓衣挂冰紈隱見十二疊觀者疑夸謾破
版陸生畫青猊戲盤跚上有二天人揮手如翔鸞
筆墨雖欲盡典型垂不刊赫赫贊皇公英姿凜以
寒古柏親植挺然誰敢干枝撐雲峯裂根入石
窟蟠薤草得斷碑斬崖出金棺瘞藏豈不牢見伏

理可歎四雄皆龍虎遺跡儼未刊方其盛壯時爭
奪肯少安廢興屬造化遷逝誰控搏况彼庸妄子
而欲事所難古今共一軌後世徒辛酸聊興廣武
歎不待雍門彈 又甘露寺彈箏詩多景樓上彈
神曲欲斷哀絃再三促江妃出聽霧雨愁白波翻
空動浮玉喚取吾家雙鳳槽遣作三峽孤猿號與
君合奏芳春調啄木飛來霜樹杪 蘇轍次子瞻
韻詩去國日已遠涉江歲將闌東南富山水跬步
留清歡遷延廢行邁忽忘身在官清晨陟甘露乘
高棄征鞍超然脫闔闔穿雲撫朱欄下視萬物微

惟覺滄海寬潮來聲洶洶望極雲漫漫一一渡海
舶冉冉移檣竿水怪時出沒羣嬉類猥獮幽陰自
生火青熒復誰鑽石頭古天險憑恃分權瞞疑城
曜遠目來騎驚所觀聚散定王業成毀猶月團金
山百圍石岌岌隨濤瀾猶疑漢宮廷屹立承露盤
狂波恣吞噬萬古嗟獨完凝眸厭滉漾遶屋行盤
跚此寺歷今古遺迹皆龍鸞孔明所坐石牂懸非
人刊經霜衆草短積雨青苔寒蕭翁嗜佛法大福
將力干陂陁故鏤在甲錯蒼龍蟠衛公秉節制佛
骨埋金棺長松看百尺畫像留三歎新詩語何麗

傳讀紙遂刊嗟我本漁釣江湖心所安方爲籠中
閉仰羨天際搏遊觀惜不與賦詠嗟獨難俸祿藉
升斗齎鹽嗜鹹酸何時扁舟去不埃官長彈 蔡
肇冬日游寺詩漕河膠舟水流咽水關著鍵行者
歛大江伏槎臥長劍萬頃濕銀寒不結蓬萊諸仙
亦避寒海門冥冥凍欲折朔風吹晚雁叫空蓬卷
松杉崖石裂道人丈室最高處地爐蒲團穩 王執
我來乘閒不問道方牀相對無言說 米芾詩欲
雨氣不透庭梧有棲烟回首望北固雲藏淨名天
呼童速具輿凭高覽山川隱見豈不好開霽景固

全須臾剛風流湛湛清露圓歸塗知有伴華月上
丹淵 又詩六代蕭蕭木葉稀樓高北固落殘暉
兩州城郭青烟起千里江山白鷺飛海近雲濤驚
夜夢天低月露濕秋衣使君肯負時平樂長倒金
尊盡醉歸 沈括詩丞相高齋半草萊舊時風月
滿亭臺地從日月生時見天到江山盡處回三國
是非春夢斷六朝城闕野花開心隨潮水漫漫去
流徧烟村半日來 程俱甘露寺很石詩阿瞞長
驅厭吳壘飲馬長江投馬箠英雄祇數大耳兒
彷彿芒碭赤龍子幄中况有南陽客布衣躬耕無甌

石當時鼎足計未成聊出一奇空赤壁人隨流水
去不還臥羊頑石留空山如今留石亦煨燼山與
長江相向閒 元黃庚詩山險疑無路縈迴一逕
通鐘聲寒瀑外埕影夕陽中窗出茶烟白鑪分葑
火紅禪房遇耆舊清話數宵同 薩都刺題北固
山無傳上人小樓詩甕城春寂寂石磴草斑斑倚
杖高低月登樓遠近山百年詩句裏三國酒杯閒
自歎黃塵客來消半日閑 明高啟詩勝地江山
壯名林歲月遙剎藏京口樹鐘送海門潮月黑龍
光發天清蜃氣消何當尋很石閒坐話前朝 國

朝蔣超詩山寺蜃雲開江光放紫回斷虹埋閣道
倒景薄崇臺古戍烟初息野芳春欲來新晴繞檻
處孤客且停哀 附衛琴孃題壁詩並序妾赤城
弱質也姓衛小字琴娘子歸三月忽遭難端匝地
鼓鼙擁之北上悲門外卽是天涯慟生離更難死
別厯吳渡淮欲死無所幸而琵琶擊碎得脫虎口
潛逃破面毀形蒙垢廢跡晝乞窮途夜伏青草吞
聲背泣生恐人知托流水之飄花以來京口偶登
北固江山滿目不覺涕泣如狂憶昔爹媽空勞魂
夢良人天遠存歿何知一時顧影自憐則花容盡

毀於風塵衣衫全屬於泥塗矣此夕此心如焚如
刺回首鴈峯何年得到惟思遊魂帶血夜化啼鵓
又恐不解南歸家鄉信遠因爲短吟數絕泣書壁
間倘得仁慈德士傳其言於妾家亦足以達孤親
云爾夢裏回家拜阿娘相逢泣訴淚千行窗前綠
樹依然在那得看來不斷腸衣片鞋幫半委泥千
辛萬苦有誰知幾回僻處低頭看獨自傷心獨自
啼目斷天台旅雁長青山綠水杳茫茫不知憔悴
中途死魂夢何時返故鄉

琴娘順治三年死甘露寺楊公祠內見邑志

北固樓一作北顧樓在山上晉蔡謨建以置軍實見

南史臨川王正義傳梁書到漑傳漑子鏡鏡子蓋早
 聰慧嘗從高祖幸京口登北固樓賦詩受詔便就上
 以示漑曰蓋定是才子翻恐卿從來文章假手於蓋
 南史王勣傳為南徐州別駕從事史大同末梁武帝
 謁園陵道出朱方勣從輦側所經山川莫不顧問勣
 隨事應對咸有故實又從登北顧樓賦詩辭義清典
 帝甚嘉之 北固亭嘉定鎮江志云北固樓或名為
 亭輿地志北固山有亭屋五間蔡謨以置軍實劉牢
 之敗為其子敬宣所焚梁武帝改因為顧有登北顧
 樓詩則其名久矣

案南史臨川王正義傳蔡謨起樓是後崩壞猶有小亭武帝登者此

亭而帝與簡文帝詩皆作登
北顧樓則亭卽爲樓無疑
乾道己丑守臣待制陳

天麟重建有記嘉定甲戌待制史彌堅命郡吏搜訪

得之碑裂爲三而失其一然其後尙可讀也記曰北

固京口缺九上至梁樓壞爲亭武帝登望缺百餘年

所謂亭者邈不知何許缺五於圖經者舊云甘露卽

其地其然缺五載別嶺入江高數十丈三面臨水號

曰北固予觀京口諸山起伏繚繞出入城府率如瓜

蔓旂綴今甘露最近江屹立西鄉而山南北皆缺一

田蓋昔江道也與南史所云合矣予於連滄觀之西

爲亭面之而復其舊名則甘露之爲北固其亦安之

而不辭矣夫六朝之所以名山蓋自固耳其君臣厭厭若九泉下人寧復有遠畧茲地控楚負吳襟山帶江登高北望使人有焚龍庭空漠北之志神州陸沈殆五十年豈無忠義之士奮然自拔爲朝廷快宿憤報不共戴天之讎而乃甘心恃江爲固乎則予是亭之復不特爲登覽也舊亭在郡圃後紹熙壬子殿撰趙彥逾徙亭於山西向規制狹小至嘉泰壬戌閣學黃由增廣之

案樓與亭在山中爲最古甘露寺爲其故基宋郡守陳天麟重建樓於郡圃又

徙於山西皆非其地今並廢邑志載樓與亭於甘露寺內非是臨江亭亦建於未有寺之前多景樓卽臨

江亭址且篇什較多故皆別志

梁武帝登北顧樓詩歇駕止行警迴輿暫游識清
道巡邱壑緩步肆登陟雁行上差池羊腸料相逼
歷覽窮天步曬矚盡地域南城連地險北顧臨水
側深潭下無底高低常不測舊嶼石若構新洲花
如織 簡文帝奉和登北顧樓詩春陵佳麗地濟
水鳳皇宮况此徐方域川岳邁周禮皇情愛歷覽
遊涉擬崆峒聊驅式道候無勞襄野童霧厓開早
日晴天歇晚虹去帆入雲裏遙星出海中 宋辛
棄疾北固樓詞南鄉子何處望神州滿眼風光北固
樓千古興亡多少事悠悠不盡長江滾滾流年少

萬兜鍪坐斷東南戰未休天下英雄誰敵手曹劉
生子當如孫仲謀

唐羅隱北固亭東望寄默師詩高亭暮色中往事
更誰同水漫矜天濶山應到此窮病憐京口酒老
怯海門風惟有言堪解何由見遠公 宋辛棄疾

北固亭懷古詞 永遇樂 千古江山英雄無覓孫仲謀

處舞榭歌臺風流總被雨打風吹去斜陽草樹尋
常巷陌人道寄奴曾住想當年金戈鐵馬氣吞萬
里如虎元嘉草草封狼居胥贏得倉皇北顧四十
三年望中猶記烽火揚州路可堪回首佛狸祠下

一片神雅社鼓憑誰問廉頗老矣尙能飯否

臨江亭在山絕頂後卽其址爲多景樓

亭未詳創始
儲太祝開元

時人有詩知建
于甘露寺前矣

山房隨筆李德裕北固懷古詩曰自

有此山川於今幾太守近世二千石畢公宣化厚丞

相量納川平陽氣衝斗三賢若時雨所至躋仁壽注

畢構政事爲開元第一丞相陸象先平陽齊澣皆爲

此郡僕考之傳獨象先不聞爲潤州此恐史之佚耳

畢構中宗景龍初爲潤州有惠愛景龍末召爲御史

大夫謂政事爲景龍間第一可也

案劉禹錫有和浙
西李大夫題臨江

亭詩此詩卽題於臨江亭者墨莊漫錄尙有多景懸
窗牖句今衛公集並無此詩全唐詩僅餘近世二千

全詩久佚矣

唐儲光羲臨江亭五詠並序建業為舊都矣晉主
 來此而禮物盡備雖云在德亦云在險京口其地
 也嗚呼有邦國者有廢興焉自晉迄陳五世遞嬗
 以今懷古五篇為咏臨江亭得其勝槩寄以興言
 雖未及乎辯士亦其志也晉家南作帝京鎮北為
 關江水中分地城樓下帶山金陵事已往青蓋理
 無還落日空亭上愁看龍尾灣山橫小苑前路盡
 大江邊此地興王業無如宋主賢潮生建業水風
 散廣陵烟直望青波裏詆言別有天城頭落暮暉

城外搗秋衣江水青雲挹蘆花白雪飛南州王氣
疾東國海風微借問商歌客年年何處歸古木嘯
寒禽層城帶夕陰梁園多綠柳楚岸盡楓林山際
空爲險江流長自深平生何以恨天地本無心京
山千里過孤憤望中來江勢將天合城門向水開
落霞明楚岸夕露濕吳臺去去無相識陳皇安在
哉 劉禹錫和浙西李大夫題臨江亭依本韻詩
一辭温室樹幾見武昌柳荀謝年何少韋平望已
久種松夾石道紆組臨沙阜目覽帝王州心存股
肱守葉動驚綵翰波澄見頰首晉宋齊梁都千山

萬江口烟散隋宮出濤來海門吼風俗太伯餘衣
冠永嘉後江長天作限山固壤無朽自古稱佳麗
非賢誰奄有八元邦族盛萬石門風厚天柱揭東
溟文星照北斗高亭一騁望舉酒共爲壽因賦咏
懷詩遠寄同心友禁中晨夜直江左東西偶將手
握兵符儒腰盤貴綬頌條風有自立事言無苟農
野聞讓耕軍人不使酒用材當溝廈知道寧窺牖
誰謂青雲高鵬飛終背負

多景樓卽臨江亭故址宋熙寧間建元明以來屢修
屢燬 國朝康熙初重建今又圯癸辛雜識張于湖

知京口王宣子代之時多景樓落成于湖爲書樓扁
公庫送銀二百爲潤筆于湖卻之但需紅羅百匹於
是大宴合樂酒酣于湖製詞命諸伎合唱甚歡以紅
羅賞之墨莊漫錄鎮江府甘露寺在北固山上江山
之勝烟雲顯晦萃於日前舊有多景樓尤爲登覽之
最蓋取李贊皇題臨江亭詩有多景懸窗牖之句以
是命名樓卽臨江亭故基也裴煜守潤日有詩云登
臨每憶衛公詩多景惟於此處宜海岸千艘浮若芥
邦人萬室緯如棋江山氣象回環見宇宙端倪指點
知禪老莫辭勤候迓使君官滿有歸期自經兵火樓

遂廢近雖稍復營繕而樓半已侵削殊可惜也入蜀
記登多景樓樓亦非故址主僧化昭所築下臨大江
淮南草木可數登覽之勝實過於舊山房隨筆辛稼
軒守京口時大雪帥僚佐登多景樓劉改之敝衣曳
履而前辛令賦雪以難字爲韻卽吟云功名有分平
吳易貧賤無交訪戴難

宋陳天麟重建多景樓記甘露寺多景樓不知其
所始與所以名寺興于唐繇李衛公以後登北固
山題詠者皆不及多景則樓當建于本朝無疑獨
不知其歲月初爲樓誰也今樓中石刻有米元章

詩且云禪師有建樓意故書禪師不載何名當元
章時尙未樓東坡先生熙寧甲寅歲自杭過潤與
孫巨源王正仲會于此賦江天斜照傳于樂府不
知與元章賦詩時歲月相去幾何豈有之而中廢
耶或云熙寧中主僧應夫爲之是皆不可知也考
丹陽類集寺凡樓觀四曰雨華清暉凝虛多景其
一也劫火之餘蹤跡難辨近歲有言于太守方公
滋者指優婆塞之居爲舊址公曰以其所名之啟
窗東鄉僅得汝圖焦山石公數山長江一曲則景
固未嘗多也謂此爲是是又未可知也下臨峭壁

岸稍稍壞難于立屋主僧化昭危之乃相地于寢
堂之西爲屋五楹榜以元章舊跡登者以爲盡得
江山之勝蓋東瞰海門西望浮玉江流縈帶海潮
騰迅而雜揚城堞浮圖陳于几席之外斷山零落
出沒于烟雲杳靄之間至天晴日明一日千里使
人慨然則是樓也安知其非故處不然亦足以實
其名矣京口氣象雄偉殆甲東南北固瀕江而山
聳峙斗絕在京口爲最勝而今之建樓之地又爲
北固勝處昭蜀人也胸中不碌碌故于是舉爲宜
而爲之書乾道六年歲在庚寅三月初五日

明潘
桂

重修樓記其畧云樓建宋熙寧間至國朝旅廢旅
建宏治癸酉夏燬于大雨中樂安李二水郡伯守
潤之三年捐俸更新額則元宰太史重書
庀材鳩工則縣尉鄭鳴時之勞可紀也

宋曾鞏詩欲收佳景此樓中徙倚闌干四望通雲
亂水光浮紫翠天含山氣入青紅一川鐘唄淮南
月萬里帆檣海外風老去衣衿塵土在祇將心目

羨冥鴻 曾鞏詩屈曲危樓倚半空詩情無限景
無窮江聲逆送潮來往山色有無烟淡濃風月滿
樓供一醉乾坤萬里豁雙瞳片雲迴逐斜陽去知
落淮山第幾重 米芾詩華嚴兜率梵天遊天下
江山第一樓坐想明廷萬靈接莫談仙嶠六鼇愁

版開猛氣吞狂象石記雄心觸不周謝客平生追

壯觀豈知席上極滄洲 晁端友詩樓上無窮景

樓前正落暉開軒跨寥廓覽物極纖微雲破孤峯

出潮平兩槩飛東溟看月上西渡認僧歸木落吳

天遠江寒越舶稀魚龍隣海窟雞犬隔淮圻草色

迷千古波聲蕩四圍廢興懷霸業融結想天機浩

浩羣流會沈沈百怪依登臨真壯觀回首重歔歔

楊蟠詩滄江萬頃對朱闌白鳥羣飛去復還雲

捧樓臺出天上風飄鐘磬落人間銀河倒瀉分雙

月錦水西來繞幾山今古冥冥難再問且持玉笋

慰愁顏 劉過詩金焦兩山相對起不盡中流大
江水一樓坐斷天中央收拾淮南數千里西風把
酒閑來游木葉漸脫人間秋關河景物異南北神
京不見雙淚流君不見王勃詞華能蓋世當時未
遇庸人耳翩然落托豫章游滕王閣中悲帝子又
不見李白才思真天人時人不省爲謫仙一朝放
跡金陵去鳳凰臺上望長安我今四海游將徧東
厯蘇杭西漢沔第一江山最上頭天地無人獨登
覽樓高意遠愁緒多樓乎樓乎奈爾何安得李白
與王勃名與此樓長突兀

岳珂程史廬陵劉改之
以詩鳴開禧乙丑過京

口余爲饑幕庾吏因識焉改之多景樓一篇章以
初爲之大書詞翰俱卓犖可喜囑余爲刻樓上會
兵事不暇也 又柴望詩早被垂楊繫去舟五更潮落

大江頭關河北望幾千里淮海南來第一樓昔日
最多風景處今人偏動黍禾愁烟沙瀕洞翻蘋末
欲擬西風問仲謀 趙師秀詩落日欄干與雁平
往來疑有舊英靈潮生海口微茫白麥秀淮南迤
邐青遠賈泊舟趨地利老僧指甕說州形殘風忽
送吹營角聲引邊愁不可聽 高翥詩一帶青山
欲盡頭精藍深處著危樓下無餘地容車馬上有
重欄接斗牛鴉落野田長趁晚雁沉烟浦最宜秋

江南好景從來少北望空多故國愁 鄭思肖詩

英雄登覽處一劍獨來遊男子抱奇氣中原入遠

謀江分淮浙土天濶楚吳秋試望斜陽外誰寬西

顧憂 蘇軾潤州多景樓與孫巨源相遇詞子採桑

多情多感仍多病多景樓中尊酒相逢樂事回頭

一笑空停盃且聽琵琶語細撚輕攏醉臉春融斜

照江天一抹紅 李漢詞乳燕飛 笛叫東風起弄尊

前楊花小扇燕毛初紫萬點淮峯孤角外驚下斜

陽似綺又婉婉一番春意歌舞相繆愁自猛捲長

波一洗空人世間熱我醉時耳綠蕪冷葉瓜州市

最憐余洞簫聲起闌干獨倚落落東南牆一角誰
護山河萬里人在玉關歸未老矣青山燈火客撫
佳期漫洒新亭淚歌嗚咽事如水 陳亮詞 念奴
嬌

危樓還望嘆此意今古幾人曾會鬼設神施渾認
作天限南疆北界一水橫陳連岡三面做出爭雄
勢六朝何事只成門戶私計因笑王謝諸人登高
懷遠也學英雄涕憑卻江山管不到河洛腥羶無
際正好長驅不須反顧尋取中流誓小兒破賊勢
成寧問疆對 陸游詞 水調
歌頭 江左占形勝最數古
徐州連山如畫佳處縹緲著危樓鼓角臨風悲壯

烽火連空明滅往事憶孫劉千里曜戈甲萬竈宿

貔貅露霑草風落木歲方秋使君宏放談笑洗盡

古今愁不見襄陽登覽磨滅游人無數遺恨黯難

收叔子獨千載名與漢江流

案至順志陸放翁登多景樓作此詞張孝

祥書刻崖石

元楊維禎詩極目心情獨倚樓荻花楓

葉滿江秋地雄吳楚東南會水接荆揚上下流鐵

甕百年春雨夢銅駝萬里夕陽愁西風歷歷來征

鴈又帶邊聲過石頭 明釋宗泐詩水際一峯出

危樓倚沈寥烟雲連北土風物見南朝山勢臨淮

盡江聲入海遙偶來閒眺客倚檻興偏饒 國朝

孫枝蔚多景樓送吳園次之任湖州詩出城送客
共躋攀萬里烟雲杳靄閒天下江山如此少古來
冠蓋幾人閒潮頭日午添帆影樓角風微散酒顏
五馬臨行重回首故知魚鳥最相關

海嶽庵在山南麓宋米芾以研山與蘇仲恭家易甘
露寺園地營此庵自題曰天開海嶽見陸游避暑漫
鈔蔡條鐵圍山叢談諸書後燬岳珂卽其址闢爲研
山園馮多福有記明宣德間僧玆理重建海嶽庵見
邑志萬厯中邑令趙昌期重修並建寶晉齋淨名齋
於內昌期有記陳元素書 國朝康熙中 賜額寶

晉遺蹤乾隆癸未邑令貴中孚改建寶晉書院內藏
寶晉齋硯寶晉書院志康熙中何將軍天培治園亭
海嶽庵側掘地得硯後藏於書院研長七寸廣四寸
高二寸許面爲圓圖受墨襄陽自爲銘曰彼美蘭亭
貽自右軍展卷悠然如行山陰江左風流萬古彌馨
圖之於硯臨池生雲其直千緡寧易鵝羣硯陰有寶
晉齋三大字亦襄陽筆四圍虛其一其前左右三面
刻蘭亭圖其後下虛上端鐫雲林主藏四篆字 研
山圖並銘勒石庵壁銘曰五色水浮崑崙潭在頂出
黑雲挂龍怪燦電痕極變化闔道門跋云右研山銘

先臣芾真蹟臣米友仁鑒定恭跋

案米老研山有二一被薛紹彭易去

詳見輟耕錄一與蘇仲恭家易宅基見鐵圍山叢談諸書此圖與輟耕錄中所繪圖同即薛紹彭易去之

石也其下刻鐵圍山叢談一則乃誤作易宅之研山矣詳見後翁方綱研山考

蘇米二公石刻小像亦在壁間蘇公像公自贊云心是已灰之

木身如不繫之舟問汝平生事業黃州儋州惠州

案此

係蘇公自題金山畫像贊米公像其子友仁贊云嚴君海嶽戲自

寫像無任臨移妙出心匠形容浩然之氣為一時之

所敬仰經綸之志眾歎曾未得施青史之名高出古

今之上像皆趙昌期摹刻銘則董其昌重書 洞天

一品石舊在寶晉齋今亡

米芾淨名齋記江山萬里十郡百邑繞山爲城臨
流爲隍者惟吾丹徒重樓參差巧若圖刊雲霞出
沒而天光不夜高三景小萬有者惟吾甘露東北
極海野西南朝數山者謂之多景然臺殿羽張寶
堵中盤五州之後與西爲阻若夫東眺京峴西極
棲霞平林坡陀淮海之域遠岫隱見滌泗之封洪
流東摺白沙之雲濤如線大磧南絕中冷之廬巖
蔚起筆山之隙岩堯雙聳五州之外嶒嶸千疊黃
鶴寶勢珠捧於豆長山異氣龍轟於天晨曦垂虹
時媚於左長庚織月每華於右千林霜落萬嶺雪

身... 卷一
三
饒春羣於西乳而秋留於南巖者惟吾淨名天下
名山水固多矣在東南則杭以湖山障其境洪以
西山彌其望潭以岳麓周其區皆一山也而望兩
邦逮穹荒迢遞發周羽皇之歎者有之矣百川滙
流而赴北旣濬旣淵亦沃亦蕩也多山引嶺而趨
東且列且驅各羣各醜也吾齋在萬井之中半天
之上乃右卷而一揖焉此其所以得山川之多而
甲天下之勝也至若水天鑑湛而博望弭槎葭葦
榔鳴而簷何投餌洪鐘動而飛仙下疾颺舉而連
山湧地祇聽法水怪効珍或鵬雲壓山海氣吞野

織雲漏月清籟韻松兜羅密而靈光生陰霧合而
大霆走瑰奇忽恍又不可得而詳言之襄陽米元
章將卜老丹徒而仲宜長老以道相契會內閣蔣
公穎叔以詩寄云京塵汨沒興如何歸棹翩翩返
薜蘿盡室生涯寄京口滿牀圖籍鑠巖阿六朝人
物東流盡千古江山北固多爲借文殊方丈地中
閒容取病維摩於是宜公以其末句命名余居亦
冀公之與余同此樂也自筆藏爲圖念老矣無佳
句壓其勝後之登吾齋覽吾勝者得不爲吾賦乎
馮多福研山園記蔡氏叢談載米南宮以研山

於蘇學士家易甘露寺地以爲宅好事者多傳道
之余思欲一至其處且觀所謂海嶽庵者米氏已
不復存總領岳公得之爲崇臺別墅公好古博雅
晉宋而下書法名蹟寶珍所藏而於南宮翰墨尤
爲愛玩悉摘南宮詩中語名其勝概之處前直門
街堂曰宜之便坐曰抱雲以爲賓至稅駕之地右
登重岡亭曰陟巘祠像南宮扁曰英光西曰小萬
有翼出塵表東曰彤霞谷亭曰春漪冠山爲堂逸
思杳然大書其扁曰鵬雲萬里之樓盡模所藏眞
蹟憑高賦詠樓曰清吟堂曰二妙亭以植叢桂曰

灑碧又以會衆芳曰靜香得南宮之故石一品迂
步山房室曰暎嵐灑墨臨流池曰滌硯盡得登覽
之勝總名其園曰研山酌酒適意撫今懷古卽物
寓景山川草木皆入題詠公文彩振耀一世篇章
脫手爭傳施之有政談笑辨治當調度搶攘羽檄
旁午應酬刻決動中機會以其餘才餘智興舊起
廢自我作新人汲汲已獨裕如茲園之成足以觀
政非徒侈晏遊周覽之適也夫舉世所寶不必私
爲已有寓意於物固以適意爲悅且南宮研山所
藏而歸之蘇氏奇寶在天地間固非我之所得私

以一拳石之多而易數畝之園其細大若不侔然
已大而物小泰山之重可使輕於鴻毛齊萬物於

一指則晤言一室之內仰觀宇宙之大

其一此地致也

以晉唐而宋皆名流所居南宮營之以海嶽名庵
復百餘年公始大復其舊岳爲公姓天設而地藏
之以遺其爾乎予何幸寓目其間公俾記其顛末
不敢以固陋辭于是乎書 明趙昌期重修海嶽

庵記往余授經提州陳眉公寫雲山扇頭贈余曰
元章以研山易蘇氏宅題曰海嶽庵庵中有淨名
寶晉二齋所藏晉唐墨跡法書名畫無數而公曰

嘯詠其中子瞻非入山訪了元則渡江訪元章爲
竟日留連乃去此庵在北固山下幸一訪之余時
爲經生僕僕未有暇然未嘗不往來胸中癸丑由
婺源轉令京口間嘗一登北固煙濤萬頃差洗二
十年塵土俗情旋訪海嶽庵故蹟久已竄爲僧寮
獨題額尙存而公之像已化爲子虛矣因又訪其
遺像於陳處士從訓家像則元章所自寫贊則其
子元暉友仁所手書此石雖不盈尺而米氏父子
之風流文采如在目前公得無於趙生有夙緣乎
于是捐俸寺僧葺草易蠹前建堂三楹謁董元宰

京口山志卷一
三三
太史署書海嶽庵陳眉公署書淨名齋志公舊也
以蘇子瞻先生並祀志公友也以敷文學士友仁
配食志公之家學也當元豐熙寧間京口一時頓
有二偉人非膽蓋九州則日射七曜無論文章氣
義卽伉浪而爲諧謔遊戲而爲翰墨短楮殘煤往
往有摩雲霄走雹電之勢上至天子下至山僧逸
民遠至獠洞蠻鄉椎髻鳩舌之夷虜莫不知有兩
公友仁又以敷文學士召入祕殿思陵至與之評
賞古蹟自子瞻以及父書皆有題識元章名位雖
遜子瞻而遭時遇主結翰墨之緣雖蘇氏邁過不

能望公之友仁也自兩公騎箕以後北轅南徙重
兵宿將半聚京口北固江山往往爲鼓鼙劒戟之
場腥風吹人而風流頓盡矣今世際清明四方高
人韻士登臨吟賞尙有追訪蘇米遺蹟於荒烟衰
草間者而余幸以公餘之暇得爲兩公受役子瞻
爲元章前輩中之龍象友仁爲元章子弟之醍醐
米氏父子有知當爲子瞻虛席以待而子瞻度且
笑而點首恨把臂入林之晚也同堂共祀誰曰不
宜庵成著爲祀典像勿袍笏祭勿刑牲瓣香而外
則有戴公斗酒雙柑郭璞墓前中泠水在 國朝

翁方綱寶晉齋研山考朱竹垞集中之米家研山
非米老易甘露寺基之研山也昔江南李後主買
一研山徑長尺許前聳三十六峯皆大如手指中
隔絕濶合計前後共五十五峯東南有飛磴橫出
方平可二寸許鑿以爲研其左右引兩阜坡陀而
鑿研處在其中央江南破流轉數士人家爲米老
元章所得元章刻其下述所由來甚詳及米歸丹
陽老謀菟裘而蘇仲恭學士之弟者才翁孫也號
稱好事有甘露寺下並江一古基多羣木蓋晉唐
人所居時米欲得宅而蘇覲得研于是王彥昭侍

郎與登北固其爲之和會蘇米竟相易米居號海
嶽庵者是也研山歸蘇氏其後入宋禁中此事見
于避暑漫鈔鐵圍山叢談秋宜集岳氏法書贊語
皆相合觀其稱米得宅而蘇得研則是中間鑿爲
研無疑也今所見竹垞家研山則中間初無鑿爲
研處且前後僅六峯無所謂三十六峯合前後五
十五峯者且又無所謂元章刻于其下詳述本末
者其非易海嶽庵之石明矣惟以陶南村輟耕錄
證之則圖與說悉合而輟耕錄所載元章自作記
初無易海嶽庵之說其詞曰此南唐寶石久爲吾

齋研山今被道祖易去中美舊有詩云研山不易
見移得小翠峯潤色裛書几隱約烟朦朧巉巖白
有古獨立高崧龍安知無雲霞造化與天通立壁
照春堊當有千丈松崎嶇浮波瀾偃仰蟠蛟龍蕭
蕭生風雨儼若山林中塵夢忽不到觸目萬慮空
公家富奇石不許常人同研山出層碧崢嶸實天
工淋漓山上泉滴瀝助毫端揮成驚世文立意皆
逢原江南秋色起風遠洞庭寬往往入佳趣揮灑
出妙言願公珍此石莫與衆物肩何必嵩少隱可
藏爲地仙今每誦此詩必懷此石余亦有作云研

山不復見哦詩徒歎息惟有玉蟾蜍向余頻淚滴
此石一入渠手不得再見每同友往觀亦不出示
紹彭公眞忍人也余今筆想成圖彷彿在目從此
吾齋秀氣猶不復泯矣崇寧元年八月望米芾書
余二十年前嘉興吳仲圭爲畫圖錢唐吳孟思書
文後攜至吳興燬于兵偶因清暇默懷往事漫記
于此此陶南村所記與所繪圖並驗之則竹垞集
註所引歸田集語無不符合曰此石流傳爲秀水
朱文恪公所藏長七寸八分高下凡六峯其右之
第一峯截然突起微類筍形頂有窮穴曰玉筍峯

第二峯曰方壇下瘦上廣方平瑩潔故壇名焉一
小峯附其下中一峯高四寸餘聳峙峭拔勢若卷
旗曰華蓋峯稍下爲月崑圓竇相通似人力而實
非人力也其左之第一峯斜連坡陀後漫前俯第
二峯隆崇離立高不及三寸有數十仞之象亦有
小竇嵌空其第三峯則與華蓋峯相連而岡阜樸
野曰翠巒者是也龍池在其下滴水少許經旬不
竭下洞在方壇之趾上洞據華蓋之麓米老云下
洞三折可通上洞予嘗神游其間頃以物探之則
格而不通注以水則流出下洞知果曲折相通也

其色黑而有光巒岬峯峒無斧鑿痕望之蒼翠欲滴疑有草樹翳鬱米老所謂不假雕琢渾然天成者也按此與輟耕錄之文極其肖矣予自壬辰歲門人謝蘊山出守鎮江託其訪此石並覓好手與海嶽庵其寫爲圖訖未得遂後晤吳門陸謹庭知有所藏邵瓜疇海嶽庵圖諾爲摹本至今年春謹庭以摹本寄來適友人又以孫雪居所臨海嶽庵卷來予倩兩峯羅君並摹爲軸而恰得見此研山亦一異也予乃合諸書攷之始知研山有二皆出於南唐歸於米老寶晉齋而一爲薛紹彭道祖所

易一爲蘇仲恭之弟以庵基相易二石判然不可強合是以鐵圍山叢談云米老有二石是其明徵也其與蘇氏相易者歸宋內府後又歸于天台戴運使覺民又歸元大都太乙崇福宮張真人今不知何存矣其與薛氏相易者至前明歸新安許文穆又歸秀水朱文恪 國朝康熙戊辰猶在朱氏新城王漁洋觀于古藤書屋爲賦七言古詩附以絕句寄竹垞謂儻有好手仿梅道人重作一圖當以吾輩唱和詩附後蓋此圖亦不果作然吳仲圭爲圖者實卽此石居易錄亦云有寶晉齋二篆字

及米氏印信漁洋此語不誤也惟香祖筆記云南
唐研山歸米元章米與蘇仲恭家易北固甘露寺
地予從朱檢討京邸見之既爲作長句又題一絕
云南唐寶石劫灰餘長與幽人伴著書青峭數峯
無恙在不須淚滴玉蟾蜍後二年復入京師已爲
崑山徐司寇購去今又十五年不知尙藏徐氏否
按漁洋七言古詩並無易海嶽庵語卽其絕句云
青峭數峯用南唐書語亦正切此高下六峯而非
所謂五十五峯之石明矣所謂淚滴蟾蜍者本于
米詩亦因此石龍池洞竇而云爾故其詩又有滴

瀝助毫端揮灑出妙言之句皆因研山之滴水言之非指石中鑿研而言是輟耕錄及漁洋所稱皆確是此石無疑而何以漁洋誤牽合甘露寺易屋基之事蓋未詳攷米氏有二石偶見宋人說部輒以彼石附會此石致令後人相傳此卽甘露相易之石深可笑也漁洋尙不足怪而竹垞精于攷據其家世相傳之奇石何至漫不加詳而其詩亦云以之易園廬勝絕臨江關則是竹垞亦不知米氏有二石若非今日余爲剖析則必有因諸書不相符合而疑爲贗者予又嘗見米老研山詩帖云山

研雲時抱奩書客不傳北窗多異氣正對淨名天
後有岳倦翁贊云壺嶺九華營是一枝則是彼石
而非此石是山研亦可名研山而此研山不得名
爲山研尤當分別者也然余幸得借留蘇米齋旬
日爲之攷辨俾觀者得釋然不惑又倩好手補圖
以補仲圭之蹟又邀諸君子爲詩以踵王朱諸前
輩遺韻米老有知當亦擊節快賞於九霞空洞中
耳乾隆庚戌秋日

王士正海嶽庵拜蘇米二公像詩前輩風流地爲
庵易研山淨名猶故蹟摩衲識清顏江月長如此

高人去不還惟應餘翰墨終古照人間 又爲朱
竹垞賦海嶽庵研山歌海嶽研山不可見人間空
說研山圖研山之圖亦遭燬雲烟過眼徒嗟呼宣
和良嶽已塵劫矧乃片石輕鎚銖永嘉流落幾百
載昭陵玉匣今亦無詎知神物有呵護星芒夜隕
三天都舊藏許文穆家太平宰相盛文物寶此何啻千璠
璣古藤書屋花未放主人愛客招吾徒眼中笑兀
忽見此乍疑几席羅衡巫壺中九華那足擬仇池
枉用誇髯蘇三茅地肺互鉤帶二華雲氣相縈紆
蛟龍屈蟠待雷雨仙靈髣髴迴駟車華蓋一峯獨

秀拔宛插玉笏翹犀株翠巒玉笋左右列睢尻股
腳相欹扶上洞下洞閼曲折潛通小有涵空虛龍
池幽窈驗雨候頗疑中有驪龍珠峯獨者蜀屬者
嶧上泉有埒下有澗坐客摩挲三歎息蒼然古色
生眉鬚海嶽之庵書畫舫幾伴此老浮江湖巧偷
豪奪歷千載閱盡春秋如螻蛄翰林好事過顛米
日餐蛾綠忘饑劬滄江夜夜虹貫月莫令光怪驚
菰蘆 周篔朱彝尊研山聯句詩有石產京峴近
在龍目灣周外史火正後愛好怡情顏朱稜分巖
穴岫垢洗黃朱斑周俄看千仞峯勢拔方寸間朱

亭亭華蓋倚隱隱卻月彎周岡巒各殊狀一一相

迴環朱其下陷深窪彷彿龍所寰周有時風雨至

大小青來還朱玩物不在多對此形神嫻周以之

易園廬勝絕臨江關朱觀其賦詩意猶自心偏慳

周年深異顯晦幸未委榛菅朱君家藏四葉冷光

古益豔周且以娛寂寞豈復論銖鍒朱舉世重黃

白熟營几上山周好語玉蟾蜍勿用清淚潛朱

府治宋祥符圖經在北固山上內有衛公堂連滄觀

乃一郡絕勝處洪适得江樓蘇舜欽蘇頌寶墨亭俱有詩見後新

唐書裴寬傳潤州刺史韋誥休日登樓見人於後圃

有所瘞藏者問諸吏曰參軍裴寬居也與偕來誚問
狀答曰寬義不以包苴污家適有以鹿來餉致而去
不敢自欺故瘞之誚嗟異引爲按察判官妻以女入
蜀記郡集衛公堂後圃比舊惟增染香亭明萬歷十
二年知府吳撫謙於治後附城築垣二十一年增建
虛臺一與甘露寺對見郡邑志

宋沈邁望海樓詩北固峩峩鐵甕完京江浩浩海
門連鵬搏羊角來天上鼇戴方壺獻几前西府旌
旗猶壯觀南朝宮殿盡蒼烟登臨不用成悲感自
得開懷一曠然 又沈括詩雨聲林外盡秋色望

中添落日挂疎柳遠江橫暮檐好風疑有意墮葉
故爭簾爲問樓中客胡爲盡日淹 又米芾詩雲

間鐵甕近青天縹緲飛樓百尺連三峽江聲流筆
底六朝山影落樽前幾番畫角催紅日無事滄洲
起白烟忽憶賞心何處是春風秋月兩茫然 辛

棄疾京口病起登連滄觀詞瑞鷓鴣聲名少日畏人

知老去行藏與願違小草舊曾呼遠志故人今又
寄當歸何人可覓安心法有客來觀杜德機卻笑
使君那得似清江萬頃白鷗飛 蘇舜欽寶墨亭
詩並序丹陽子高得逸少瘞鶴銘於焦山之下及

梁唐諸賢四石刻共作一亭以寶墨名之集賢伯
鎮爲之作記遠來求詩因作長句以寄山陰不見
換鷺經京口今傳瘞鶴銘瀟灑集仙來作記風流
太守爲開亭兩篇玉蕊塵初滌四體銀鈎蘇尚青
我久臨池無所得願觀遺法快沈冥 蘇頌潤州

錢祠部新建寶墨亭詩王蕭書迹衛公詩流落江
南世少知古寺購尋遺刻在新亭龕置斷珉奇模
傳遂比黃庭字埋沒非同石鼓碑墨藪書評多逸

事何妨揮翰與題辭

案錢彥遠字子高慶歷中以祠部郎知潤州四石刻一瘞

鶴銘一陀羅尼經幢唐王奐之集宗祖右軍將軍書宋趙潛題僧如玉瘞鶴銘辨証後有云師示以

瘞鶴銘辨因以所得陀羅尼經右軍書遺之郡志有墨寶二卽此帖之在郡治者與華陽真逸書也又通志金石畧王奂之佛頂心陀羅尼經在潤州一李德裕沈傳師玉蕊倡和詩其一當是通志所載梁蕭綸招隱刹銘也

明李一陽府治後垣記吾潤有城莫詳所始自吳大帝築子城控扼南北號曰鐵甕規制宏壯爲建業藩籬迨今則已湮沒於荒邱斷隴荆棘草莽間莫可問矣高皇帝師入建康命泗國耿武莊守潤益樹支輔以遏東兵武莊請因六朝舊城稍斂之贅以塼石自是雉堞巍然稱江南最乃府治獨當城東北世廟末島夷亂海上俄突至潤當事者計

無所出倉卒驅丁壯築斷北固嶺距城自守賴國
家威靈旋遁去得無事癸未夏臨川吳公自南北
部尙書省郎天子佩以二千石印綬來守潤甫入
境環城四顧嘆曰王公設險以守國自古記之矧
潤當南北衝途襟帶江海天下一日有事必先諸
郡受兵奈何使城無屏蔽府治孤危爲異日患且
坐令僉人子日夕從高墉窺我虛實無忌憚心卽
日上書部使者請得出帑金築內垣以預桑土部
使者大是其議公遂檢帑中兵費及四府協濟餘
貲約可以千金召工指授擘畫環府治後因故城

垣築石垣起東西角樓計長二百一十丈有奇高可丈許左右構鈴閣如角樓制扁其東日日精西日月華諸守陴邏卒往來行夾道中外有所憑以拒敵而內不得以窺府治遠近望之若重城然公名爲謙字汝亨登隆慶辛未進士

丹陽宮卽府治陸游南唐書昇元二年讓皇屢請徙居戊午改潤州州治爲丹陽宮以平章事李建勳充迎奉讓皇使甲寅徙讓皇居丹陽宮

宋征西將軍蕭思話墓江南通志在鎮江府北京口

案京口在甘露寺側詳見九卷

南史蕭思話傳長子惠開了父艱居

喪有孝性家素事佛凡爲父起四寺南岡下名曰禪
陶寺曲阿舊鄉名曰禪鄉寺京口墓亭名曰禪亭寺
所封封陽縣名曰禪封寺

宋屯田郎中柳永墓府志在土山下避暑錄話永死
旅殯潤州僧寺王和甫爲守時求其後不得乃爲出

錢葬之

案柳耆卿墓今湮然葬於京口無疑也
玉漁洋真州雜詩謂墓在儀徵失考

唐北固兵場方輿紀要上元初劉展作亂江淮都統
李岷屯京口闕北固爲兵場插木以塞江口

明北固寨府志甲申九月援勦副總兵官洪日昇統
福兵三千立木寨駐北固山

國朝鎮海軍營在山下順治十二年海警以都統石

廷柱為鎮海大將軍帥八旗官兵駐防京口屯演武

場十六年劉之源為大將軍移屯城內康熙十三年以和碩額駙石華

善為安南將軍統八旗官兵屯演武場郡民因城內

增設安南軍營公請捐建營房二千餘間於北固山西屯駐設有重鎮又提督營順治十四

年以提督漢兵昂邦章京管効忠鎮京口屯演武場

以上二營臺灣平後俱撤

八旗教場在山下即明教場址

礮臺在山下道光二十四年建二十二年英夷犯京口事平自東馬頭至

此俱設礮

京口山水志卷一

京口山水志卷一

四

京口山水志卷二

丹徒楊棨撰

丹徒山

金山在城西七里大江中初名氏父山元和郡縣志晉

破苻堅獲氏賊置此山下因以為名今土俗亦謂之金

山南唐僧應之頭陀巖記金山昔名浮玉因裴頭陀江

際獲金貞元二十一年節帥李錡奏聞賜名金山圖經

寰宇記九域志並同

案元和去貞元甚近錡奏聞賜名李吉甫豈不知之何以云土俗謂

之金山且唐書韓滉傳有總兵臨金山寺語大歷建中

間已有金山之名不自貞元始三山志郡邑志則謂梁

書天監四年帝臨金山修水陸會金山之名見於六朝

考梁書南史皆無此語是年武帝亦並未至京口綱目

天監九年書梁主視學發明云時梁主清明尙未溺於
寂滅之學天監四年必無金山修水陸會事可知從元
和志說爲是華嚴經云閻浮提外香水海中有七金山
繞須彌盧因海水滌涸播溢無定設七金山以鎮之此
山在大江之中與海中無異梵語須彌華言妙高故曰
金山而以妙高名峯又道經云上仙居浮玉山朝上帝
則山自浮去金山一名伏牛山藝文類聚山謙之南徐
浮玉取名略同

州記蒜山北江中有伏牛山新唐書韓滉傳陳少游在
揚州以甲士三千臨江大閱滉亦總兵臨金山寺與少
游會又周寶傳寶與高駢有隙駢遣人請會金山謀執
寶寶詬絕之宋史韓世忠傳帝如浙東世忠至行在奏
畱江上截金人會上元節就秀州張燈高會忽引兵趨
鎮江兀朮遣使通問約日大戰戰將十合梁夫人親執

桴鼓金兵終不得渡盡歸所掠假道不聽請以名馬獻
又不聽相持黃天蕩者四十八日以海艦進泊金山下
預以鐵綆貫大鈎授驍健者明旦敵舟謀而前世忠分
海舟爲兩道出其背每縋一縋則曳一舟沈之兀朮窮
蹙一夕鑿渠三十里遁去初世忠收餘軍還鎮江謂敵
至必登金山廟觀我虛實遣兵百人伏廟中百人伏岸
許約聞鼓聲岸兵先入廟兵合擊之金人果五騎闖入
廟兵喜先鼓而出僅得二人逸其三中有絳袍玉帶旣
墜而復馳者詰之乃兀朮也又虞允文傳金主亮至瓜
州允文命戰士踏車船中流上下三周金山回轉如飛

敵相顧驚愕會亮爲其下所殺敵退又李全傳全游金山作佛事以薦國殤知鎮江府喬行簡方舟逆之大合樂以饗之總領程覃迭爲主禮務誇北人以繁盛全歸語其徒曰江南佳麗無比須與若等一到始造舳艫舟爭舟楫之利焉明史楊文驄傳文驄以兵部郎中監軍京口以金山距大江中控制南北請築城以資守禦從之山之巔曰妙高峯一名金鼇峯或曰皆一山之總名日照巖在山東北下有朝陽洞一名觀音洞 頭陀巖在山西北下有裴公洞以唐裴頭陀得名 妙空巖在朝陽洞右 有宣德八年工部侍郎周忱撰妙空巖記李時勉書 金玉巖卽山

東一帶石壁初日照耀爛若金碧故名 龍洞在山東

北 飛雲洞在山北 金鼇嶺在山西北七峯閣下

門限石在山正南水底通南岸 二島分峙山之左右

入蜀記登雄跨閣觀二島左曰鶻山舊傳有棲鶻今無

有右曰雲根島皆特起不附山俗謂之郭璞墓雲根島

一稱三島又名石簿方輿勝覽金山前有三島號石簿

俗稱郭璞墓大水不能沒

案太平御覽南徐州記曰暨陽縣北九里馬鞍山東有黃

山郭璞葬所晉書郭璞傳璞以母憂去職卜葬地於暨陽去水百步許人以近水為言璞曰當即為陸矣其後沙漲去墓數十里皆為桑田郭宏農集有題墓詩曰北阜烈烈巨海混混纒纒三墳唯母與昆璞蓋隨其母與昆俱葬江陰縣北近海後人因之誤為揚子江中云入蜀記曰俗謂郭璞墓方輿勝覽曰俗稱郭璞墓明知其

誤以訛傳訛也宋劉克莊明沈周及日本使臣中心叟詩認真嘲諷便迂故皆不錄龍門一名

龍渦在石簿前其下為中洽泉詳見十卷自康熙甲子

聖祖南巡山中建有行宮先後駐蹕者六乾隆辛未

至甲辰

高宗亦六次臨幸俱有御製詩文御書聯扁

唐竇庠金山行西江中灩波四截湧出一峯青巒

嶠外如削成中缺裂陽氣發生陰氣結是時炎天

五六月上有火雲下冰雪夜色晨光相蕩沃積梁

流霞滿坑谷龍泓徹底沙布金鳥道插雲梯瑩玉

架險凌虛隨指顧榱桷璽瓏皆固護幹流倒景不

可窺萬仞千崖生跬步日華曠曠上金榜丹楹碧
砌真珠網此時天海風浪清吳楚萬家皆在掌瓊
樓菌閣分明媚曲檻迴軒深且邃海鳥夜上珊瑚
枝江花時落琉璃地有時倒影沈江底萬狀分明
光似洗不知水上有樓臺卻就波間看閉啟舟人
忘卻江水深水神誤到人間世歛然風生波出沒
濯瀟晶瑩無定物居人相顧非人間如到日宮經
月窟信知靈境長有靈住者不得無仙骨三神山
上蓬萊宮徒有丹青人未逢何如此處靈山宅清
涼不與囂塵隔曾到金山處處行夢魂長羨金山

客 又詩一點青螺白浪中全依水府與天通晴
江萬里雲飛盡鼇背參差日氣紅 宋孝宗詩峯
然天立鎮中流雄跨東南二百州武士每登須破
膽毋勞平地戰貔貅 王安石詩北楫南檣泊四
垂共憐金碧爛參差孤根萬丈滄溟底除卻蛟龍
總不知 又次平甫韻詩天末海門橫北固煙中
沙岸似西興已無船舫猶聞笛遠有樓臺只見燈
山月入松金破碎江風吹水雪崩騰飄然欲作乘
槎計一到扶桑恨未能 楊蟠陪潤州裴如晦學
士游金山詩世上蓬萊第幾洲長雲漠漠鳥飛愁

海山亂點當軒出江水中分繞檻流天遠樓臺橫
北固夜深燈火見揚州迴船卻望金陵月獨倚牙
旗坐浪頭 蘇軾大風留金山兩日詩壇上一鈴
獨自語明日顛風當斷渡朝來白浪打蒼厓倒射
軒窗作飛雨龍驤萬斛不敢過漁艇一葉從掀舞
細思城市有底忙卻笑蛟龍爲誰怒無事久留童
僕怪此風聊得妻孥許瀟山道人獨何事半夜不
眠聽粥鼓 又金山夢中作江東賈客木棉裘會
散金山月滿樓半夜潮來風又急臥吹簫管到揚
州 秦觀宿金山詩山南山北江水流半空金碧

隨雲浮我來仍值風日好十月未寒如晚秋山僧
引客尋蒼翠歷盡參差到平地萬里風來拂骨清
卻憶人間如夢寐夜深無風月入扉相對老人如
槁枝流水與天爭入海其笑此心誰得知下山卻
向中冷望翻憶當時在屏障老母思兒且欲歸回
首雲峰已天上 郭祥正金山行金山杳在滄溟
中雪崖冰柱浮仙宮乾坤扶持自今古日月彷彿
躔西東我泛靈槎出塵世搜索異境窺神功一朝
登臨重歎息四時想像何其雄卷簾夜閣挂北斗
大鯨駕浪吹長空舟摧崖斷豈足數往往霹靂掄

蛟龍寒蟾八月蕩瑤海秋光上下磨青銅鳥飛不
盡暮天碧漁歌忽斷蘆花風蓬萊久聞未成往壯
觀絕致遙應同潮生潮落夜還曉物與數會誰能
窮百年形影浪自苦便欲此地安微躬白雲南來
入我望又起歸興隨征鴻 米芾金山晚泊詩插
雲樓殿壓滄溟笑語風生袪暑清誰爲抉雲開皎
月練飛雪捲看潮生 陳東與士繇游金山翌日
分袂詩早別金山恰曉鐘離帆分破一江風瓜州
渡口波聲遠後夜相思明月中 李燾詩金山何
處好四顧不相連窗迴前無地波澄下有天堂畱

三楚客門泊五湖船暝色關詩思江籠兩岸煙

朱熹詩浩浩長江水東逝無停波及此一回薄潮
平煙浪多孤嶼屹中流層臺起周阿晨望愛明滅
夕遊驚蕩磨極目青冥茫回瞻碧嵯峨不復車馬
跡惟聞榜人歌我願辭世紛茲焉老漁蓑會有滄
浪子鳴船夜相過 陸游金山觀日出詩繫船浮
玉山清晨得奇觀日輪擘水出始覺江面寬遙波
蹙紅鱗翠靄開金盤光彩射樓堦丹碧浮雲端詩
人窘筆力但詠秋月寒何當羅浮望湧海夜未闌
真德秀詩江來朱方注之東海潮怒飛日夕相

撞春天將古來義士骨化作狂瀾中央屹立之青
峰孤根直下二千尺動影裊窈沖融中黃金側布
蘭若地鑿翠面面開窗櫺雙橈伊軋破浪屋恍忽
置我高巖嵒是時千山雪新霽水面月出天清空
濤聲四起人籟寂毛髮蕭爽琉璃宮披衣明發躡
煙靄決皆俯入歸飛鴻襟前渤澥歛暝色袖裏岷
峨吹曉風越南燕北但一氣塵埃野馬何時窮蒼
梧虞舜不可叫王事更恨歸怱怱 鮮於侁詩蓬
萊三神山橫絕互鼇背鼇傾海水動一峰失所在
飛來大江中盤礴幾千載化爲金仙居龍象錯朱

貝夙昔愛山水江湖不暫忘君前或剖竹匏繫古
維揚隱然絕勝地旦旦遙相望不意二君子招攜

一葦杭高攀躡雲梯濶視噉 漲潮來隱天地萬

里捲白浪波清霄漢淨澄徹迷下上更深月正中

山影杳無象蛟鼉四面穴形勢三洲壯融結旣難

窮丹青殊莫狀蘇侯韻高遠邵子雅趨向奇觀極

無邊幽尋端未放浮生閱流水清晨造方丈畢景

趣言歸侵星搖兩槩 徐元用 約東坡游金山詩黯淡灘

頭一艇橫夕陽西下大江平與君不負生平約同

上金鼇背上行 張蘊詩江身臺殿切空雲夜月

魚龍影不分八十老僧相引說潮痕不上郭公墳
金黨懷英詩我從渡淮涉高郵雪風連日吹行
舟維揚地西闌夜色星月隱見邊城樓晴光破曉
射瓜步照見玉宇闌瓊州馮夷收威浪妥貼容我
一到金山頭金山勝槩冠吳楚萬礎盤峙江中流
平生夢寐不到處乃以王事從私游鍾山雨花落
眼底海門鶴巖波際浮川開林闔望不極但見遠
色明輕鷗風煙渺漭異吾土行役有程難久畱一
盃未舉帆影轉已看浙樹梢旗旒元文宗詩巍
然塊石數株松盡日游觀有客從自是擎天真柱

石不同平地小山峰東連舟楫西津渡南望樓臺
北固鐘我欲倚欄吹鐵笛恐驚潭底久潛龍 耶

律楚材過金山詩金山前畔水西流一片青天萬
里秋蘿月團團上東嶂翠屏高挂水晶球 明楊

一清詩坐上青蒼接綠漫樓臺面面枕高寒八窗

帆影隨潮過兩岸人家隔水看地有江山成偉觀
天將砥柱障狂瀾塵心到此消應盡更欲凌雲漱

碧湍 國朝王士正詩三山縹緲望如何有客褰

裳俯逝波絕頂高秋盤鸛鶴大江白日踏鼉鼉冷
泠鐘梵雲間出歷歷帆檣檻外過京口由來開府

地不堪東望尚干戈 蔣超詩江煙日暮正高秋

雪壁銀巒據上頭老衲不知風勢惡自提燈火入

鐘樓 查慎行詩片帆重過潤州城曙色東來海

氣晴千點桃花一江水妙高峰下作清明

金山寺舊名澤心太平寰宇記金山澤心寺在城西

南揚子江

案寺未詳創始虞集金山萬壽閣記云山有佛祠始建于晉明帝時不知所據至

順鎮江志宋祥符五年改名龍游寺

案洪邁記真宗皇帝感宵夢所

抵更爲龍游

政和四年改爲神霄玉清萬壽宮

案嘉定志徽宗書殿

閣十名賜之爲天下神霄第一

南渡後仍爲寺而厄於火淳熙中僧

蘊衷重加修創

案陸游入蜀記新作寺門翟耆年伯壽篆額長老寶印言舊額仁宗皇帝

御書飛白張之則風波洶湧蛟鼉出沒遂藏之寺閣明萬歷二十一年賜金山

藏經敕諭猶稱龍游禪寺 國朝康熙二十五年

賜額江天寺唐宋至今詩人則通謂之金山寺寺有

蘇東坡玉帶謹案玉帶舊缺數版乾隆壬午 翠華

臨幸山寺 命工補足乙酉 六飛重蒞復 臨內

府所藏崔子忠畱帶圖以賜並藏寺中焦氏說楷佛

印住潤州金山寺蘇公赴杭過潤師正挂牌與弟子

入室公便入方丈見之師云內翰何來此間無坐處

公戲曰暫借和尚四大用作禪牀師曰山僧有一轉

語內翰言下卽荅當從所請如稍擬議所繫玉帶留

以鎮山門公許之便解置几上師曰山僧四大本無
五蘊非有內翰欲於何處坐公未及荅師急呼侍者
云收此玉帶永鎮山門遂取衲裙相報公有一絕云
病骨難堪玉帶圍鈍根仍落箭鋒機欲教乞食歌姬
院故與雲山舊衲衣片語風流輝映千古又有東坡
佛印二像李伯時筆蘇子由贊見至順志又東坡與佛印
手簡淳熙戊戌釋蘊良刻石今在寺壁妙高臺在山絕
頂宋元祐間釋了元建有石刻王安國妙高臺三字
明郡守林鶚移置留雲亭蔡條鐵圍山叢談歌者袁絢宣政間供
奉九重嘗言東坡公昔與客游金山適中秋夕月色

如畫遂共登山頂之妙高臺命絢歌其水調歌頭日

明月幾時有把酒問青天歌罷公為起舞 楞伽臺

旁有楞伽室宋僧寶印建蘇東坡嘗寫楞嚴經於此

故名 東坡有金山楞伽阿跋多羅寶經集注題詞見集中 玉鑑堂入蜀記玉

鑑蓋取蘇儀甫詩云僧依玉鑑光中住人踏金鰲背

上行儀甫果終於翰苑當時以為詩識 堂額王安國書石刻尚存

浮金堂 徐元用有邀東坡游金山浮金堂詩 至游堂元祐中僧寶

覺建 案東坡與寶覺書云至游堂記即當下筆今集中無此文 水陸堂 曾鞏有記又有

元延佑三年趙孟頫書金山建水陸大會碑記明萬歷十三年董其昌書金山募齋僧水陸道場疏

化城閣 王安石有詩 雄跨閣乾道初淮東總領洪适取

孝宗句以名入蜀記新作寺門亦甚雄然門乃不可
泊舟凡至寺中者皆由雄跨閣 奎文閣宋郡守方

滋刻孝宗詩於閣下故名 萬壽閣元至大中僧應

深建

虞集
有記

江天閣在山之巔舊名靈觀閣明嘉靖

中郡守滕謚易今名 畱玉閣明萬歷中僧超塵重

築妙高臺得東坡佛印銅象建閣奉之 七峰閣在

金鼇嶺 大藏閣一名蓮華閣在多寶塔前明萬歷

中建以貯勅賜藏經 慈雲閣舊名德雲樓在妙高

臺右 文宗閣乾隆四十七年奉 勅建以貯繕本

四庫全書 浮翠樓在楞伽臺左 操江樓在玉帶

橋左 印月樓浴日樓俱在大藏閣右 得月樓在

妙空巖 海嶽樓 王士正金山詩懷古 仍登海嶽樓今廢 信庵宋理

宗御書二字賜趙葵建庵揭之 見邑志金山志今廢 吞海亭

入蜀記山絕頂有吞海亭取毛吞巨海之意登望尤

勝每北使來聘例延至此亭烹茶金山與焦山相望

皆名藍每爭雄長焦山舊有吸江亭最為佳處故此

名吞海以勝之可笑也 案焦山僧妙福請楊文襄一

冷泉亦是與金山爭勝方豪 清留玉帶又易燒丹井名東 煙雨奇觀亭宋僧蘊

會作二詩紀事真可噴飯 衷建 枕流亭 宋周紫芝有金山貫道人跨 水作亭余為名以枕流詩 留雲

亭在山頂明景泰閒建尙書喬宇易名馭風 迴廊

四圍臨江

明楊文驄于金山築城以資守禦遂去廊為城旋毀康熙初將軍劉之源復城二十

三年去城為廊周以欄楯始還舊觀

雙塔名慈壽塔宋曾布建今廢

入蜀記長老寶印住山近十年興造皆其力寺有兩塔本曾子宣丞相用西府俸所建以薦其先者政和中寺為神霄宮道士乃去塔上相輪而屋之謂之鬱羅霄臺至是五十餘年印始復為塔且增飾之多寶塔在妙空巖側萬歷間僧至性建

宋曾鞏金山寺重建水陸堂記慶歷八年潤之金山寺火明年寺之僧瑞新來治寺事某月擇山之陽亢爽之地勸州之人某氏為水陸堂積錢之數

百三十萬積日之數若干而成夫金山之以觀游之美取羨於天下非獨據江瞰海並楚之衝而濱吳之要也蓋其浮江之檻負岸之屋椽摩棟揭環山而四出亦有以夸天下者則天下之東馳而莫不顧慕者豈特一山之好哉而其作之完蓋非一人一日之力及火余固嗟夫未嘗得與時之君子者游而縱夫余心之所樂焉至於今未及也則聞夫山之窮堂奧殿環傑之觀滋起矣此非佛之法足以動天下蓋新者余嘗與之從容彼其材且辯有以動人者故成此不難也夫廢於一時而後人

不能更興者天下之事多如此至於更千百年委棄鬱塞而不振行於天下者吾之道是也豈獨牽於勢哉蓋學者之難得而天下之材不足也使如此寺之壞而有新之材一日之作軼於百年累世之迹則事廢者豈足憂而世之治可勝道哉新方以書告某氏之世善而其子某又業爲士因以求余記堂之始故爲之歷道其興壞之端而并余之所感者寓焉 洪邁重建金山佛殿記江自岷山而下歷巴夔湘楚包吞前沫橫漾浯流沱潛澧沔盱淦巨川數千百演迤橫放薄於朱方極沛以大

然後東入於海舉天下之水莫甚此焉金焦兩山
峩然天立鎮乎中流皆有大蘭若峇堯其上古記
謂紫金浮玉者是矣浮玉處其左如幽人逸士巖
栖谷隱恐入林之不密故航葦罕至而僧居觸事
隨亦泯歇惟紫金超遙擅勝不復與同蕩然開闢
八面應敵所謂江心一峰水面千里潭月雙映雲
天四垂眞能雄跨東南二百州如宸章所表揭者
千颿下來萬客鱗萃魚龍之所憑怙人天之所賓
挹古今推勝無得擬議寺舊名澤心天禧中眞宗
皇帝感宵夢所抵更爲龍遊飛白扁額以資方來

室廬崢嶸槩與境稱遭罹魔劫鞠爲燼墟中興以
還視力開葺軍帥劉寶奮營大殿幾成而厄於火
明年郡守韓及祖又嗣爲之築於道謀旋即蠹敗
淳熙四年樞密沈公復出治慨然嘆曰吾行四方
多矣未有如此刹者住山非本色人其可哉乃卑
禮厚帛延金華蘊衷師於焦山俾主張是舍寂而
居囂去安而卽煩人以爲介介師不屑也徧行其
疆悲智歟起自念已身逢此壞相亟倒空鉢囊先
衆募捨前所未及一切趨新展前資以安耆舊抗
塔院以壯瞻睹壽坊經室庖浴廂榮易翳爲明寬

身... 卷二
十四
潔敞靚江濱故址隘而不舒累石拓基隄護榆楊
作屋二十四楹中建亭名曰煙雨奇觀游士戾止
洗心儲清又捨法施爲後人買田六十頃唯雄殿
尊居役鉅費侈居之六年而後敢議擇廉謹僧入
閩卽山伐木如約浮海歸命黿鼉而協謨節定星
而揆日道充於內而跡張於外其聲遠揚如谷應
響施者惟恐不克豐其獻匠者惟恐不克旣其功
度爲崇五十有五尺爲廣七十有四尺糜錢六十
萬闕四寒暑而成廓如穹如輪奐華奕卻顧城闕
根塵聿清前瞻海潮法音如在吳頭楚尾莫之與

京功甫訖師移錫錢唐靈隱邦人願有記使來謁
當紹興之季戎馬飲江暴骨堤莽是時長老淨信
誘化童隸收拾瘞藏予再奉使往來親見爲之啓
於太上被褒寵而僧徒二十人則於茲山疑若有
宿因故書而不辭殿經始於癸卯之孟夏成於乙
巳之仲春而訖於丁未之秋八月二十有四日癸
巳云 元虞集金山萬壽閣記南徐古治限大江
之堧受衆川之委東趨而將至於海也其浸汪洋
以無涯其流舒肆而莫止拳然屹立中江以迎其
衝者金山也山有佛祠始建於晉明帝時梁武帝

著水陸齋儀親幸其寺至宋眞宗賜名龍游禪寺
國朝至大己酉僧應深以天子之命主之兼昇以
馬薛里吉思所據銀山東西二院且敕使者修水
陸大會如梁之儀延祐至治間又兩敕建會如至
大故事於是應深以辛酉之歲卽寺之右建大閣
焉上嚴萬佛之像下肖羅漢之容爲位五百後三
年今上皇帝潛邸之日由江引舟而親登是閣壯
其締構雄偉而善深之爲也出帑金成佛像千以
贊之又三年皇帝旣登大寶建元天歷三遣使齎
名香白金往祠之山祇波神魚躍龍舞幽顯咸若

應感著焉至順元年秋應深來朝京師十月乙未
入見上御奎章閣奉佛像以進上曰閣中萬佛已
莊嚴乎對曰像具而未完以金也上曰朕悉爲若
成之卽出內府寶鈔五萬緡以賜之仍歸以羅漢
莊陷江沙汰之田明日應深入謝曰臣僧請以萬
佛祝萬壽願萬壽等萬佛上曰朕之從佛豈私朕
躬所願含生均被佛力因名其閣曰萬壽又明日
敕學士臣集勒文以記之臣集聞諸浮屠氏之說
曰充乎法界一佛身也何有於萬及其化現至百
千億恒河之沙析爲微塵猶不能擬豈萬可言用

東方日報
像設教取數於圓以表也臣請喻之以言今我聖
皇運至善大慈之心位乎億兆萬民之上一念慮
之善一佛之全體也一號令之善一佛之大用也
一日二日已具萬幾至於歲時積善無數卽佛之
言非萬可計然則聖天子萬幾之施豈獨見於斯
閣而已哉有生之類無間遠邇大小知上之念已
也仰而望之一一如親涵上之恩惠焉辟如瞻日
於天人各見日如日視已不知所見共一日也觀
月於水人各見月如月視已不知所見同一月也
散之諸有名之爲萬歸之於無其實一佛也一佛

萬佛也我聖天子一佛萬佛之所具乎一佛之壽
已不勝計卽至萬佛其壽無量卽壽卽佛卽佛卽
壽是故斯閣可得而名矣請書其事以誌諸來者
而深之勤亦得繫於無窮焉

唐李翱詩萬古波心寺金山名日新天多剩得月
地少不生塵石室堪容膝雲堂可憩身我來登眺

處能有幾間人

此詩向與孫魴詩亂據馬
令南唐書孫魴傳更正

張祐

詩一宿金山寺微茫水國分僧歸夜船月龍出曉
堂雲樹影中流見鐘聲兩岸聞因悲在城市終日

醉醺醺又詩

見全唐詩

古今斯島絕南北大江分水濶

吞滄海亭高宿斷雲返潮千澗落啼鳥半空聞皆
是登臨處歸航酒半醺 劉滄詩一點青山翠色

危雲巖不掩與星期海門煙樹潮歸後江面山樓
月照時獨鶴唳空秋露下高僧入定夜猿知蕭疎
水墨清鐘梵灑氣寒光動石池 許渾送僧歸金

山寺詩老歸江上寺不忘舊師恩駐錫逢山色停
盃見浪痕秋濤吞楚驛曉月上荆門爲訪題詩處
莓苔幾字存 李羣玉微上人話金山詩江上青
蓮宮人間蓬萊島煙霞與波浪隱映樓臺好潮門
梵音靜海日天光早願與靈鷲人吟經此終老

又金山寺石堂詩白波四面照樓臺日夜潮聲繞
寺回千葉紅蓮高會處幾曾龍女獻珠來 鮑溶
詩一朵蓬萊在世間梵王宮闕翠雲間近南秋水
更清淺聞道游人未忍還 杜荀鶴詩僧愛無塵
地江心島上居接船求化慣登陸赴齋疎載土春
栽樹拋生日飯魚入雲蕭帝寺畢竟到何如 馬
戴送僧歸金山詩金山江色裏蟬急向秋分迴寺
橫洲島歸僧度水雲夕陽依岸盡清磬隔潮聞遙
想禪林下鑪香對月焚 孫魴詩千載江心寺魚
龍是四鄰樓臺懸倒影鐘磬隔囂塵過櫓妨僧定

三才圖會 卷二
驚濤濺佛身誰言題詠處流響更無人 韓垂詩

金山一峰秀岌然殊衆山盤根大江底插影浮雲

間雷霆常間作風雨時往還象外懸清景千載常

躋攀 羅隱題金山僧院詩根盤蛟蜃路藤蘿四

面無塵輟棹過得似吾師始惆悵眼前終日有風

波 宋范仲淹送識上人游金山寺詩空半簇樓

臺紅塵安在哉山分江色破潮帶海聲來煙景諸

鄰斷天光四望開疑師得仙去白日上蓬萊 蘇

紳詩九派分流擁化城登臨潛覺骨毛清僧依玉

鑑光中住人踏金鼇背上行鍾阜雲開春雨霽海

門雷吼夜潮生因_耳絕頂高秋夜四面雲濤浸月
明 蔡襄詩平日厭塵土今游興味長波濤圍四
際臺殿起中央魚聽晨餐鼓雲和夕炷香薰風休
遞吹襟袂不勝涼 司馬光詩秀剎冠嵯峨松門
絡薜蘿風清塵不到岸濶鳥難過欲雨江聲怒新
晴海氣多行舟未搖棹回望隔煙波 梅堯臣詩
吳客獨來後楚橈帶夕曛山形無地接寺界與波
分巢鶻寧窺物馴鷗自作羣老僧忘歲月坐石看
江雲 蘇舜欽詩孤峰湧滄江突兀臺殿積驚波
四面起日夜走霹靂陰壑瀉風雲陽崖產金碧離

披萬年樹根抱太古石修廊轉峻閣窈窕壓山脊
寶像浮海來珠纓冷光滴扣欄見龜鼉揚首意自
得又有翠羽禽羣飛喜賓客口銜紺蒂花近我欲
相識開軒心曠絕上下無異色氣象特清壯所覽
輒快適余心本高灑誤爲塵土隔不知人間世有
此物外迹落日將發舟低徊空自惜

王安石贈

金山寶覺禪師集句詩並序予始與寶覺相識於
京師因與俱東後以翰林學士召宿金山一夕今
復見之聞化城閣甚壯麗可登眺思往游焉故賦
此詩大師京國舊興趣江湖迴往與惠詢輩一宿

金山頂懷哉苦留戀王事有朝請別來能幾時浮
念劇含梗今朝忽相見眸子青爛爛夜闌接軟語
令人發深省化城出天半遠色有諸嶺向前對汀
洲猶思理煙艇 曾鞏詩塵外岩龕鷲嶺宮架虛
排險出青紅林光巧轉滄波上海色遙涵白日東
夜靜神龍聽呪食秋深蒼鶻起搏風連荆控蜀長
江水盡在回廊顧盼中 蘇軾詩我家江水初發
源宦遊直送江入海聞道潮頭一丈高天寒尙有
沙痕在中冷南畔石盤陀古來出沒隨濤波試登
絕頂望鄉國江南江北青山多羈愁畏晚尋歸楫

山僧苦畱看落日微風萬頃鞞文細斷霞半空魚
尾赤是時江月初生魄二更月落天深黑江心似
有炬火明飛焰照山棲鳥驚悵然歸臥心莫識非
鬼非人竟何物江山如此不歸山江神見怪驚我
頑我謝江神豈得已有田不歸如江水 又金山
妙高臺詩我欲乘飛車東訪赤松子蓬萊不可到
弱水三萬里不如金山去清風半帆耳中有妙高
臺雲峰自孤起仰觀初無路誰信平如砥臺中老
比丘碧眼照窗几巉巉玉爲骨凜凜霜入齒機鋒
不可觸千偈如翻水何須尋德雲卽此比丘是長

生不暇學請學長不死 又金山寺與柳子玉飲
大醉臥寶覺禪榻夜分方醒題其壁詩惡酒如惡
人相攻劇刀箭頽然一榻上勝之以不戰詩翁氣
雄拔禪老語清軟我醉都不知但覺紅綠眩醒時
山月上瑟瑟風響變惟有一龕燈二豪俱不見

又畱別金山寶覺圓通二長老詩沐罷巾冠快晚
涼睡餘齒頰帶茶香艤舟北岸何時渡晞髮東
未肯忙康濟此身殊有道醫治外物本無方風流
二老長還往願我歸期尙渺茫 又去金山五年
而復至次舊韻贈寶覺詩誰能斗酒博西涼但愛

齊廚法鼓香舊事真成一夢過高譚爲洗五年忙
清風偶與山阿曲明月聊隨屋角方稽首願師憐
久客直將歸路指茫茫 又仲秋夜宿金山寺寄

子由詞

水調歌頭

明月幾時有把酒問青天不知天上

官闕今夕是何年我欲乘風歸去又恐瓊樓玉宇
高處不勝寒起舞弄清影何似在人間轉珠閣低
綺戶照無眠不應有恨何事長向別時圓人有悲
歡離合月有陰晴圓缺此事古難全但願人長久
千里共嬋娟 秦觀次韻子瞻贈金山寶覺詩雲
峰一變隔炎涼猶喜重來飯積香宿鳥水邊迎曉

聞亂岬天際受風忙青鞋踏雨尋幽徑朱火籠紗
悟上方珍重故人敦妙契自憐身世兩茫茫元
薩都刺詩約客同游買渡船間觀古剎禮金仙山
中好景無多地天下知名第一泉佛閣齊雲浮海
嶼估帆過寺帶風煙當年郭璞因何事來葬江心
作浪傳明李東陽詩長向名山憶所逢偶來南
國問仙蹤潮聲夜落江心寺雲氣朝浮海上峰元
圃樓臺通日月石壇風雨護蛟龍詩成卻笑張公
子解道中流兩岸鐘謝肇淛登金山多寶塔詩
一柱接青霄春江浪正驕龍歸山寺雨月落海門

潮水氣中峰合人煙兩岸遙振衣危墻畔疑渡赤
城橋 又杜濬詩極目非無岸滄波接大荒人煙

沙鳥白春色嶺雲黃出世登初地思家傍戰場咄

哉天咫尺消息轉茫茫 夏言詞 大江東去 砥柱乾坤

鎮長江萬古中流獨立橫邊驚濤排駭浪直負擎

天巨力吞吐煙雲奔騰日月壯觀東南壁三山海

上孤根不與同植蛟宮貝闕玲瓏海色浮空日抱

鼉鼉出人世光陰如一瞬惟有滄波不息吞海亭

前江天閣上目送飛鴻翼振衣長嘯墨花醉灑巖

石 國朝施閏章詩水國東連海中流島嶼青風

帆爭落日佛火亂寒星
洞穴通雲漢魚龍上杳冥
忽聞喧鼓角愁絕不堪聽
朱彝尊妙高臺詩高
臺堪極目落景一登臨
衆水金陵下孤城鐵甕深
平沙依雁宿橫笛想龍吟
不見安禪叟寥寥江上
心

下元水府廟在山麓五代史吳世家乾貞二年正月
封金山下元水府鎮江王宋會要大中祥符二年正
月詔潤州金山下元水府靈肅鎮江王封昭信泰江
王賜額曰顯濟入蜀記乾道五年六月二十五日早
以一豨壺酒謁英靈助順王祠所謂下元水府也祠

屬金山寺寺常以二僧守之無他祝史然勝云賽祭
豬頭例歸本廟觀者無不笑初紹興未完顏亮入寇
樞密葉公審言督視大軍守江禱於水府祠請事平
奏加帝號既而不果隆興中敵再入有近臣申言之
議者謂四瀆止封王水府不應在四瀆上乃但加美
稱而已 國朝乾隆四十七年

敕封靈區安瀾恒佑宏仁廣濟至德尊神春秋有司
致祭 賜額曰德佑安瀾

韓蘄王廟在水府廟左今爲三忠祠並祀魏忠壯公
勝文信公天祥 鶴林玉露韓蘄王之夫人京口倡也
嘗五更入府伺候賀朔忽於廟柱下

見一虎蹲臥鼻息齟齬然驚駭亟走出不敢言已而
 人至者衆復往視之乃一卒也因蹴之起問其姓名
 爲韓世忠心異之密告其母謂此卒定非凡人乃邀
 至其家具酒食卜夜盡懽深相結納資以金帛約爲
 夫婦勸王後立殊功爲中興名將遂封兩國夫人勸
 王嘗邀兀朮於黃天蕩幾成擒矣一夕鑿河遁去夫
 人奏疏言世忠失機縱敵乞加罪責舉朝爲之動色
 宋史寧宗紀嘉泰四年詔立韓世忠廟於鎮江府
 魏忠壯褒忠廟在蒜山廟廢移祀於此文信國山
 壽邱山遷祠於此宋史本傳元兵至鎮江文天祥夜
 入眞州苗再成出迎曰兩淮兵足以興復計大舉合
 攻天祥稱善遺書二淮閩因間未果又杜濬傳天祥
 北行濬從京口以計脫天祥偕走淮甸由海道以達
 永嘉又呂武傳天祥出使武應募從行偕脫鎮江之
 難沿淮東走海道賴武力爲多

趙吉士金山韓蘄王廟詩古廟歸然控上游雲帆

戰艦夕陽收江煙時帶魚龍氣潮水猶傳鼓角愁

南渡衣冠空半壁中冷俎豆竟千秋
可堪驢背投閒去長使厓山作帝州

京口山水志卷三

丹徒楊棨撰

丹徒山

焦山在城東九里大江中與金山對峙相距十里許本名譙山通典丹徒有譙山成太平寰宇記譙山成海口

成也施丙之蘇詩注潤州圖經云焦山焦先所隱故以

為名事物記原宋大中祥符七年四月詔封焦山大聖

祠為明應公今山中有大中祥符六年二月四日案事

原年月賜漢隱士焦光明應公敕案蔡中郎集有焦君

不傳魏畧高士傳道學傳皆言焦先隱於魏受禪後蔡

邕初平三年死獄中見後漢書邕所贊者決非焦先矣

然中郎未言焦君隱於何所各傳亦不言焦先隱居譙山圖經所云不知何據宋勅焦光之名更不知何本宋史本紀德祐元年七月辛未張世傑諸軍戰焦山下敗績又張世傑傳世傑與劉師勇出師焦山令以十舟爲方碇江中非有號令毋發碇元史本紀至元十二年七月庚午宋沿江制置使趙潛樞密都承旨張世傑知泰州孫虎臣等陳舟師於焦山南北辛未阿朮阿塔海指授諸軍水軍萬戶劉琛循江南岸東趨夾灘繞出敵後董文炳直抵焦山南麓以倚其右招訪使劉國傑趣其左萬戶忽刺出其中張宏範趣焦山之北大戰宋師大敗又張晉亨傳晉亨淄萊路總管伯顏留之戍鎮江

戰焦山瓜洲皆有功山亦稱雙峯以山有東西二峯也

又稱浮玉

金焦皆有浮玉之名宋洪邁金山佛殿記云金焦兩山峯然天立鎮乎中流皆有大蘭若

岩堯其上古記謂紫金浮玉者是已浮玉處其左航別葦罕至惟紫金超遙擅勝是浮玉亦可專稱焦山

峯東西兩峯間別出一峯故名 焦仙嶺在山巔 海

雲巖一名師子巖在山南 觀音巖一名觀音崖在山

西下有善財石 棧道巖山西麓達觀音崖之路 羅

漢巖在山西宋理宗書羅漢巖三字刻巖上又有趙潛

題名云咸淳壬申九月二十八日長沙趙潛與客山陽

陸秀夫潼川袁塤當塗朱華章東嘉廉開達公亮建業

湯德從金榮朱璧蘄春朱玉國自金山來弟涯深浦姪

孫璠付隕之平章信借 瘞鶴巖刻瘞鶴銘處在羅漢

巖右雷震巖石墜於江名雷轟石一名霹靂石詳見巖後

上有唐丹陽掾王瓚自題所作冬日游焦山詩又宋米

芾題名云仲宣法芝米芾元祐辛未孟夏觀山樵書案仲

宜甘露寺僧見米公淨名齋記法芝金山僧東坡有寄法芝上人詩又陸游題名云陸務

觀何德器張玉仲韓无咎隆興甲申閏月二十九日踏

雪觀瘞鶴銘置酒上方烽火未息望風檣戰艦在烟靄

間慨然盡醉薄晚泛舟自甘露寺以歸明年二月壬午

圓禪師刻之石務觀書 浮玉巖在瘞鶴巖南上有宋

淳熙甲辰吳琚書游焦山觀瘞鶴銘詩 心經石在山

西側濱江宋吳琚磨崖書心經其上石裂僧明湛移其
半置松寥閣中僅存無色聲香味觸法無無明亦無無
明盡無苦集滅道二十字其餘仍在江中石上可識者
般無有諸佛多是大苦真說咒曰琚敬書十六字 角
觥石在山北水際二石對立形似角觥故名 門限石
在山南江底通南岸石公山 印石在焦公洞下風濤
激盪有聲一名音石 石屏與浮玉巖對有宋吳傅朋
書石屏二字下有醉石 焦公洞一名三詔洞在山西
南內有焦公像 石室晉傅先生隱處在瘞鶴巖下有
戶有庭有几有案中窈而深可通巖腹陶宏景真誥傳

先生少好道入焦山石室中積七年而太極老君詣之
與之木鑽使穿一石盤厚五尺許云穿此盤便當得道
積四十七年鑽盡石穿遂得神丹乃升太清為南嶽真

人山有石名鑽丹者以此

案真誥仙卿黃冠子亦隱焦山

松寥山夷

山在山東北江中李白有焦山望松寥山詩孟浩然望

京口詩云夷山近海濱

山多鷹鵠而金山前之鵠山反無鵠亦事變之一也

海

門松寥夷山分峙江中若雙闕然故名劉禹錫渡揚子

江詩海澗石門小新唐書韓滉傳滉建節潤州造樓艦

二千柁以舟師出海門大閱馬令南唐書盧絳傳絳召

募無賴少年便習舟楫水道者得馬雄王川等軍數千

人立爲偏裨使督卒伍日習水戰常於海門遮獲越人
船舫盛貨獻於金陵又稱海門國宋釋了元有詩 青
玉塢在山東北隅 碧桃灣在山西北隅山上有
行宮有

聖祖御製詩 御書扁

高宗御製詩文 御書瘞鶴銘及聯扁

齊江淹陸東海譙山集詩杳杳長役思思來使懷
濃恒忌光氛度藉蕙望春紅青莎被海月朱華冒
水松輕氣暖長岳雄虹赫遠峯日暮崦嵫谷參差
綵雲重永願白沙渚游衍遂相從丹山有琴瑟不

爲憂傷容 唐王瓚冬日與羣公泛舟登焦山詩

江外水不凍今年寒復遲衆芳且未歇近臘仍裊
衣載酒適我情興來趣漸微方舟大川上環酌對
落暉兩片青石稜波際無因依三山安可到欲到
風引歸滄溟壯觀多心目豁暫時况得窮日力乘
槎何所之 李白焦山望松寥山詩石壁望松寥
宛然在碧霄安得五綵虹駕天作長橋仙人如愛
我舉手來相招 宋王存詩連山擁滄江峭絕視
茲鮮由來一氣結殊不麗衆巘林深鳥聲悅境靜
人自遠吾方抱幽介對此萬慮遣 蘇軾自金山

放船至焦山詩金山樓觀何耽耽撞鐘擊鼓開淮
南焦山何有有修竹採薪汲水僧兩三雲霧浪逐
人跡絕時有沙戶祈春蠶我來金山便留宿而此
不到心懷慙同游盡返決獨往賦命窮薄輕江潭
清晨無風浪自湧中流歌嘯倚半酣老僧下山驚
客至迎笑喜作巴人談自言久客忘鄉井只有彌
勒爲同龕困眠得就紙帳暖飽食未厭山蔬甘山
林飢餓古亦有無田不退寧非貪展禽雖未三見
黜叔夜自知七不堪行當投劾謝簪組爲我佳處
留茅庵 蘇轍和子瞻詩金山游徧入焦山舟輕

帆急須臾間涉江已遠風浪濶游人到此皆爭還
山頭冉冉萬竿竹樓閣不見門常關金山共此一
江水只有絕勝無此間野僧終日飽一飯與世相
視如髦蠻門無舟楫斷還往說法教化龍龜頑偶
然客至話鄉國西望落日低銅鑲岷峨正在日入
處想像積雪堆青鬢稻田一頃良自給仕宦不返
知誰扳久安廩祿農事廢強弓一弛無由彎行逢
佳處輒歎息想見茅屋藏榛菅我知此地便堪隱
稻田旆旆魚斑斑 元郭畀詩砥柱中流障北溟
海門對峙兩峯青鶴歸幽竇雲烟冷龍卷空江樹

石腥爲爾欲招蓮社侶嗟予久負草堂靈坡翁綸
老知何處西日荒寒照野亭 明王守仁詩倚雲

東望曉冥冥縹緲諸峯數點萍漂泊轉慙成竊祿
幽棲終擬抱殘經巖花入暖新凝紫壁樹懸江欲
墮青春水特深埋鶴地又隨斜日下山亭 楊繼

盛詩並序訪唐子荆州到此因名山與已號音相
同喜而賦之楊子懷人渡揚子椒山無意合焦山
地靈人傑天然巧瞬息神游萬古閒 王世貞詩

石鬪東溟起雲含北固青江山分氣概風雨走精
靈處士輕龍詔仙巖秘鶴銘由來元圃路少許俗

人經 杜濬詩觸處迷人代茲山尙姓焦上頭仍
棟宇到眼忽雲霄樹色南徐近江聲北岸遙衣冠
留洞壑不必問松寥 國朝王士正海門歌岷峨
東下江水長遠從井絡來吳鄉奔濤萬里始一曲
古之天塹維朱方北界中原壯南紀魚龍日月相
迴翔中流一鳥號浮玉登高眺遠何茫茫長空飛
鳥去不盡江海一氣同青蒼山外兩峯遠奇絕雙
闕屹立天中央左江右海辨雲氣如爲八裔分紀
疆江流到此一縛束早潮晚汐無披猖燭龍曉日
出雲海山光照耀連扶藜年來海戍未停罷戡舸

大艦來汪洋胡豆洲前起烽火徒兒浦上披襦袴
古聞京口兵可男寄奴一去天蒼涼我願此山障
江海七閩百粵爲隄防作歌大醉臥巖石起看江
月流清光 孫枝蔚焦山遇風詩風起中流浪打
船秦人失色海雲邊也知賦命原窮薄尙欲西歸
太華眠 潘高曉上焦山絕頂至暮歸宿山莊詩
初日江荒荒曉烟不可罷稍行見青螺漸次辨蘭
若人行穿鵲巢路窄盤石罅逾時攀險絕早已驚
衰謝樹古巖就穿樓高雲許藉一盡巔厓趣旋從
別徑下落木響蕭騷寒潮勢奔瀉欲歸路非遠問

渡風稍借可憐江上月先我在茅舍酌酒勸影形
嗒然坐清夜 厲鶚三詔洞拜焦隱君像詩呀然
石房闢栝柏互森竦下有黃犢廬山因姓氏重炎
靈失其政四海浩呼洵先生獨緘口絕世一何勇
魏吳公與卿彌望盡闕茸去之斯已而孤寄此寵
從入獸不亂羣露寢甘自擁至今拂巖花真氣使
人拱何哉天書帝襪祥共愆懣通夢謬加封高靈
肯汙寵我擬駕蜚鴻瑤草拾遺翫爲君迴俗駕落
葉寒到踵 鮑臯宿焦山詩靜極疑山動乾坤到
此浮水光終夜曉海氣不時秋沙月窺蘿壁龕燈

厭石樓不眠聞發掘身世總悠悠

焦公祠在佛殿右康熙中賜扁曰山高水長舊名
明應公廟文獻通考廟在潤州焦山大中祥符七年
上以京江多覆溺之患是山在江中近海門禱祈有
應詔封山神以公爵仍製文告之刻石廟中案石刻
久佚今祠內有墨勅一道前題御書之寶四大字慶
元戊午冬十月甲子太子少傅觀文殿學士陳騏書
其文卽祥符中賜漢故隱士焦光明應公詔又有米
芾自書所作祠銘碑

漢蔡邕焦君贊

見中郎集

猗歟焦君常此元默衡門之

下棲遲偃息泌之洋洋樂以忘食鶴鳴九臯音亮
帝側乃徵乃用將授袞職昊天不弔賢人遘慝不
遺一老屏此四國如何穹蒼不照斯域惜哉朝廷
喪茲舊德恨茲學士將何法則 三國志管寧傳
裴注時有隱者焦先河東人也魏畧曰先字孝然
中平末白波賊起時先年二十餘與同郡侯武陽
相隨武陽年小有母先與相扶接避白波東客揚
州取婦建安初來西還武陽詣太陽占戶先留陝
界至十六年關中亂先失家屬獨竄於河渚閒食
草飲水無衣履時太陽長朱南望見之謂爲亡士

欲遣船捕取武陽語縣此狂癡人耳遂注其籍給
廩曰五升後有疫病人多死者縣常使埋藏童兒
豎子皆輕易之然其行不踐邪徑必循阡陌及其
捃拾不取大穗飢不苟食寒不苟衣結草以爲裳
科頭徒跣每出見婦人則隱翳須去乃出自作一
瓜牛廬淨埽其中營木爲牀布草蓐其上至天寒
時構火以自炙呻吟獨語飢則出爲人客作飽食
而已不取其直又出於道上邂逅與人相遇輒下
道藏匿或問其故常言草茅之人與狐兔同羣不
肯妄語太和青龍中嘗持一杖南渡淺河水輒獨

云未可也由是人頗疑其不狂至嘉平中太守賈
穆初之官故過其廬先見穆再拜穆與語不應與
食不食穆謂之曰國家使我來爲卿作君我食卿
卿不肯食我與卿語卿不應我如是我不可爲卿
作君當去耳先乃曰寧有是邪遂不復語其明年
大發卒將伐吳有竊問先今討吳何如先不肯應
乃謬歌曰祝魼祝魼非魚非肉更相追逐本心爲
當殺牂羊更殺其殺獼耶郡人不知何謂會諸軍
敗好事者乃推其意疑牂羊謂吳殺獼謂魏於是
後人僉謂之隱者也議郎河東董經特嘉異節與

先非故人密往觀之經到乃奮其白鬚爲如與之
有舊者謂曰阿先濶乎念共避白波時不先熟視
而不言經素知其昔受武陽恩因復曰念武陽不
邪先乃曰已報之矣經又復挑欲與語遂不肯復
應後歲餘病亡時年八十九矣高士傳曰世莫知
先所出或言生乎漢末自陝居大陽無父母兄弟
妻子見漢室衰乃自絕不言及魏受禪常結草爲
廬於河之湄獨止其中冬夏恒不著衣臥不設席
又無草蓐以身親土其體垢汙皆如泥漆五形盡
露不行人間或數日一食欲食則爲人賃作人以

衣衣之乃使限功受直足得一食輒去人欲多與
終不肯取亦有數日不食時行不由邪徑目不與
女子逆視口未嘗言雖有驚急不與人語遺以食
物皆不受河東太守杜恕嘗以衣服迎見而不與
語司馬景王聞而使安定太守董經因事過視又不
肯語經以爲大賢其後野火燒其廬先因露寢
遭冬雪大至先袒臥不移人以爲死就視如生不
以爲病人莫能審其意度年可百歲餘乃卒或問
皇甫謐曰焦先何人曰吾不足以知之也考之於
表可畧而言矣夫世之所常趣者榮味也形之所

不可釋者衣裳也身之所不可離者室宅也口之所不能已者言語也心之所不可絕者親戚也今焦先棄榮味釋衣服離室宅絕親戚閉口不言曠然以天地爲棟宇闡然合至道之前出羣形之表入元寂之幽一世之人不足以挂其意四海之廣不能以同其顯妙乎與夫三皇之先者同矣結繩以來未及其至也豈羣言之所能髣髴常心之所得測量哉彼行人所不能行堪人所不能堪犯寒暑不以傷其性居曠野不以恐其形遭驚急不以迫其慮離榮愛不以累其心損視聽不以汚其耳

目舍足於不損之地居身於獨立之處延年歷百
壽越期頤雖上識不能尙也自羲皇以來一人而
已矣魏氏春秋曰故梁州刺史耿黼以先爲仙人
也北地傳元謂之性同禽獸並爲之傳而莫能測
之臣松之按魏畧云焦先及楊沛並作瓜牛廬止
其中以爲瓜當作蝸蝸牛螺蟲之有角者也俗或
呼爲黃犢先等作園舍形如蝸牛蔽故謂之瓜牛
廬 葛洪道學傳焦先者字孝然河東人也年一
百七十歲常食白石以分與人熟煮如芋食之日
日入山伐薪以施人先自邨頭一家起周而復始

負薪以置人門外人見之鋪席與坐爲設食先便
坐亦不與人語負薪來如不見人便私置於門間
便去連年如此及魏受禪居河之湄結草爲庵獨
止其中不設牀席以草襯坐其身垢汗濁如泥潦
或數日一食行不由徑不與女人交遊衣敝則賣
薪以買故衣著之冬夏單衣太守董經因往視之
又不肯語經益以爲賢後遭野火燒其庵人往視
之見先危坐庵下不動火過庵燼先方徐徐而起
衣物悉不焦灼又更作庵天忽大雪人屋多壞先
庵倒人往不見所在恐已凍死乃共拆庵求之見

先熟臥於雪下顏色赫然氣息休休如盛暑醉臥
之狀人知其異多欲從學道先曰我無道也或忽
老忽少如此二百餘歲後與人別去不知所適所
請者竟不得一言也 陸雲登遐頌

并序錄焦
生一首 夫

死生存亡二理之已然者也而世有神仙登遐之
言千歲不死之壽其詳固難得而精矣列仙之道
作者既集而登遐未有焉莊周有言我試妄言之
子試妄聽之彼之有無蓋難以理求我之妄聽顧
可以言寄之遂爲頌云爾焦生卜居在河之東皓
襟解帶嘉卉結容頤神太素淑思元冲在彼黃堂

明道固窮 宋大中祥符六年二月四日賜漢隱
士焦光明應公敕朕臨御天下賴宗廟之靈方內
乂安元元蒙福四海恬然頗稱隆平之世邇者染
疾未瘳忽夢老人入殿自謂東南隱者焦光持丹
奉獻夢覺卽愈詢之近臣云光乃漢末高隱遨遊
天塹洞隱譙山甘貧樂道昔以三詔不起廉節自
持雖萬鍾而難移撫川流以自得觀泌水以陶情
不但福佑於國抑且惠及於民封功報典理之所
宜凡本山田地差役一概優免有司春秋祭奠以
爲永錫之報無負朕意副所願焉 米芾焦公祠

銘水清石白焦公之宅妙道誰測能語而默俟河
之清乃通帝夢殖殖瑤壇乃靈是擁髀馨遠濁以
道祚宋公德不輦客必茹素擁徒駕御必以風雨
明德感神神應可呼勒石津塗以肅薄夫

焦山寺舊名普濟禪院嘉定鎮江志云祥符圖經不
載始建歲月但云宋朝改今名釋了元焦山十六題
詩白序云元祐三年春普濟庵乏主者因太守楊公
乞退居於此孫覲詩昔年與客寄僧龕敗屋疎籬一
草庵白首重來看修竹連山樓觀亦耽耽蓋元祐後
日益恢廓始成名蓋稱普濟禪寺 國朝康熙四十

二年 賜額定慧寺宋以來又通謂之焦山寺寺額宋吳

琚書宋史高宗紀建炎三年金兵至鎮江韓世忠屯今佚

焦山寺邀擊之又韓世忠傳上元節就秀州張燈高

會忽引兵趨鎮江及金兵至世忠兵已先屯焦山寺

金將李選降 海雲堂舊為枯木堂內藏古鼎王士

祿古鼎歌序云焦山有古鼎一圓腹三足雲雷紋高

可尺六寸許腹有銘韓吏部如石案如石名豫邑人為余言

鼎故京口某公家物當分宜相枋國時某公官於朝

分宜聞此鼎欲之某公不即獻因嫁甌焉鼎竟入嚴

氏嚴氏敗鼎復歸江南某公以甌由鼎作謂鼎不祥

捨之焦山寺中顧炎武金石文字記鼎高一尺三寸

二分腹徑一尺五寸八分口徑一尺四寸五分耳高

三寸濶四寸二分足六寸一分深入寸二分銘九斗

三字皆古文蝕一字外為雲雷之形其文曰維九月

既望甲戌王各古格於周丙子烝於圖室司徒南中

古仲右古佑世惠僉立古位中廷王呼史端冊令古

字世惠曰宣治佐王頗側弗作錫女古汝玄衣束帶

戈瑀戟縞鞞彤矢筌勒鑿旂世惠敢對揚天子不古

字顯敬休用作尊鼎用享於蝕列考用周簋壽萬年

子孫永寶用朱彝尊吉金貞石志鼎銘其人莫攷曰

王格於周曰司徒南仲殆周時器也其曰立中延案
毛伯敦銘文亦有之薛尙功釋爲立而周禮小宗伯
掌建邦之神位注故書位作立鄭司農云立讀爲位
古者立位同字古文春秋經公卽位爲公卽立則是
銘曰立亦當讀位也右古佑字令古命字不古丕字
錢大昕金石文跋尾右焦山鼎銘宋人好辨識鐘鼎
文字此銘獨未著於錄其出於何時何地不可得而
知矣古器銘多用鑿勒字惟石鼓及寅簋文正作鑿
勒伯姬鼎則作攸勒宰辟父敦又作攸革薛尙功王
球諸家皆釋攸爲鑿此文亦但作攸蓋古文之鑿勒

卽詩所云儻革也詩儻革凡四見鄭氏箋或云轡或云轡首或云轡首垂毛公則訓儻爲轡革爲轡首說文無儻字而有筮字訓爲轡首銅明乎筮之卽儻也釋器云轡首謂之革郭景純曰轡靶勒也詩如烏斯革韓詩作勒明乎勒之卽革也詩儻革有鶉鄭以鶉爲金飾古文儻從金與許叔重轡首銅合孔疏謂以儻皮爲轡首之革似未達古制矣伯姬鼎師敦敦竝有縞必字薛氏釋必爲縹案攷工記天子圭中必鄭注讀如鹿車縶之縶是必縶古文相通此銘亦作必與康成注合又藏玉帶明楊文襄一清所施又宋繡

觀音像王士祿焦山觀宋繡觀音像歌枯木堂中看
宋繡詩載集中像為明邑令張文光所留嘉慶中相
國阮元得漢陶陵鼎亦藏於此 瘞鶴銘亭在佛殿

東覆瘞鶴銘銘舊在山下刻崖石上未知何年雷震

石裂淪沒於江康熙壬辰長沙陳恪勤公鵬年募工

挽出遷於佛殿之左建亭覆焉

案宋淳熙己酉馬子嚴曾請州將張子顏

發卒挽出募以遺故舊子嚴有跋載蔡佑雜記詳見

於後蓋僅出之於水以便摹搨未曾移置他所故日

久仍沒 陳自有重立瘞鶴銘碑記瘞鶴銘在焦山西
麓不知何人書書中但載甲子不列朝代其後崩墮

江中遂名雷轟石亦不紀何歲月宋元以降傳錄傳

會舛譌相仍莫能攷正蓋歷世既遠文字殘缺江濤
險阻摹搨爲難固其所也余自庚寅十月再罷郡羈
繫京江足不踰戶庭且三歲越壬辰冬蒙天語昭
雪禁網始疎乃間以扁舟一至山下尋探崖壁適雨
雪稀少水落石露異乎常時乃命工人是相是伐巉
巖尋丈力難全昇是割是剔不遺餘力以求遺文出
之重淵躋之重岡乃得七十餘字質體完固精采飛
奕巋然煥然如還舊觀自冬徂春凡三閱月厥工乃
成是爲癸巳二月旣望茲銘在焦山著稱殆千有餘
年沒於江者又七百年蛟鼉之所盤踞波浪之所剝

蝕沙泥之所沈埋此七十餘字自歐陽文忠公以至
今日宛然猶存非山川鬼神護之惜之曷至此乃遵
原刻行次存者表之亡者闕之蝨以山石儼若磨崖
畧循故蹟覆以層軒環以周垣不事雕鏤不施丹黃
以速厥成毋俾散佚至是書撰造確係何人傳寫荒
唐與補刻之謬妄古今人論辨頗詳余不具論案銘
字皆從左方起存者七十七字又不全者九字無字
處以空石補之不全上歲不全於華不全於朱未遂吾
羽不全矣不全也迺裹以玄黃之幣藏山之下仙家石旌
事篆銘不朽詞曰相此胎禽浮萃不全表留唯髣髴事

亦不屎土惟寧後蕩洪流前固不爽塏勢掩華

亭爰集真侶瘞爾不全鬱徵君丹楊外仙尉江陰真

宰陳公出銘於江用定武蘭亭例別刻東觀餘論載

邵亢興本瘞鶴銘有序華陽真逸撰上皇山樵缺鶴

壽不知其紀也壬辰歲得於華缺甲午歲化於

朱方天其未遂吾翔缺廊耶奚奪缺遽也迺

裹以元黃之幣藏乎茲山之下仙家無缺我缺此

不故立石旌事篆銘不朽詞曰相彼胎禽浮缺二

余欲無言爾缺去鼓缺表缺當

惟髣髴事亦微冥爾將何之解化缺厂此又缺

惟寧後蕩洪波前固重局右

此五字不全又缺八

字

華亭爰集真侶瘞爾

缺二字或文但止於此未可知也

丹楊真宰

此四字不知其次

廣川書跋載張學

子厚

本瘞鶴銘華陽真逸

撰上皇山樵

缺一本有書字

鶴壽不知其紀也壬辰歲得於

華

缺一字當為亭

甲午歲化於朱方天其未遂吾翔

缺一字當為寥

廓耶奚奪

缺一字

遽也迺裹以元黃之幣藏乎茲山之

下仙家無

缺四字

我

此字不完

故立石旌其事篆銘不朽

詞曰相此胎禽浮上

缺二字

余欲無言爾

缺三字當有雷門二字

去鼓

缺一字當為華

衰留

缺二字當為形義

唯髣髴事亦微冥爾將

何之解化

缺五字

厂

此字不完又缺一字

惟寧後蕩洪流前固重

局右

此六字不完又缺八字

華亭爰集真侶瘞爾

缺兩字或但止於此未可

知也丹陽真宰

此四字不知其次字句讀之可識及點畫之僅存者百三

學跋瘞鶴銘凡文

十餘言而所七失幾五十字計其完書蓋九行行之全者率二十五字而首尾不預焉熙寧三年春予索

其遺逸於焦山之陰偶得十二字於亂石間袁留惟寧十字完餘二字譌缺其後又有丹陽外仙江陰真

宰八字與華陽真逸上皇山樵似是真侶之號今取其可考者次序之如此

又刁約所得

金山經度本鶴壽不知其紀壬辰歲得於華亭甲午

歲化於朱方天其未遂吾翔寥廓耶奚奪余仙鶴之

遽也迺裹以元黃之幣藏之茲山之下故立石旌事

篆銘不朽詞曰相此胎禽仙家之真山陰降迹華表

留名真惟彷彿事亦微冥西竹法里宰耳歲辰鳴語

解化浮邱去莘左取曹國右割荆門後蕩洪流前固
重局我欲無言爾也何明爰集真侶瘞爾作銘宜直

示之惟將進寧丹楊仙尉江陰真宰立石

廣川書跋云刁景純

就金山經度中得唐人於經後書瘞鶴文以較興宗子厚其字錯雜失序多矣宜直示之惟將進寧則不
可陶宗儀輟耕錄本瘞鶴銘華陽真逸撰上皇山樵

鶴壽不知其紀也壬辰歲得於華亭甲午歲化於朱
方天其未遂吾翔寥廓耶奚奪之遽也迺畏以元黃
之幣藏茲山之下仙家無隱故我立石旌事篆銘不
朽詞曰相此胎禽浮邱著經迺徵前事我傳爾銘余
欲無言爾其藏靈雷門去鼓華表留形義唯彷彿事

亦微冥爾將何之解化唯寧後蕩洪流前固重局右

割荆門歷下華亭爰集真侶瘞爾作銘丹楊外仙尉

江陰真宰一本山樵下有書字真宰下有立石二字

紀爾王士正池北偶談門人淮陰張弢力臣康熙丁

未十月至焦山觀瘞鶴銘得仰石一凡六行存二十

六字仆石一字在石下存三十字又二殘字又一石

側立剝甚存七字仆石之背有宋人補刻三行按圖

列見存字鶴側石第一行上皇側石第二行歲得於華側石第三行

亭甲午歲化於朱方天其此宋人補刻石第一行未遂

吾翔仰石第一行遽也乃裹以玄黃之幣藏乎茲宋人補刻石第一行

二行屬仰
石第一行
山之下仙家
仰石第二行
立石旌事篆銘不朽

詞曰
宋人補刻
第三行
相此胎禽浮丘
仰石第三行
華表

留形義
仰石第一行
唯髣髴事亦微
仰石第四行
厥土惟寧後

蕩
仰石第二行
洪流前固重
仰石第五行
爽塏勢掩華亭爰集

三行
仰石第三行
真侶瘞爾
仰石第六行
峯山徵君
仰石與銘二行
斜

連
丹楊外仙尉
仰石第二行
江陰真宰
仰石第三行
壯觀

亭址宋人別刻本
磨
今僅存五十九字瘞鶴銘
並序

華陽真逸鶴壽不知其紀也王未遂吾翔寥廓耶奚

山之下仙家無相此胎禽浮丘著經唯髣髴事亦微

冥洪流前固重扁右真侶瘞爾作銘
焦山志王世貞跋云瘞鶴銘余

往歲游焦山後崖水落時得之僅數字耳今此帖乃
一百許字蓋取舊本刻之壯觀亭者刻手精頗不失
初意可玩也案今僅存五十九字蓋上半截也下截
被明人磨去題名咄咄怪事此外有程康莊重刻玉
烟堂本在方丈前錢升重刻顧宸家藏本林企忠重
摹本並在海雲庵無名氏小字本在文殊閣文皆互
異

歐陽修集古錄云瘞鶴銘華陽真逸撰刻於焦山
之足常爲江水所沒好事者伺水落時摸得之往往
祇得數字而已惟余所得六百餘字按潤州圖經以
爲王羲之書字亦奇特然不類羲之筆法而類顏魯
公不知何人書也華陽真逸是顧况道號今不敢遽
以爲况者碑無年月不知何時疑前後有人同斯號
者也黃氏東觀餘論云資政邵公亢考次銘文首尾

文全亦止此百餘字爾而集古錄謂得六百餘字蓋
印書者誤以十爲百當時所得蓋六十餘字此銘相
傳爲王右軍書故蘇舜欽子美詩云山陰不見換鵝
經京口新傳瘞鶴銘文忠以爲不類王法而類顏魯
公又疑是顧况云道號同又疑是王瓚僕今審定文
格字法殊類陶宏景宏景自號華陽隱居今號真逸
者豈其別號與又其著真誥但云己卯歲而不著年
名其他書亦爾今此銘壬辰歲甲午歲亦不書年名
此又可證云壬辰者梁天監十一年也甲午者十三
年也按隱居天監七年東游海嶽權駐會稽永嘉十

一年始還茅山十四年乙未歲其弟子周子良仙去
爲之作傳卽十一年十三年正在華陽矣後又有題
丹陽尉江陰宰數字及唐王瓚詩字畫亦頗似瘞鶴
銘但筆勢差弱當是效陶書故題於石側也或以銘
卽瓚書誤矣王逸少以晉惠帝大安二年癸亥歲生
年五十九至穆帝升平五年辛酉歲卒則成帝咸和
九年甲午歲逸少方三十二至永和七年辛亥歲年
四十九始去會稽而閒居則不應三十二年已自稱
眞逸也又未官於朝及閒居時不在華陽以是攷之
此銘決非右軍也審矣董道廣川書跋黃伯思學士

以鶴銘示余世謂晉右軍將軍王逸少書歐陽公疑華陽居士唐顧况道號然逸少逋翁其書可見不與此類晉成帝咸和九年太歲在甲午逸少當三十二歲逮四十八年辛亥始去會稽其時未嘗至朱方華陽又非其郡邑所望不得以此爲稱顧况卒於貞元末當元和七年爲壬辰九年爲甲午良不及也上推壬辰歲爲天寶十一載况當兒穉其號華陽乎蓋貞元以後皆不合於此昔陶宏景嘗以其居華陽觀故自號華陽隱居或曰茅山碑前一行貞白自書與今銘甚異不得爲陶隱居書然華陽眞逸特其撰銘書

者上皇山樵也四人各以其號自別固不識其姓名
疑皆隱君子也又適自書其後云余於厓上又得唐
人詩詩在貞觀中已列銘後則銘之刻非顧况時可
知集古錄豈又並詩繫之耶趙明誠金石錄集古錄
華陽真逸是顧况道號徧檢唐史及况文集皆無此
號惟况撰湖州刺史聽記自稱華陽山人爾不知歐
陽公何所據也茗溪漁隱日集古錄疑前後有人同
斯號者西清詩話云余讀道藏陶隱居外傳號華陽
真人晚號華陽真逸此蓋同斯號矣集古錄又以字
不類羲之筆法而類顏魯公不知何人書也第蘇子

美黃魯直皆以此銘爲右軍書得非本潤州圖經而
言之故魯直云頃見京口斷崖中瘞鶴銘大字右軍
書以此觀之遺教經良非右軍筆畫也若瘞鶴銘當
爲右軍書使人不疑如歐陽評顏柳數公書最爲端
勁然纔得瘞鶴銘髣髴爾又嘗有詩云小字莫作疑
凍蠅樂毅論勝遺教經大字無過瘞鶴銘劉昌時蘆
浦筆記瘞鶴銘蔡端明以字有楷隸筆當是隋代書
而山谷乃斷然曰王書不疑何也今攷銘引雷門鼓
事案臨海記昔有鶴晨飛入會稽雷門鼓中於是鼓
聲聞洛陽孫恩斫鼓鶴乃飛去恩起兵會稽殺逸少

子疑之蓋在安帝隆安三年斫鼓必此時羲之豈肯
遽取以爲引證哉漁隱攷訂華陽真逸爲陶隱居推
原本末或庶幾焉蔡佑雜記古洲馬子嚴題云余淳
熙已酉歲爲丹陽郡文學訪此石刻初於佛榻前見
斷石乃其篇首二十餘字有僧云往年於厓間震而
墜者余不信遂拏舟觀厓間尙餘茲山之下二十餘
字波閒片石傾側因請於州將張子顏發卒挽出之
則甲午歲以下二十餘字偶一卒曰此石下枕一小
石亦覺隱指如是刻畫遂併出之文與佛榻所見者
同第闕二字而筆力頓異乃知前所見者爲寺僧所

給耳因摹數本以遺故舊近觀陶隱居諸刻反覆詳
辨知此銘真陶所書前輩所稱者衆矣惟長睿之說
得之鄭杓衍極蔡君謨曰瘞鶴文非逸少字東漢末
多善書惟隸最盛至於晉魏之分南北差異鍾王楷
法爲世所尚元魏閒盡習隸法自隋平陳中國多以
楷隸相參瘞鶴文有楷隸筆當是隋代書曹士冕曰
瘞鶴銘筆法之妙爲書家冠冕前輩慕其字而不知
其人最後雲林子以華陽隱居爲陶宏景及以句曲
所刻隱居朱陽館帖參校然後衆疑釋然其鑒賞可
謂精矣周暉金陵瑣事唐李石續博物志陶隱居書

自奇世傳畫版帖及焦山瘞鶴銘皆其遺蹟顧炎武
金石文字記銘與舊館壇碑正同其爲隱居書無疑
王澍竹雲題跋銘就石書左行題銘一行撰書姓名
一行序三行銘四行後欸三行凡一十二行當時以
就崖書石故其行之疎密字之多寡大小皆不整齊
又歲久磨滅斷續不可知其字數廣川書跋載南陽
張子厚所記計其完書蓋九行行之全者率二十五
字而首尾不與焉余案首尾旣不與則序三行銘四
行僅七行耳九字蓋誤今如張所記以二十五字爲
準則序三行第一行闕一十六字第二行闕一十一

字第三行末原文短二字僅闕九字銘四行第一行
闕一十七字第二行闕一十三字第三行闕一十二
字第四行原文僅六字今存四字僅闕二字後款三
行僅存一十三字共存字八十有八此亦只案其位
次約畧計之究竟歲久磨滅未可據以爲定自宋邵
資政亢以來諸家以意改正次爲全文是非莫辨皆
所謂不知而作吾無取也汪士鋐記瘞鶴銘攷後瘞
鶴銘書撰姓氏本無可攷卽華陽真逸與華陽隱居
偶同道號亦祇可懸擬爲宏景之文不當直定爲宏
景之書其書者固自署上皇山樵何從知其姓名而

一時道流皆各自別銜如真宰仙尉徵君卽銘詞所謂眞侶是也諸君匿迹逃名安可強指其人又其字體參雜篆隸六代皆然卽南北分界其書法亦未必不互相流傳何可定爲平陳以後南土始有此結體諸家議論紛紜余俱未敢深信夏之蓉跋金陵老友程南耕寄示張力臣瘞鶴銘辨書後一首云皮日休先字逸少後字襲美

見北夢瑣言

詩集內有悼鶴詩云卻

向人閒葬令威此瘞鶴之證也又一詩序云華亭鶴聞之久矣及來吳中以錢半千得一隻養之經歲不幸爲飲啄所誤而卒悼之不已遂繼以詩陸魯望和

云更向芝田爲乞銘此撰銘之證也又云襲美爲唐懿宗咸通八年進士崔璞守蘇辟軍事判官自敘以九年從北固至姑蘇咸通十三年壬辰僖宗乾符元年甲午襲美正在吳中其年相合集內與茅山廣文南陽博士詩皆不書其姓氏又憶華陽潤卿博士詩亦不書其姓魯望亦有寄華陽山人詩與刻華陽真逸上皇山樵丹陽仙尉江陰眞宰諸稱謂同所云得於華亭經歲卒與銘詞合文筆亦復相類集內他處稱丙戌歲庚寅歲皆不書年號又非獨貞白爲然也又云是銘疑爲襲美所作而華陽北固之閒無上皇

山之名惟會稽有之

南宋北陵奏云直以上皇青山之雄翼以紫金白鹿之秀豈

襲美以右軍遺跡在會稽而已亦字逸少遂假其名

以傳世歟向傳為右軍書亦非無故也右南耕之說

如此是又黃董陶張之外而別自為說者余雖未敢

遽信以為然然其言亦似可取

案皮襲美顧道士七弟子乞銘詩云大椿

枯後新為記仙鶴亡來始有銘正用瘞鶴銘事斷無以已事對莊子之理存此以備一說

大悲

亭即善財亭在山頂

了元有詩

吸江亭在山頂

見入蜀記

佳處亭在觀音厓取東坡為我佳處留茅庵句以名

天啟中郡守王秉鑑改建仰止軒祀楊忠愍公

軒後移水

品庵今又移建海西庵內

壯觀亭在山西西南明天順間郡守姚

堂建以上諸亭俱廢

不波亭即寺門有明胡纘宗書海不

揚波四字

問渡亭在山南

四面佛亭在東峯絕

頂其地舊有埒元大德二年建明初燬

見焦山志

寶蓮

閣宋釋了元建

元白有詩

烟雲閣明郭第建

以上二閣俱廢

藏經閣在佛殿後貯明所賜藏經有正統十年二月

萬曆二十七年三月兩賜藏經敕諭

觀音閣在觀

音厓

松寥閣舊名松寥山房

文殊閣

以上二閣在佛殿東

石壁庵內有宋寶佑甲寅張卽之書金剛般若波

羅蜜經康熙乙巳重摩勒石邑人笱重光跋尾 滄

雲庵內有寶墨亭

案郡治後寶墨亭有陀羅尼經幢唐王奂之集宗祖右軍將軍書三

山東易
名雲深

朱蘇軾題焦山綸長老壁詩法師住焦山而實未
嘗住我來輒問法法師了無語法師非無語不知
所答故若看頭與足本自安冠履譬如長鬣人不
以長爲苦一旦或人問安睡無所措歸來視上下
一夜無著處展轉遂達晨意欲盡鑷去此言雖鄙
淺亦故有深趣持此問法師法師一笑許 汪藻
宿焦山方丈詩明發理烟艇歡言濟遙岑盤渦沸
風雨稍辨鐘磬音行行並疎柳迎客多幽禽扶輿
上犖确始見江湖深臺殿明海色嵌空憶龍吟修

廊延客步妙香慰人心遐眺未云極千巖忽秋陰
孤月欲出嶺諸天悉浮金茲游信奇絕况接支道
林夜語不知旦虛窗對橫參人閒驚毫末物外雄
窺臨稽首悟真理微生安所任蒼崖有奇字霜乾
約重尋 吳琚游焦山觀瘞鶴銘詩昔愛山樵書
今踏譙山路江邊春事動梅柳皆可賦犖磴石徑
微白浪灑衣履臨淵魚龍驚捫厓猿鳥懼古刻難
細讀斷缺蒼蘚護歲月豈易考書法但增慕摩挲
發三歎欲去還小住習氣未埽除齒髮恨遲暮華
亭鶴自歸長江只東注寂寥千古意落日起烟霧

林景熙詩山裏中流水作林寶蓮鰲背翠沈沈
半空但覺烟嵐合三面不知風浪深仙井浴丹闌
曉日海門浮玉澹秋陰洞深瑤草無人采瘞鶴殘
碑浸碧潯 元薩都刺焦山方丈題壁詩江風入
霜林寒葉下疎雨蕭蕭復蕭蕭可聽不可數山僧
亦好奇呼童埽行路到處覓秋聲肩輿入山去
明姜垓仰止軒弔楊忠愍詩太常鼓舵大江濱頽
宇書題白練羣六義風流今不減十行封事未全
焚原因報國成忠愍翻似完身傍隱君獨有兩賢
真出處蒼茫常鎖嶺頭雲 國朝王士禛焦山古

鼎歌海雲堂中暮相索古鼎照人光駁犖龍文獨
許吾邱知篆銘畧辨周京作宛同石鼓出陳倉那
數銅狄傳西洛韓公摩挲指向余會人秦家格天
閣雲烟過眼已成虛劔去珠還事堪愕安陸飛龍
亦英主元修晚慕軒轅樂一德何人日相嵩金鉉
只用青詞博朝廷仍收養士報楊沈謇謇如鵬鶚
鼎鐺有耳豈不聞恥向迴風作秋籟萼山先生斲
養耳紛紛冠蓋多酬酢當時不鄙趙師弄於今誰
憐賈秋壑從來鑄鼎戒饕餮此物胡爲亦遭攫山
頭尙有椒山詩三尺古碑墨光錯隻字重於神禹

金猶向山林辟不若老奴真欲愧歐陽廿載鈴山
空寂寞培壘已拉冰山摧有鐵誰能鑄此錯徘徊
三歎軒几旁極目江天莽寥廓 又王士正詩曉
入枯木堂怪禽驚翩翩清露滴松杪下見古鼎蹲
寶光耀昆吾中有飛廉魂上文爲雷回下文爲雲
紘猙狀饕餮伏兵氣蚩尤昏辛壬與丁甲世次迷
夏殷初疑周虎彝復惑虞雖敦尊從不可辨牛豕
誰能論瑰怪壓繚鼎譎詭旅紀獻蛟龍雜蝌蚪五
指不敢捫在胙想鬣鱗識字驚蜒蜿月黑鬼神泣
峽東波濤奔籀書失趨蘊斯篆慙親朝史游已久

沒皇象不復存不遇博雅流孰爲洗煩冤諒比岐
陽狩或同泗水淪山僧與道古感激聲還吞分宜
昔枋國氣勢傾崑崙斯鼎出京口上燭光綢繆役
使萬指衆負戴千蹄健大哉宗廟器詎屑豪貴門
威力鎮禪窟寂寞歸祇洹午夜鳴鐘魚清晝啼林
猿閱人恒河劫如彼蝨在禪我昔訪焦先望氣吟
不言五年隔揚子無翻思騰騫吾兄癖好古八書
探河源三日松寥游坐臥忘囂喧扁列折螺書卷
尾拽蠶文作爲奇偉辭大海搏鵬鯤春江壯風霆
響激雲濤渾三歎繼高唱海門上朝暾 又張玉

書詩海風吹雲捲枯木星斗離離光夜燭虛堂古
鼎蛟螭蟠精熒鬱律駭心目獐豸距地二尺餘百
乳雙夔銘在腹甲戌紀日不紀年召史受刑錫鞶
服蚪斗省識七十八剝蝕癢胝難卒讀齊鐘宋絲
那足擬已爵丁卣差比躅器欸未入宣和圖奇文
遺載金石錄當時收藏好古家青詞相公恣貪黷
一朝攫取渡江水江濤晝黑神鬼哭寶物恥爲饕
餮用過眼須臾覆公餗此鼎復溯江流回棲託僧
寮氣蕭穆春風霽日映珠纓秋雨澄波對松菊吁
嗟鈴山已蕪萼山枯椒山石峙焦山麓年年古鼎

壓驚濤江峯千載無傾覆 朱彝尊焦山剔銘圖
爲王副使煥作華陽真逸昔瘞鶴井穴乃在焦山
根銘文不省誰氏作紀年第有千支存審視要非
唐後勒昔年曾與張弼論茲山不與浮玉伍其地
僻左希攀援旋渦轉湍奔溜急沐日浴月驚濤翻
峯坳集海舶浪齧藏江狔銘辭汨沒露日少誰揭
地戶開天門丈人守靈威真官降趙尊若非神人
護遺蹟安可捫蘆臺王君信好事躬自荷鍤操犢
禪剝苔剔蘚竟深入先以前趾次尻臀手摸其文
無闕失一紙價已當瑤琨西江道士爲傳寫衣袂

尚帶寒潮痕惜哉轅馬且北去山游未遂栝與溫
何年金石共搜討疑義相析窮其源 汪士鋐陳
滄洲太守出瘞鶴銘於江中以榻本見示作歌焦
山山崖瘞鶴銘雷擊墜江江冥冥一旦水底出至
寶神物焜耀含精靈此碑書家最珍惜欲搨恐犯
蛟龍腥致令贖本遍天下刻畫嫫母誇娉婷或傳
此是右軍跡逸少二字疑足徵或云宏景或顧况
未睹真跡憑圖經滄洲使君好古士搜奇抉怪心
無寧竭來江邊問遺碣太息墨寶存空亭時當窮
冬江水涸巉巖洗刮平沙汀或側或仆露奇字磊

落散布如天星命工昇石置江岸殘筆剩畫稀留
形重依舊石定方位安排字跡還儀型屹如陰崖
立華屋恍然峭壁開新劂字體寬綽近古隸鋒稜
雖剗光晶瑩睇視山中宰相筆齊梁風格我所憑
何年埋沒忽露洩水府倏忽仍邱陵吾吳太守素
神異驅使直可到六丁狼貪虎噬且弗避麾斥水
怪如蠖蜒世閒寶物久必顯雲日肯被烟塵暝扶
傾固待巨人手此舉便已喧驚霆遠道寄我喜創
見從今摹畫希精能此石此銘不再得毋使日夜
椎搗無留停 又法重正詩姑蘇太守瀟湘客隻

手常操補天石衝波逆浪來海門海底先禡毒龍
魄圖汝之北松寥巔華陽鶴蹟垂千年阿香車來
收寶物穹碑一旦沈深淵鼉鼉鬣鬣共相戲百丈
龍宮永幽閉輓昇不有有力人赤文綠字終沈淪
姑蘇太守膽如斗驅鱷除蛟施巨手渚犀夜然天
四青燭幽起頽攪海腥神明奕奕還舊觀精采躍
躍通仙靈焦公傅公兩相守勿任風雷薄蚪蚪朱
方鶴化夜歸來裂竹一聲江月走

案北固金焦有京口三山之目三山勝蹟最多
名又最著故特志於諸山之前

京口山水志卷三

京口山水志 卷三

三

三ノ二

三ノ二

京口山水志卷四

丹徒楊棨譔

丹徒山

徐陵太平寰宇記南徐州記云京口先爲徐陵元和郡縣志漢獻帝建安十四年孫權自吳理丹徒號曰京城今州是也按州理古名京城說者以爲荆王劉賈嘗都之或言孫權居之故名京城今按荆字旣不同又孫權未稱尊號已名爲京則兩說皆非也京者人力所爲絕高邱也亦有非人力所爲者人力所爲者若公孫瓚所築易京是也非人力所爲者滎陽京索是也今地名徐

陵卽此京非人力所爲也京上郡城城前浦口卽是京

口案京口依山爲城徐陵卽城下之山猶之京口爲城前浦口後遂以爲郡之統名也胡三省通

鑑注此京取爾雅邱絕高曰京之義王應麟通鑑地理

通釋吳築城因京峴號爲京鎮

案據此徐陵卽京峴之枝獻帝春秋

劉備至京謂孫權曰吳去此數百里卽有驚急赴救爲

難將軍無意屯京乎權曰秣陵有小江百餘里可以安

大船吾方理水軍當移據

嘉定鎮江志吳先都京後三都建業京口亦謂之京

國志吳書魯肅傳備詣京求都督荊州惟肅勸權借之

共拒曹公又孫權傳黃武元年曹休使臧霸以輕船五

百敢死萬人襲攻徐陵又華覈傳覈封徐陵亭侯又孫

皓傳天紀三年陶濬爲徐陵督又孫韶傳孫楷代弟越
爲京下督又顧承傳承領京下督嘉定鎮江志晉元帝
渡江都建業乃於京口僑置徐兗州永嘉之亂兗州淪
沒徐州所得惟半流人相率渡江淮者帝並立僑郡縣
司牧之徐兗二州或居江南或居江北後雖徐州或鎮
下邳或鎮盱眙姑孰然皆置留局於京口時號爲北府
京口在建業東北名爲北府
亦猶姑孰在南名爲南州

郡城周十三里卽吳京城故基三國志吳書孫韶傳
伯父河爲將軍屯京城媯覽戴員殺河韶年十七收
河餘衆繕治京城起樓櫓權聞亂引軍歸吳夜至京

城試攻驚之兵皆乘城傳檄備警曉諭乃止晉書郗
鑒傳劉徵聚衆抄東南諸縣鑒城丹徒討平之齊志
京城因山爲壘望海臨江新唐書王璠傳璠爲浙西
觀察使鑿潤州外隍至順鎮江志元初凡郡之有城
郭皆撤而去之以示天下爲公之義明一統志太祖
以元帥耿再成守鎮江依舊址重築洪武元年指揮
宋禮請於朝螿以甌石 國朝康熙元年將軍劉之
源修雍正元年將軍王鈇等重修道光二十一年居
民請修高其樓櫓明年六月英夷突至城毀越一年
復修

國朝王鈇重修郡城記鈇欽承 簡命來駐於鎮
遂有督修城垣之役是役也承修之員爲原任翰
林院侍讀學士惠士奇原任直隸布政使司楊紹
原任兩淮鹽運使司范廷謀也三人者先後至而
急公趨事以次有加城故周圍十三里高准二丈
九尺殘缺幾遍今相度經營若者拆造若者補修
自城墻以迄四門月城北門夾城合二千八百四
十餘丈而無一可遺其女墻一千四百一十五座
及內外甕城十座城樓八座水關水門樓各二座
角樓二座亦拆補兼舉而新者倍之又添置望江

樓一座平臺一座柵欄二十二座更鋪四座其城
之四門東曰朝陽西曰金銀南曰虎踞北曰定波
仍舊名也門各二重獨於西而三之以重濱江捍
衛更別立一小門通其輻輳而分其雜遝因舊制
亦宏舊規也通計力作十六萬工需貲四萬有奇
肇修於雍正己酉之秋至乙卯夏而城始完備費
無虛冒役無科派料不苦窳工不儉縮爲時久而
程工亦倍密矣

唐邱爲登潤州城詩天末江城晚登臨客望迷春
潮平島嶼殘雨隔虹霓鳥與孤帆遠烟和獨樹低

鄉山何處是日斷廣陵西 劉長卿登潤州城樓

詩山城迢遞敞高樓 露冕吹鐃居上頭 春草連天

隨北望夕陽浮水共東流 江天漠漠全吳地 烟樹

茫茫故蔣州 王粲尙為南郡客 別來何處更消愁

子城至順志吳大帝所築周廻六百三十步內外固

以甄號鐵甕城 東西夾城唐時所築 唐進士桑華有東西夾城

石 子城門四東曰望春 後改東海 南曰鼓角西曰欽賢

北門名未詳 門在府治後 東夾城門二南曰建德 後改朱方

西曰清風西夾城門二東曰千秋 後改鐵甕 西曰崇化 後改

高 子城夾城今皆無存 案程大昌演繁露潤州城古

號鐵甕人但知其所喻以堅而已然甕形深狹取以
喻城似爲非類乾道辛卯予過潤蔡子平置燕於江
亭亭據郡治前山絕頂而顧子城雉堞緣岡彎環四
合州治諸廨在焉員深之形正如卓甕始知喻以爲
甕者指子城也

羅城嘉定鎮江志通鑑乾符中周寶爲鎮海節度築
羅城城周迴二十六里十七步高九尺五寸舊有十
門東二門北曰新開南曰青陽南三門東曰德化正
南曰仁和西曰鶴林西二門南曰奉天一號北曰朝

京淳熙戊申守臣張北三門西曰來遠東曰利涉次

子顏改曰還京

東曰定波 太平廣記周寶治城隍至鶴林門內得至古塚又唐書本傳寶自青陽門出奔

順鎮江志嘉定甲戌郡守史彌堅作新門七日通津

甘露跨鼇東山虎蹲馬巷放鶴咸淳中已廢其五存

者仍有十二東曰青陽 去府治二里 南曰南水通吳仁和

中土 並去府治八里 西曰登雲 去府治八里 北曰定波 去府治八里 西

南曰鶴林放鶴 並去府治七里 西北曰還京 去府治七里 東北曰

利涉 去府治一里 通津 去府治四里 今皆廢

宋史彌堅重修土城記南徐會府軍民廬井星列

棊布子城僅周府寺而外無羅郭舊嘗築垣設門

薄示禁防自禦前分屯七軍十有七寨其倚郭者

各爲門以便出入而居民參錯千徑萬隧散無有
紀郡之西北直際大江無復橫草之限剽劫闖闖
往歲薦有鼠聚鳥散踪跡易失爲守者蓋通病之
將大築其城則役鉅費廣熟眠而莫敢議將補其
疏闕而羅絡之則東鱗西隙漫不得其要領因循
廢弛以至於今余來守是邦深惟重閉之議日營
心度念之不忘會有旨開濬漕渠及歸水澳乃以
餘力疏甘露港鑿轉般護倉壕引水環於西北屈
水之所止而立之門曰通津循水而東作門於北
固亭之北曰甘露之南曰跨鼇於是向之際江

而往來者始有限制遂周眠其餘而經理之凡舊城之圯者墻而塞之因軍民之便相地勢之宜作新門於其所必由之塗其旁軼挺出不可墻者西南則廢薛家池門溝斷之而門其兩端曰東山曰虎蹲稍南則撤鶴林東籬門垣屋之而更其名曰放鶴東南則廢妙喜寺土門保伍之而移其門於馬巷因之爲門曰馬巷門前軍夾刺門及榕材隊門幽僻特甚姦穴所囊索也則又溝之以絕其所趨後軍北草門與東土門相比則塞之以歸於一蓋新作之門七廢者五諸軍穿垣而出因之以爲

城門者十有一前軍曰東山門曰東寨門後軍曰馬軍東土門曰花山門曰東寨門曰南寨門中軍曰南土門左軍曰西水門曰南寨門右軍曰高山門遊奕軍曰西山門城之舊門見於圖經者八東曰青陽南曰通吳曰仁和西南曰鶴林西曰登雲曰還京北曰利涉曰定波凡門二十有六悉置州兵司啟閉以誰何之然後異戶殊轍渙焉四出莫不會歸於經塗雖未能增高浚深壯金湯之勢然昭明限闕使民有所底止視昔固有間矣夫申關譏謹封守郡之常職也而廢置之自則不可以不

嚴既以其事聞之於朝茲庸詳書俾來者有考

日精山在府治東府學內

學舊在山南明景泰壬申遷此

府學

臧熹傳

嘉定鎮江志載學校門之首

宋高祖鎮京口與熹

書曰頃學尙廢弛後進頽業衡門之內清風輟響良由戎車屢警禮樂中息浮夫近志情與事染豈可不敷崇墳籍激厲風尙此境人士子姓如林明發搜訪想聞令軌然荆玉含寶要俟開瑩幽蘭懷馨事資扇發獨習寡悟義著周典今經師不遠而赴業無聞非唯志學者鮮或是勸誘未至耶想復宏之 臧榮緒純篤好學隱居京口教授南徐州篤愛五經序論嘗

以宣尼生庚子日陳五經拜之案本傳榮緒與關康之俱隱在京口時號

為二諸葛璩世居京口天監中太守蕭琛刺史安

成王秀鄱陽王恢甚禮異焉性勤於誨誘後生就學

者日至居宅狹陋以容之太守張友為起講舍日

夕講誦不輟鎮江有學始於太平興國五年冬柳

開自常移潤八年秋乃發舊創新告遷夫子之廟見嘉

定志張扶重修學記至順鎮江志學麟鳳碑嘉定

志在講堂壁間今在訓導署乾道壬辰春教官熊克

因閱漢碑取麟鳳二瑞圖而贊曰麟胡為來有王者

起曠代一獲魯狩漢時聖賢感之經絕史止于嗟麟

兮維其時矣有道則見鳳何爲藏儀韶鳴岐千載相
望逮時之衰歌聞楚狂德備舜文覽輝其翔至順志
慶元四年教官陳德一易之以石嘉熙中教官劉卿
月又符四靈圖於應天府墓刻於大成殿西廡麟鳳
二贊與熊直院所傳正同其龍之贊曰或潛或躍龍
稱其神爰飛在天易況大人名師命紀瑞應昌辰類
孰從之祥風慶雲龜之贊曰天下有道神龜出焉背
書脅文光昭後先謂何千載游於芳蓮得氣致和維
以永年

龍龜二石今佚

李西臺詩禹迹圖

教授俞篋依長安刊本重校立

石王荆公手帖潤守許遵詩並在講堂之壁

見嘉定志今佚

宋蔡杭書致廣大盡精微極高明道中庸十二大

字見曹昭格古要論今佚

日觀在山上宋嘉定間郡守趙善湘建至順志

光風霽月亭在山上舊在黃鶴山周濂溪先生祠明

郡守張巖重建於此

陳修撰祠宋慶元中教授陳德一建於學之西序內

有石刻修撰手書建炎初第三諫草學遷祠未重建

月華山在府治西下有萬歲嶺

萬歲樓在山上太平寰宇記京口記云晉王恭為刺

史改創西南樓名萬歲樓西北樓名芙蓉樓樓之最

高者又輿地志云俗傳此樓飛向江外以鐵鎖縻之方已一名月觀陸游老學庵筆記京口子城西南月觀在城上或云卽萬歲樓京口人以爲南唐時節度使每登此樓西望金陵嵩呼遙拜其實非也京口記云晉王恭所作唐孟浩然有萬歲樓詩見集中

宋汪藻月觀記京口以江山名天下其來尙矣而國家屏蔽尤重於晉宋齊梁之間觀其千嶂所環中橫巨浸風濤日夜駕百川而東之其形勝之雄實足以控制南北豈直爲騷人羈客區區登覽之勝哉州治之西有樓焉並城而出名曰千秋者考

諸圖志始於晉王恭之時由樓西南循城百餘步
忽飛簷曲檻峩然孤起於城隅之上望數百里見
之者月觀也紹興八年吳興劉岑季高來刺是州
州承廢亂之後公私掃地無復故時季高以精明
強敏之才易民觀瞻於譚笑之頃旣府寺間井鳩
集經營悉復其初始遑暇於游息之地乃卽月觀
之址輯而新之客有登而歎曰嗚呼壯哉未之見
也前此頽蕘圯棟蕪沒於蒼烟灌莽之中雖江山
不與時變遷者亦莫吾覲今晨霏夕靄晴嵐烟翠
復得於几席之上而風颿浪舶離鴻落鷺畢陳於

樽俎之前如客得歸如蒙得發也季高於此可謂能矣非政有餘力能如是哉或曰是未足言季高之政也季高勞於侍從之事出分天子西顧憂方時艱難此州實爲襟要其經理規模必有足大者嘗與子四顧而望之其東曰海門鳴夷子皮之所從游也其西曰瓜步魏佛狸之所嘗至也若其北廣陵則謝太傅之所築埭而居江之中流則祖豫州之所擊楫而誓也計其一時英雄慷慨憤中原之未復反寇之未禽欲吞之以忠義之氣雖狹宇宙而隘九州自其胸中之所積亦江山有以發之

方
今攬而納諸數楹之地使千載之事了然在吾目
中則季高之志可知矣然自有天地則有山川其
閱人多矣而山川勝處非人不傳襄陽峴首以羊
叔子傳武昌南樓以庾元規傳蜀人籌筆驛以諸
葛武侯傳吾知月觀與季高之名籍籍天下矣姑
書其本末以補京口故事之遺使後人知此觀復
新自吾季高始豈不益可喜季高曰可哉

唐孟浩然詩萬歲樓頭望故鄉獨含鄉思更茫茫
天寒雁度堪垂淚月落猿啼欲斷腸曲引古隄臨
凍浦斜分遠岸近枯楊今朝喜見同袍友却喜家

書寄八行 王昌齡詩江上巍巍萬歲樓不知經
歷幾千秋年年喜見山常在日日悲看水獨流猿
狄何曾離暮嶺鷓鴣空自泛寒洲誰堪登望雲烟
裏向晚茫茫發旅愁 皇甫冉詩高樓獨上思依
依極浦遙山合翠微江客不堪頻北望塞鴻何事
又南飛丹陽古渡寒烟積瓜步空洲遠樹稀聞道
王師猶轉戰誰能談笑解重圍 國朝王士禛萬
歲樓程崑崙別駕招飲詩干尋江閣引諸峯夕景
登臨策短筇參佐風流如謝眺樓臺瀟灑憶王恭
三年夢裏西津雨五夜燈前北固鐘明日芒鞋別

君去城中遙望白雲重

芙蓉樓與萬歲樓對

詳見上

一名千秋樓

見汪藻月觀記今廢

唐王昌齡芙蓉樓送辛漸詩二首寒雨連江夜入

吳平明送客楚山孤洛陽親友如相問一片冰心

在玉壺丹陽城南秋海陰丹陽城北楚雲深高樓

送客不能醉寂寂寒江明月心 崔峒詩上古人

何在東流水不歸往來潮有信朝暮事成非烟樹

臨沙靜雲帆入海稀郡樓多逸興良牧謝元暉

譙樓在山東隅府治前郡志在子城上宋端平丙申

郡守吳淵建

江亭在山絕頂

見程大昌演繁露今廢

漢荆王賈墓在山下府治東荆王廟後太平寰宇記

澗州漢初為荆國故荆王劉賈所都之地今郡城中

賈墓尚存

荆王廟至順鎮江志在府治後圃

案廟今在

治東蓋明時移建

輿地紀勝有唐先天二年碑

城隍忠佑廟在山南

宋陸游鎮江府城隍忠佑廟記漢將軍紀侯以死

脫高皇帝於滎陽之圍而史失其行事司馬遷班

固作傳弗載也維宋十一葉天子駐驂吳會改元

乾道正月甲子右中奉大夫直敷文閣知鎮江府

方滋言府當江淮之衝屏衛王室號稱大邦自故
時祠紀侯爲城隍神莫知其所所以始然實有靈德
以庇其邦之人禱祈禳禱昭答如響紹興隆興之
閒北兵入塞金鼓之聲震於江壩而吏民不知所
爲則惟神之歸雖北兵畏天子威德折北不支退
舍請盟府以無事至於流徙蔽野兵民參錯而居
處弗驚疾癘以息則神實陰相之吏其敢貪神之
功以爲己力乎謹上尙書願有以褒顯之以慰父
兄子弟之心越三月癸丑有詔賜廟額曰忠祐詔
下而方公爲兩浙轉運副使右朝散大夫直徽猷

閣呂公擢來知府事侈上之賜五月癸亥大合樂
盛服齋莊恭致上命神人協心霧雨澄霽雲風肅
然來饗來臨於是呂公以屬某曰願有紀焉某惟
紀侯忠奮於一時而暴名於萬世功施於漢室而
見褒於聖宋身隕於滎陽而血食於是邦士惟於
力爲善而已豈有有其善而不享其報者乎吏之
仕乎是邦者必將有事於廟有事於廟者必將有
考於碑其尙知所勉焉毋爲神羞

壽邱山在府治南

丹徒宮陳沂南畿志在鎮江府城南宋武帝微時宅

也入蜀記壽邨者宋高祖宅有故井尙存焉南史宋武帝紀帝微時躬耕於丹徒及受命耨耜之具頗有存者命藏之以留於後及文帝幸舊宮見而問焉左右以實對文帝色慙有近侍進曰大舜躬耕歷山伯禹親事土木陛下不覩列聖之遺物何以知稼穡之艱難何以知先帝之至德乎又文帝紀元嘉四年二月幸丹徒謁京陵三月幸丹徒宮帝鄉父老咸與焉二十六年二月己亥幸丹徒三月丁巳宴於丹徒宮癸亥使祭晉司空忠肅公何無忌墓又順帝紀昇平三年四月辛卯禪位於齊壬辰遜於東邸是日封帝

爲汝陰王居丹徒宮

案鶴林寺相傳亦武帝宅寺前有井俗謂之寄奴泉考南史本

紀帝嘗游京口竹林寺寰宇記云宋高祖潛龍時游竹林寺有黃鶴飛舞因改爲鶴林寺寺爲武帝游息之所非卽其宅也梅聖俞鶴林寺詩傳聞宋武帝舊宅爲茲寺蘇東坡游鶴林寺詩劉裕宅邊霜竹老或別有據詳後黃鶴山

宋孝武帝巡幸舊宮頌惟皇敬眷永慕徐京列裝

青野動軌丹廷榮和首律景澤開年林垵發色川

郊列泉沿溯遙衍登陟回旋踐域負外卽宮臨山

思申陵寢歡結粉都渺懷沛濟勤念宛吾納壽遺

老設飲先居堂序朝秀廷集里閭 梁沈約爲柳

兗州世隆上舊宮表舊宮蘊靈千古合祥百代萬

東正山九元
名
祇相社入神警室事超齊甸義邁譙宮故能屬輦
道於天階命帝闕於霄路實宜樹闕疏壤寫極上
穹克播徽塵永光盛烈 又丹徒舊宮頌聖祖神
傑堯蹤漢烈岳峻雄圖天張武節墜命旣升霸畧
將騁清渭走烽濁河獻警恃峭劍關憑深桂嶺尋
章委闕禮樂沈河拯壓傾構引溺危波盡物稱瑞
窮靈委和懸精翼日丹羽巢阿

朱鮑照從過舊宮詩肅裝屬雲旅奉鞠承末塗巖
恭履桑梓加敬覽枌榆靈命蘊川瀆帝寶伏篇圖
虎變由石紐龍翔自鼎湖功冠生民始道妙神器

初宮陛留前制歌思溢今衢餘祥見雲物遺像存
陶漁泉流信清泌原野實甘茶豈伊愛艷鄙天險
兼上腴東秦邗北門非親誰克居仁聲日月懋惠
澤雲雨敷盧令美何歇唐風久不渝微臣逢世慶
征賦備人徒空費行葦德採束謝生芻 宋林景
熙宋武帝居今爲壽邨寺詩青衣夢破滿林烟一
擲乾坤亦偶然僧屋翠微看月上江山猶似永和
年 國朝王士正丹徒行弔宋武帝詩曲阿之北
京口東寄奴王者真英雄新洲伐荻殺龍子大業
遂建丹徒宮桓家小兒亂天紀投袂勤王夜中起

糶蒲百萬皆人豪龍行虎步非凡理從茲大運屬
彭城中原趙魏歸經營峽口千軍五龍涸藍田一
戰二嶠平南北推移幾千載太息雄圖竟何在宿
麥寒原少昔人神鴉社鼓成空塞王氣銷殘帝宅
荒悠悠江水不勝長忠臣徒歎袁開府天命還歸

蕭建康

附

京口里南史宋武帝紀帝諱裕字德輿小字寄奴
彭城縣綏里人姓劉氏晉氏東遷移居晉陵丹徒

之京口里

案寰宇記京口里在縣西鄉今無其名亦無武帝居址疑卽在壽邱山

普照寺在山上至順鎮江志宋高祖故宅至陳立寺

名慈和唐張祐許宋號延慶曾鞏詩自注延慶寺者

後更名普照人蜀記郡集衛公堂後圃飲半登壽邨

普照寺終宴寺本名延慶隆興中復泗州有普照寺

僧奉僧伽像來歸寓焉因賜名普照寺僑置僧伽道

場東望京山連亘抱合勢如繚牆宮寺樓閣如畫西

闕大江氣象極雄偉也寺今廢案宋分普照寺地為

今其地猶名寨上嘉定鎮江志乾道六年五月奉旨

鎮江府駐劄御前諸軍以前右中左後水遊奕七軍

稱呼至順志紹興罹兵屯大軍於江上先時公卿甲

第與夫名勝之蹟率為營寨所占穿鑿殆徧郡守劉

子羽嘗日子若早來則當置諸塞於新豐
蓋新豐地平如掌庶不至壞江山之形勢

唐張祐秋夜登潤州慈和寺上方詩清夜浮埃歇

井廬搶輪金照露華鮮人行中路月生海鶴語上
方星滿天樓影半連深岸水鐘聲寒徹遠林烟僧
房閉盡下山去一半夢魂離世緣 許渾慈和寺

移宴詩高寺移清宴漁舟繫綠蘿潮平秋水濶雲
歛暮山多廣檻停簫鼓繁絃散綺羅西樓半牀月
莫問夜如何 宋曾鞏延慶寺會景純正仲希道
介夫明叟納涼同觀建鄴宮中畫像翰林墨蹟詩
禪方壽邨山平昔宋公宅好風吹雨來暑氣一蕩
滌我與二三友歡然同几席神清軼埃壒趣合盡
肝膈嶺竹翠尙新水花紅可摘以此侑樽酒隕然

岸巾幘建鄴舊丹青金鑿餘翰墨綽約桃李顏超
遙龍虎跡紆矣霸王業信哉文章伯感古已躊躇
慕奇復歎息泊無勢利心自覺襟慮適起坐相扳
牽遲留日將夕 孫覲京口普照寺詩敗屋茨生
草崩崖蔓老藤布金無長者持鉢有殘僧撥刺魚
跳釜睚盱鼠瞰燈炎炎三伏暑岑絕冷如冰

縣學至順志在縣治西儒林里

祥符圖經夫子廟在縣西三里是時尙未

立學州縣有學自慶歷間始

邑志明嘉靖初移建山下蓋龍華寺

址內有宣聖小影碑唐吳道子筆宋紹聖二年孔宗
壽記元延祐四年新安于泰來勒石 趙子昂小楷

度人經格古要論宣德初鎮江元妙觀道士得之士
中今在丹徒縣學經後云皇慶元年春正月九日三
教弟子趙孟頫書有翰林學士袁梅跋其字又小

范文正公祠在縣學內

至順鎮江志宋寶元中范文正仲淹守潤州新廟學請賜

以閒田聘江南處士李覲以教養其州之子弟邦
人士深德之立祠於學見王存范文正公祠堂記

宗忠簡公祠在范公祠後舊在山北明正德三年侍

御謝琛請建靳文僖貴有記崇禎乙亥邑令張文光

改建於此李長科有記 國朝康熙四十二年 賜

額忠藎永昭乾隆十六年 賜額丹忱貫日

案范公宗公二

祠始皆建於府學見嘉
定鎮江志後移於此

明楊一清拜宗忠簡公祠詩宋家國運當陽九金
人南來帝北走臨戎盡瘁賴有公收拾中原惟一
手堪嗟事半業未成三軍慟哭星墜營上爲日星
下河嶽忠魂耿耿猶平生廟貌衣冠至今在譜牒
璽書藏不沫靈旗彷彿渡河時白馬猶將復燕代
臨安宮闕半林臯豺狼聚兮狐狸嗥獨有公祠永
千古入門稽首豐碑高 又費閭詩悅安社稷豈
狂顛千里東京一旅肩勢可進圖成再造誰期屢
疏不西旋拔才共事惟忠義憂國忘家合聖賢今
日壽邱猶有廟無慚配享泮宮前

餽頽山在府治西南城隅太平御覽京口記曰山周迴

二里餘

案嘉定志作唐頽又作塘
堤今僅餘一阜上有關廟

郗鑿宅太平御覽京口記曰餽頽山南隔路得郗鑿

故宅五十餘畝

積弩堂嘉定鎮江志輿地志云唐頽山西有宋武帝

積弩堂

志又云武帝之破盧循也軍中
多萬鈞神弩所至莫不摧陷

戴公園在山下相傳戴仲若別業

羅漢寺在山上內有風漪軒宋蘇庠有詩見至順鎮

江志今廢

蘇庠題唐頽山風漪軒詩竹陰旣疎朗流泉復清

駛佳響聞山泉涼風澹然至幽人此安禪閱世一
遊戲何必周八垠是中有能事

乾元萬壽宮在山西瓶場巷元大德五年道士余以

誠建

至順志本宋安撫畢再遇故宅

眉公秘笈萬壽宮舊有玉冠度

人經石板古簫趙孟頫書神牌七十六位大楷書松

江袁履善嘗欲集入子昂碎金帖未果後遭回祿今

俱不存止存張上卿像贊石刻度人經上卿碑銘叙

俱趙文敏書

鎮海營在山下

鎮海八旗官兵順治十二年屯北固山下十六年復設重鎮移駐於此乾隆

二十八年鎮海軍罷兵皆爲民分江寧蒙古兵千六百戍京口以副都統領之軍營仍舊

張玉書過鎮海將軍營詩六纛雙旌隱畫扉月明
霜白路人稀燕歸不識將軍壘猶認烏衣舊宅飛

城守營教場在山南

紫金山在府治西南大市山東有駱駝嶺

嘉定府志山當市中心四圍

民居案今營內關廟後高阜卽山址也

錢家山在紫金山南

楊一清宅在山下宅南有別業名待隱園明史本傳

一清請骸骨歸賜敕褒諭給夫廩如制帝南征幸其
第樂飲兩晝夜賦詩賡和以十數一清從容諷止帝
遂不爲江浙行

王守仁楊邃庵待隱園詩嘉園名待隱專待主人
歸此日真歸隱名園竟不違巖花如共語山石故
相依朝市都忘却無勞更掩扉 大隱真壓市名
園陋給孤留侯先謝病范老竟歸湖種竹非醫俗
移山不是愚對時存燮理經紀自成謨 綠野春
深地山陰夜靜時冰霜綠逕滑雲石向人危平難
心仍在扶顛力未衰江湖兵甲滿吟罷有餘思
茲園聞已久今度始來窺市裏烟霞靜壺中結搆
奇勝游須記日虛席亦多時莫道東山僻蒼生或
未知 芳園待公隱屯世待公亨花竹深臺榭風

塵暗甲兵一身良得計四海未忘情語及艱難意
停盃淚欲傾

楊文襄公祠在公宅旁

靳貴宅在楊文襄宅南靜志居詩話靳文僖康陵舊
學南巡時臨其喪命詞臣撰祭文皆不稱旨御製云
朕居東宮先生爲傅朕登大寶先生爲輔朕今南巡
先生已矣嗚乎哀哉代言者歎息斂手

達家山在府治東山南有烏風嶺

京口山水志卷四

京口山水志卷五

丹徒山

京峴山在城東五里通典丹徒有京峴山太平寰宇記
吳錄地理云朱方後名谷陽秦望氣者云其地有天子
氣始皇使赭衣徒三千人鑿京峴南坑敗其勢故云丹
徒王應麟通鑑地理通釋吳築城因京峴號爲京鎮乾
隆壬午

高宗南巡經此山有御製詩

宋鮑昭從拜陵登京峴詩孟冬十月交殺盛陰欲

終風烈無勁草寒甚有凋落軍井冰晝結士馬羶
夜重晨登峴山首霜雪凝未通息鞍循隴上支劍
望雲峰表裏觀地險升降究天容東嶽覆如礪瀛
海安足窮傷哉良永矣馳兪不再中衰賤謝遠願
疲老還舊邦深德竟何報徒令田陌空

秦始皇馳道江南通志金陵志云始皇三十六年東
游至金陵斷山疏淮由江東丹徒往會稽

丹徒故城在山下今其地名丹徒鎮漢書注丹徒卽
春秋云朱方括地志丹徒故城在今縣東南十八里
南徐州記秦始皇鑿處在故縣西北六里丹徒京峴

東南案今丹徒鎮蓋古朱方也

石頭五城新唐書韓滉傳滉築石頭五城自京口至

玉山修塢壁起建業抵京峴樓雉相望

宋翰林學士蘇紳墓在山之西北原

宋史本傳紳字儀甫泉州晉江

人進士及第舉賢良方正科擢祠部員外郎進史館
修撰知制誥入翰林為學士以侍讀學士知河陽徙

河中卒子頌曾肇蘇頌墓志
父紳葬潤州故今為丹徒人

宗忠簡公墓在山東北夫人陳氏附

宋史本傳宗澤字汝霖婺州義

烏人登元祐六年進士第調大名館陶尉衢州龍游
令晉州趙城令知萊州掖縣通判登州靖康元年知

磁州除河北義兵都總管康王即位除龍圖閣學士
知襄陽府改知青州尋徙知開封府除延康殿學士

京城留守兼開封尹薨贈觀文殿學士通議大夫諡
忠簡喬行簡宗忠簡公年譜公生嘉祐四年十二月

十四日巳時宣和元年公年六十一丐祠得主管南
京鴻慶宮退居東陽會延昭倖用訴公改建神霄宮
坐褫職編置潤州居丹徒四年夫人陳氏卒葬丹徒
京峴山結廬龍目湖上經郊恩就差監潤州酒稅建
炎元年除京城留守二年公年七十七月十二日未
時薨子穎素得士心都人請繼父任時朝廷已命杜
充留守以穎充留守判穎乞終喪與岳飛扶柩歸京
口與夫人合葬於京峴山顯謨閣學士曾懋爲墓銘
樞密副使岳飛建功德院於雲臺寺吏部侍郎知鎮
江軍府俞烈卽墓道建享堂案公集有葬妻京峴山
結廬龍目湖上詩云一對龍湖青眼開乾坤倚
劍獨徘徊白雲是處堪埋骨京峴山頭夢未回

宋趙善湘宗忠簡公享堂記夫天之至無極也
地之厚至無窮也乃人則以渺然七尺之身參乎
至大至厚者而爲三才是豈血肉之軀足以配合
乎兩間哉蓋由其忠誠堪泣鬼神歎畧可經邦國

天下而無事則已天下而有事上之則邀天之佑
獲人之助而能扶危使安撥亂歸正以成不朽之
功次之則逆天之意犯人之忌不計成敗利鈍鞠
躬盡瘁以孤行其志而立不刊之節由是天柱賴
之以立地維賴之以張君臣之義父子之經賴之
以弗墜其所行事昭揭乎宇宙不啻日月之照臨
河山之流峙蓋終古常存而不毀焉此其所以克
配乎兩間而堪與至大至厚者相參也如我汴京
留守忠簡宗公者非其人耶獨是天旣生公以支
拄我國家之顛覆奈何不使之蚤致通顯得時行

道以保邦於未危致治於未亂而乃自通籍後沈淪下僚韜光掩采逾三十三載迨乎國勢已危大事已去馴至萬難措手之時乃始畀之以磁州任之以軍旅而責之以勤王於時公年已六十八迫於義憤弗忍以老辭奮其孤忠迎敵前進雖與其別部屢戰皆捷而已鞭長不及二聖蒙塵矣嚮使有一人協力得遂其據金人歸路邀還二帝之謀固不世奇功也而無如汪伯彥輩從中沮之致使其獨提一旅孤軍徘徊四顧毫無應援付之無可如何徒深浩歎而已暨乎康王卽位南都用李綱

言以公爲開封尹俾其綏復舊都其事之難爲蓋
不啻一髮之引千鈞而公弗避也慨然受命入於
都城以至誠激勵人心而百萬之師立具人人爭
欲爲公効死嚮使高宗皇帝允其迎鑾之請車駕
卽日啟行乘忠臣義士朝氣之銳而用之以報讐
雪恥光復舊業此亦不世奇功也而無如狃偏安
之逸者憚於犯危難覩其疏請爭笑以爲狂計公
之疏凡二十四上而終不見省卒使之鬱憤無聊
疽發於背齎志而薨此蓋山天未厭亂弗欲康靖
我國家故使公之功垂成而弗克就志見沮而不

得伸也雖然公則已矣而其所以匡天柱奠地維
明君臣之義正父子之經者固已長留於天地之
間與日月共其明河山同其永矣謂猶不可以參
兩閒而並立乎公之喪奉勅岳武穆同公子穎扶
柩與夫人陳氏合葬於丹徒大慈鄉汝山灣之原
建功德院於雲臺寺以守公墳祠堂又別創以藏
廟像是郡鬻宮之祀先賢公亦在列前守俞君烈
以吏部侍郎集英殿修撰出知鎮江軍府卽公墓
道建所歆祀之堂曰忠武以公有危身奉上之忠
裕戡定禍亂之武也善湘來守是邦展謁公墓弗

勝景仰之思因仰俞君之意而爲記之如此云
明鄭濟重修墓碑記嗚乎宋運至靖康之世王室
再造謀國之臣爭土地於敵人之手忠簡宗公尹
京握兵之日在匪老忍死之年不以敵人之強爲
可懾惟視人心之不去爲可圖義旗一呼轉盜賊
爲王師百萬之衆悉集麾下羣兇挫衄叛亡歸正
中國北敵之分若可粗安何天之生才難爲公後
繼天方假北祚未欲一裔夏當時中外誰知防江
守淮爲計惟議和之恐後中分之勢隨之而定公
死不可復生忠魂義魄不返故鄉旅葬長江之上

雖橫屍地下公之精誠所感英靈所集猶可以捍禦強敵宋再立國偏安南服倚長江以爲天塹者一百五十年是又豈非天意乎公薨於建炎二年秋七月詔贈觀文殿學士謚忠簡累加開府儀同三司立廟於鄉邦崇祀於邑庠有司著爲彝典宋太守趙公享堂記云岳武穆扶柩同夫人合葬於丹徒大慈鄉汝山灣之原建功德院於雲臺寺以守公墳祠堂又別創以藏廟像宋元以來更歷旣久墳圯不治寺屋亦移置他處今洪武三十四年公之同里劉侯辰來守茲郡治民禮神報政稱最

凡所以樹立名教者知無不爲率僚佐召父老揖
拜墳下灑掃薦奠覩祠宇之傾移考碑碣之湮沒
推詳按實復其山林伐石重表神道種樹加護封
域移文於朝貽書於家俾其子孫重至展省著存
孝思歸以先業改建祠宇凡若干楹環墳之山凡
六十畝零仍俾寺僧守之俾其子孫著名以隸於
籍焉侯之景仰先哲表章前烈可謂達忠孝之本
知政治之原矣嗚乎公之謀國用武死於忠憤而
葬江上岳武穆知遇於公將兵敵愾死於仇嫉而
葬江南趙忠簡出公後同公謚身都將相死於斥

逐而返葬江北所謂身騎箕尾歸天上氣作山河
壯本朝者夫人道尙明神道尙幽三公謀國復封
疆不能同列於中外不得同信其志後乃共衛社
稷於沒身以終宋室三百年之運嗚乎何莫非天
也亦何莫非人也公之勲烈赫赫乎振耀於其前
公之名義昭昭乎暴白於其後又何其愈久而愈
無窮也嗚乎盛哉侯繕治公墓且將樹麗牲之碑
補其闕文以濟亦忝鄉里後學請有所述學識寡
陋不敢輒諾侯言至再三不敢終辭謹論列而銘
之其辭曰烈烈宗公大節英風誓以生死與國始

終公自爲州起應朝聘使節未降過已改命剛方
而斥擠之北區單騎就道出而守磁民間公來遐
邇響應義旅奮起辭直氣勁太原不守兩河貼危
磁當其衝敵車四馳親王出質幾蹈虎口扣馬請
還公爲殿後王在行間危言沸譌公率義旅履冰
渡河先驅無援勤王不集公來師閭衆毀構厄民
心可恃敵心無厭徒彰國弱孰究公言城下行成
宗社之恥有兵不戰大難不已莫匪王土莫匪王
臣二帝北狩中原陸沈敵騎衝突無所顧惜橫潰
不障乘輿不入額額都城留守尹京師徒有統戰

守有兵播剝聲猷登翼炎運公實啟之以定國命
爰積器備糗糧藁芻以守以戰士爲嘯呼黔黎輯
柔豪暴震懾王畿千里置之衽席人心不去天道
不違中外戮力興復可期見機乘時身當其責朝
無成命公有遺策梁木其壞山嶽其摧公不可作
三軍慟哀明神天游上顛帝所英雄在地下扞邦
土長江浩浩高塚纍纍天塹之外敵不敢窺生之
不淑非公之志死之不忘惟公之義長淮大江天
限北南京口孤塚爲生死關時移運遷宗社已屋
邦人來思不伐宰木劉侯守邦瞻拜幽堂昭夫遺

績賁茲永藏故鄉後人前代先哲景行仰止執鞭
不及新祠奕奕穹碑巖巖松阡鬱鬱邦人共瞻公
名天壤公績之偉江流不息何千百祀 國朝宗
文燦墓圖記公墓坐郡城東北京峴山枝宋高宗
勅賜子穎同岳忠武扶柩與夫人陳氏合葬地也
坐丙向壬汝山爲案沙渚環抱大江遠流墓前爲
陳家灣陳姓聚族於此世守松楸公之享堂在焉
東有土門岡左保安堂迤西則萬壽寺也原賜山
六十畝六分七釐二毫田四十八畝三分二釐四
毫地十四畝三分草灘十二畝五分入官民田七

畝三分宋元革命子姓散居命龍華寺僧收其租
以供歲祀明洪武中郡守劉公辰清復墓田移文
義烏取八世孫漢中至潤守墓永樂十三年寺僧
善安盜佃指揮程德因而佔葬十九世孫德控於
官至 國朝順治三年郡守塗公廓始爲勘斷除
程德所葬三塚外其餘山地盡歸宗氏編入會計
召佃看守追龍華寺僧盜佃山契存庫康熙二十
二年守墓孫文燦記 案程弁盜葬雖經郡守勘斷
而朽骨未拔至今仍踞邱首
千古憾事然岳墓前有頑鐵公墓前
有盜骨大慙小醜類而觀之可也
明王禕登京峴山弔宗忠簡公墓詩艤舟大江口

矯首京峴山山色近日曉
洩雲護層巒吾鄉忠簡
公邨隴在其間嗚乎靖
康亂九鼎紛播遷建炎
旣南狩國事已艱難公
方任社稷百戰心力殫
神州將全壁抗疏請迴
鑾大誼表日月衷言披
膽肝誰歟獨何心忍使
棄中原星殞孔明死王
業遂偏安惟留忠誠節
宇宙垂不刊遺墳托茲
土孰敢樵牧干容途有
程期無由拜荆菅遺武
幸可蹈英風杳難攀天
昏白日落淒然涕長潛
宗臣詩丞相塋前楓樹
丹潤州城外送波瀾千
秋不盡中原淚此地眞
成故國看一自燕雲孤
騎入至今龍氣大江

寒客游莫聽胡笳起白日青天處處殘 冷士嶮
詩英雄此地理弓劍隴木荒蕪隧道平慷慨一心
歸二帝艱難百戰保孤城空山落日思旗壘野老
春風薦杜蘅自爾渡河人去後倉皇誰復守東京
談允謙詩荒墳宿草此山阿留守英靈史不磨
治世未嘗掄使相危時偏自任干戈平生四拔皆
飛將臨死三呼欲渡河最是陸公居第近幽魂應
與往來多 忠烈公秀夫宅在汝山下 國朝張九徵詩宋代園
林秋草邊夕陽遺址尙依然松杉剝落精靈在父
老悲吟諫疏傳彈指已成千古事傷心莫話靖康

年陸公居第還相望兩地忠魂泣杜鵑 沈德潛
詩徑走瀘淵溯上游渡河直欲復神州晉元已作
南遷計諸葛空懷北伐謀當日廟堂違奏議只今
樵牧護松楸請看京峴山邊水日落濤聲恨未休
雲臺寺在花山灣與崇忠簡公墓近卽公之功德院
也宋紹興間岳忠武王建

宋岳珂重修忠簡宗公功德院碑記自古國家之
丁厄運者雖曰天命哉實亦人爲之弗善有以致
之當其將壞也率皆憤憤於上泄泄於下如波流
之東注焉卽有遠識之士逆覩其萌而憂之爲之

大聲疾呼思以彌縫其闕而匡救其災固無如叔
兮伯兮之衰如充耳何也及其既壞也憤憤者益
憤憤泄泄者益泄泄勢岌岌乎危矣天不忍遽棄
成命復生一二英才以維持之俾其返日於虞淵
迴瀾於溟渤推其精誠所至未始不可以奏膚功
而成偉烈乃任之既不專信之又不得因而妒之
嫉之敗之者遂接踵而起致其功弗克成事弗克
就徒竭畢生之力與其事相終始貽後人以憑弔
之端爲之惋惜歎恨而已矣甚至嬰莫大之禍舉
身家性命以殉之而卒無補於其國此詎可畧人

爲而弗咎盡以歸之於天命哉我國家靖康之禍
釀於熙寧成於宣和以致生靈塗炭鑿輿播遷大
勢已土崩瓦解不復可收拾乃有忠簡宗公者當
垂暮之年弗忍君父之危急起而肩萬難支之任
用仁慈以輯安黎庶仗忠義以鼓舞人心運智謀
以經營征伐緣其措置得宜規模由是大定麾使
百萬義師有如臂指上下一心靡不敵王所愾未
幾而都城固矣未幾而國勢張矣未幾而敵人望
風遁矣當是時也譬猶儲萬頃之陂以待決穀千
鈞之弩而待發所需者高宗赫然一怒爾夫何迎

鑿之疏凡二十四上言之者諄諄聽之者藐藐不殊於以水沃石也由是二聖卒不可還中原卒不可復而公亦憤慨而終矣當公之初受事也先會大父武穆公方任秉義郎而羅法公一見奇之卽授之以兵使立功自効果大敗金人先武穆公由是顯名於其歿也奉勅同公子頴扶櫬歸葬於鎮江之京峴山其後先武穆公功益高位益崇感公知遇之隆而念公不置乃於塋傍花山灣雲臺寺建功德院以祠祀公歲久圯壞適珂以總餉駐節鎮江軍府覩公棲神之所遐想其當年竭智殫力

而爲之之事皆付之無用蓋不禁爲之俯仰歛歔
惋惜而長太息也爰命重加修葺部使喬君行簡
築僧廬於墓左剏祠堂於龍華寺屬太守趙君善
湘移文義烏取公會孫有德至潤主守丞嘗以無
忘先武穆惓惓於公之意嗚乎公雖功弗成事弗
就而身家猶幸無恙也先武穆所遭之時勢旣後
於公而欲爲公之所爲人心已渙士氣已隳較公
之難不啻十倍旣已毅然任之因而奮然爲之不
意其功垂成而見忌遂貽禍於身家致非常之慘
酷也此豈獨珂等爲之後裔者悲哀痛悼舉凡六

合內含齒戴髮之民未有不聞而傷心者由今以推之後因二聖之不還中原之不復當無不為我國家慨惜矣夫豈可徒諉之曰天命使然哉嘉定十四年歲次辛巳月日記

白石峴太平御覽京口記曰去城九里有白石峴又曰

石峴東連馬蹄山 案白石峴今無其地疑即京峴

花山一名東山在城東三里

花山寺在山下

宋蘇舜欽詩寺裏山因花得名繁英不見草縱橫
栽培翦伐須勤力花易凋零草易生 沈括詩經

旬花雨喜新晴病馬緣畦取次行老態只應隨日
至春心無意與花爭山川滿目浮烟合樓閣侵天
暮靄橫嗟我有身無處用強攜尊酒入崢嶸

李衛公園在山下

宋李公異花山衛公園詩當年花草徑滿目舊林
亭無復東山妓空門苔蘚青

沈王二公祠在山西厲壇內

明史紀事本末嘉靖三十五年倭賊至金山殺

鎮江千戶沈宗玉
王世良於江中

侯山在城東三十五里

宋興寧陵元和郡縣志在縣東南三十五里宋武帝

追尊曰孝皇帝諱翹初仕郡爲功曹南史宋武帝紀
皇考墓在丹徒之候山其地秦史所謂曲阿丹徒閒
有天子氣者也又孝懿蕭皇后傳后孝皇帝繼室景
平元年崩與興陵合墳

雩山在城東三十五里

練壁里在山下

宋書趙皇后傳晉哀帝興寧元年一
葬晉陵丹徒縣東鄉練壁里雩山一

作諫

音速

壁一作諫壁

南史宋趙皇后傳葬丹徒縣東
鄉諫壁里雩山諫原注一作諫

一作

一作澗壁

馬令南唐書盧絳傳絳入金陵詣後
主上書陳京口至澗壁宜立柵屯戍

一名練辟聚

史記吳王濞傳注括地志云漢吳王
濞冢在潤州丹徒縣東練辟聚北

宋興寧陵南史孝穆趙皇后傳后以產武帝殂於丹

徒官舍葬丹徒縣東鄉諫壁里雩山宋初追崇號謚

陵曰興寔

或云雩山即侯山陵是宋武考妣所合葬然史明舉二山因分志以仍其舊文帝

母胡太后亦葬丹徒陵

曰熙寔見南史后妃傳

漢吳王濞墓在練壁北

史記本傳東越使人縱殺吳王正義曰括地志云吳王濞

冢在潤州丹徒縣東練壁聚北今入平江吳錄云丹徒有吳王冢在縣北其處名為相唐

唐詩人許渾墓在諫壁里

全唐詩小傳渾字用晦丹陽人太和六年進士大中

三年為監察御史歷虞部員外郎睦郢二州刺史姚堂潤州先賢錄渾以詩名居丹徒別墅丁卯橋有丁

卯集二卷

行於世

流水院在諫壁有唐大中時所鑄鐘

至順志鐘今在埤城法雲寺

礮臺在山下

舊有二礮臺今併置於此

馮詠京口東西礮臺記京口爲江南重鎮三面距
江帶海負山通淮泗控吳楚連百越天下之險無
踰此者順治十三年海寇之變江左州縣爲之騷
動始命漢軍都統伯石公掛鎮海將軍印統八
旗兵屯北固山下其後復命都統劉公以甲二
千分駐城西南民房自是朝廷非重臣不令在此
職今雍正元年念將軍何公素爲兵民倚賴特
召陛見會江寧巡撫難其人命公署理而以駙馬
李公署鎮海將軍李公至鎮治軍有法屢飭八旗
兵毋得欺凌百姓兵民大和明年余奉命令丹

徒公閱江口舊礮臺距江稍遠且鎮城舊礮尙多
移檄下縣宜更置處所余視沿江要害渡江自金
山者先避風臺自焦山者先東馬頭於是西於避
風臺前置礮六位東於東馬頭置十二位築垣建
柵旬日兩礮臺成李公喜易曰王公設險以守其
國書曰事事乃其有脩有脩無患當此江海清晏
昔時戰爭之地人民恬熙農桑畜牧六七十年官
無文武之異籍罕兵民之殊樂利均平洩洩然太
平無事而李公仍不忘礮臺之建於易書所垂不
旣然歟余爲守土官實經理斯臺故嘉其成而誌

其事時雍正二年十一月某日也

大瀆山在城東三十里

晉謝元宅太平御覽京口記曰長村東大瀆瀆北有謝元故宅

小瀆山在大瀆山東苦竹里

吳橫江將軍魯肅墓在苦竹里太平寰宇記續搜神託云王伯陽者家在京口東有大家傳是魯肅墓伯陽妻卒乃平其墳以葬焉經數年忽一日伯陽方在聽事中見一人乘肩輿從者數十輩徑前怒謂伯陽曰我魯子敬也冢在此二百許年矣君何敢輒相毀

壞因目左右與之毒手從者遂牽伯陽下以刀環築之數百而去登時卽死良久乃蘇其環築處遂皆發疽爛尋卒

華山在城東六十三里

神女冢郭茂倩樂府詩集古今樂錄曰華山畿者宋少帝時懊惱一曲亦變曲也少帝時南徐一士子從華山畿往雲陽見客舍有女子年十八九悅之無因遂感心疾母問其故具以啟母母爲至華山尋訪見女具說聞感之由因脫蔽膝令母密置其席下臥之當已少日果羞忽舉席見蔽膝而抱持遂吞食而死

氣欲絕謂母曰葬時車載從華山度母從其意比至女門牛不肯前打拍不動女曰且待須臾敷點沐浴既而出歌曰華山畿君既爲儂死獨活爲誰施歡若見憐時棺木爲儂開棺應聲開女遂入棺家人叩打無如之何乃合葬呼曰神女塚

龍頭山王象之輿地紀勝在城東南半里

鼎石山在城東南三里山有塢明季由壽邨山遷此

武烈帝廟在山西廢今太平寰宇記隋司徒陳杲仁僞

唐冊爲武烈其靈可畏嘉定鎮江志唐封忠烈公顧雲爲之記江南保大中冊武烈大帝徐鉉有廟碑

都天廟在山下未詳何神廟臨漕河糧艘阻淺漕使

祈禱有應乾隆間

賜額曰靈貺嘉慶間

賜褒語

曰宜漕助順顯佑安瀾春秋

予祀

程孝子碑在山下運河口

孝子名元德丹陽人道光元年四月隨父行至河口

父失足墮水孝子驚號赴救俱死翼日抱父屍出見者感泣邑令王臺表以石曰程孝子救父投水處

報恩寺舊名善禧寺隋開皇間建在武烈廟側

止方寺在山西未詳創始明萬歷癸丑重建有吏部

郎中談自省碑記

釜鼎山在城東南四里

大覺寺在山西相傳宋建炎兵亂劉光世聚骸瘞此

因建為寺見郡邑志

三烈墓在山下烈婦趙氏謝氏烈女龔巧之墓邑志

瓜洲余有德妻儼居月觀下有德出無賴子入犯趙

自勿康熙丙辰三月二十九日事年二十四邑諸生

設祭葬之釜鼎山側謝氏與化人避水從夫龔行攜

女巧姐移居縣南關口河干江寧人田五瞰謝暨女

姿賂其黨何三代主畫合作行負券索負行訴官官

弗辨券偽答行飭來日繫謝同質謝母女哭竟夜以

赤帶繫臂投河死謝年三十四女年十七謝有身一

時實殞三命行一號雙尸湧水中立時戊午夏殮踰

五日尸無纖微穢氣邑薦紳及諸生為詩文往奠粘

河上屋壁累干章田何等抵法謝母女得旌墓與

趙烈婦並列案道光十一年邑中旌

彙請旌表節烈趙亦得旌

華蓋山在城東南六里

南唐吉王李從謙墓在山南之望城岡翁仲尚存陸游

南唐書從謙元宗第九子歷封鄂國公
宜春王進吉王及貶制度降鄂國公

焦石山在城東南九里

萊山在城東南十里

明諸生趙弼經墓在山下

弼經字公正甲申聞變餓七日不死赴學自經死同

邑冷秋江高士弔之以詩有云嗚乎公以公正名如公始不愧斯名族孫湧和題遺像云少陽書欲上臯羽恨無窮生未趨朝闕死猶依澤宮能堅樵夫志不愧古人風此日瞻遺像稜稜氣吐虹

白兔山太平寰宇記在城東南一十五里

宋集賢校理刁約墓在山下

京口耆舊傳約字景純天聖八年進士為集賢

校理管當三館祕閣案明一統志謂刁約葬此山有白兔躍出故名山名已見寰宇記志誤

唐山在白兔山側下有唐山莊刁約所居

見刁約詩自注

秀山娘子山俱在城東南二十五里

馬蹟山在城東南三十五里道書所謂四十九福地也
咸淳府志東海道君參白馬老君傳授相骨經之所有
黃龍青龍二洞黃龍洞中舊有石泉一掬四時不竭近
頗止澁青龍洞巉巖嶽嶽入其中冷然風生洞有大小
石龍挂石罅中時出青霧霧出卽雨一名馬蹄山太平
御覽京口記曰石峴東連馬蹄山山上有石馬蹄蹟因
以爲名

唐權德輿有酬李二十二
兄主簿馬蹟山見寄詩

紫府觀在山麓舊名福業觀唐天祐中建宋治平中

賜今額乾隆壬午

高宗南巡有 御製紫府觀詩

明王禕馬蹟山紫府觀碑鎮江丹徒縣西若干里
有山曰馬蹟是爲天下七十二福地之一左抱三
茅右控五州之境岡嶺繚屬林壑深茂其陞盤亘
數十里相傳東海青童君所治而老君嘗乘白馬
授相骨經於茲蹄蹟猶存故山因以得名山之東
有二洞最爲邃險與華陽潛通水出巖閣閒冬夏
不竭雨暘愆期有禱輒應其南有隱君之泉有鍊
丹之井而巖谷之幽常產玉蘭香異凡卉歲將大
稔則不根而茁焉按郡志宋武永初二年歲在辛

西肇基觀宇以處羽流榜曰福業唐上元令王仲康爲之記所存鐘鉦驗其銘文乃唐天祐七年庚午歲所造鎮江於時爲潤州屬楊氏時梁已代唐而楊氏仍稱天祐其歲則梁開平四年而楊隆演之三年也逮宋治平閒始賜今額曰紫府且賜田及山地三千畝而復其租建炎後嘗一新之歷歲浸久棟宇日頽未及復新時若有待國家旣一海宇崇尚道教皇慶癸丑今洞元沖靖崇教廣道大真人薛公實領觀事覩其闕壞大思無以承景貺而薦鴻釐以興廢舉墜爲已任卽捐私橐合公帑

徵工簡材撤其舊而大新之是歲秋冬外建三門
內創方丈而財用不能繼爰畜爰積閱十年當至
治癸亥之冬而大殿乃成又十年當元統甲戌之
春而兩廡始備凡庫庖庖滷之屬莫不次第具完
密宇廣庭華飭炫耀穹檐隆棟光景蔽虧儼然太
清之居列仙之館矣至正甲午觀成二十年其徒
以謂觀之託基於是山公之致力於斯觀宜有登
載屬予爲辭夫宇宙間名區奧壤大抵扶輿清淑
之氣之所鍾然必得至人高士爲之增重而後益
有以顯其靈所謂地以境而勝境因人而著也是

故自有是山不知幾千百年老君乃來馬蹟開秘
而山以得名及有是觀又九百餘年薛公於是昭
被帝命主茲法席而觀以復新地以境而勝境因
人而著殆有數存其閒豈偶然哉公名廷鳳字朝
陽早學道龍虎山故特進元教大宗師吳公之弟
子而今大宗師于公又其弟子旣領是觀至正丁
丑奉璽書賜號稱真人領杭州四聖延祥觀明年
戊寅兼領鎮江道教兼住持乾元元妙凝禧三觀
大宗師之傳以次及公而公固辭集賢以聞特命
仍其故號進稱大真人復領杭州道教且主領大

開元宮云銘曰巍巍茲山名馬蹟發祥應異自古
昔陰巖密洞闕幽閒福地宜爲仙聖宅爰自棟宇
基肇闢閱歷寒暑歲九百廢興相尋事叵測皇元
道教致崇極有大真人尸法席宏宣至化昭帝力
改舊圖新興鉅役土木莊麗功匪亟餘三十年乃
就績耽耽潭潭衆楹植塗墍丹堊絢金碧林谷輝
映咸改色寶旛繽紛華蓋翬雲璈石磬振朝夕天
神來游畢懽懽錫美降康永如式壽我天子年萬
億國祚綿綿與山積勒以茲銘示無斁

宋資政殿學士林希墓在山下

宋史本傳希字子中
福州人舉進士以集

賢殿修撰知蘇州更宜湖潤抗毫五州遷禮部吏部
尚書翰林學士同知樞密院贈資政殿學士諡文節
後湖居士蘇庠墓在山下金橋村京口耆舊傳庠字

徐俯在樞近薦於上辭病不起詔
再下扁舟遠引天下士皆高其節

了髻山城東南三十五里

明參戎冷之曦墓在山下冷氏家乘冷子晉傳君名

書明烈皇帝時見天下大亂日安用是毛錐為哉棄
去習騎射能取中百步外年十八州司聞其名召總
郡兵闖寇逼關三晉淪陷君憤憤有勤王志繫於職
未果福王立入為閣部史公牙將未幾閣部渡江督
四鎮兵進討遂移牒與平伯高傑麾下參將右軍乙
西春進軍至歸德總兵許定國舊與傑有隙設誘害
之傑兵十餘萬眾分潰南下君歸曲阿是年夏南都
不保遂死於難時六月十三日也君生於天啟辛酉
十月二十八日少有大志不事家人生產善書下筆
有山崩河決之勢亦足以覘其概云冷上隄哭子晉

兄詩吾兄雖弱冠忠義古人難憤血千秋碧操心一
寸丹旌旗落泗水魂夢繞金壇痛灑包胥淚霜飛六
寒月

遺民冷士帽藁在山下

案土帽字又湄號秋江明鼎
革時年未冠棄諸生遁居江

上年逾八十乃卒卒之前有句云一身江上老存歿
義熙年論者以爲不愧此言著有江洽閣文集四卷
詩集十二卷載入四庫全書存目法嘉蓀養痾調詔
云洽秋江先生吾邑丹徒鎮人也與張文貞公父九
徵友善明鼎革後不應試文貞公屢欲薦之於朝皆
力辭重逢甲申春日誌感云燕子飛來柳絮天人間
芳草尚依然海棠花落東風裏此事傷心六十年先
生無子嘗館於門人周某家時已八十餘每晨諸生
必向榻前問安先生皆於帳中應之一日忽不應舉
帷視之已死矣諸生驚號周某至先生忽開日舉手
日後事累汝矣
復瞑目而逝

嘉山與馬蹟了髻近

三十一
フ
三

三

京口山水志卷六

丹徒山

黃鶴山在城南三里通典丹徒有黃鶴山本名黃鵠山
太平寰宇記宋高祖丹徒人潛龍時游竹林寺每息於
此山常有黃鶴飛舞因名黃鶴山改竹林寺爲鶴林寺
南史隱逸傳戴禹字仲若世居剡中宋國初建元嘉中
徵竝不就衡陽王義季鎮京口迎來止黃鵠山山北有
竹林精舍林澗甚美禹憩於此澗義季亟從之游禹服
其野服不改常度爲義季鼓琴竝新聲變曲文帝每欲

見之嘗謂黃門侍郎張敷曰吾東巡之日當宴戴公山下也祝穆方輿勝覽黃鶴山一名戴公山陳沂南畿志

黃鶴山今名鴻鶴

竹林寺在山北晉大興閒建南史宋武帝紀帝嘗游

京口竹林寺獨臥講堂前上有五色龍章又戴禹傳

黃鶴山北有竹林精舍

嘉定鎮江志竹林精舍即宋武帝微時所游京口竹林寺

今鶴林寺是舊志兼引寰宇記以為宋高祖潛龍時游息竹林寺黃鶴飛舞其上因名黃鶴山郤不考宋

戴禹傳衡陽王刺京口時在宋文帝元嘉九年去宋武游息之時已久猶謂之黃鶴山是舊志因寰宇記

而差矣案寰宇記又云宋高祖改竹林寺為鶴林寺據嘉定志山與寺名皆後人所改

鶴林寺至順鎮江志舊名竹林寺宋永初中改今名

唐開元間僧元素主焉時又名古竹院案竹院即因竹林以名唐

李涉題鶴林寺壁詩因過竹院逢僧話朱放鶴林寺

詩殷勤竹林寺能得幾回過許渾丁卯集及元薩都

刺雁門集中或云鶴林或云竹寺有夾山文室至順志繆

林或云竹院其實即一寺也君珙重修寺記咸通十一年夾山善會師

由此往參船子和尚故寺有夾山文室宋高宗

書籍田詔刻石寺壁又蘇軾書所作鶴林招隱詩呈

刁景純詩米芾書城市山林四字紹興二十六年僧

法永書黑漆光菩薩贊嘉定甲申八月岳珂題古竹

院僧房詩紹定元年馮多福次韻詩淳祐乙巳三月

王埜鶴林寺二絕句景定五年陳均二絕句明董其

昌書元素禪師簡友詩諸石刻並在壁閒榜其屋曰

古墨林 杜鵑花古今詩話潤州杜鵑花相傳唐貞
觀中外國僧種之鉢盂中自天臺攜來每春末開時
有朱裳女子來游花下俗傳花神也殷七七字文祥
周寶舊識之及移鎮浙西一日謂七七曰鶴林杜鵑
花天下奇絕聞子能作非時花今重九將近能開花
副此日乎七七乃前二日往鶴林中夜女子來謂七
七日妾爲上元所命司此花今與道者開之然此花
非久卽歸閻苑矣俄不見及九日爛漫如春寶驚異
游賞累日其後兵火焚寺樹失根株 案今寺中有杜鵑樓 十
三松寺前古松十三株樵人將析爲薪楊文襄一清

捐金贖之並作十三松記

唐李華潤州鶴林寺故徑山大師碑銘道行無跡
妙極無象謂體性空而本源清淨謂諸見滅而覺
照圓明我天人師示第一義師無可說之法義爲
不二之門其定也風輪駐機其慧也日宮開照其
用也春泉利物三者備體誰後誰先入無量而不
動開法華而踴出湛兮以有無觀聽而莫測寥兮
以遠近思惟而不窮智得皆空爲真實際大悲恒
寂遍撫羣迷月入百川之中佛而千花之上修而
證者元同妙有應而起者旁作化身先大師適來

此土化身歟適去他方補處歟不可得而知也自如來現滅四魔橫恣人天無怙寄命崩崖勝大敵者那羅延身消大毒者伽陀妙藥拔陷扶墜而生大師大師延陵馬氏諱元素字道清崇高紹興於法外徑緒不繫於人間慈母方娠厭患葷肉長至之日誕彌仁尊生有異祥乳育安靜既齒稽首父母求歸法門卽日獲請出依精舍如意年中剃度隸江寧長壽寺旣進具已戒光還照定水澄源驚王之不受泥塵香象之頓除羈鎖未之比也身長七尺體無凡骨眉毫際臉口若方丹目不顧睇聲

侔扣玉八南牛頭山事威大師撞鐘大鳴入海同
味迦葉以頭陀第一大師亦斗數塵勞聞一知十
未嘗請益觀法無本觀心不生喻金剛之最堅比
師子之無畏圓月照海高深盡明慧風吹雲宇宙
皆淨威大師摩頂謂曰東南正法待汝興行命於
別位開導來學於是嚙虞馴擾表仁之至也衆禽
獻果明化之均也接足右繞百千人俱大師悉以
菩薩呼之教習大乘戒妄調伏自性還源無漸而
可隨無頓而可入摩尼照物一切如之吾嘗默然
無法可說或有信願雙極懇求心要於我渴仰施

汝醍醐問禪定邪吾無修問智慧邪吾無得道惟
心證不在言通懷帝釋輪終爲世論自淨而已無
求色聲旣悟者小無微塵大無三界當悟者內珠
雖隱猶作來因藥草萬殊根莖等潤貌和言寡飢
至飽歸或有聞尊稱而遷善見色身而獨得我無
爾念道溥慈圓食不問鹹酸口不言寒暑身同池
水飽蚊蚋之飢渴道離人我順衆生之往來貴賤
寃親是法平等故饋甘味而不辭同於糗糒奉上
服而不拒齊於弊褐俾夫家有道侶府無爭人開
元中本寺僧法密請至京口潤州刺史韋銑灑掃

鶴林茲焉供養有屠者恣忍積骸如山聞大師尊
名來仰眞範忽自感悟懺悔求哀大師受之又白
言和尚大悲當應我供大師衲衣跣趺未嘗出戶
公侯稽首不爲動搖至是如其懇乞忻然降詣夫
盜隱其罪虎慈其子仁與不仁皆同佛性不生不
滅無去無來今濁流一澄清水立現諸佛所度我
亦度之天寶中楊州僧希元密請至廣陵便風馳
帆白光引棹楚人相慶佛日渡江梁宋齊魯傾都
來會津塞途盈人無立位解衣投施積若邱陵皆
委於所在行無住捨禮部尙書李澄時爲楊州牧

齋心跪謁爲衆唱首望慈月者誰不清涼傳百億
明燈照四維上下塵沙之數皆超佛乘二州以貪
法之心移牒逾月均吾喜捨成汝堅牢無非道場
還至本處天寶十一載十一月十一日中夜坐滅
嗚呼菩提位中六十一夏父母之生八十五年赴
哀位者可思量否至有浮江而奠望寺而哭十里
花雨四天香雲幡幢蓋網光蔽日月以其月二十
一日四衆等號捧全身建塏於黃鶴山西原像法
也州伯邑宰執喪師之禮率申哀慕江湖震悼曩
於寺內移居高松互偃涅槃之夕倚桐雙枯虎狼

哀號聲破山谷人祇慴慴天地晦冥及發引登原
風雨如掃慈烏覆野靈鶴徊翔有情無情德至皆
感初達摩祖師傳法三世至信大師信門人達者
融大師居牛頭山得自然智慧大師就而證之且
曰七佛教戒諸三昧門語有差別義無差別羣生
根器各各不同惟最上乘攝而歸一涼風既至百
實皆成汝能總持吾亦隨喜由是無上覺路分爲
此宗融大師講法則金蓮冬敷頓錫而靈泉湧溢
東夷西域得神足者赴會聽焉融授巖大師巖授
方大師方授持大師持授威大師凡七世矣真乘

妙緣靈祥嘉應僉具傳錄布於人世門人法鏡吳
中上首是也門人法欽徑山長老是也觀音普門
文殊佛性惟二菩薩重光道源門人法勵法海親
奉微言感延霜露繕崇龕座開構軒楹時惟海公
求報師訓廬孔氏之墓起淨明之塏世異人同泣
然長慕僧端等蔭旃檀樹皆得身香菩薩戒弟子
故吏部侍郎齊澣故刑部尙書張均故江東採訪
使潤州刺史劉日正故廣州都督梁昇卿故採訪
使潤州刺史徐嶠故採訪使常州刺史劉同昇故
潤州刺史韋昭理故給事中韓賞故御史中丞李

丹故涇陽令萬齊融禮部員外郎崔令欽道流人
望莫盛於此弟子常聞道於徑山猶樂正子春之
於夫子也洗心仰瞻天漢彌高鏡公門人悟甚深
者大理評事楊詣過去聖賢諸功德藏志之所至
無不聞知魯史從告況乎傳信其文日濁金清鏡
在爾銷練磨之瑩之功至乃見膏漬炷然光明外
遍陽升律應草木皆變啟迪瘖瞽惟吾大師息言
成教捨法興悲辰極不動風波自移境由心寂道
與人隨杳然元默湛人無餘性本無垢云何淨除
身心宴寂大拯淪胥內光無盡萬境同如甘露正

味瑠璃妙器遍施大千無同無異度未度者化周
緣備道樹忽枯涅槃時至我無生滅隨世因緣吉
祥殿上應化諸天寂寂靈塏滔滔逝川恒沙劫壤
智月常圓

唐綦母潛詩道門隱形勝向背臨層霄松覆山殿
冷花藏溪路遙珊珊寶幡挂焰焰明燈燒遲日半
空谷春風連上潮少憑水木興暫忝身心調願謝
攜手客茲山禪侶饒 皇甫冉詩古寺傳燈久層
城閉閣閒香花同法侶旌旆入深山寒磬虛空裏
孤雲起滅閒謝公憶高臥徒望欲忘還 劉禹錫

春晚游寺詩野寺尋花春已遲背巖惟有兩三枝
明朝攜酒猶堪賞爲報東風且莫吹 顧況寄鶴
林寺石冰上人詩山川重復重心地閭相逢忽憶
秋江月如聞古寺鐘潮平南北岸雲抱兩三峯定
力超香象眞言懾毒龍風中何處鶴石上幾年松
爲報烟霞道人閒共不容 李嘉祐奉陪韋潤州
游寺詩野寺江城近雙旌五馬過禪心超忍辱梵
語問多羅松竹閒僧老雲烟晚日和寒塘歸路轉
清磬隔微波 許渾鶴林寺中秋翫月詩待月東
林月正圓廣庭無樹草無烟中秋雲盡出滄海半

夜露寒當碧天輪綵漸移金殿外鏡光猶挂玉樓
前莫辭達曙殷勤望一墜西巖又隔年 又竹林

寺別友人詩騷人吟罷起鄉愁暗覺年光似水流
花滿謝城傷其折蟬鳴蕭寺喜同游前山月落松

杉晚深夜風清枕簟秋來日分襟又何處江南江
北路悠悠 戴叔倫贈鶴林上人詩日日澗邊尋

茯苓巖扉常掩鶴山青歸來挂衲高林下自翦芭
蕉寫佛經 張祐詩古寺名僧多異時道情虛遣

俗情知千年鶴在市朝變來去舊山人不知 李
涉題寺壁詩終日昏昏醉夢間忽聞春盡強登山

因過竹院逢僧話偷得浮生半日閒 方干詩得
路到深寺幽虛曾識名蘚濃陰砌古烟起暮香生
曙月落松翠石泉流梵聲聞僧說真理煩惱自然
輕 宋蘇軾游鶴林招隱詩二首郊原雨初霽春
物有餘妍古寺滿修竹深林聞杜鵑睡餘柳花墮
目眩山櫻然西窻有病客危坐看香烟行歌白雲
裏坐詠修竹林風輕花自落日薄山半陰澗草誰
復識聞香杳難尋時見城市人幽居惜未深 又
同柳子玉游鶴林招隱歸呈景純詩花時臘酒照
人光歸路春風灑面涼劉氏宅邊霜竹老戴公山

下野桃香巖頭匹練兼天淨泉底珍珠濺客忙安
得道人攜笛去一聲吹裂翠崖岡 梅堯臣詩松
竹暗山門颼颼給清吹傳聞宋高祖舊宅爲茲寺
地以黑龍升經因白馬至何必問興亡山川應可
記 王安石次韻張子野詩二首澗水橫斜石路
深水源窮處有叢林青鴛幾世辭蘭若黃鶴當年
瑞卯金敗壁數峯連粉墨涼烟一穗起檀沈十年
親友半零落回首舊游成古今京峴城南隱映深
兩牛鳴地得禪林風泉隔屋撞哀玉竹月緣階貼
碎金藻井仰窺塵漠漠青燈對宿夜沈沈扁舟過

客十年事一夢此山愁至今
岳珂題古竹院僧

房詩秋枕竹鳴屋晝基松掩關雨晴猶濕徑雲薄

不藏山未洗中原恨難消永日閒西風動征思空

媿鬢毛斑
又馮多福次韻詩春郊躬勸相稅駕

擬禪關院古深藏竹堂虛靜對山日薰農父醉雲

伴老僧閒暇日還攜茗同來淪虎斑
王埜清明

游寺詩蒿日黃塵擾擾閒出門偶到鶴林山仙花

僧竹俱陳迹白日青天祇自閒竹院閒來春正遲

籜龍猶自長孫枝野夫豈識尋芳意爲愛光風面

面吹
陳均次韻詩知有楓林坐竹閒每尋迂路

試尋山虛檐忽見籠中鶴似我愛閒身未閒竹繞
高僧逢話處花留仙者舊開枝道身虛淡原無着
付與東風爛漫吹 釋道潛詩招隱山南寺重來
歲已寒風林驚墜雪雨澗咽飛湍壁暗詩千首霜
清竹萬竿東軒謫仙句洗眼共君看 陸秀夫詩
歲月未可盡朝昏屢不眠窓前多古木牀上半殘
編放犢飲溪水助僧耕秫田寺門久斷歸分食愧
農賢 文天祥詩屐齒俱無登盡山臥游多病遠
公關相思南國故人少滿寺蕭蕭落葉斑 元薩
都刺詩病餘乘野興來叩了公房竹笋迸出地花

枝垂過牆雨聲鳴客枕雲氣暗僧堂歸路馬蹄滑
風吹酒面涼 又清明游寺詩青青楊柳唳乳鴉
滿山爛開紅白花小橋流水過古寺竹籬茅舍通
人家潮聲卷浪落松頂騎鶴少年酒初醒若將何
物賞清明且伴山僧煮新茗 又寄鶴林主人了
卽休詩白頭不出城南寺枯坐蒲團笑客忙過暑
葛衣渾破碎逢秋竹院愈荒涼空山雲溼龍歸鉢
古屋松低鶴在牀遙憶題詩舊游處夜深東壁月
蒼蒼 又竹林寺詩野人一過竹林寺無數竹林
生白烟江近玉龍埋碧草月明黃鶴下青田樹銜

宿雨啼山鷓花落春風老杜鵑何日來分雲半榻
故人不用買山錢 又題竹院壁詩門外好山青
入戶階前芳草綠侵簾山僧應笑遊人醉頭上花
枝壓帽簷 明唐文獻詩每逢山水地便有卜居
心終歲風塵裏何年滄海潯林寒泉滴細花暝石
房深青壁須留姓他時好共尋 國朝龔鼎孳詩
武帝草猶綠空堂迴不關日斜何代寺松冷一樓
山往事隨花盡浮生讓竹閒登臨寬戰伐旅鬢未
應斑 王士祿詩寺門曉日引孤節黃鶴幽棲憶
隱蹤客到不知風物改逢人猶問十三松 補 唐朱

放題鶴林寺詩歲月人閒促煙霞此地多殷勤竹
林寺能得幾回過

西園在山西放鶴門邑志韓蘄王花園內有飛蓋堂
傳觴亭覆雲臺留仙洞

元吳萊韓蘄王花園老卒歌蘄王手種紅錦花十
載不挂鐵鎚鍛花園老卒守花樹睡着花埭聞曙
鴉白頭白盡身無事古塞沙塵戰餘騎多士如雲
足健兒一奇在腹終憔悴青銅萬緡滿地光寶函
矯節賜夷王宮妝粉豔去酣酒海貨珠賤歸壓槽
王家舍兒驚吐舌御府珊瑚碎飛雪口猶乳臭却

身下口力示 卷一
三
帳前鬢鑠一翁嗟棄捐君不見天下英雄本奴虜
左鼻成龍右鼻虎頸血淋漓思鬣鼓史傳沈埋誰
比數花落花開幾風雨

鴻鶴山莊在山下楊文襄一清別墅

楊一清詩鴻鶴冥冥事已遙清溪曲曲下通潮鏡
中白髮誰能變江上青山可待招興到登臨隨短
屐客來傾倒醉長瓢郡城相望無多路也得幽棲
遠市朝

米公祠在鶴林寺左有明米萬鍾書米公祠碑避暑
錄話米元章愛鶴林寺松石沈秀誓來生爲寺伽藍

永護名勝公沒後鶴林伽藍無故塌下里人知公欲還宿願於此至今祠於寺之左隅

周濂溪先生祠在鶴林寺西內有石蓮池光霽亭後亭

移建日精山楊一清記云亭蓋取黃庭堅稱先生語而名之也先生少失父奉母依舅氏鄭龍圖居潤母卒遂葬焉後人即其地建祠祀之又闢書院以居四方之學者近時書院廢其地併與鶴林寺僧郡守張公巖重建廟學乃即廟背山之巔構亭扁以今名

尹和靖先生祠在濂溪祠側案宋史道學傳先生世為洛人今丹徒有專祠

並祀鄉賢祠邑志謂先生赴浙時夫人郭氏亡葬此子孫家焉

陸忠烈公祠在鶴林寺側乾隆九年自金山移建宋史

忠義傳陸秀夫字君實楚州盩厔人生三歲其父徙家鎮江

張文貞公祠在鶴林寺側乾隆中 賜額曰風度端

凝

案公名玉書字素存順治辛丑進士官至
文華殿大學士卒贈太子太保諡文貞

宋米芾父左武衛將軍光輔母丹陽縣太君閻 墓

在山下

詳見長山蔡肇
米元章墓志

大鄉寺唐大德雲禪師所居其墟在鶴林寺西乾元

初奏請天下一十五寺長講戒律天鄉卽其一見李

華雲禪師碑

案寺未詳所在以雲禪師墟在
鶴林寺西故志於鶴林寺後

唐李華潤州天鄉寺故大德雲禪師碑東南苾芻

之上首日長老雲公報年若干永泰二年某月日

湮燬於潤州丹徒天鄉寺人天痛慕江海寂寥御

史中丞韋公元輔史作甫頃臨潤州嘗由禮無何

韋公兼觀察領浙西按部至京江來修謁問長老

曰如來遺教付囑仁賢貧道有檀像一龕敬以相

奉意深言簡聞者淒然韋公致別之明日長老繩

床跣趺無病而滅嗚呼至矣哉昔支遁與謝公爲

山水下疑之遊竺法師與王度爲生死之約古今

同道如見其人長老每言曰得天師於牧馬求善

法於鬻香不可不敬樂羊以食子見疑苾芻以草

繫成忍不可不仁智瑤死於大縣頂生退於什宮

不可不廉留侯先期而黃石悅元謀懇乞而觀音

降不可不信學此四者以爲教端內訓緇褐外化羣品其餘觸類而長道遍恒沙長老法號法雲獲度於神龍之歲俗姓申氏其先魏都之望出於姜姓左右宣王詩所謂惟岳降神者也會祖宣皇朝考功員外郎祖靖睦州遂昌縣令父儉不仕以復楚之忠烈相韓之勲伐蓄靈韜曜鍾美後人長老童卯入道誦法華經景龍歲受具於本州龍興寺元昶律師由是萬計俱圓名冠同列與鶴林絢律師偕往嵩穎求法於大照和尚以心眼覩徹見無邊界果在掌中隨心舒卷喻庵羅熟終當自知此

其端也道在兼愛故無棄物有志於道來問長老
曰飲甘露者當淨其身有涉道未泓來問長老曰
菩提爲寶耶無知無德涅槃爲空耶常樂我淨由
是江景疑禪教有大照之宗焉至若願力所宏莊
嚴佛教像飾同日月之照厨供盡人天之福積若
山川流於他方凡聖去來緇素皆以天鄉爲中路
之化城也夫三界爲牢鬼神同死使桎梏輪轉無
解脫時佛性在煩惱之中佛身卽衆生之體大法
平等無所不同雪山滿月是爲真語同音半字宜
爲妄說如來毫相始於東土菩薩求法遍在西方

慈悲之間固非一致若乃昆明劫灰夏時同學化
來周穆之歲星隕魯莊之年甘泉金人之祀伊存
浮圖之說謂之爲妄則常情不測謂之爲實則迂
濶難明立定哀之時書隱桓時事憑魯史之文猶
未之詳况超乎視聽之外出乎名言之域固宜然
也國史傍錄往往合符者則宣尼稱西方有聖元
老云吾師竺感厥乾後夢孝明漸於中國楚王英
尤敦此道嘗奉縑贖罪詔曰王誦黃老之微言尙
浮圖之仁祠潔齋三月與神而爲誓其還縑以助
伊蒲塞桑門之盛饌浮圖仁祠卽捨廟也潔齋爲

誓卽禮懺也伊蒲塞則優婆塞也至魏受禪洛陽
宮中有浮圖毀除之沙門以佛舍利擲水生光由
是移於道車廣開禪室僧會揚化於三吳惠持演
教於三蜀震曜尊瞽無代之法壤也因蓋吳同亂
之積其後也賴曇休堅持之誓自菩提達摩降及
大照禪師七葉相乘謂之七祖心法傳示爲最上
乘南方以殺害爲事北方多豪右犯法故大通在
北能公在南至慈救愍曲無不至其餘則澄公威
神止石羯之虐惠始定力峻赫連之暴淨檢尼部
之初曇柯律藏之始道安垂範羅釋詮譯惠遠道

生闡教於廬匡杯渡寶誌著異於江浙公之慈靈
鎮攝智者之遵揚真極清膺昏季在壤尋舉稠公
之衣而定興廢驗仲尼之記而崇建立唐撫運同

符聖覺中州徼外人智如林元莊無畏繼興夷憂

疑作不可悉數舉甚疑作殊尤長老既滅門人僧

某等戒還本原智人無學以某月十六日遷定於

鶴林寺西江湖晦冥道路悽慟初吏部侍郎齊澣

採訪江東見天鄉殿宇傾圮孰尸完葺乃請禪師

與絢公當謂寺僧乾最得堅固力求真實智乾元

初奏請天下一一作十五寺長講戒律天鄉卽其

一焉爾後率同心願善繕理禮部員外郎崔令欽
常爲丹徒宗仰不怠於何吳越震擾繼侶竄伏長
老挺身於戈劍之間宴坐於虎狼之口大浸不溺
大火不焚天鄉獲全長老之力也韋中丞以句容
令田少文悅長老之風宏無生教故托句容謀辦
葬事刺史韋公損奉善逝甚深之旨行菩薩廣大
之慈大理司真兼丹徒令史坦惟爭道周如潤州
者疑長之兄弟之子曰堂構爲當代詞人修在家
梵行與門人俾華贊德於萬斯年其文曰至哉元
德高標法流法而不着行而不求輪王自在象寶

調柔黑夜生月驚波起州洲淪大浸日落中夜方
外常在人間代謝性不遷易法無高下億萬人天
從吾受化從受化已委順知時諸佛如是 今得
之清江朗月古人仁祠以我遺法爲人導師

勝果寺至順鎮江志在鶴林門外宋乾道中建高宗
成肅皇后謝氏之功德寺后父冀王墓在焉山門有
流憩亭寺有高宗所賜七佛畫像

磨筭山在黃鶴山東

夾山在城南六里唐時有夾山亭

唐李德裕夾山亭月夜獨宿對櫻桃花有懷伊川

別墅詩皎月照芳樹鮮葩含素輝
愁人惜春夜達曙想巖扉
風靜陰滿砌露濃香入衣
恨無金谷妓爲我奏思歸

竹林寺在山下邑志明崇禎中僧林臯至夾山搆草

廬獨居二年始創爲寺名竹林

案晉時所建之竹林寺卽鶴林寺在黃鶴

山此則襲其名耳

內有祖堂

王士正詩祖堂白雲裏惠棟注林公開山竹林故塢院稱祖堂

鉗錘室臥佛樓一佛居康熙己卯

聖祖南巡

御書寺額

御製竹林寺詩竹賦勒石寺

中雍正癸丑奉勅重建

王士正題名記自招隱至竹林山路紆曲長松如

畫修竹數萬竿清風拂戛上捎雲日與崑崙小憩
鉗錘室聽中上人談林公開山舊事日移晷不能
去憶唐人詩殷勤竹林寺更得幾回過惘然自失
也 又詩超超夾山道幽幽竹林寺林公闢山處
泉澗饒古意鐘磬聞諸天花藥覆平地森梢萬竿
竹烟景滿空翠慈烏識禪心清猿起愁思平生江
海情蕭然但高寄回首禮白雲何時謝塵累 又
自招隱登夾山入竹林寺詩籃輿俯高嶺石磴轉
幽谷諸峯亂空翠澄江疊輕縠迴望戴公宅秋氣
益蒼肅紺壁隱奇杉危亭蔽荒竹孤僧遠獨歸山

鳥暮相逐樹杪見古寺松栝散林麓絕壁尙千尋
紆逕非一曲初蠟阮公屐逝將訪金粟暝坐竹林
深山山靜寒綠 邛象隨丹徒竹林寺詩十里江
城外山開古竹林厨通一澗遠寺俯萬松深石乳
清僧骨花潭靜客心隔簾荒草合招隱念知音

孫枝蔚詩漸近雲中寺山容四面蒼松門聞法鼓
竹徑見天香乞食春風裏思家老衲旁長江不可
斷處處對維揚 張玉裁詩千盤石磴蘚花鮮絕
澗泉流樹杪穿行到春山山盡處亂雲都繞杖藜

前

獸窟山在城南七里元和郡縣志獸窟山一名招隱山

卽隱士戴禺之所居也太平寰宇記昭明太子曾游此

山讀書因名招隱山今石案古蹟猶存案明都穆游名山記離黃鵠西

南行三里抵招隱山山以晉處士戴禺所居得名或又

以爲招隱謂梁昭明太子嘗讀書於此子觀駱賓王游

寺詩云共尋招隱寺初識戴禺家張祐題寺亦云千

年戴禺宅乃知名山始於戴禺其日照明者非也 乾

隆壬午

高宗南巡有 御製招隱寺暨讀書臺詩

招隱寺在山上今在山東麓明時江淮肥遯陳景沂

書戴仲若舍宅爲招隱寺與鶴林古竹院相望數里

孤處於萬山荒涼之巔所由山徑石卵纍纍不絕如

綫有米元章隸碑以紀仲若之出處唐趙璘因話錄
李約曾佐李庶人錡浙西幕約初至金陵於錡座上
屢贊招隱寺標致一日庶人宴於寺中明日謂約曰
嘗聞誇招隱寺昨游宴何殊州中約曰某所賞疎野
耳若遠山將翠幕遠古松用綵物裹腥膻浣鹿跑泉
音樂比山雞聲此則實不如在叔父大廳也庶人大
笑寺有梁昭明太子讀書臺 增華閣昭明太子嘗

選文其中

見陳景
沂書

梁普通二年蕭綸書招隱寺刹

下銘

見通志
金石畧

唐李德裕沈傳師唱和詩刻

亦見
通志

萬松關宋李迪構

見至
順志

虎跑泉鹿跑泉二亭

詳十
二卷

玉蘂亭有玉蘂樹太平寰宇記山有玉蘂樹唐李
德裕作記石存全唐詩李德裕招隱山觀玉蘂樹戲
書卽事奉寄江西沈大夫閣老詩玉蘂天中樹金閨
昔共窺落英閒舞雪密葉乍低帷舊賞烟霄遠新歡
歲月移今來想顏色還似憶瓊枝自注內署沈大夫
所居門前有此樹每花落空中回旋久之方集庭際
大夫草詔之月皆邀予同玩沈傳師和詩曾對金鑾
直同欹玉樹陰雪英飛舞近烟樹動搖深素萼年年
密衰容日日侵勞君想華髮僅欲不勝簪蔡寬夫詩
話李衛公玉蘂詩注以爲禁林有此木吳人不識自

予賞玩始得名此爲潤州招隱山作也碑今裂爲四
段在通判廳中而招隱無復此花矣陳景沂羣芳備
祖招隱寺方丈有閣號增華梁昭明選文於中左有
亭名虎跑鹿跑右有亭名玉蘂有玉蘂二株對峙一
架其株髣髴乎葡萄而非葡萄之可比其葉類柘之
圓尖梅之厚薄其花類梅而萼瓣縮小厥心微黃類
小淨瓶暮春初夏盛開葉獨後凋其白玉其香殊其
高丈餘土人僉言此花自唐迄今天下只有此二株
亦猶瓊花之於維揚千餘年間凡幾遭兵燬而僅餘
此欲天下皆知此花非礬非瓊復出鮮儔而自成一

家也胡仔漁隱叢話晉宋以來招隱寺名甲京口古
松修竹清泉幽澗播在談詠誇詡絕勝邇者樵伐童
赭實不副名其中玉蘂累經兵燬自普覺師來主法
席頓還三百年舊觀加以年歲蒼翠環舍景物增遂
至順鎮江志周文忠必大玉蘂辨證跋語云唐人甚
重玉蘂故唐昌觀有之集賢院有之翰林院有之皆
非凡境也往有自鎮江招隱來遠致一木條蔓如茶
藤冬凋春榮柘葉紫莖花苞初甚微經月漸大暮春
方八出鬢如冰絲上綴金粟花心復有碧筍狀類膽
瓶其中別抽一英出衆鬢上散爲十餘蘂猶刻玉然

花名玉蘂乃在於此宋子京筆記維揚后土廟有花
色正白曰玉蘂劉原父移瓊花詩序云瓊花別號八
仙花或謂李衛公所賦玉蘂卽此宋次道春明退朝
錄后土廟瓊花或云白唐所植卽衛公所謂玉蘂三
公博洽無比不知何故疑爲瓊花甚無謂也又曾端
伯高齋詩話廬陵段謙叔有楊汝士與白廿二帖云
唐昌玉蘂以少故見貴耳自來江南山山有之土人
取以染不甚惜也則知瑒花爲玉蘂無疑洪景廬容
齋隨筆玉蘂今瑒花又名米囊黃山谷易爲山礬者
在江東彌山亘野而唐昌所產至於神女下游折花

身口山才元
卷六
三
而去以踐玉峯之期是不特土俗罕見雖神仙亦不
識也止因好事者僞作唐人帖故二公皆信之山谷
訛榕作鄭而江南鄉音又呼鄭爲瑒復疑未安於是
創山磬之名其實諸公猶未見此花所謂信耳而不
信目者也

唐權德輿招隱寺上方送馬典設歸上都序扶風
馬諫茂直直方中和之性發於恬曠放言遣詞示
有餘力知名舊矣故相得甚歡觀覽其卷則警言會
心府三復不倦若霜鴻清唳松雪孤映或諸生所
不能至者而茂直至之且多特操尤病苟進故調

於南宮仕於東朝戰勝無悶官閒更適適相遇於
南徐俄愴離居官局所係言旋上國子乃與一二
踈放之客詣精廬上方主人又以啜茗籍芳代夫
飛觴舉白元言至論代夫握手流涕時物且舉靈
臺曠然晴江有楓千里在目茂直深於詩者衆君
子以詩賦之

駱賓王陪潤州薛司空丹徒桂明府游招隱寺詩
共尋招隱寺初識戴嵩家還依舊泉壑應改昔雲
霞綠竹寒天筍紅蕉臘月花金繩儻留客爲繫日
光斜 綦母潛題招隱寺絢公房詩開士度人久

空巖花霧深徒知燕坐處不見有爲心蘭若門對
壑田家路隔林還言澄法性歸去比黃金 王昌
齡諸官游招隱寺詩山館人已空青蘿換風雨自
從永明世月向龍宮吐鑿井長幽泉白雲今如古
應真坐松柏錫杖挂窻戶口云七十餘能救諸有
苦回指巖樹花如聞道場鼓金色身壞滅真如性
無主僚友同一心清光遣誰取 劉禹錫詩隱士
遺塵在高僧精舍開地形臨渚斷江勢觸山迴楚
野花多思南禽聲例哀殷勤最高頂閒卽望鄉來
皇甫冉招隱寺送閩判官還江州詩離別那逢

秋氣悲東林更作上方期共知客路浮雲外暫愛
僧房墜葉時長江九派人歸少寒嶺千重雁度遲
借問潯陽在何處每看潮落一相思 李嘉祐招
隱寺東峯茶宴送內弟閻伯均歸江州詩萬畦新
稻傍山村數里深松到寺門幸有茶香留釋子不
堪秋草送王孫烟塵怨別惟愁隔井邑蕭條誰忍
論莫怪臨歧獨垂淚魏舒偏念外家恩 李正封
夏游招隱寺暴雨晚晴詩竹林風雨過蕭疎臺殿
涼石渠寫奔溜金刹照頽陽鶴去巖烟碧鹿鳴澗
草香山僧引清梵幡蓋繞迴廊 張祐詩千年戴

禹宅佛廟此重修古寺人名在清泉鹿跡幽竹光
寒閉院山影夜藏樓未得高僧旨烟霞空暫游

宋王琪詩蒼崖何蟠回嘗爲隱君宅孰謂人琴亡
松風正蕭瑟花開雪英舞鹿去崑泉冽經聲草堂
迴天香中夜發月落山氣深清猿嘯亦絕如何人

外迹輕爲世網別 蘇舜欽招隱道中詩揚鞭望

招隱塵思漠然收雲接青林合泉兼碧草流疎鐘
傳別壑晚日動前樓嘉遯平生志吁嗟何暫游

曾鞏詩一徑入松下兩峯橫馬前攀緣綠蘿磴飛
去蒼厓巔昔人此嘉遯手弄朱絲絃想當林圃月

獨寫山中泉此樂非外得肯受世網牽我亦本蕭
散至此更怡然偏憐最幽處流水鳴濺濺 明郎
佐卿詩城南搖落後一徑入林幽山合聊容寺松
深獨影樓葉飛千澗暝雲起萬峯秋叢桂年年待
風塵已白頭 國朝王士正詩筍輿越黃鶴連岡
帶平楚歷歷南朝松風吹落寒雨石枹紅始垂沙
泉碧方吐遂造戴公山風氣何清古山門映殘照
雙泉咽寒嶼玉蕊不復見空亭閉荒塢戴公昔通
隱風流照巖戶漱泉彈名琴東巡動人主風清一
銷歇初地留空宇金碧漸凋殘林壑自清舉蕭條

黃葉落寂歷幽禽語迴澗起涼吹經堂罷齋鼓緬
想剡中人蒼茫久延佇 又昭明太子讀書臺詩

王孫讀書處梵宇自蕭森無復維摩室空餘雙樹

林荒臺梁碣盡夕景楚江陰古像悲猶在風流不

可尋 補 唐李涉詩兩崖古樹千般色一井寒泉數

尺冰欲問前朝戴居士野煙秋草是邱陵

招隱洞在山上一名師子窟

本與招隱寺相屬寺今移建遂分爲二矣

明朱一 是詩人稱招隱地我隱不須招遠俗慙汗

澗尋山愛寂寥鹿馴眠洞月松古捲江潮他日移

家住生涯是野樵

朱秘書郎黃伯思墓在山下宋史文苑傳黃伯思字長睿邵武人元符三年

進士高等河南府戶

曹參軍擢秘書郎

虞部豐有孚駕部豐有章墓俱在山下京口耆舊傳有孚字寶臣

有章字漢臣丹徒人兄弟相勉以學有孚字寔出身虞部員外郎有章皇祐八年進士駕部員外郎

元都水監羅璧墓在山下元史本傳璧字仲玉鎮江人官明威將軍陞都水監

迴龍山在城南七里

八公洞在山北康熙三十八年 賜額山與招隱山相接故借淮南

南八公故事以名洞 庵名漢隱亦以此 內有平等寺 翠淙庵 深雲

庵 大林庵 紫竹庵 半壑庵 化城庵 潮音

庵 遠塵庵 漢隱庵庵有綠蓋樓

張九徵詩竹塢僧龕傍水灣八公丹竈寄人間雲
中雞犬歸何處猶向城南賦小山 張曾詩漢隱

人何在僧寮星散居泉流分壑細山翠納窗虛老
樹秋陰落荒塍夕照疎杳然塵思冷清磬一聲初

王文治八公洞十詠 平等寺 佛法沒些子唯茲平

等心破壁漏殘月曉來無處尋 翠淙庵 高樹列森梢

女蘿垂幕歷山翠夜淙淙風旛晨寂寂 深雲庵 雲生

深山中俄頃滿崑谷今夜住山人商量伴雲宿 大林

庵 門內夕陽樓門前古溪水新竹出牆來影落溪

流裏 紫竹庵 日暮柴荆裏蕭蕭紫竹林櫻桃花落後

扁鎖到如今牛壑庵縛竹作門扉橫石爲畧約秋來

黃葉多風吹填半壑化城庵化城本無城陽燄空中

過當日妙莊巖如何今破墮湖音庵薜荔覆牆頭青

苔積門外欲聽海潮音喬林迸虛籟遠塵庵庵中最

高樓林光驚乍曙但聽有啼鶯不見鶯飛處漢隱庵

漢隱讀書處自并少時讀書於此落花沾客衣白頭重到此

惆悵故人稀

白龍山在獸窟迴龍兩山之間

白龍洞在山半相傳明萬歷間僧奇然得龍骨數石

於洞中因名洞前一石屏狀若蓮萼故又名蓮花洞

汪懋麟游蓮花洞詩探奇訪古洞玲瓏若天闕絕
壁凌雲端下垂幾千尺洞口白雲生冉冉上几席
層巒三面墜摩挲古苔碧道人山中歸汲泉供游
客自言此境幽終年少人跡邱壑本自佳湮沒良
足惜安得謝與柳高文顯泉石 何佳致詩細徑
緣山轉遙林對澗分僻知人罕至時有磬孤聞石
氣欲成雨檐陰常宿雲我來秋已老巖桂落繽紛
菊花山在城南三里今其上建觀音庵亦稱觀音山
鳳皇山在城南五里

宋進士俞德鄰墓在山下子吏部主事庸墓在東北

一里許見至順鎮江志

案德鄰字宗大號大迂山人永嘉人徙居京口舉咸淳癸

酉進士米亡不仕遜迹以終四庫全書總目有佩韋齋集二十卷提要云集首有皇慶壬子熊禾序稱紫陽方侯嘗序公集載其遺事如作傳然且以能保晚節而心服之云云方侯即歙人方回宋末為睦州守以州降元元擢為總管者也此本佚去此序殆後人以德鄰高節不城陶潛不欲以回序汚之故點削歟

福田山在城南五里

洪山在城南六里

四望山在城南十里見輿地紀勝俗名四面山

宋樞密使高桂墓在山下

至順鎮江志桂字德芳嘉熙已丑進士除廬江主簿

辟兩淮制置司參謀官遷高郵知府後扈從之海上進樞密使與陸秀夫同死於厓山又茅湘字清叔癸子陸秀夫薦之朝從海上驟遷至兵部侍郎從秀夫蹈海死案高茅二公宋史俱失載茅墓並未詳何

所附志
於此

靈山在城南四十里

阿育王山在城南六十里

峴山一名小九華山在城西南五里

地藏寺在山麓明萬歷間建寺有峴山閣觀音閣冬
青閣水明樓萬竹堂翠微精舍

筮重光宿小九華僧舍詩策杖登臨思渺然憑虛
趺坐有青蓮千峯遠抱金陵氣萬井低浮鏡甕烟
瑟瑟秋風聞雁度迢迢江水想龍眠南徐到處多
名勝此地應通甌率天

明少師大學士楊一清墓在山下夫人段氏胡氏祔

明史本傳一清字應寧其先雲南人年十四舉鄉試成化八年進士父喪葬丹徒遂家焉以少傅兵部尙書左都御史總制陝西三邊加少師特進左柱國華蓋殿大學士卒贈太保諡文襄

檀山在峴山北

檀道濟廟在山北麓

南史本傳道濟高平金鄉人也世居京口

宋湖州長史蘇舜欽墓在山下之石門村

舜欽宋史有傳爵里

已詳墓志不錄案自來輿地志罕載墓志此與後米公二葛公墓志俱係傳作且可備考故破例載之

歐陽修湖州長史蘇君墓誌銘故湖州長史蘇君

有賢妻杜氏自君之喪布衣蔬食居數歲提君之

孤子歛其平生文章走南京號泣於其父曰吾夫

屈於生猶可伸於死其父太子太師以告於予予
爲集次其文而序之以著君之大節與其所以屈
伸得失以深誚世之君子當爲國家樂育賢材者
且悲君之不幸其妻卜以嘉祐元年十月某日葬
君於潤州丹徒縣義里鄉檀山里石門村又號泣
於其父曰吾夫屈於人間猶可伸於地下於是杜
公及君之子泌皆以書來乞銘以葬君諱舜欽字
子美其上世居蜀後徙開封爲開封人自君之祖
諱易簡以文章有名太宗時承旨翰林爲學士參
知政事官至禮部侍郎父諱耆官至工部郎中直

集賢院君少以父廕補太廟齋郎調滎陽尉非所
好也已而鎖其廳去舉進士中第改光祿寺主簿
知蒙城縣丁父憂服除知長垣縣遷大理評事監
在京樓店務君狀貌奇偉慷慨有大志少好古工
爲文章所至皆有善政官於京師位雖卑數上疏
論朝廷大事敢道人之所難言范文正公薦君召
試得集賢校理自元昊反兵出無功而天下殆於
久安尤困兵事天子奮然用三四大臣欲盡革衆
弊以紓民於是時范文正公與今富丞相多所設
施而小人不便顧人主方信用思有以撼動未得

其根以君文正公之所薦而宰相杜公堦也乃以
事中君坐監進奏院祠神奏用市故紙錢會客爲
自盜除名君名重天下所會客皆一時賢俊悉坐
貶逐然後中君者喜曰吾一舉網盡之矣其後三
四大臣繼罷去天下事卒不復施爲君攜妻子居
蘇州買水石作滄浪亭日益讀書大涵肆於六經
而時發其憤悶於歌詩至其所激往往驚絕又喜
行草書皆可愛故其雖短章醉墨落筆爭爲人所
傳天下之士聞其名而慕見其所傳而喜往揖其
貌而竦聽其論而驚以服久與其居而不能捨以

去也居數年復得湖州長史慶歷八年十二月某
日以疾卒於蘇州享年四十有一君先娶鄭氏後
娶杜氏三子長曰泌將作監主簿次日液曰激二
女長適前進士陳絃次尙幼初君得罪時以奏用
錢爲盜無敢辯其寃者自君卒後天子感悟凡所
被逐之臣復召用皆顯列於朝而至今無復爲君
言者宜其欲求伸於地下也宜予述其得罪以死
之詳而使後世知其有以也旣又長言以爲之辭
庶幾並寫予之所以哀君者其辭曰謂爲無力兮
孰擊而去之謂爲有力兮胡不反子之歸豈彼能

兮此不為善百譽而不進兮一毀終世以顛擠荒

孰問兮杳難知嗟子之中兮有韞而無施文章發

耀兮星日光輝雖冥冥以掩恨兮宜昭昭其永垂

尙書左丞鄧潤甫墓在山下之下鼻塘

宋史本傳潤甫字温伯建

昌人第進士拜尙書左丞卒贈開府儀同三司諡安惠

蠹齋先生真州教授周孚墓在山下

京口耆舊傳周孚世濟北將家

避亂南徙天資穎悟七歲通春秋左氏傳有鄧氏張書肆孚日往游焉因得盡觀天下書其友陳琪為字集序謂其博聞強記尤遂于楚騷遷史唐韓杜氏之詩文而博以本朝諸公名世之作為詩始以黃陳為法而卒歸于杜屬思深遠鍊句精穩少而工壯而新晚而平淡為文長于叙事簡潔而峻厲不喜襞積雕繪循理而言理盡而止幸棄疾少壯時兄事之擢乾道丙戌進士第為真州教授郡守延璽欲薦之孚不

可卒有蠹齋
集三十卷

黃山在城西南五里

吳季子別廟在山下

明茅坤季子廟記季子廟之在丹徒者予不詳其所自始按司馬遷撰次史記世家云季子封於延陵則延陵季子所食於吳之采邑也而延陵卽今毘陵去丹徒二百里土之人非其故君特廟而食之豈愛其道與然亦不附郡邑之祀里中父老歲時伏臘爭走之以禳年攝福田而廟址舊隸鄉大夫吳公所爲別業山之隘頽甚公閒請有司改廟

於其山之最高處予過謁之而攬所爲江流金焦
北固諸勝若左右翼於襟帶之間可以眺而游晏
焉遂屬予加亭於其前而爲記其事問於予曰季
子之讓國非與何傳春秋者謂孔子惡其辭國而
生亂於其聘魯書吳子使札來聘不稱公子示貶
也予應之曰非也季札使魯在餘祭之四年又夷
昧立十七年而卒而始致位乎季札季札讓而去
然後國人謀立夷昧之子僚又二十年而公子闔
閭弑之由是言之方其聘魯君命也非讓國而逃
也其聘魯陳詩而徵存亡攷小大蓋浸浸乎有禮

矣弑之事未兆也春秋以忠恕明王道聖人安得
以其二十年後去國之亂而預罪之哉曰然則孔
子其與之與曰春秋之世臣弑君子弑父以力相
攘而成篡殺之亂者踵相接其能以兄弟遜國於
其閒者於商得泰伯仲雍焉又百年而得伯夷焉
又五百年而後季札者出紹明泰伯之風彼其屣
視千乘之國而世之所稱分茅胙土聲名文號之
寵澹然無所緇於其心冷然若蟬之飲露而處焉
然後能舉而蛻之其於春秋之世何如也而孔子
惡乎不與之哉使其非與之則何以爲之哭其死

而題其墓也然則傳春秋者妄與曰蓋未能明乎
季札父子兄弟之間而何以服其心也太王之授
季歷也泰伯仲雍相與逃之荆蠻斷髮文身示不
復用然後國人得以推太王之意立季歷季歷得
以傳諸子昌是爲文王使當時泰伯仲雍而苟在
則國君死而立其子制也季歷其能以一日朝泰
伯仲雍而南面於其上乎而又得以傳諸子乎壽
夢卒而諸樊攝行事以待札札當以此時如叔齊
逃而去之或髡鉗自廢然後諸樊不得不自立使
諸樊又如伯夷之讓國人不得不如孤竹立其仲

子之義以及餘祭然後國有定君也季子而一日
在吳則諸樊以爲父之遺命蓋嘗告之先公之廟
書之簡冊布之國人所共聞者安得不倡兄終弟
及之義以次致位於札諸樊卒而餘祭也立餘祭
卒而夷昧也立兄弟相及之義國人固已目見而
心習之矣及夷昧之卒也而莫之立季札始窮而
逃焉闔閭其能甘心於公子僚之自立乎哉胡亥
殺公子扶蘇以自立而陳勝者詐稱公子扶蘇一
呼而天下大亂且闔閭不言國人猶陰拱而議也
况闔閭之雄狠其於公子僚鼠畜而犬視之彼其

謀任伍子胥而進專諸其篡弒之志非一日矣特以國無內外之釁而季子猶位僚肘腋閒故不敢急逞耳吳伐楚喪而季札且出使晉以觀諸侯之變當是時彼闔閭囂然其左右也能無動乎哉故其言曰吳方外困於楚而內無骨鯁之臣是幸札出聘之辭也然猶不敢擅立而曰季子雖至不吾廢也言不吾廢者其義懼於心之辭也季子至而曰苟先君無廢祀乃吾君也然則闔閭蓋已早諒之矣季子必何如而可曰未及諸樊之除喪當先去以避之不之去當請諸樊立公子闔閭以爲太

子諸樊不從則必去或又不及去則夷昧之立也
必當以闔閭死爭之如言諸樊時且曰國本闔閭
所有也不吾從吾將東西南北而之焉是教諸子
他日兄弟相篡弑也夷昧其能不聽之哉季札內
無所處以授夷昧外無所處以待闔閭迺欲默然
以去嗚呼晚矣予故竊謂季子非不當讓國而去
惜其去之處乎父子兄弟之間或未盡也雖然復
命而哭諸墓終身焉不入吳之市季札其始終能
自靖以持亂矣其履古之仁義之遺者與公以爲
然因書之爲記以質士大夫之過廟而謁者

高安寺在山下元至元中薛里吉思建見至順志大興國寺記

宋知海州陳汝奭墓在山下之義里鄉子知建康軍

龍輔京口耆舊傳汝奭字公武由泉之晉江來居景祐中擢進士第嘗以文謁范仲淹奇之為

遂安令改知眉山有能名監交益子務益帥張方平薦通判鄆州鄆守吳奎薦知秀州求省墓得知邵武

軍除知海州歲飢不俟報發廩賑民朝廷嘉之卒贈大中大夫

明總制繆大亨墓在山下之經家灣明史本傳大亨定遠人為同僉

書行樞密院事總制揚州鎮江卒太祖過鎮江歎曰繆將軍生平端直未嘗有過惜不見矣遣使祭其墓

馬鞍山在城西南十五里

宋延康殿學士王漢之墓弟寶文閣學士渙之墓俱

在山下宋史王漢之渙之傳漢之字彥昭衢州常山人進士甲科顯謨閣待制知瀛州定州江寧

進延康殿學士卒年七十弟渙之字彥舟未冠擢上
第吏部員外郎中書舍人寶文閣待制知廣州舒州
中山府加寶文閣直學士卒年四十五王明清玉照
新志王介子沈之漢之渙之瀉之皆近世名卿家居
京口

長山在城西南二十五里山周四十餘里其別支曰桃
花山雞籠山流山漲山雙珠山東庫山西庫山山下有

分龍岡

唐孟浩然寄潤州長山劉隱士詩所思在建業欲
往大江深日夕望京口烟波愁我心心馳茅山洞
日極楓樹林不見少微隱星霜勞夜吟

龍王廟在山下宋元豐六年賜廟額曰靈淵宣和中

封惠澤侯紹興癸酉加靈應昭濟公 至順志

宋禮部員外郎米芾墓在山下 案宋史本傳卒年四十九墓志享年五十

七不同
俟考

蔡肇米元章墓志銘崇寧三年甲子六月制詔今

四方承平百揆時叙小大之政畢舉增光繼志曠

古絕無獨書畫之學未有高世絕人之風殆勸勵

之不至也其議投試簡拔之法著為律令建官養

徒庶幾異時彬彬者有紀焉於是六藝之學以次

開設矣是時元章名能書適官太常一旦奉詔以

黃庭小楷作干文以獻繼進所藏法書名畫賜白

金緡錢甚腆方民間競以前代筆蹟來上萃於秘
府號宣和御覽幾百帙特詔丞相太史楚國公跋
尾公亦被旨預觀緡紳以爲榮遇已而出知常州
不赴改勾管洞霄宮未幾就除知無爲軍踰年復
召爲書畫學博士便殿賜對因上其子友仁所作
楚江清曉圖旣退賜御書畫扇各二遂擢爲禮部
員外郎復以言者罷知淮安軍彌年瘍生其首上
書謝事不許以某年月日卒於官廨享年五十有
七遺命送終皆有治命賻其家以百緡不受官其
子皆特恩也公諱芾字元章世居太原後徙襄陽

自其高會以上多以武幹官顯父光輔始親儒嗜學公生秀穎六歲日讀律詩百首一再過目輒背誦稍長博記洽聞於書務通大畧不喜從科舉學議論斷以己意其說踔厲世儒不能屈也刻意文詞不剽襲前人語經奇蹈險要必已出以崖絕魁壘爲工作字道勁更沈着雅有晉唐風流尤善臨摹至能亂真其畫山水人物自成一家尺縑寸楮人以爲玩四方碑榜咨請踵至所著詩文凡百卷號山林集宣己子聖度錄正韻雜說又數十卷平居退然若不能事事至官下則率職不苟喜爲教

戒吏民初爲煩已而安之時亦越法縱舍有足多者家故饒財旣仕悉以分族人後貧不以爲悔遇古書名畫必極力購取得之乃已余昔相遇於都城敗屋僦居客至烹飲出諸奇相與把玩嘯咏終日所至喜覽山川擇其勝處立宇製名後來莫之廢也過潤愛其江山遂定居焉作庵城東號海嶽日詠哦其閒爲吾州佳絕之觀平生與游多天下士蜀劉涇長安薛紹彭好奇尙古相與爲忘形交風神蕭散是其一流人也舉止頡頏不能與世俯仰故仕數困躋冠服用唐人規制所至人聚觀之

性好潔置水其傍數頰而不悅未嘗與人同器服
眉宇軒然進趨瞻如音吐鴻暢雖不識者亦知爲
米元章也少與禪人摩詰游詰以爲得法其逝作
偈語有倫父佐左武將軍贈中散大夫母閻氏贈
丹陽縣太君旣卒始葬潤州黃鶴山以中散祔初
宣仁聖烈皇后在藩與丹陽君有舊故公少長邸
中以后恩入仕初補秘書省校書郎授含光尉七
遷入淮南幕改宣德郎知雍邱縣乞監中嶽廟授
漣水軍使除發運司勾當公事蔡河撥發入奉常
爲博士三加勳服五品娶許氏封宣公縣君有賢

行五男長則友仁也補將仕郎辭藝能世其家餘
早卒八女子適進士喬襄公僖老南康君教授段
拂承奉郎吳激餘未嫁孫男女各一人以大觀三
年六月某日葬丹徒長山下余元豐初謁荆國王
文公於金陵公以詩文贄見公於人材少所許可
摘取佳句書之便面余由是始識公故爲之銘曰
米胄楚出自鬻分仍世勇爵史載芬旣極而遷稟
不羣生憐野鳩憎家鷓特棄鞴決習典墳君纔弱
冠藝且文豪氣激越蕩乾坤劇談四座寂不喧冠
巾說製傍朝掀浣衣濯帶肌膠皸手攀拉頰送飛

雲邈晉千載風流存鍾王已往楷法紛後生不復
窺完渾臨池幾年墨練裙句法甫白相弟昆造雄
設險驚刑昏文成揮掃干鬼髡蚊虻着紙尾角騫
尺牘藏去珍瑤琨一宦骯髒諸侯門熟視試一引
手援南宮坐曹席未温世間巧語空織文瀕淮出
守朱兩轡三仕三已無戚欣視身蚊蚋何足論思
坐海嶽窮朝曛暮年消中病文園踰月止酒不茹
輦却乘洽風反衆薰西山嶒峻星可捫其陰大江
鬱東奔噴沙發石漂無垠氣象歷落宜置君欲酌
中灑採菰蓀生芻舍奠宿草根尙書局促駒伏轅

這摘往實詔九原吾文坐荒失鋤芸爲歌銘詩下
招魂巫咸上天誰復聞薄暮雷電歸叫閭駛雨忽
作九河翻

度支郎中葛源墓子主簿良嗣墓俱在山下

王安石葛公墓志銘葛公姓也源名也宗聖字也
處州之麗水公所生也明州之鄞後所遷也貫會
大考也遇大考也旺累贈都官郎中考也進士公
所起也洪州左司理叅軍吉州太和縣主簿江州
德化縣令監興國茶場威武軍節度推官知廣州
四會縣著作佐郎知開封府雍邱縣秘書丞知泉

州同安縣太常博士通判建州屯田員外郎知慶
成軍都官員外郎知南劍州司封員外郎祠部郎
中江浙荆湖福建廣南提點銀銅坑冶鑄錢度支
郎中荆湖北提點刑獄此公之所閱官也州將之
甥與異母兄毆人而甥殺之州將脅公曰兩人者
皆吾甥而殺人者乃其兄也我知之彼大姓也無
爲有司所誤不然此獄也將必覆公劾不爲變此
公之爲司理叅軍也州符徙吉水行令事他日令
始至大猾吏輒誘民數百訟庭下設變詐以動令
如此數日令厭事則事常在吏矣公至立訟者兩

庶下取其狀視有如吏所爲者使自書所訴不能
書者吏授之往往不能如狀窮輒曰我不知爲此
乃某吏教我所爲也悉捕劾致之法訟以故少吏
亦終不得其意毛氏寡婦告其子以恩義說之不
得卽使人微捕得之與間語者驗其對乃書寡婦
告者也窮治具服爲私謀誣其子孫距州溪水惡
而歲租幾千萬碩舟善敗民以輸爲愁公始議縣
置倉以受輸則官漕之亦便州不聽公論之不已
倉成至今賴其利此公之爲主簿也中貴人擊驛
吏取所給過家以言府府不敢劾公曰中貴人何

憚爲吾民而有陵之者吾亦耻之上書論其事中
貴人坐紕此公之爲縣於雍邱也屬吏常有隙於
公同進者因讒之公察其旨不聽以爲舉首此公
之爲州於南劔也鑄錢歲十六萬其所施置後以
爲法程此公之爲銀銅坑冶鑄錢也鄂州崇陽大
姓與人妻謀而殺其夫州受賕出之公使再劾劾
者又受賕獄如初而公終以爲不直其弟訴之轉
運使雖他在事者亦莫不以爲寃復置之獄卒得
其姦賕狀論如法此公之爲提點刑獄也甲子四
百三十五公所享年也至和元年六月乙未卒之

年月日也潤州之丹徒縣長樂鄉顯揚村公所葬也嘉祐元年十月壬申葬之年月日也鄉邑孫氏今祔以葬者公元配也萬年縣君范陽盧氏公繼配也良肱良佐良嗣公子也妻太常博士黃知良曰金華縣君公女也起進士爲越州餘姚縣尉主公之喪而請銘以葬者良嗣也論次其所得於良嗣而爲之銘者臨川王某也銘曰士窾以養交兮馳官之不思維公之所至兮樂職嗜事彼能顯聞兮公則不晰不銘示後兮孰勸爲瘞 又葛興祖墓志銘許州長社縣主簿葛君諱良嗣字興祖其

先處州之麗水人而興祖之父徙居明州之鄞興祖葬其父潤州之丹徒故今又爲丹徒人矣曾大父諱遇不仕大父諱盱贈尙書都官郎中父諱源以尙書度支郎中終仁宗時度支君三子當天聖景祐之間以文有聲赫然進士中先人嘗受其摯閱之終篇而屢歎葛氏之多子也旣而三子者仲伯皆蚤死獨其季在卽興祖興祖博知多能數舉進士角出其上而刻勵修潔篤於親友慨然欲有所爲以效於世者也年四十餘始以進士出仕州縣十餘年而卒窮於無所遇以死嗟乎命不可控

引而才之難恃以自見蓋久矣然興祖於仕未嘗
苟聞人疾苦欲去之如在己其臨視雖細故人不
以屬耳目者必皆致其心論者多怪之曰興祖且
老矣弊於州縣而服勤如此余曰是乃吾所欲於
興祖者夫大仕之則奮小仕之則怠忽不治非知
德者也興祖聞之以余之言爲然興祖娶胡氏又
娶鄭氏其卒年五十三實治平二年三月辛巳其
葬以胡氏祔在丹徒之長樂鄉顯揚村卽其年十
一月某甲子也興祖三男子蘩蘊皆有文學蘩許
州臨潁縣主簿蘊鄧州穰縣主簿蘩尙幼也四女

子皆未嫁云銘曰蹇於仕以為人尤不憇施以年孰主孰謀無大憾於德又將何求

右僕射曾布墓在山下地名相公灣宋史本傳布字子宣南豐人年

十三而孤學於兄輩同登第拜右僕射罷為觀文殿大學士知潤州大觀元年卒於潤州諡文肅

明太子太保大學士靳貴墓在山下邑志靳貴傳貴字充道舉鄉試

第一會試第二廷試第三人及第授編修選東宮講官歷左中允諭德太常寺少卿禮部吏部侍郎禮部

尚書文淵閣大學士進太子太保戶部尚書武英殿大學士卒諡文僖明史毛紀傳正德十年烏思藏入

貢言有活佛能前知帝遣中官劉允迎之紀言自京師至烏思藏二萬餘里公私煩費不可勝言內閣

梁儲斬貴楊一清皆切諫不報

塢山在長山南

仙人山在城西南四十里

伏牛山在城西南四十里

案唐書地理志潤州貢伏牛山銅器鱗鮮蓋金山亦有伏

牛山之名非謂此也銅器如李肇國史補所云揚州舊貢江心鏡之類是

獨山在城西南五十里

橫山在城西南五十里

宋戶部侍郎張頴墓在山下

宋史本傳頴字仲舉其先金陵人徙鼎州桃源

第進士江陵推官知益陽縣擢江淮制置發運副使徙廣西轉運使哲宗立召為戶部侍郎以寶文閣待

制出為河北都轉運使徙知瀛州復徙荆南卒

白石山在城西南五十里

青山在城西南五十里

曲陽山在城西南六十里中有曲陽泉後漢書襄楷傳
 順帝時琅邪宮崇詣闕上其師于吉於曲陽泉水上所
 得神書百七十卷皆縹白素朱介青首朱目號太平清
 領書注今潤州有曲陽山有神谿水案嘉定鎮江志云
無此山水名今縣西南與句容接境之處有地名曲
陽以在句曲之陽為名其間有山疑即曲陽山也

京口山水志卷六

京口山水志卷七

丹徒山

蒜山在城西五里太平御覽京口記曰蒜山無峯嶺臨江魏文帝南望致歎元和郡縣志山臨江絕壁晉安帝時海賊孫恩至丹徒戰卒十萬率衆登山鼓譟動地引陣南出欲向京城時宋武帝衆無一旅率所領橫擊大破之山多澤蒜因以爲名宋書武帝紀孫恩率衆數萬鼓噪登蒜山居民皆負擔而立高祖奔擊大破之投巘赴水死者甚衆新唐書李敬業傳敬業兵敗與李敬猷

駱賓王等奔潤州潛蒜山下陸游南唐書徐知諤鎮潤
州一日游蒜山除地爲場連虎皮爲大幄號虎帳與賓
僚會飲其中一名算山太平寰宇記蒜山陸龜蒙題曰

算山以周瑜武侯議拒曹操謀算於此因以爲名出輿

地紀勝

案俗以山與金山相望易名銀山而別指山下
一石磧爲蒜山沿誤已久郡邑志又以銀山爲

土山其誤滋甚土山
卽北固山已詳於前山下有京畿嶺

沈德潛游蒜山記予少讀文選顏延之有車駕幸

京口侍游蒜山詩後屢過京口不得所謂蒜山者

戊戌秋訪之士人土人指江濱石磧應高三四丈

廣蕪之石芒峭立不可攀登予疑焉退攷潤州志

所載亦云然予亦不之信也按延之侍車駕從晏
游決非石芒峭立之處又晉史記海寇孫恩驅十
萬衆據蒜山劉裕擊之隄崖下以長刀斫敵破賊
于此以情事度之必無驅十萬衆據一石磧者而
蘇子瞻詩亦云蒜山大有閒田地招此無家一房
客就今所見安得云大有閒田地也已亥春與余
子文圻遊銀山及山之半藉草而坐俯瞰城郭面
臨大江浩浩千里奔赴履舄竊意是山形勢與金
焦北固相埒而其名不見於古心頗疑之詢之余
子余曰此古所云蒜山也古有蒜山無銀山地與

金山相望土人易以今名復以旁一山爲玉山而
蒜山之名移之江濱石磧矣今衆人所稱蓋兩失
之也予聞之恍然遂相與造其巔相度高下旁廣
中平豐土少石與劉禎京口記所云山無峯嶺者
嚼合由是蒜山之名始有定所蓋事不詢之學者
而憑衆人之言鮮不貿貿者也噫天下之大事之
名實混淆者何可勝道衆人之陋知有貨賄寶玉
名宜矣而文學之士秉筆作志者亦不考諸古人
之書其賢於衆人幾何予是以不能無歎也

宋顏延之車駕幸京口侍游蒜山作元天高北列

日觀臨東溟入河起陽峽踐華因削成巖險去漢
宇襟衛徙吳京流池自化造山關固神營園縣極
方望邑社總地靈宅道炳星緯誕曜應辰明睿思
纏故里巡駕卮舊坳陟峯騰輦路尋雲抗瑤豐春
江壯風濤蘭野茂萸英宣游宏下濟窮望凝聖情
嶽濱有和會祥習在卜征周南悲昔老留滯感遺
氓空食疲廊肆反稅事巖耕 鮑照蒜山被始興
王命作暮冬霜雪嚴地閉泉不流元武藏水陰丹
烏還養羞勞農澤旣周役車時亦休高薄符好藉
藻駕及時游鹿苑豈淹睇兔園不足留升嶠眺日

軌臨迴望滄洲雲生玉堂裏風靡銀臺陬
石類星懸嶼木似烟浮形勝信天府珍寶麗皇州
白日迴清景芳豔洽歡柔參差出寒吹嘹唳江上謳
王德愛文雅飛翰灑鳴球美哉物會昌衣道服光猷

謝莊侍宴蒜山詩龍旌拂行景鳳蓋起流雲轉

蕙方因委層華正氤氲烟竟山郊遠霧罷江天分

調石飛延露裁金起承雲 唐許渾登蒜山觀發

軍詩羽檄徵兵急轅門選將雄犬羊憂破竹貔虎

極飛蓬定繫猖狂虜何須矍鑠翁更探黃石畧重

振黑山功別馬嘶營柳驚鳥散井桐低星連寶劍

殘月讓雕弓浪曉戈鋌裏山晴鼓角中
甲開魚照水旗颺虎挈風去想金河遠
行知玉塞空漢廷應有問師律在元戎
陸龜蒙算山詩水繞蒼山固護來當時
盤踞實雄才周郎計策清宵定曹氏樓
船白晝灰五十八年爭虎視三千餘騎
騁龍媒何如今日家天下閭闔門臨萬
國開宋蘇軾蒜山松林中可卜居余欲
僦其地地屬金山故作此詩與金山元
長老魏王大瓠無人識種成何翅實五
石不辭破作兩大尊只憂水淺江湖窄
我材濩落無所用虛名驚世終何益東
方先生好自譽伯夷

子路並爲一杜陵布衣老且愚信口自比契與稷
暮年欲學柳下惠嗜好酸醎不相入金山也是不
羈人蚤歲聞名晚相得我醉而嬉欲仙去旁人笑
倒山謂實問我此生何所歸笑作浮休百年宅蒜
山幸有閒田地招此無家一房客

蒜山亭在上一名二翁亭嘉定鎮江志無爲集云

浮玉僧建亭蒜山之頂丹陽新舊太守林子中希楊

次公傑首登之因名二翁亭今廢

楊傑詩來陪杖履躡孤峯故老旁觀歎二翁海上
波平千里白江東兵壯萬旗紅雲開雲合山頭月

湖落潮生渡口風須約蒙莊老仙客凭闌直下看
龍宮 蘇軾次韻林子甲蒜山亭見寄詩奇逸多
聞老敬通何人慷慨解憐翁十年簿領催衰白一
笑江山發醉紅聞道賦詩臨北固未應舉扇向西
風叩頭莫喚無家客歸掃岷峨一畝宮 再和並
答楊次公詩毗盧海上妙高峯二老遙知說此翁
聊復艤舟尋紫翠不妨持節散陳紅高懷却有雲
門興好句真傳雪竇風唱我三人無譜曲冰夷亦

合舞幽宮

好漢亭在山下明嘉靖中土兵死倭難處

廢今

褒忠廟在山上宋史魏勝傳勝宿遷人充山東路忠
義軍都統制兼鎮江府駐劄御前軍統制知楚州金
人出侵劉寶救不至中矢墜馬死贈保寧軍節度使
諡忠壯時淮南未平詔於鎮江府江口立廟賜號褒
忠且令有司刻木以斂葬於鎮江

案今移祀金山墓在汝山

雲山寺 聚明寺俱在山上元至元開鎮江路達魯

花赤馬薛吉里思建至大四年改爲金山下院賜名
般若集賢學士趙孟頫翰林學士潘昂霄並奉敕撰
碑見至順鎮江志今山巔有銀山寺雲臺院卽此二
寺之址

清寧道院在山半舊名西來庵明天啟中建

余京暮春同沈歸愚登蒜山憩清寧道院詩老去
攀躋興尙存蹒跚與客躡雲根天晴烟樹分瓜浦
春漲波濤拓海門野馬網緼頻過眼蟲沙變滅幾
招魂亂藤荒草山前路鐵騎曾經十萬屯

玉皇殿在山前舊名拱真庵明萬歷初增修易名旁
有三元宮關帝廟大王廟紫陽洞觀音洞凌江閣
宋都巡檢營在山下至順鎮江志宋長編大觀元年
於杭越之錢唐西興楊潤之瓜州西津淮口之盱眙
臨淮各置都巡檢一員於江淮岸側置營解屯守

水軍營在山東至順志宋祥符六年置見圖經

孫楚別墅在山下第一村

案楚未聞居京口然金陵有孫楚酒樓見李白詩又

考晉書石苞都督揚州楚參其軍事知楚固嘗往來於此其有別墅可信也

宋秘閣校理王介墓在山東

宋史王漢之傳父介舉制科以直聞官至秘閣

校理施元之蘇詩注介字中甫

玉山在蒜山前

龍王廟在山上方輿紀要玉山臨江聳立上有龍王

廟

超岸寺在山下舊為玉山寺

至順志紹興間郡守程蓮建浮玉亭寺即其址

崇禎中興化李長科建避風館於其地募造救生船

十以拯溺者 國朝康熙三十八年 賜今額並

諭金山寺避風館二處一切丁銀雜派豁免 船今歸 救生館

陳玉璣登京口避風館高閣望江詩袞袞登樓與

披襟坐上頭果知天地大不盡古今愁孤塔衝烟

立諸峯拍浪浮憑闌一長嘯江月夜橫秋 田雯

詩避風館在江東岸瓜步颿回四月初鴨觜小船

趁潮上櫻桃時節打鱗魚

正平山在蒜山東上有平等寺宋劉宰為記見至順鎮

江志 今廢 下有潮音洞

陽彭山在城西一里

董文友陽彭山春望詞徧訪桃花徑幾回陽彭山
下一株開招呼共向壚頭飲已有輕紅墮酒盃北
固臨江簇一巒參差樓觀着烟寒山中不見山容
好圖畫偏宜此處看 湯斌陽彭山春望詞跋京
口形勝甲東南金焦北固其名特著故畫舫籃輿
日萃其下而未有知所謂陽彭山者是山也雖無
奇峯危巘深澗絕壑之觀然登其上而三山雲樹
環翠如屏長江洶湧風帆隱見與潤州城堞樓櫓
烟火十餘萬家無不近在几席俯仰指顧亦登臨
之勝槩也特其名不見於山經輿誌故騷人之遊

屐不至卽或至焉而文字不足以發之世亦莫得而傳焉則山川之幸不幸豈不以人哉戊申三月董子文友來自毘陵與何子雍南程子千一偶登此山乘春騁望各賦詩十章曰陽彭山春望詞三子皆以詩文擅名當世其詞雖記一時聞見所及而江山形勝如指諸掌余聞京口盛時名家巨族競選山水靚冶之區治園亭臺榭極歲時遊覽之娛自海艘告警山川如故風景頓殊三子懷古瞻今感慨係之宜其詞之婉麗而淒愴也夫天下幽巖邃壑徒爲樵夫漁子所栖遊者多矣此山南望

則米元章之遺墓在焉其西則昭明太子讀書處也風流文章想見其人何從來遊者篇什零落乎此詞流傳於世吾見尋奇探幽者詫爲奇聞異蹟必將載酒登高窮極眺望墨版淋漓侈爲遊覽盛事四方聞而不得至者與金焦北固同入夢想也故余謂仙宮佛窟士女繽紛不可言遊遊陽彭山者自三子始書此所以慶此山之遇也

東嶽別廟在山巔至順鎮江志宋熙寧中建元大德六年行工部尙書辛仲實重修海陵陳膺記

招慶報慈寺在山麓五代吳義順三年建宋易名普

慈寺

蘇軾書普慈長老壁詩普慈寺後干竿竹醉裏曾
看碧玉椽倦客再游行老矣高僧一笑故依然久
參白足知禪味苦厭黃公聒晝眠惟有兩株紅白
葉晚來猶得向人妍

登雲寺在山西登雲門外宋祥符末建至順志

麗春臺在山後明時仕宦餞客之所今廢

師子山在城西二里

寶蓋山在城西四里

小華山在城西十五里山下有白鶴觀

五州山在城西二十五里文選顏延之侍游曲阿後湖
詩望幸傾五州注九州之地宋得其五或謂山名以此
或云曾布詩海門西北起崇邱絕頂參差見五州蔡肇
詩西升崇邱望培塿見五州謂登山望見五州也未知
孰是山生蘭蕙及茶其巔有老人峯天鷲洞下有木棋
墩又有蘇軾書臥看滄江夕聽流泉八字

梁武帝輦道相傳武帝曾至此山遺跡猶存

因勝寺在山下相傳梁代建 國朝乾隆十六年

賜額淨因寺寺內舊有宋黃庭堅開堂疏石刻米芾

跋

見至順志

寺旁有翠巖室

宋有翠巖禪師居此山故名邑人篋重光書額

鮑臯五州山因勝寺詩山翠橫秋冷四天兩峯平
處一江懸松陰無數當門黑林虎時來白晝眠

程夢湘晚過五州山翠巖室詩路轉千峯秀谿迴

一徑微松陰亂人影崖翠溼僧衣樵逐白雲返鐘

和黃葉飛東林月初上習靜坐忘機

宋秀國公陳升之墓在山下

宋史本傳升之字暘叔建州建陽人舉進士拜

鎮江軍節度使同平章事封秀國公卒贈太保中書令謚成肅升之初名旭避神宗嫌名改焉京口耆舊

傳升之自建來居案邑志升之母亦葬此升之曾建顯慈寺於山中

京口轉運使蘇舜元墓在山下

宋史蘇舜欽傳兄舜元字才翁為人精悍

任氣節為歌詩亦豪健尤善草書舜欽不能及官至尚書度支員外郎三司度支判官東都事畧蘇舜欽

傳兄舜元仕至
轉運使亦知名

司空蘇頌墓在山北阜

東都事畧本傳頌字子容舉進士召試知制誥元佑初為

尚書左丞拜右僕射紹聖初除太一宮使居京口以太子少師致仕進太子太保薨年八十二贈司空案

宋史本傳謂頌父紳葬潤州丹陽因徙居之而紳墓實在丹徒京峴山曾肇頌墓志亦云父紳葬潤州故

今為丹徒人

左丞王存墓在山西之仙風里

宋史本傳存字正仲潤州丹陽人登進士

第元佑二年拜尚書右丞遷左丞以資政殿學士知揚州揚潤相去一水用故相例得歲時過家上冢紹

聖初致仕靖國元年卒年九十九贈左銀青光祿大夫至順志王存宅在登雲門內京口集有存閒居詩

云旅居自買百間屋月賜官廩六萬錢又乞得琳宮就退閒誅茅結宇郡城鸞

尚書蔣猷墓在山西阜

宋史本傳猷字仲遠潤州金壇人舉進士拜御史中丞遷

兵部尚書卒贈特進案邑志蔣
猷宅在放鶴門內後爲大軍寨

彭公山與五州山近

香山在城西四十里山出白石可爲坊表欄檻

鐵爐山在城西四十里

宋秘書監翟思墓在山下

參政翟汝文之父山後有
泉汝文作銘詳十二卷

曹王山在城西五十里相傳曹武惠曾駐兵於此嘉定

志作曹山

高驪山在城西五十里太平寰宇記梁武帝輿駕東行

記云自覆船山酒盃山南次高驪山傳云昔高驪國女

來此東海神乘船致酒醴聘之女不肯海神撥船覆酒

流入曲阿湖故曲阿酒美也又搜神記云諸葛恪爲丹陽尹出獵於兩山之間忽見小兒衆慕之諸參佐問之曰此事在白澤圖曰兩山之間其精如小兒曰係囊衆服其博識一名句驪山通典丹徒有句驪山山下仙人洞洞內天然石案石枰東有大小繡毬山皆山別支

覆船山在城西五十里一名覆舟山山出黑石用以取

火與香山所出迥別太平御覽郡國志曰潤州覆舟山

有聞風亭

嘉定志據寰宇記書祥符圖經謂之覆船山

酒甕山嘉定志云亦名覆船山然梁武帝輿駕東行記曰白覆船山酒甕山南次高驪山則爲二山無疑

論山在城西六十里道家所謂二十八福地也見名勝

志嘉定志作崙山至順志別出論山於丹陽未知孰是

莫山與論山近

京口山水志卷七

上房 口力 三 夕

三

京口山水志卷八

丹徒山

石公山在城北九里濱江元史世祖紀宋沿江制置使
趙潛樞密都承旨張世傑知泰州孫虎臣等陳舟師於
焦山南北阿朮阿瑒海登南岸石公山指授諸軍又阿
朮傳宋兩淮鎮將張世傑孫虎臣以舟師駐焦山阿朮
登石公山望之舳艫連接旌旗蔽江曰可燒而走也山
形如雙象一名象山中有一普賢洞峨眉洞上有韓公墩
相傳韓蘄王屯兵處

石隱庵在山下面江舊名普賢寺未詳創始

明冷士嶠石公山藺若詩柴扉臨岸水幽境絕塵
煩寒月隱江嶼暮潮生島門遠峯纔入定清磬不
聞喧日日汀沙畔看鷗無一言

防江軍營嘉定鎮江志開禧二年冬楚州申敵犯清
河宜備江面令閣門陳煥因守臣待制宇文紹節募
能水一千六百人充本府防江水軍於石公山之東
置教場以練士卒又守臣史彌堅創威輔堂

送江亭在山上宋乾道中邵守陳天麟建

取東坡宦
游直送江

入海句以
名今廢

下鼻岡在城北四十里藝文類聚京口記曰城北四十餘里有小岡高五丈許有人鼻形着岡西頭有口在上而鼻在下方圓數尺狀如焦土故老相傳山名下鼻今無復鼻厥口猶在

案此岡郡邑志不載今亦不知岡在何所

汝山在城東北九里太平御覽南徐州記曰丹徒縣東九里臨江有女

同汝

山山東許貢客刺孫策所也三國志

孫策傳注江表傳曰策軍到丹徒須待運糧策性好獵所乘馬精駿從騎絕不能及初吳郡太守許貢策殺之貢奴客潛民間欲爲報讐獵日卒有三人卽貢客也策問何人荅是韓當兵策曰當兵吾皆識之未嘗見汝等

因射一人倒餘二人射策中頰後騎追至皆刺殺之

萬壽寺在山下宋趙安撫故宅大德六年改創至順志

談允謙詩烟寺蕭然不近城僧勤禪誦又勤耕近

看京峴雲朝出遙聽焦巖鶴夜鳴陸相門前新海

漲宗丞墓上古松聲宗忠簡公墓陸忠烈公故居皆相近稻花香引

江村路一杖吾何憚遠行何金蘭詩層層山抱

寺曲曲水當門數折松楸路幾家薜荔垣寒烟迷

遠浦落日冷荒原獨有幽人住相攜倒一尊

宋陸忠烈公秀夫宅在山下

宋知濟州陳豫墓在山下孫觀陳公神道碑畧豫字子由用族父升之恩任秘

書省校書郎發書張武軍節度判官豫善知人杜大
中者豪縱不治繩檢一日抵罪當下吏豫留不遣屬
鄰帥善御之大中捉撻擊賊勇冠一軍韓世忠少年
善鬪數犯法當伏誅豫願屬帥曰世忠驍悍不畏死
寇至盍令當前斬捕自贖帥從之始隸兵籍遷中散
大夫自言於朝久任邊將且老矣乞東方一郡自效
得守濟南徙萊州不赴請祠得提舉舒
州靈山觀卒年六十八葬丹徒之汝山

中書侍郎劉逵墓

宋史本傳逵字公路隨州隨縣人進士高第同知樞密院拜中書侍

郎罷知亳州再責鎮江節度副使卒贈
光祿大夫案邑志劉逵宅在長橋之南

郎中俞康直墓在山下

京口耆舊傳康直字之彥父希言始自黟縣來居康直用

從祖獻卿恩補太廟齋郎杭州觀察推官范仲淹爲
守以政委之爲泗州軍事推官知桐城簽書武宣軍
節度判官所公事通判睦州皆有惠政年八十三終
葬丹徒汝山之側曰京峴原案蘇東坡有監洞霄宮
俞康直郎中所居
詩四首見集中

宋贈節度使諡忠壯魏勝墓在山下漩水灣

嘉定志詳見蒜山

大山在城東北四十里道士山五十五里

圖山在城東北六十里濱江宋史高宗紀建炎三年九月
月諜報金人治舟師將由海道窺江浙遣韓世忠控守
圖山又張世傑傳世傑與劉師勇諸將大出師焦山敵
載殼士以火箭攻之世傑大敗奔圖山上疏請濟師不
報元史世祖紀十二年七月張世傑孫虎臣等遁走追
至圖山獲黃鵠白鷁之船數百艘宋人自是不復能軍
明史兵志嘉靖三十二年倭患熾復設副總兵于金山
衛轄海至鎮江與狼山副總兵水陸相應時江北俱被

倭于是量調九江安慶官軍守京口圖山等地久之給事中范宗吳言故事操江都御史防江應鳳二巡撫防海後因倭警遂以通常狼福諸處隸之操江以故二撫臣得委其責操江又以向非本屬兵難遙制亦漠然視之非委任責成意宜以圖山三江會口爲撫操分界報可又嘉靖中令鎮江圖山添設游兵聽金山副總兵調度吳時來江防考京口西接石頭東至大海北距廣陵而金焦障其中流實天設之險江岸之防惟在京口而江中置防則圖山爲最要圖山屹立京口江中有順江扁擔諸沙動亘數里爲之外護舟行其間僅通一路矢

石可及況當江流自東而西而北轉屈之間層峯峭壁
俯瞰湍波若屯設重兵水陸協守賊必不敢越此而西

今以其地險要名爲圖山關山有箭洞山上有塢明崇

禎中吏部郎陳觀陽建

案圖字唐韻市緣切集韻淳沿切並音遊與篙同說文判竹圖

以盛穀也又是爲切音垂集韻山名在吳郡此正謂京
口圖山圖宜讀作垂乃土俗讀如除或讀如徐蓋轉音

耳之譌

明冷士岫詩鑿石排南紀連峯出大川江回絕壁

下山立斷陁前別嶂通吳會平荒入海天時愁波

浪濶風雨起龍眠

東霞寺在山下唐寶歷間建

圖山寨王存九域志丹徒有圖山一寨祥符圖經圖
山寨在圖山下宋史傅伯成傳圖山砦兵素與海盜
爲地伯成廉知姓名會郡都試捕之無一逸去獄具
請貸其死黥隸諸軍

圖山營雍正四年江蘇巡撫張楷以圖山一帶爲鹽
梟聚集之所將簞灣駐劄巡江營守備帶領千總一
員兵二百名移駐韓橋留水司營千總一員駐簞灣

題 准咨行

明刑部郎中唐侃墓在山下

明史循吏傳唐侃字廷直丹徒人正德八年舉

於鄉授永豐知縣進武定知州遷刑部主事案唐順之唐郎中墓志銘侃擢南京刑部員外郎轉郎中明

史誤

五峯山與圖山接山有虎洞

紹隆寺在山內康熙中 賜名靈覺寺

京口山水志卷八

京口山水志卷九

丹徒 水

大江在縣西北自江寧府句容縣界流入與揚州府江都縣分界又東逕丹陽入常州界亦名京江又名丹徒江徐堅初學記長江有別名則有京江江帶郡縣因以爲名則有丹徒江元和郡縣志江今濶一十八里春秋朔望有奔濤太平寰宇記京江水干寶晉紀魏文帝臨江歎曰嗟乎固天所以限南北也論衡儒書言伍子胥恨吳王驅水爲濤今會稽錢唐丹徒江皆立子胥祠欲

止其濤也一名揚子江揚州府志揚子江在儀徵縣南

案儀徵唐為揚子縣蔡寬夫詩話潤州大江本與揚子橋連瓜州

乃江中一洲耳故潮水通揚州城中李紳詩鸕鷀山頭

片雲晴揚州城裏見潮生今洲與揚子橋相連自揚子

橋距江尚三十里山川形勢固有時遷易也亦稱曲江

枚乘七發客曰將以八月之望與諸侯遠方交游兄弟

並往觀濤乎廣陵之曲江李善注漢書廣陵國屬吳地

案曲江或曰錢唐江然選一名北江初學記漢書地理
注明言吳地故志於此

志江至徐陵為北江又荊州記云東北至南徐州名為

北江而入海也吳淑賦注南徐州記京江禹貢北流也

濶漫三十里有大濤聲勢駭壯至江北激赤岸尤爲迅
猛桑欽水經沔水分爲二其一東北流其一又過毗陵
縣北爲北江酈道元注地理志曰毗陵縣舊會稽之屬
縣丹徒縣也北二百步有故城本毗陵郡治也舊去江
三里岸稍毀遂至城下城北有揚州刺史劉繇墓淪於
江江卽北江也江至金山分爲三灩至順鎮江志水記
揚子江南零水第一太平廣記李德裕使取金山中泔
水蔡祐竹窗雜記石簪山北謂之北灩按此三灩謂南
零中泔北灩字不同爲義則一詳見後中泔泉史記吳王濞傳
吳兵犇條侯壁大敗吳王乃與其麾下壯士數千人渡

江走丹徒太平御覽謝承後漢書曰吳郡沈豐爲郡主簿太守第五倫母老不能之官倫每至臘節常感戀乖泣遣豐迎母廣陵母見大江畏水不敢渡豐祭神令子孫對母飲酒因醉卧便渡又續漢書曰張禹拜揚州刺史當過江行部中土人皆以江有子胥之神難於濟涉禹厲聲言曰子胥如其有靈知吾志在理察枉訟豈危我哉遂鼓棹而過三國志吳書孫權傳魏文帝出廣陵望大江曰彼有人焉未可圖也裴注干寶晉紀曰吳人臨江爲疑城自石頭至於江乘卓以木楨衣以葦席加采飾焉一夕而成魏人自江西望甚憚之遂退軍又徐

盛傳盛建計從建業築圍作薄落圍上設假樓江中浮船文帝到廣陵望圍愕然彌漫數百里而江水盛長遂引軍還又步騭傳注吳錄曰步騭表言北降人說北人多作布囊欲以盛沙塞大江吳主曰此曹必不敢來若不如孤言當以牛千頭爲君作主人後有呂範諸葛恪云每讀步騭表輒失笑此江與開闢俱生豈有可以囊塞理也晉書祖逖傳逖渡江中流擊楫而誓曰不清中原而復濟者有如大江又苻堅傳堅曰吾將薄伐南裔以吾之衆投鞭於江足斷其流太子宏曰晉阻險長江未可圖也彼若憑長江以固守徙江北百姓於江南增

城清野杜門不戰我已疲矣御覽三十國春秋曰劉裕次山陽聞何無忌敗績卷甲兼行將濟江而風急衆咸難之裕曰若有天命風當自息如其天不助舟覆溺何足可怪卽命登舟舟移而風止宋書五行志文帝元嘉二十六年二月幸京口有黑氣暴起占有兵明年魏南寇至瓜步飲馬於江南史陳後主紀禎明三年隋將賀若弼攻下京口緣江諸戍望風盡走分兵斷曲阿之衝而入又孔範傳隋師將濟江羣臣請爲備防後主未決範曰長江天塹古來限隔豈能飛渡李肇國史補揚州舊貢江心鏡五月五日揚子江中所鑄也通鑑唐紀德

宗建中四年淮南節度使陳少游聞朱泚作亂修塹壘繕甲兵浙江東西節度使韓滉繕館第修塙壁以備車駕渡江少游發兵三千大閱於江北滉亦發舟師三千耀武於京江以應之又興元二年議者言韓滉修石城陰蓄異志李泌上章請以百口保滉上卽下泌章令韓臯謁告歸覲臯至潤州滉感悅卽日自臨水濱發米百斛送至江上冒風濤而遣之宋史高宗紀紹興八年五月詔鎮江府募橫江軍千人又劉光世傳高宗在揚州金兵掩至天長倉卒渡江命光世爲行在五軍制置使屯鎮江府控扼江口又王德傳劉光世鎮京口以德爲

都統制金兵復南光世退保丹陽德請以死捍江又解
元傳韓世忠治兵京口解元隸其麾下金人攻浙西世
忠邀其歸路以海艦橫截大江金人出小舟數十以長
鈎扳艦元在別舸躍入敵舟以短兵擊殺數十人擒其
千戶又虞允文傳金人趨瓜州時揚存中成閔邵宏淵
諸軍皆聚京口不下二十萬惟海鱗船不滿百戈船半
之允文謂遇風則使戰船無風則使戰艦數少恐不足
用遂聚材冶鐵改修馬船爲戰艦命張深守滁河口扼
大江之衝以苗定駐下蜀爲援允文與存中臨江按試
又韓世忠傳太乙孛堇軍江北兀朮軍江南世忠以海

艦進泊金山下明旦敵舟譟而前世忠分海舟爲兩道
出其背兀术謂諸將曰南軍使船如使馬奈何募人獻
破海舟策閩人王某者教其舟中載土平版鋪之穴船
版以擢槳風息則出江有風則勿出海舟無風不可動
也又劉寧止傳寧止言京口控扼大江爲浙西門戶請
分常州江陰軍及崑山常熟二縣隸本司庶防秋時沿
江號令歸一可以固守又王埜傳埜知鎮江府以守江
尤重於淮瓜州一渡甚狹請免鎮江水軍調發專一守
江置游兵如呂蒙所言蔣欽將萬人巡江上增創水艦
於揚子江習水戰又文天祥傳元兵至鎮江天祥與其

客杜濟十二人入真州苗再成出迎曰今先約淮西兵趨建康以通秦兵攻灣頭以高郵寶應淮安兵攻揚子橋以揚兵攻瓜步吾以舟師直擣鎮江同日大舉合攻瓜步之三面吾自江中一面薄之瓜步旣舉以東兵入京口西兵入金陵要浙歸路其大帥可坐致也天祥大稱善遣書二淮閩因閒未果長編嘉定十五年知鎮江府趙善湘教浮水軍五百人以黃金沈之江使探得者輒予之於是水藝極精能潛行水底數里又制多槳船五百艘無閒風勢逆順捷疾如飛赤馬白鶴二大舟每舟可載二千人元史兵志至元二十七年江淮行省平

章布連吉岱言揚州建康鎮江三城跨據大江士民繁
會置七萬戶府從之順帝紀十四年命平章政事也先
帖木兒討沿江賊立鎮江水軍萬戶府命江浙行省右
丞佛家閻領之明史吳良傳良從徐達克鎮江進鎮撫
守丹陽張士誠兵出馬馱沙侵鎮江巨艦數百沂江而
上良戒嚴以待太祖親督大軍禦之士誠兵遁追至浮
子門良出兵夾擊獲卒二千又楊文驄傳以兵備副使
分巡常鎮二府監大將鄭鴻達鄭彩軍及 大清兵臨
文驄駐金山扼大江而守擢巡撫兼督沿海諸軍乃還
駐京口合鴻達等兵南岸與 大清兵隔岸相持 大

清兵編大筏置燈火夜放之中流南岸軍發礮石以爲
克敵也日奏捷 大清兵乘霧潛濟迫岸諸軍始知倉
皇列陣甘露寺鐵騎衝之悉潰文驄走蘇州

北周庾信奉命使北始渡瓜步江詩校尉始辭國
樓船欲渡河輻軒臨磧岸旌節映江沱觀濤想帷
蓋爭長憶干戈雖同燕市泣猶聽趙津歌 隋柳

顧言奉和晚日揚子江應制詩詰旦金鏡發驂駕
出城闔鮮雲臨葆蓋細草藉班輪千里烟霞色四
望江山春梅風吹落蘂浦雨減輕塵日斜歡未畢
睿想良非一風生壘浪起霧卷孤帆出揆蒨麗繁

星高論光朝日空美鄒枚侶終謝淵雲筆 又奉

和晚日揚子江應教詩大江都會所長洲有舊名

西流控岷蜀東汎邇蓬瀛未覩織羅動先聽遠濤

聲空濛雲色晦淡疊浪華生欲知暮雨歇當觀飛

旒輕 唐駱賓王渡瓜步江詩奉檄辭幽徑鳴榔

下貴洲驚濤疑躍馬積氣似連牛月迴寒沙淨風

急夜江秋不學浮雲影他鄉空滯留 丁仙芝渡

揚子江詩桂楫中流望空波兩岸明林開揚子驛

山出潤州城海近邊陰靜江寒朔吹生便聞楓葉

下浙瀝度秋聲 祖詠泊揚子岸詩纔入維揚郡

鄉關此路遙林藏初霽雨風退欲歸潮江火明沙
岸雲帆礙浦橋客衣今日薄寒氣近來饒 儲光

羲寒夜江口泊舟詩寒潮信未起出浦纜孤舟一
夜苦風浪自然增旅愁吳山遲海月楚火照江流
欲有知音者異鄉誰可求 王昌齡宿京江口期

劉昫虛不至詩霜天起長望殘月生海門風靜夜
潮滿城高寒氣昏故人何寂寞久已乖清言明發
不能寐徒盈江上尊 劉昫虛暮秋揚子江寄孟
浩然詩木葉紛紛下東南日雨霜林山相曉暮天
海空青蒼暝色况復久秋聲亦何長孤舟兼微月

獨夜仍越鄉寒笛對京口故人在襄陽詠思勞今
夕江漢遙相望 權德輿晚渡揚子江却寄江南
親故詩返照滿寒流輕舟任搖漾支頤見千里烟
景非一狀遠岫有無中片帆風水上天清去鳥滅
浦迴寒沙漲樹遠疊秋風江空翻宿浪胸中千萬
慮對此一清曠回首碧雲深佳人不可望 戴叔
倫江干詩江干望不極樓閣影繽紛水氣多爲雨
人烟遠是雲予生何濩落客路轉辛勤楊柳牽愁
思和春上翠裙 宋徐鉉京口江際弄水詩退公
求靜獨臨川揚子江南二月天百尺翠屏甘露寺

數帆晴日海門船波澄瀨石寒如玉草接汀蘋綠
似烟安得乘槎更東去十洲風外弄潺湲 元尹

廷高雨中渡揚子江見海怪出沒詩吳頭楚尾天
一隅長江浩渺雲模糊中流風急浪花湧船頭黃
帽驚相呼蜿蜒海怪互出沒踴躍與我爲先驅神
閑意定若無見自信膽氣由來麤江神惟識詩客
意故爾獻狀聊相娛岸旁青帘酒可沽拔劍割炙
傾玉壺與君痛飲留斯須此時此意不可孤山川
慘淡百戰餘古今變態難盡摹且書雨裏金焦圖
吳萊風雨渡揚子江詩大江西來自巴蜀直下

萬里澆吳楚我從揚子指蒜山舊讀水經今始睹
平生壯志此最奇一葉輕舟傲烟雨怒風鼓浪屹
於城滄海輪潮開水府淒迷灩澦恍如見滢滢扶
桑杳何所須與草樹皆動搖稍稍鼉鼉欲掀舞黑
雲鯨漲頗心掉明月貝宮終色侮吟倚金山有暮
鐘望窮采石無朝鷁誰歎敲齒兇能神或有偃身
言莫吐向來天塹如有限日夜軍書費傳羽三楚
畸民類魚鼈兩淮大將猶熊虎錦帆十里徒映空
鐵鎖千尋竟然炬桑麻夾岸收戰塵蘆葦成林出
漁戶豈知造物總兒戲且攬長川入尊俎悲哉險

阻惟白波往矣英雄幾黃土獨思萬載疏鑿功吾
欲持觴酌神禹 明王鏊過揚子江詩燕南倦客

江東去一見澄江眼爲開紅日遠疑從地起青山
近欲傍人來中流擊楫空懷志南國持衡獨愧才
漸覺故鄉風物近十年一到思悠哉 國朝錢謙

益渡江詩京江南北路不到十餘年歲月看如此
風波意渺然浮生催渡客宦況釣魚船何事眉山
老歸期只問田 陳允衡京口江上寄林茂之隱
君白下詩寒月散篷隙皎皎爭朝暉不寢學跣趺
如掩山窗扉啟視聞無人遠水長天圍眷懷在高

館旣醉未言歸 陳玉璣望江詩行子乘江望淒

然發浩歌海雲浮客棹江樹接官河雁去吳天盡

潮來楚國多妙高臺上月日夕逐流波 查慎行

月下渡揚子江詩妙高峯下曉鐘撞隔岸吳船正

發幫風露一天人擁被櫂枝搖夢過春江 又雪

後渡揚子江詩十里江風一霎間海門晴色帶潮

還白頭浪裏參差影看盡江南雪後山 陳維崧

京口渡江用辛稼軒韻

永遇樂

如此江山幾人還記

舊爭雄處北府軍兵南徐壁壘浪捲前朝去驚帆

蘸水崩濤颭雪不爲愁人少住嘆永嘉流人無數

神傷只有衛虎臨風太息髯奴師子年少功名指

顧北拒曹丕南連劉備霸業開東路而今何在一

江燈火隱隱揚州更鼓吾老矣不知京口酒堪飲

否

京口唐書音訓在潤州城東北甘露寺側元和郡縣

志京者絕高邳也京上郡城城前浦口卽是京口

日本謂城前浦口後因以爲鎮江之統名劉禹錫詩氣混京口雲潮吞海門石徐鉉詩京口潮來曲岸平

海門風起浪花生皆謂城前浦口也京口渡今名甘露港渡

唐王維送邢桂州詩饒吹喧京口風波下洞庭赭

圻將赤岸擊汰復揚舫日落江湖白潮來天地青

明珠歸合浦應逐使臣星
丁仙芝江南曲未曉
已成妝乘潮去茫茫因從京口渡使報邵陵王
宋梅堯臣京口水詩江頭潮正平日落土山口坐
見遠來舟高帆忽前後將隨入浦風稍渡遙圻柳
客無南北虞始信承平久

西津一名西津渡在城西七里長編大觀元年於揚
潤之瓜州西津各置都巡檢一員置營解屯守以備
巡察老學庵筆記徽宗南幸至潤郡官迎駕於西津
及御舟抵岸上御棕頂轎子一宦者立轎旁呼曰道
君傳語衆官不須遠來衛士廬傳以告遂退元史世

祖紀十二年七月阿塏海董文炳集行院諸翼萬戶

兵於西津渡又阿塏海傳謀告揚州人將夜襲丹徒

守將乞援塏海出扼西津邀擊之

案嘉定志以為卽蒜山渡金陵渡

姜宸英西津義渡贍產碑記自岷山導江而下出

峽汗漫數千里至金焦一束水旋行逆折然後朝

宗於海此曹子桓所為臨江賦詩徘徊而不敢進

者也然予考之史記秦始皇登會稽還從江乘渡

註其地在句容縣北六十里不知何時復徙瓜步

梁庾信集有奉命使北始渡瓜步江詩至唐開元

二十二年刺史齊澣以舟行繞瓜步回遠六十里

始從京口埭下直趨渡江路徑而免漂溺之患故
自唐至今瓜步渡者皆徙而至京口然往時京口
與楊子橋對岸瓜洲特江中一洲耳後瓜洲以北
淤漲與楊子橋連南直對潤州江身益狹江身狹
則水流益汎急舟緣金山之麓而行春秋之間上
流泛漲山水相搏觸漩而爲渦激而成湍雖恬風
霽景猶懼變生不測少遇風波失利一瓠千金故
京口之渡爲天下最險余六月渡江登金山見山
足艤舟五六舟人操楫而坐若有待者寺僧深爽
進曰此爲濟渡之舟自巡撫某公設此後凡有事

於茲土者及往來行旅各捐俸及貲益造舟買田
置市租以贍水手之稍食及其賞格之費焉然久
滋易弛也某懼斯人之弗脫於險而大隳前功願
得一言以示來者余惟易既濟稱君子思患而預
防其說在六四爻曰繻有衣袽終日戒夫涉川者
不能戒之於未濟之前特恃其一舟之無隙以與
彼狂飈駭浪爭命於呼吸之頃固且不可況於待
其既濡然後操舟而拯之此與夫救火者之焦頭
爛額何以異然而聖人之慮患也偏視夫事之可
需者則需之有需之不能不得已而濟者則終日

戒之至不得已而濟而終日之戒之猶不足以勝夫所濟者之險既已瀕於死亡矣乃忽然而得生彼仁人者之於此視夫人之脫之死而易之生其心樂不樂也自數舟者之設常歲活人以四五十計不十年而得活者四五百人矣由十年以前觀之彼四五百人者皆江上之遊魂水府之鬼錄也然則使自今十年之後之人有一不得濟以淪胥以亡者於吾心不且有戚戚乎哉若夫推前人之心以繼於無窮此則思患預防之道宜如是也深爽學佛者也獨能推廣有司德意使人之得免於

危險且曰吾佛之道固然其爲世利益多矣余樂
其有是請也而書之

唐許渾京口津亭送張崔二待御詩愛樹滿西津
津亭墮淚頻素車應度洛珠履更歸秦水接三湘
暮山通五嶺春傷離與懷舊明日白頭人

蒜山津一名蒜山渡在蒜山下馬令南唐書馬仁裕
傳烈祖鎮潤州仁裕監蒜山渡首聞朱瑾之亂馳白
烈祖卽日以州兵渡江定亂烈祖得政基於此也

唐許渾將赴京師蒜山津送客還荆渚詩尊前萬
里愁楚塞與皇州雲識瀟湘雨風和鄠杜秋潮平

仍倚棹月上更登樓他日滄浪水漁歌對白頭

金陵渡

見上

唐張祜詩金陵津渡小山樓一宿行人祇自愁潮

落夜江斜月裏兩三星火是瓜州

高資東西渡在縣西四十里

石公渡在定波門外石公山下

沙窰渡在大港鎮西

韓橋渡在丹徒鄉

至順志朱朱倬詩隔溪人喚漁樵動江上潮平船欲行謂此渡也

揚子津與西津南北相對隋書楊素傳江南人李稜

等聚眾為亂賊朱莫問自稱南徐州刺史以盛兵據

京口素率舟師入自揚子津進擊破之又吐萬緒傳
帝幸江都時劉元進作亂帝徵緒討之緒率衆至揚
子津

唐孟浩然揚子津望京口詩北固臨江口夷山近
海濱江風白浪起愁殺渡頭人 劉禹錫北歸渡
揚子津詩幾歲悲南國今朝賦北征歸心渡江勇
病體得秋輕海濶石門小城高粉堞明金山舊游
寺過岸聽鐘聲 盧綸泊揚子津詩山影南徐暮
千帆入古津魚驚出浦火月照渡江人清鏡悲雙
鬢滄波寄一身空憐芳草色長接故園春

三江口在圖山下

明蕭明美請置江南鎮守海口疏臣按鎮之守禦單弱異常江頭有水兵一營不滿三百陸營兵不滿千圖山在本郡之極東爲三江口設有把總一員兵亦不過千數分汛設防尙恐支抵不給一旦強寇擁至何以應之且吳越之民儇巧而健悍善於操舟當阡危水火之時爲偷生旦夕之計賊衆一至勢必乘機又何以應之臣稽在昔秦璠王良爲亂出沒江沙兵部議置總兵官駐節鎮江勦之已而盜平相沿不革至嘉靖二十九年始有御史

趙錦建言罷設夫罷以無事在昔誠不爲過而設以有事在今尤不可遲則總兵之應復似無容再計矣然有將必有兵臣謂宜募土銳兼募浙勇多則三千少則二千又於本衛軍按冊屯種者覈屯課軍不但練得軍勇抑且稽察屯糧或可以補召募之窮耳至議設餉臣按練餉二百六十餘萬原爲增兵二十餘萬而設奈兵已成黠鬼而餉竟付填谿業已有日今議添兵卽以江南四府之所出者量移而給之不愈於虛擲之無用乎哉或又慮添兵未免擾民不知兵之不戢祇以將之不良是

在擇一廉勇威望之將以膺其任令水陸各營將士並歸統轄新舊操練壁壘一新宛爲天塹築一長城矣

國朝汪楫泊三江口詩月出日未落大江生晚烟
舟停宿鷺起潮落薄冰懸列戍吹笳地黃蘆賣酒
船北來長道路盡醉水雲邊

炭渚在城西五十里有炭渚驛

東浦亦謂之潤浦元和郡縣志在縣東二里北流入江隋置潤州取此浦爲名也

西浦宋書五行志太元十五年京口西浦濶入殺人

魚遇杜蘭香處也太平寰宇記南徐州記云京口舊名碩口異苑云交州阮郎晉永和出都至西浦泊舟見一青衣女子云杜蘭香遣信托如君子郎愕然云蘭香已降張碩何以敢爾女曰伊命年不修必遭凶危敬聞姿德志相存恤郎彎弓射之卽馳牛奔轂軒游霄漢郎等被害

北固浦在北固山下

下鼻浦在城西十里東有憩賓亭圖經云輿地志吳置刺姦屯晉郝鑒嘗置兩壘於浦西

樂亭浦在下鼻西七里

洪信浦在樂亭浦西

徒兒浦在城東二十里藝文類聚京口記縣城東南
大路過長岡五里得屠兒浦者昔諸屠兒居此小浦
因以爲名也葉廷珪海錄徒兒浦在丹徒秦始皇將
徒人過此因名

茅浦隋書吐萬緒傳劉元進作亂江南以兵攻潤州
帝徵緒討之緒率衆至楊子津元進至茅浦將渡江
緒勒兵擊走因濟江背水爲柵明日元進來攻又大
挫之賊解潤州圍而去

申浦新唐書韓滉傳滉建節潤州以舟師由海門大

閱至申浦乃還

嘉定鎮江志申浦在江陰界以春申所封之地得名

徐浦方輿紀要齊建元初以魏人入寇沿江置戍分

置一軍於徐浦即徐陵也

夾灘元史董文炳傳文炳兵駐鎮江張世傑等陳大

艦碇焦山下文炳乘輪船突陣諸將繼進宋師大敗

世傑走文炳追至於夾灘世傑收潰卒復戰又破之

遂東走於海

新洲通鑑孫恩聞劉牢之已還至新洲不敢進而去

注洲在京口西大江中南史宋武帝紀帝伐荻新洲

見大蛇長數丈射之傷明日復至洲裏聞有杵臼聲
往覘之見童子數人皆青衣擣藥問其故答曰我王
爲劉寄奴所射合散傅之帝曰王神何不殺之答曰
劉寄奴王者不死帝叱之皆散仍收藥而反又桓元
舉兵東下司馬元顯遣劉牢之拒之帝參其軍事元
至帝請擊之牢之不許遣子敬宣請和元尅建鄴以
牢之爲會稽內史牢之懼竟縊於新洲梁武帝詩新
洲花似織

中洲晉書蔡謨傳領徐州刺史遣龍驤將軍徐元等
守中洲洪亮言東晉置域志云當卽新洲左近洲也

長命洲太平御覽郡國志曰潤州長命洲梁武帝放生處後魏使李諧來聘武帝問曰彼國亦放生否諧曰不取亦不放帝大慙

胡豆洲南史羊鴟傳侯景於松江戰敗惟餘三舸下海欲向蒙山會景晝寢羊鴟語海師此中何處有蒙山汝但聽我處分遂直向京口至胡豆洲景覺大驚問岸上云郭元建猶在廣陵景大喜將依之鴟拔刀叱海師使向京口景欲透水鴟抽刀斫之景走入船中鴟以稍刺殺至順鎮江志丹徒縣胡豆洲未詳

所在案太平寰宇記胡豆洲在海陵東南二百三十八里海中東西八十里南北三十五里上多流

人羨盪爲業梁太清六年侯景敗走將北過此洲爲
王僧辯軍人所獲據此洲在海陵東南海中不在丹
徒存以
俟考

貴洲在樂亭浦北太平御覽京口記曰嘉子洲西一
里得貴洲周迴四十里許上多有居民昔魏文帝伐
孫權至此洲南望曰彼有人焉而退因名曰貴洲隋
書郭衍傳開皇十年衍從晉王廣鎮揚州遇江表構
逆命衍爲總管領精銳萬人先屯京口於貴洲南與
賊戰敗之生擒魁帥大獲舟楫糧儲以充軍實駱賓
王渡瓜步江詩鳴榔下貴洲

嘉子洲 見上

譚家洲在北固山下海鮮河外楊陸榮三藩紀事本
末鄭成功於順治十六年己亥七月抵焦山集諸將
議曰瓜鎮爲金陵門戶宜先破之乃會僞右提督馬
信前鋒鎮統領余新奪譚家洲僞材官張亮督善泗
者斬斷滾江龍僞兵侍張煌言會僞水師提督羅蘊
章候滾江龍旣斷進據瓜洲上游焚奪滿洲木城成
功與甘輝翁天佑等直搗瓜洲城破其譚家洲及滿
洲木城俱潰成功令僞援勦左鎮劉猷守瓜洲餘皆
渡江趨鎮江我提督管効忠以步兵駐守銀山騎兵
移當大路成功以銀山迫府治爲必爭之地引兵奪

之効忠北鎮江守將高謙降成功以周全斌黃昭守
之屬邑皆下甘輝進曰斷瓜洲則山東之師不下據
北固則兩浙之路不通但坐鎮此南都可不勞定也
不聽率師薄金陵八月由儀鳳門登陸屯嶽廟山大
軍以千騎來薄僞前鋒鎮余新擊敗之遂輕敵不設
備軍士捕魚飲博爲樂我副將梁化鳳偵知之由儀
鳳門穴城出薄新營新不及甲遂就擒成功急令翁
天祐馳援已無及大兵旣敗余新遂以步卒搗中堅
以騎兵繞山後出其背前後夾擊成功大敗諸僞將
各潰走甘輝且戰且走至江騎能屬者三十人被執

殺九月成功還師攻崇明不下十月還島

珠金沙元史本紀至元十二年七月宋趙潛張世傑
孫虎臣等陳舟師於焦山南北阿木分遣萬戶張宏
範等以撥都兵船千艘西掠珠金沙

鷓鴣堰唐僧皎然送楊山人往京口詩夜驚潮沒鷓

鷓鴣堰朝看日出芙蓉樓

沙洲時沒時長其名無定
多不勝載祗載有故實者

明唐順之洲田記古者與天下爲公而泉布其利

然山川林麓天地之產金石鉛錫萑蒲鹽蜃鳥獸

翎革之瑣細莫不爲之厲禁而名山大澤雖封諸

侯不以及者非自封植也懼夫利孔不窒而爭獄

滋繁則是以其利人者爲人害也其慮可謂深矣
丹徒環江爲邑沿江上下多有蘆洲其爲利甚鉅
而新故之洲時沒時長故不入版籍而人據以爲
私每一洲出則大豪宿猾人人睥睨其間畢智殫
賄百計求請或連勢人以搖官府必得乃已及不
可能則讐其得者而相與爲私鬪甚者構亡命挺
矛稍隱賊公閔於叢葦高浪之間相殺或數十人
官司逮捕輒反覆解脫獄案滿筐篋積十數年不
可結絕故洲之爭未已而新洲之爭又起於是丹
徒之視蘆洲如懸疣枝指之著體非特其懸與枝

而已且痛連於骨體而怵於心畜爲癰蠱不治日深而丹徒縮水陸之口厨傳日費數十金謂之班支郡邑公私筵燕諸所狼籍歲費且數千金謂之坊支間里騷然苦焉不可以已也莆田林侯旣蒞郡日夜問民所利病除所不便深知班坊苦民而未有以處也適會有洲田之訟於是慨然諭於衆曰吾欲祛兩害以興兩利可乎且夫古者山澤之利其權一歸於上而今擅於下古有遺人掌客道路委積賓旅廩餼之奉其費一出於官而今役平民權宜歸於上者而擅於下則孔漏孔漏者啟奸

而人以殃費宜出乎官者而役乎民則歛重歛重者積蠹而人以貧今若一切反此二敝使擅乎下者歸之於上役乎民者出之於官塞其漏孔而蠲其重歛因天地之贏以濟人事之乏收豪民之腴以代貧人之瘠是蘆洲之果爲茲邑利也而又何病乎衆謹然曰侯議是侯又以丹陽水陸之衝與丹徒同而並練湖田爲豪民所擅與蘆洲同思推所以處丹徒者處丹陽也乃並二議以請於巡撫公巡撫公是之請於巡按公巡按公是之旣得請於是痛繩其豪之爭洲者與其侵湖者而歸之官

而兩邑廢寺之田附焉總洲與湖田寺田之所入
而勾其贏縮以代故時班坊之所出裁其濫而存
其不可已者於是出入之數大畧相均以嘉靖癸
卯九月而計籍賦如其籍而行之遂以爲故事邑
人旣深德侯而恐後之人不能守侯之法也而又
恐豪者惡是之病已而欲壞之也相率請於邑令
茅君而鑿石以記凡洲田與寺田之在丹徒者爲
畝共五千三百九十五歲入租一千九百擔有奇
易金可若干兩蘆薪歲易金可百兩山薪歲易金
二十六兩以代故時班坊之所出定其額凡爲金

四百兩而羨凡湖田與寺田之在丹陽者爲畝共
二千四百五十有奇歲入租一千七百擔有奇易
金可若干兩湖魚歲易金可二十兩以代故時班
坊之所出定其額凡爲金四百兩而羨藏其羨以
待歲收之所不及而間出其羨以賑凶飢自癸卯
九月至乙巳五月總羨金九百八十二兩米千五
百九十擔有奇其纖悉列之碑陰其區畫出入則
計籍具存林侯名華字廷份篤志古道爲政一本
經術余嘗爲序其口義者其惠愛在民多可書茲
以記洲田也故不及 國朝馮詠蠲免埒江田賦

記 今天子卽位改元 詔免江南省逋賦數

百萬明年沿江水災 詔是年漕米緩輸其半減

地丁銀十之三又明年部臣按 聖祖朝奏銷

籍內載丹徒縣埤江田地一百八十一頃二十二

畝八分七釐六毫故侍御王公之瑚於康熙四十

六年奏請豁免至是鎮海將軍署江蘇巡撫何公

覆奏如前下部議如所請有 旨依議於是歲免

銀一千六百二十二兩八錢二分八釐米麥一千

九百七十七担五斗三升二合始五十一年至雍

正三年共免舊逋銀二萬二千七百一十七兩八

錢八分米麥二萬七千六百八十五担四斗二升
自是歲除其額徵之數編於令是邑濱江田地常
受洪潮衝沒民無以償其賦相率逃亡 聖祖
惻然憫之 詔免二十八年以前逋賦及有侍御
王公之請復允所奏載在部籍其後部臣行查數
四格於制撫兩臺遷延不報至 今上二年復
下部檄於是署巡撫何公會同總督部院查公親
詣江濱具疏聞於 上故降今 旨初 聖祖
巡幸江南者六稔民爲重賦累甚窮苦屢下赦免
之詔故江南民較他省受恩特多 今上御極

方新嘉與大臣議赦議減歲下 詔旨多者免數

百萬少亦數萬江南財賦浩繁之區損 國帑以

益民生不獨見 聖恩之有加無已益以彰

先帝之盛德於弗替也已 旨既下沿江耆老

野夫衛軍屯卒權呼踴躍填街塞郭北向叩頭謝

至於涕流念無以仰答 聖恩且事屬創典宜

有以示後人咸來告丹徒令馮詠請為記故記之

如此

毗陵故城水經注縣北二百步有故城本毗陵郡治

也舊去江三里岸稍毀遂至城下 詳見前

漢揚州刺史劉繇墓水經注毗陵縣舊會稽之屬縣

丹徒縣也城北有劉繇墓淪於江詳見前

明知陝州贈光祿寺少卿史記言墓在城東濱江府志

記言字司直丹徒人萬歷壬子舉于鄉知長沙縣擢陝州知州陝當賊衝記言募勇敢士聘少室僧道清太和者練鄉丁賊屯磁鍾鎮記言迎擊斬數十級生擒二十餘人賊首老回回馬守應等銜之部十數萬衆環州城堅守三月賊解去會夜大雪賊笑自靈寶來緣城上二僧躍身越城河欄賊誘記言降記言大呼曰今日有死知州無降知州也身中四矢刃裂腹洞胸死時崇禎八年十月也事聞贈光祿寺少卿二僧護其喪歸居丹徒之沙渚後太和返少室道清遇盜死

國朝都司羅明昇墓在談家洲今淪於江邑志順治

十六年海寇犯鎮江明昇守談家洲被害諸生談枚

徵藁葬之並爲立廟康熙四十四年 聖駕南巡賜
奮勇致身額新其廟後洲沒於江移祀南岸觀音庵
雍正間移廟南閘口府志明昇南陽人由神木道中
軍守備遷鎮江巡江營都司順治己亥爲寇所害家
丁趙狗兒亦血戰死備兵參議胡直爲文致祭書其
事於石表江上

需亭嘉定志在府治西九里江津之上舊亭絕小乾
道己丑守臣陳天麟重建王象之輿地紀勝需亭北
爲浮玉亭

分口山水志卷九

京口山水志卷十

丹徒 水

高資港在城西四十里明史黃鉞傳建文四年燕兵渡江盛庸戰於高資港敗績港之左右有炭渚黃泥樂亭浦馬步橋永豐橋諸港乾隆壬午

高宗南巡經高資港有御製詩

高資營在高資鎮曰

戰船廠在港口丹徒志京口戰船爲防海而設通計海哨船吧哢船快哨船艚船三百隻舊有船政通

判今歸常鎮道修造建廠高資港

七里港在城西七里明史林鶚傳鎮江漕故經孟瀆險甚巡撫崔恭議鑿河自七里港引金山上流通丹陽避之鶚言道里遠多石且壞民廬墓請按京口牘甘露埧濬之令通舟功力省便恭從其議遂爲永利近此有錢家費家下鼻斷妖洪信諸港

京口港在城西北江口京口閘下

程公下埧在港口

丹徒港在城東南丹徒鎮王存九域志縣有丹徒大港
丁角三鎮

黃水碓在江口宋紹熙間郡守陳居仁建

澗壁港在澗壁一名鐵錨港

草牐在港口

孩溪港在城東苦竹里渡泥港洩港皆近孩溪小港

安港一名大港在城東大港鎮明史紀事本末嘉靖三十
十五年江北倭流劫至岡山山北等港無爲州同知齊
恩率舟師迎戰敗之恩長子尙文次子首叔仲實弟寶
榮姪慎寅及良大卿孫嵩俱在行間嵩年十八驍勇善
射獨前追賊至安港恩等從之伏發恩及其家丁錢鳳
等二十一人力戰皆死之獨嵩慎寅三人得脫賊乘勝

至金山殺鎮江千戶沈宗玉王世良於江中近安港有柳黃諸小港

韓橋港在城東六十里

韓橋相傳韓蘄王屯兵處

山北港在圖山之北其下郭家徐府中新烟墩朱秀太平劉仙莫家諸小港甚多皆平地沙區無山隴之限通潮汐資灌溉而已

便民港一名新開河自縣西簿灣師古灘逕句容之龍潭達上元棲霞山下礮駝壩乾隆四十五年巡撫吳壇奏開以避黃天蕩之險越三年始通行四十九年

高宗南巡經此 賜名便民港

河神廟在師古灘

甘露港在北固山西通關河南出便益橋運河旁通鳳皇池春夏船泊石壁下今漸淤其側有金線港鱣魚港新港亦皆淤塞

宋黃震申提刑司乞濬甘露港狀國事以軍餉爲急軍餉以漕運爲急古人欲貫串河渠至有鑿平地三百餘里者我藝祖最愛惜民力猶首置斗門於五丈河良以大計所關雖勞費有不憚爾今京口轉般倉實依大江而立一水環其前後前引上

河頭以南致浙右之米後出甘露港以北餉兩淮之軍通徹無礙措置曲盡養兵百萬不費一夫擔夯力也近年來甘露港口就乾澁一月間惟兩大汛潮僅及之舟楫不通糧運中痞問其弊源皆曰自往歲郡將拆去甘露閘板始夫智者謀餉變陸爲水今反堙之寸步千里何哉或者弗之思耳某嘗竊謂此港之不可不浚其事有十轉般倉今所交者多江西米每米一担自港外步般至倉雇錢五百是一綱所費白增數千貫綱稍如之何不愈侵盜是此港之不可不浚者一也無港泊舟往往

退藏焦山之阿候潮旋艤艱難萬狀港若開通則
舳艫相銜徑入城市其至如歸是此港之不可不
浚者二也候潮艤舟旣待風色隔沙步卸能復幾
何若徑近倉朝交卸而夕絕矣是此港之不可不
浚者三也退泊不暨舟閣硬沙或近斗岸爲風濤
所撞若纜爲他舟所絕往往損破失米皆由無所
稍泊之故是此港之不可不浚者四也米舟急於
稍泊每大汛輒數舟占港共作一壩截水旋僱小
舟剥淺作壩之費三千貫剥淺之費不預焉舟之
急欲得港若此是此港之不可不浚者五也兩淮

諸司支請軍食其步卸出江而去重廢久淹與綱
戶之來入倉者同是此港之不可不浚者六也米
船近倉檢柅亦易今在僻遠恣雜濕惡是此港之
不可不浚者七也南北之舟皆泊倉岸或遇對剝
徑可就舟是此港之不可不浚者八也脫有緩急
軍糧豈宜少滯國朝閒暇此事正當講明是此港
之不可不浚者九也不獨轉般倉爲然大軍北倉
正與轉般倉夾河而立南倉亦由此河而北此河
通則凡裝運皆便是此港之不可不浚者十也至
若京口爲淮浙之要衝舟楫苟便百貨可以駢集

甘露實京口之主山港脈苟通臺郡皆有關係兼
此邦地仰易盈涸苟有閘以時其啟閉農田之
利益尤多此又軍餉外無窮之便也某人微位下
凡事何敢僭越實以目擊本倉交卸支運兩極其
難到任數日卽親歷其地見大江之入京口者其
道有四最西自京口閘總領所見於此支運河流
亦淺頗費搬夯其二曰海鮮河甚淺見係江西綱
作壩截大汎潮以剥米其三曰鱖魚港尤淺亦江
西綱乘大汎潮隱舟此地隔塘搬米以上詢之故
老皆吳尙書任內所嘗開浚日久漸湮其四則今

來所指之甘露港實居四港之最東則北固山甘露寺下北固山純土如粉獨其北峭石壁立竒枝竦人蓋游觀者所不見豈北固之所以得名歟石之下爲田田之外爲港自利涉門外遶土城而西入倉約二里可容米舟二十萬石最外爲舊石閘之基風濤所不及今居民橋其上稍深折而西爲舊木閘之基今綱戶乘大汎用椿蘆截水其地又漸入則港漸狹蓋居民時采其傍然古岸猶存甚濶也自嘉定間史待制名彌堅嘗浚治今五十年初本不至堙塞自廢閘十年渾水漸入舟始澁而

不通某嘗意他港必未暇浚莫若先浚甘露港石
閘亦未易復莫若且改置外閘爲木閘如此則易
害爲利當盡如前項所陳不然湮且日甚害亦不
止如目前所見而已也區區欲望台慈詳酌其可
特賜申明朝省乞從行下所屬作急開浚修復國
事幸甚

甘露外閘在港口宋嘉定中郡守史彌堅置 內閘
亦彌堅置後改建登仙橋 栲栲閘在登仙橋南宋

淳祐中郡守何元壽置 甘露埧一名程公上埧宋

咸淳六年郡守趙潛立

並邑志

包港宋史傅伯成傳知鎮江府時制置司欲移焦山防
江軍於圖山伯成謂虛此實彼利害等耳包港在焦圖
之中不若兩砦之兵迭戍焉

丁卯港在城南三里通漕河

丁卯埭相傳晉元帝子哀鎮廣陵運糧出京口爲水
涸請立埭於此以丁卯日成故名

丁卯橋在港口

許渾宅方輿勝覽許渾居京口有別墅在丁卯橋

許渾夜歸丁卯橋村舍詩月涼風靜夜歸客泊巖
前橋響犬遙吠庭空人散眠綠蒲低水檻紅葉半

江船自有還家計南湖二頃田
殷堯藩訪許渾
詩去郭來尋隱者居柳陰假步小籃輿每期會面
初償約卻討論心舊得書淺綠垣牆綿薜荔淡紅
池沼映芙蓉爲言肯共留連飲澗有青芹罟有魚

張祐詩遠郭日曛曛停櫂一訪君小橋通野水

高樹入江雲酒興曾無敵詩情舊軼羣怪來音信
少五十我無聞 宋陸游讀許渾集詩裴相功名

冠四朝許渾身世落漁樵若論風月江山主丁卯
橋應勝午橋 明鄔佐卿丁卯橋尋許渾故宅詩

流水城南路幽哉刺史橋芙蓉秋對雨楊柳晚通

湖高韻誰能繼斯人不可招門前有樵徑落日草

蕭蕭

石淙精舍在丁卯橋明楊文襄一清別墅

李夢陽石淙精舍記昔周子起濂溪之上倡明其學天下宗焉其後自濂溪徙廬山遂名廬山之溪曰濂溪名其堂曰濂溪之堂今天下之學宗我師楊公而公亦自安寧石淙渡徙鎮江於是築精舍丁卯橋名曰石淙精舍嗟乎事固有偶同者非謂是哉愚往觀眉山蘇氏愛陽羨山欲徙之蓋卒不返眉山今其墓在郊廓之間曰小自眉者是也愚

謂其特文章士不足法及觀周子自濂溪徙廬山
則又訝曰茲非有道者爲邪蓋天壤間物無常主
自吾之所自出言濂溪也眉山也石淙也固吾土
也白天壤間物言吾安往而不得主耶嗟乎古今
人用心豈異哉愚不佞少幸從公游以故得竊聞
石淙焉石淙有虎邨之邨曹溪之溪螳螂之川白
昆明池來者奔流千里其地崩湍激石兩崖菰葦
交合水汨汨循其間泠然金石之音故曰石淙石
淙視二子故土吾不知其孰愈乃若丁卯橋負山
帶江據東南之會上游之地其泉石巖壑之佳要

不在廬山陽羨下也陽羨姑置勿論且廬山其志
奚爲者耶顧卒幽抑不見於世今公際明天子拔
茹嚮用功著邊徼顯名中外利澤在社稷天下其
還也登橋据水厓坐石磯不一再吟嘯去矣故金
焦大江之雲不能奪京洛之塵而甘露鶴林之情
不能已龍沙鴈塞之行也雖然君子豈以此易彼
哉故孔子曰樂則行之憂則違之夫廬山豈固濂
溪意耶愚不佞徒及公之門力不足濬流揚波南
瞻石淙特望洋耳是何敢言記

大瀆在城東太平御覽京口記曰長村東大瀆

班瀆通鑑劉敬宣勸牢之襲桓元牢之猶豫不決移市

班瀆胡注瀆在新洲西南

案濱江一帶及高騷長山以南港瀆甚多名亦無定不能

悉志志其大而著者

京口山水志卷十

リ
ト
フ
カ
夕
一

一

京口山水志卷十一

丹徒水

漕河自常州府武進縣流逕丹陽縣南又西北逕縣西
又北踰大江入揚州府界太平御覽吳志曰岑昏鑿丹

徒至雲陽而杜野小辛閒皆斬絕陵龔功力艱辛

原注杜野

屬丹徒小辛屬曲阿

又吳錄曰句容縣大皇時使陳勳鑿開水道

立十二埭以通吳會諸郡故船行不復由京口三國志

孫權傳赤烏八年遣校尉陳勳將屯田及作士三萬人

鑿句容中道自小其至雲陽西城通會市作邸閣齊書

州郡志丹徒水道入通吳會入蜀記自京口抵錢唐梁

陳以前不通漕至隋煬帝始鑿渠八百里皆濶十丈夾

岡如連山蓋當時所積之土朝廷所以能駐蹕錢唐以

有此渠耳汴與此渠皆假手隋氏而為吾宋之利豈亦

有數耶

案京口漕渠吳以前即有之觀御覽引吳錄船行不復由京口云云可知至隋則鑿渠益廣非

創始於隋也

宋史王琪傳琪知潤州轉運使欲濬常潤漕河

琪陳其不便詔寢役後議者卒請廢古城埭破古函管

而浚之河反狹舟不得方行公私交病明史劉辰傳漕

河易涸仰練湖益水三斗門久廢辰修築之運舟既通

湖下田益稔

夾岡河道

在丹徒界曰小夾岡嘉定鎮在丹陽界曰大夾岡

江志云會要治平四年七月都水監言兩浙相度到潤州至常州界開淘運河廢置堰閘乞候今年住運開修夾岡河道從之

馮詠丹徒丹陽河工免役碑記鎮海將軍署江寧巡撫部院何公奉

上諭移咨總督兩江部院

查公總漕部院張公總河部院齊公以雍正二年十月甲申會於京口是年八月

上念京口爲

杭嘉湖蘇松常六郡運河入江之道而挑浚偏累丹徒丹陽兩邑百姓故有是命明日四院舟由江口西閘出南閘次丹徒鎮登橫閘遣水利廳持水

平測潮淺深分遣屬吏閱沿河廢閘故址越兩日
至丹陽周視練湖然後反次京口議應修之閘有
三曰江口西閘曰利涉橋小閘曰丹徒鎮橫閘重
建閘四曰張官渡曰陵口曰呂城曰越河開浚則
起江口至丹徒鎮二十里黃泥灞至張官渡十里
七里廟至尹公橋十里七里橋至陵口十三里又
至呂城二十里皆舊阻淺處也江口之西爲觀音
樓東爲水府廟並建草壩以拒江流修築丹陽西
灞以蓄練湖之水所需工料遵 諭旨動用國帑
歲修仍責徒陽二邑而以六郡協濟之議既定繕

摺以聞 上諭具疏來疏奏下部核覆如所議
明年三月報可於是兩邑民莫不怵舞喜悅先是
運河自江口至武進之奔牛百六十里江湖出入
常淤塞爲漕患有司無以塞責率派諸民間五年
大浚用人夫十餘萬水車千餘部費白金六七萬
兩歲小浚亦五六千兩民貧者至鬻子女以應至
是聞 詔旨免役男婦提攜老幼畢至望 闕呼
萬歲歡聲四達以其狀陳於今巡撫張公請題建
萬壽碑亭會蘇松蠲免浮糧有 旨詔免謝恩事
遂寢兩邑之民以詠爲丹徒令恭荷 殊恩又先

身口又示 卷一 三
備位詞臣宜有文辭以揚盛德不敢以淺陋爲解
爰指懃事實宣布 皇仁昭示無極辭曰皇皇

帝祐愷澤單敷輓漕東南萬民其蘇緬彼京
口洪潮所底或漲而淤或壅而圯自徒及陽百六
十里旣築旣浚民亦勞止嘉詔自天眷此南土爾
徒爾陽厥民殊苦申命大僚載厯河澗相度土宜
指陳旁午 帝曰俞哉謨謀允臧亮工熙載視
民如傷在易之益民說無疆飲和食德如煦春陽
金焦之南練湖之北大化滂流感恩抒力如彼山
河高深不測億萬斯年永載 帝德

唐李白丁都護歌雲陽上征去兩岸饒商賈吳牛
喘月時拖船一何苦水濁不可飲壺漿半成土一
唱都護歌心摧淚如雨萬人鑿盤石無由達江濟
君看石芒碭掩淚悲千古

京口閘俗名大閘在城西北距江一里許唐徙漕路

由京口埭渡江至伊婁河

見唐書齊澣傳

宋嘉定八年郡守

史彌堅浚渠記云沿渠而閘者五首曰京口閘次日

腰閘又其次曰下中上閘視時節次第啟閉以出納

浮江之舟歲久木朽石泐擇美材密石而更葺之

見嘉

定明閘廢轉漕者道新河出江舟數敗郡守劉辰復

修見明史
劉辰傳

唐孫逖京口埭夜行詩孤帆度綠氛寒浦落紅曛

江樹朝來出漁歌夜漸聞南溟接潮水北斗近鄉

雲行役從茲去歸情入雁羣

老人閘一名南閘在虎踞門外

新閘在南水關外舊為滅渡橋明天順己卯浚漕河

作閘以殺水勢見府志
今廢

橫閘在丹徒鎮案故老相傳此閘舊制閘門陝而長
西向閘底高門陝而長則長潮力猛

泥活不淤西向則長潮直入落潮從大閘口出底高

則能蓄水近改閘門寬而淺東向閘底低長潮無力

落潮勢平淤積而水不蓄此因簞木由此入口閘門

陝底深簞大不容口門西向轉折不便木商於閘圯

之時承任修築陰改舊制以故數年一濬之漕渠今則無歲不濬志之以俟當事者察核焉

越河閘在越河鎮越河一作月河鈞廊二筆康熙十年五月十八日鎮江迅雷烈風月

河鎮地方隕酒數十曠平置河側

通阜橋在金銀門口舊為板橋明萬厯間易以石

關門橋在通阜橋之南

泰運橋在虎踞門口舊名虎踞橋明萬厯丙子知府

張純易以木春運時撤去民大不便後知府蘇兆民

仍易以石更今名

便益橋在南水關外

永安橋俗名灣子橋在丹徒鎮跨漕河

新豐橋在新豐鎮跨漕河案入蜀記自京口過新豐

豐酒東山小妓歌又唐人詩云再入新豐市猶聞舊酒香皆謂此非長安之新豐也

京口驛舊在京口開萬曆七年知府鍾庚陽改建城

西河口社稷壇左

風神廟在京口驛西乾隆六十年賜翊靈佑順額

江神廟在漕河西近江

郭侍郎祠在京口驛之右後增入唐公侃名郭唐

公祠明史郭任傳任丹徒人建文初佐戶部燕王兵起被擒不屈死之子經亦論死少子成廣西福

王時贈太子太保戶部尚書謚清毅唐公詳見前圖山唐伽墓

附府志張德傳畧德字仲敬丹徒人建文元年以薦諱試禮部授右軍都督府斷事盛庸師出改德

戶科源士使犒師至東昌與北兵遇被執德曠目
言曰天子安宗藩宗藩反欲危天子異日何以見
高皇帝于宗廟王怒劍斷其臂左右刃交下至死
不仆時年四十一德以陣死不入逆籍家人隱其
事至國朝裔孫九徵始屬南昌王猷定立傳
案張公不得與部公同祠者當時隱其事故也
羅公廟在老人闡祀都司羅明昇詳見前談家
洲羅明昇墓

海會寺在丹徒鎮宋建炎中建明景泰二年重修禮

部尚書王英記工部尚書周忱書

會音寺在丹徒鎮漕河乾隆十六年 賜額

舊河嘉定志政和六十八月敕鎮江府旁臨大江舟楫
往來每遇風濤無港河容泊以故三年之間溺舟船凡
五百餘艘人命十倍其數甚可傷惻訪聞西有舊河可

以避急歲久湮廢宜令發運司計度深行浚治以免沈溺之患委官處置早告功

新河城西枝河明史劉辰傳京口閘廢轉漕者道新河出江舟數敗辰修故閘公私皆便

小閘在河上

利涉橋一名浮橋在河口

紅橋在江口新河出江處

海涵河在北固山西北

柳青橋在河上

海鮮河在甘露寺西宋嘉定八年郡守史燭堅浚以泊

防江之舟有記載嘉定志宋史陳居仁傳紹興中鎮江
大旱移居仁爲守因饑治古海鮮界港爲石礎蓄洩以
時通濟漕運

歸水澳在中閘之東宋嘉定中郡守史彌堅重濬有記
載嘉定志其畧曰南徐地高卽漕渠貫城中爲西津斗
門達於江以出納綱運昔之爲渠謀者慮斗門之閘而
水走下也則爲積水歸水二澳以輔乎渠積水在東歸
水在北皆有閘渠滿則閉耗則啟以有餘補不足故渠
常通流而無淺淤之患歷年久澳廢不治渠亦告病父
老言二澳不可不復按行故蹟積水爲居民抵昌獨歸

水澳隄防畧存私念復一澳固足爲渠利然澳之西南則轉殷倉其東北則甘露港引而環之倉垣因以護倉受者在渠給者在壕以便夫綱運之出納引而接之甘露別爲斗門以通於江亘三水爲之長壕焉改修歸水故閘以通於渠且浚而廣之其護倉壕則取其土以廣倉垣其北達於甘露港者則爲上下二閘候潮登否以益納上流之舟且慮二閘之間不足以容多舟也視北閘之址有陂澤則又通之以爲秋月潭以藏舟焉其下閘之外則補浚百八十丈容舟浮江乘便艤泊以避夫風濤之害

積水澳

詳見上

宋轉般倉在歸水澳西南

黃震重修轉般倉記景定元年春聖天子奮張天威再安區夏四闕祀而當癸亥歲於是邊烽之熄侵久矣方且兢兢軍國事凡切於邊者日益蒐講謂京口轉般倉尤兩淮軍饗襟喉賜緡錢五十萬米以石計者千有三百用鳩工新其舊歲十一月建礮鼓明年春告成董役官劉安輦石請記工役余曰是奚足哉盍記其大者乎或曰倉舊八十廩今修六十有一已仆不存者十有八行且併新之

蓋記諸余曰是亦奚足哉蓋記其大者乎紹興七
年我高宗用向子諲之請始以昔之置於泗真者
置京口當是時諸侯方會師江上勃勃乎爭驅而
進指日恢中原轉般之事如之何可一日緩未幾
柄國者摧一世之豪傑而奪之兵託名四大屯廩
之不容出尙安以轉般爲哉倉於是易名曰大軍
君子觀薛雄飛書倉之廳壁謂今大軍倉尙榜稱
轉般使人於邑不自勝淳熙初我孝宗復度地舊
倉之西爲今倉方是時上親閱精銳日夜感勵雖
一飯未嘗忘中原如之何不於轉般留意嘉定更

化增飭唯謹雲屯百萬今猶賴之奈何法久而弊
至有張大糴事者嘗倚轉般爲子母相私之地雖
營葺之費一毫不以請於朝識者終不以爲忠於
職然則轉般之關係不其大矣乎蓋倉之興也未
嘗不出於朝廷而其弊也未嘗不由於有司出於
朝廷也未嘗不爲經久博大之規而其屬於有司
也未有不流於侵奪便私之失倉之更革乎軍實
所繫軍之張弛乎國勢所關唯我宗功祖德格於
皇天聖子神孫繩繩克肖由紹興而有淳熙由淳
熙而有今日復覈其事而一新其修其費胥朝廷

出無異疇曩建立之初意汰有司之蠹冗昌三軍
之司命此其規模功用當何如而獨記工役哉言
未旣衆慷慨動容於是知大義之在人心其不可
磨滅如此乃拜手稽首歌以颺之曰轉般之新兮
紹興常饗軍兮三京誰歟易之兮猶名大軍轉般
之再兮淳熙將何爲兮規恢誰與專之兮轉而自
私轉般之修兮吾皇士飽馬騰兮行恢故疆增光
二宗兮世世其毋忘

護倉濠在宋轉般倉後

腰插在京口插東南

上牖在故程公橋北

中牖在故大軍倉後

下牖在程公下壩東

減水牖在下牖西上有石橋柱刻咸淳六年歲在庚

午七月二十六日長沙趙潛立

以上五牖俱見嘉定志久廢

程公橋在上牖南久廢

鎮西橋俗名拖板橋在京口驛後臨濠

三汊河在城西小門外西由鎮西橋入漕河北通甘露

港

伊婁河新唐書齊澣傳澣遷潤州州北距瓜步沙尾紆

滙六十里舟多敗溺漕路繇京口埭治伊婁渠以
達揚子歲無覆舟減運錢數十萬又立伊婁埭官征其
入太平寰宇記伊婁河開元二十二年潤州刺史齊澣
以潤州北界隔江為限每船繞瓜步江迂迴六十里多
為風濤所損臣請於京口埭下直截渡江二十里開伊
婁河二十五里即達揚子縣無風水之災歲取利百億
並立伊婁埭自是免漂損之災

漕路

案嘉定鎮江志云當時瓜州遙隸潤州故岸得以改置

唐李白題瓜州新河餞族叔舍人賁詩齊公鑿新
河萬古流不絕豐功利生人天地同朽滅兩橋對

雙閣芳樹有行列愛此如甘棠誰云敢攀折美關
倚此固天險自茲設海水落斗門湖平見沙汭我
行送季父弭棹徒流悅楊花滿江來疑是龍山雪
惜此林下興愴爲山陽別瞻望清路塵歸來空寂

滅

古河十國春秋忠懿王世家吳越王俶遣沈承禮等率
兵隨宋平潤州進討金陵江南平請入覲宋帝勅遣供
奉官張福貴等開古河一道自瓜洲口至潤州江口以

待王舟楫

案古河疑卽伊婁河也

關河自北水關達南水關穿城計千二百丈順治十六

年因海警閉兩水關河淤康熙十一年知府高得貴同知孫汝謀募工疏濬舟楫復通乾隆二十八年邑令貴中孚重濬五十一年知府鹿荃又濬後復淤 烏盆澳在城東北之間亦關河之支

貴中孚重濬關河記郡志舊有關河一道貫城之內外民間薪米所需悉藉此以資轉運當糧艘擁擠之際則由江達河重載又得以間道取濟其便利之處邑父老尙能言之自 國初開濬以來歷年旣多久失修治岸土崩卸河形雖在水不容舸是以土著者旣苦於負戴之勞而行旅者亦失其

津濟之便一事廢而遠與近交受其病夫有利弗
興守土之責也正在籌畫開挑適士民秦聖且等
以公捐疏濬爲請余喜其有賴於地方遂亟請於
觀察姚公郡憲李公咸欣然報可畚插旣集囊鼓
弗勝不逾月而大工告竣計由運河入南水關直
抵北水關出甘露港以達江者凡一千餘丈又自
登仙闢西行入運河者凡八百餘丈一律深通舟
楫四達而府經歷王君維城照磨王君樹聲知事
楊君大勳縣丞陸君景澄主簿沈君宋良與董事
紳衿張成璧郭家麟趙德修劉金書李丹實經紀

之其夫工之費則概出之士民公捐初非有所徵
發期會而舊制以復水利以興於以見 聖朝

同化之隆草野踴躍向義如此

千秋橋在府治西跨河廣輿記鎮江西有千秋橋晉

刺史王恭建上即萬歲樓也

綠水橋在千秋橋西俗名高橋

太平橋在綠水橋西

法嘉蓀養疴嘲語夏太史沅與丹徒鎮周氏為中表戚周氏無

子乞太史幼子為嗣太史曰吾宅後臨城河對岸預備倉口有小木橋常溺人君能為我建一石橋當以幼子繼君後周故巨富即日鳩工橋成抱太史幼子去子乳名太平遂以名橋

嘉定橋在千秋橋南嘉定志俗呼禁方橋

今志作利民橋

烏盆澳橋在利民橋東今城隍廟大門外照壁下

范公橋在利民橋南宋景祐間郡守范仲淹建一名
范橋蘇子瞻哭刁景純詩傷心范橋水漾漾空寒藻
一名清風橋見邑志

宋梅堯臣范公橋詩謂公天下才非專一方惠及
此作輿梁力行無鉅細既異國僑爲將同傳巖濟
礮石亘長川何須伐山桂

通濟橋在南水門上今爲南水關

南唐林仁肇宅在清風橋東見明一統志

藏春塢宋刁約所居明一統志在城內清風橋東本

南唐林仁肇故宅陸游南唐書刁彥能傳彥能子布
衍孫約亦名士人在三館晚築室潤州號藏春塢京

口耆舊傳約家世簪纓所居頗有園池之勝約更葺

藏春塢塢西臨流為屋曰逸老堂又西有山阜植松

其上曰萬松岡嘉定志今半為前軍寨至順志宋判
三司鹽鑊院

刁約宅在范公橋東京口集有刁景純懷南徐所居
詩有云城南已葺藏春塢溪側方營逸老堂嶺上萬

松山徑合江中千稻一坵黃正謂此後廢為前軍寨
淳熙末郡守張子顏嘗築亭三楹於廢址取歐陽公

修所題藏春塢詩水浮花出人
間去之句勝曰浮花尋亦廢

司馬光寄題刁景純藏春塢詩藏春在何許鬱鬱

萬松林永日門闌近東風花木深主公今素髮野

服遂初心時與鄉人醉高歌散百金 歐陽修寄

題景純學士藏春塢新居詩清才四紀擅時名晚

卜邨林遂解纓欲借青春藏向此須知白首尙多

情水浮花出人間去山近雲從席上生漫說市朝

堪大隱仙家誰信在重城 王安石藏春塢詩獻

刁十四丈學士蒜山東渡得林邨邂逅藍輿亦少

留今日更知萊氏隱暮年常憶武陵游欲縈垣屋

隨穿屨尙歎塵沙隔獻酬遙約勾吳亭下路春風

深駐五湖舟 蘇軾寄題刁景純藏春塢詩白首

歸來種萬松時看千尺舞霜風年拋造物陶甄外

春在先生杖履中
楊柳長齊低戶暗
櫻桃熟爛滴階紅
何時却與徐元直
共訪襄陽龐德公
又詩
退之身外無窮事
子美生前有盡花
更有多情君未識
不隨柳絮落人家
莫尋羣玉峯頭路
莫看元都觀裏花
但解閉門留我住
主人休問是誰家
朱閣前頭露井多
碧桃枝下美人過
寒泉未必能如此
奈有銀牀素纒何
又刁景純賞瑞香花憶先朝侍宴次韻詩
上苑天桃自作行
劉郎去後幾回芳
厭從年少追清賞
閒對宮花識舊香
欲贈佳人非泛酒
好紉幽佩與沈湘
鶴林神女無消息
爲問

何由返帝鄉

蘇頌宅亦林仁肇宅基京口集有頌新居詩云版築多遺址經營信昔緣自注舊址乃林仁肇故宅林亦溫陵人而家此今余居之信非偶然

陳升之宅在清風橋南內有秀公亭夢溪筆談公治第極宏壯池館綿亘數百步宅成已疾甚肩輿一登西樓而已嘉定志今爲後軍寨并酒海酒庫

米芾宅輿地紀勝在千秋橋西米公自書帖云傲居在丹徒行衙之西脩閑堂瀆月亭佳麗亭在其後臨蓮河之濶水東則月臺西乃西山故寶晉齋之西爲

致爽軒環居桐柳椿杉百十本以藥植之今十年皆

垂蔭一畝真一畝之居也

案今巡道署即其址

丹陽館在千秋橋西宋紹興中建北有脩閒堂後改
為秦潭驛南有皇華亭守臣張子顏建並見嘉定鎮
江志

陸秀夫丹陽館記丹陽館之所始無可考按郡志
紹興十四年朝廷命守臣鄭滋建之於時和議既
成館是用作中門南向接送伴使在東館客使在
西館厥後凡奉法銜命者皆館焉部使者亦如之
在郡國諸邑為特鉅屋與歲陳廩廩將壓於是百

二十有六年矣咸淳五年冬長沙趙公以外司農
典刑顧謂是邦江淮閩浙之所交也四海賓客之
所合也輶車驛騎之所會也而舍於隸人不亦羞
當時之士乎七年春乃一大修之悉撤其舊而新
是圖木甍瓦石厥材孔良孔惠孔時役不告勞暨
訖工功與勦畧等而其鉅也加於昔落成馳書秀
夫曰子之居是邦也蓋記諸竊嘗稽之周官里有
市市有候館館有積嗟夫此王者之政也晉文公
崇大諸侯之館猶汲汲焉繕修是務褒城驛甲天
下才幾何時庭除蕪堂廡殘過者太息今州縣皆

驛也夫以古人則視館如寢後世則視州縣如驛
蓋學之不講而吏道之衰也久矣公共工於茲能
以達之廉以奉之心休而力有餘茲館固舉廢之
一事於乎古之所以創中之所以弊今之所以修
其可以弗記公名潛字元晉忠靖公之子忠肅公
之孫忠肅師張宣公淵源所漸有自來矣奉議郎
宜特差充京湖制置大使司主管機宜文字陸秀
夫記

毛翊丹陽館詩渡江第一南來驛幾度華堂延雁
客百年運逐曉雲空愁殺鞬官老無職南徐今日

古陽關不斷歌聲祖離席國讎已復事尤多折損
年年春柳碧

喜雨樓在千秋橋南宋嘉定中郡守史彌堅建一名

第一樓因戴石屏題句以名

案今其地猶名第一樓街方輿勝覽

樓在城中規模宏壯占一郡勝處頗有登覽之快

戴復古京口喜雨樓落成呈史固叔侍郎詩京口

畫樓三百所第一新樓名喜雨大鵬展翼到中天

化作檐楹不飛去一日登臨天下奇華燈照夜萬

琉璃上與星辰共羅列下映十里蓮花池泰山爲

趨海爲釀手挈五湖爲甕盎銀槽香沸碧瑤春歌

舞當鑪多麗人使君歌了人皆飲更賞谷中花似
 錦五兵不用用酒兵折衝樽俎邊塵寢茲樓屹作
 東南美孰識黃堂命名意持將此酒喫為霖四海
 九州同一醉

勾吳亭方輿勝覽在府治西杜牧潤州詩勾吳亭東

千里秋一作向吳亭陸龜蒙詩秋來頻上向吳亭

案向

疑卽句
字之訛

後更號通吳驛見嘉定鎮江志

青苔寺在綠水橋南杜牧詩青苔寺裏無鳥跡綠水
 橋邊多酒樓

惠安寺在青苔寺西嘉定鎮江志故相文簡向敏中

祠在寺內志又云向文簡公以欽聖皇后賜燕王有功德寺曰資福在開封南渡初寺僧負其像至京口再創以廢額揭之并文簡像在焉

京口山水志卷十一

方下口

卷一

京口山水志卷十二

丹徒水

龍目湖在城東京峴山下太平御覽郡國志曰潤州邊
陂有湖名龍目湖又京口記曰龍目湖秦皇東游觀地
勢云此有天子氣使赭衣徒鑿湖中長岡使斷因改爲
丹徒令水北注江也又梁典曰武帝望京峴山盤紆似
龍掘其右爲龍目二湖寰宇記同

新豐湖在新豐鎮元和郡縣志晉元帝大興四年晉陵
內史張闔所立舊晉陵地廣人稀且少陂渠田多惡穢

闔創湖成漑灌之利初以勞役免官後追紀其功超爲
大司馬一作新豐塘晉書張闔傳立曲阿新豐塘漑田
八萬餘頃

芙蓉湖太平御覽南徐州記曰子英常於芙蓉湖捕魚
得赤鯉持歸以穀養一年遂生角翅云我來迎汝子英
騎之遂乘風雨騰而上天芙蓉湖卽射貴湖也又名上

湖

射貴湖

上湖

並見上案水經注江南東注於具區謂之五湖口五湖謂長塘湖太湖射貴湖

上湖漏湖也射貴湖上湖似非一湖

杜野湖在縣東南十五里

案吳志所謂杜野小辛間卽此杜野郡邑志譌作社墅

寺湖在縣南十八里

鄭湖在縣東南三十八里

綠水潭一名秦潭陸龜蒙詩松門穿戴寺荷徑繞秦潭

自注秦潭始皇所開宋紹興中改為放生池

嘉定鎮江志云其地

右直運河千秋橋北時月觀臨流建亭勝日南山今廢

唐李德裕白芙蓉賦

並序

金陵城西池有白芙蓉

素萼盈尺皎如霜雪江南梅雨麥秋之後風景甚

清漾舟綠潭不覺隆暑與佳客泛玩終夕忘疲古

人惟賦紅葉未有斯作因以抒思庶得其彷彿焉

朱明夕霽佳木凝陰蘭未歇其秀色烏尙留其好

音泛迴塘兮清景暮環修渚兮碧流深誠有感於
逝節更新得於賞心是時黛葉已繁瓊英始發搖
瑞彩於波上挺纖莖於蘋末忽疑巨蚌濯漪暫覩
其明月復似處子映松遙覲其冰雪煥列宿於長
河耀良玉於方折點白露於葭莢散飛鴻於林樾
予乃鼓輕柁入澄瀛度柳杞越蘭蘅裴回容與放
志遺榮近汀洲而菱密出蓮徑而潭平飛鷁鷁起
鷓鴣揮水珠而濺葉動波文而抗莖傳羽卮而適
性合金絲而寫情管度風而音遠歌臨流而轉清
旣而稍憇川陰暫浮霄外極望漪瀾靜無夕靄又

如游女解佩於漢曲宓妃採蓮於湍瀨舒蘊藻以
爲席倚立荷以爲蓋發巧笑之芬芳感佳期之來
會嗟夫楚澤之中無蓮不紅惟斯華以素爲絢猶
美人以禮防躬銀輝光而流燭玉精氣而舒虹雖
有貴其符采且未匹其華容由是南國之姝以爲
麗觀延華頸於沼沚曳羅裙於磯岸且謂降元實
於瑤池徙靈根於天漢悵霄路兮永絕與時芳兮
其玩聽高柳之蚤蟬悲此歲之過半彼妍姿之昭
灼待風雨而消散乃爲歌曰秋水濶兮秋露濃盛
華落兮歎芙蓉菖花紫兮君不識萍實丹兮君不

逢想佳人兮密靜處顏如玉兮無冶容

秋月潭在北固山下宋嘉定中郡守史彌堅因山址陂

澤爲潭以藏防江軍船

見嘉定志

崖石間有舊刻秋月潭三

字

馬潭在縣南五十五里

護軍潭在丁角鎮

夢溪近烏盆澳其水流入關河

夢溪園宋沈括宅在溪上

沈括自志翁年三十許時嘗夢至一處登小山花木如覆錦山之下有水澄澈極目而喬木翳其上

夢中樂之將謀居焉自爾歲一再夢或三四夢至其處習之如平生之游後十餘年翁謫居宣城有道人無外謂京口山川之勝邑之人有圃求售者及翁以錢三十緡得之然未知圃何在又後六年翁坐邊議謫廢乃廬於潯陽之熨斗洞爲廬山之游以終身焉元祐元年道京口登道人所置之圃恍然乃夢中所游之地翁歎曰吾緣在是矣於是棄潯陽之居築室於京口之隄巨木蔚然水出峽中渟滌杳冥繚繞地之一偏者日之曰夢溪溪之上聳然爲邱干本之花緣焉者百花堆也覆堆而

廬其間者翁之棲也其西蔭於花木之間翁之所
憇殼軒也軒之瞰有閣俯於阡陌巨木百尋闕其
上者花堆之閣也據堆之巔集茅以舍者岸老之
堂也背堂而俯於夢溪之顏者蒼峽之亭也而花
堆有竹萬箇環以激波者竹塢也度竹而南介途
濱河銳而垣者杏背也竹間之可燕者蕭蕭堂也
蔭竹之南軒於水澁者深齋也封高而締可以眺
者遠亭也居在城邑而荒蕪古木與豕鹿雜處客
有至者皆頓過而去而翁獨樂焉魚於泉觴於淵
俯仰於茂木美蔭之間所慕於古人者陶潛白居

易李約謂之三悅與之酬酢於心目之所寓者琴
碁禪墨丹茶吟談酒謂之九客四年而翁病涉歲
而益羸濱樞木矣豈翁將蛻於此乎

馬林溪在城南三十五里元和郡縣志練湖在丹陽縣
北周迴四十里晉時陳敏爲亂據有江東務修耕績令
弟諧過馬林溪以漑雲陽亦謂之練塘太平寰宇記後
湖亦名練湖湖水上承丹徒高驪覆船山馬林溪水水
色白味甘輿地志云練塘陳敏所立遏高陵水以溪爲
後湖馬林一稱馬陵唐皇甫冉有馬陵溪遇雨詩

皇甫冉泊丹陽與諸人同舟至馬陵溪遇雨詩雲

林不可望溪水更悠悠共載人皆客離家春是秋
遠山方對枕細雨莫迴舟來往南徐路多爲芳草
留

神溪在城西南曲陽山下

後漢書襄楷傳注潤州有曲陽山神溪水

蜃溪一名辰溪

嘉定志溪自丹徒經延陵入金壇界案辰溪疑卽神溪故溪上之亭名神亭

神亭在溪上吳長沙桓王遇太史慈處三國志吳書

太史慈傳揚州刺史劉繇與慈同郡慈渡江到曲阿

見繇會孫策至使慈偵視時獨與一騎卒遇策慈便

前鬪正與策對策刺慈馬而擊得慈項上手戟慈亦

得策兜鍪會兩家兵騎竝來赴於是解散慈進住涇

縣立屯府策躬自攻討遂見囚執策卽解縛捉其手
曰寧識神亭時耶若卿爾時得我云何慈曰未可量
也策大笑

鳳皇池在北固山下

白蓮池在城南古竹院中

金牛池在城南五里近八公洞

龍池在嘉山上見嘉定鎮江志

薛家池

荷香池並在城南又縣西八里有蓮陂

輿地紀勝

萬東陂在丹徒鎮祥符圖經陂宜稻頃收萬束因名

下鼻塘在城西四里府志明萬曆中知縣龐時雍濬深

丈餘給穀增堤植柳千株可備旱潦眾民便之

官塘在城南八里

以上二塘見嘉定志塘多不勝載載其最古者後同

慶封井在城南一里其水逆流又名逆流泉

唐陸龜蒙慶封宅古井行

並序

春秋左氏傳云襄二

十八年齊慶封亂而來奔既而齊人來讓奔吳吳

句餘與之朱方聚族而居之富於其舊後七年荆

人使屈申圍朱方執慶封而盡滅其族按圖經潤

之城南一里則封所居之地詢問故老井尚存焉

因覽其遺甃故歌之以志其惡古甃團團蘇花碧

鼎深寒泉深百尺江南戴白盡能言此地曾為慶

封宅慶封嗜酒荒齊政齊人翦族封奔迸雖過魯
國羞魯儒欲弄吳民竊吳柄吳分巖邑號朱方子
家負固心強梁澤車豪馬馳似水錦鳳玉龍森若
騰一朝雲夢圍兵至胷陷鋒鏃腦塗地因知富德
不富財顏氏簞瓢有深意宣父嘗違盜泉水懦夫
立事貪夫止今歌此井示吳人斷纆沉瓶自茲始
寄奴井在城內壽邨山下入蜀記壽邨者宋高祖宅故
井尙存焉

燒丹井在焦山相傳焦公故蹟明方豪易名東冷泉今
淪於江

煉丹井在馬蹟山相傳葛洪鍊丹處

開元寺大井續仙傳潤州開元寺大井旁生枸杞歲久
飲其水甚益人

千尺井一名龍湫在五州山翠巖室前翠巖禪師句云
門對懸巖千尺井石橋分水繞松杉

鰻井在北固山下

龍井在長山龍王廟又金山西麓有龍井宋釋別峯鑿
亦稱中泠泉每誤過客

中泠泉在金山下江中嘉定鎮江志蘇軾游金山詩中
泠南畔石盤陀又送金山鄉僧歸蜀開堂詩涪江與中

冷共此一味水蔡肇石排山渡詩中冷之西古石排狂
波悍浪不能摧又煙江壘嶂圖詩中冷之南古浮玉鐘
鼓下震蛟龍川並用此冷字潤州類集江水至金山分
爲三灑又唐竇庠金山詩西江中灑波四截用此灑字
歐陽修云陸羽茶經論水山水次上江水次井水下至張
又新始云劉伯藹謂水之宜茶者有七等以揚子江南
零水第一丹陽寺井第四又新煎茶水記代宗朝李秀
卿刺湖州至維揚逢陸處士鴻漸李素熟陸名因赴郡
抵揚子驛將食李曰陸君善于茶蓋天下聞名矣况揚
子南零水又殊絕二妙千載一遇可曠之乎命軍士挈

瓶操舟深詣南零陸執器以俟之俄水至以杓揚其水
曰江則汪矣非南零者旣而傾諸盆至半陸遽上之曰
此南零者矣軍士大駭踞曰齋至南零舟蕩水覆懼其
勢挹岸水增之處士神鑒也其敢隱焉太平廣記李德
裕居廊廟日有親知奉使京口李曰還日金山下中零
水可與汲一盞來其人舉棹日醉而忘之汎舟至石城
下方憶乃汲一瓶於江中歸京獻之李飲後歎曰江表
水味有異於頃歲矣頗似建業石城下水其人謝過不
憚並用此零字前志昔人取中泠泉用油紙覆瓶長竿
深探度至井底則別用一竿擗破油紙使水入瓶滿然

後引出近歲不復如此取水寺僧乃指水陸堂下井水
爲中泠非也

國朝康熙中

聖祖南巡幸金山有 御製試中泠泉詩乾隆中

高宗駐蹕金山試泉有 御製詩

潘介中泠泉記中泠伯芻所謂第一泉也昔人遊
金山吸中泠膏腋皆有仙氣其知味者乎庚辰春
正月予將有澄江之行初四日自真州抵潤州舟
中望金山波心一峰突兀雲表飛閣流丹夕陽映
紫躊躇不肯艤岸但不知中泠一勺清徹何所耳

次日覓小舟破浪登山周石廊一匝聽濤聲噲咳
激石哮吼迤邐從石磴陟第二層穿茶肆中數折
得見世所謂中冷者瓦亭覆井石龍蟠井闌鱗甲
飛動寺僧爭汲井水入肆是日也吳人謂錢神誕
爭詣寺中爲壽摩肩連袂不下數萬人茶坊滿不
納客凡三往得伺便飲數甌細啜之味與江水無
異予心竊疑之默然起履巉陟險窮盡金山之勝
力疲小憩仰觀石上蒼苔剝蝕中依稀數行磨刷
認之乃知古人所品別在郭璞墓間其法於子午
二辰用銅瓶長綆入石窟中等若干尺始得真泉

若淺深先後少不如法卽非中冷正味不禁爽然
汗下浹背然亦無從得銅瓶長綆如古人法而吸
之飲之也郭公爪髮故在山足西南隔洪濤巨浪
中亂石嶙峋森森若奇鬼異獸去金山數武而徘徊
躑躅空復望洋蓋杳乎不可卽矣日暮歸舟悵
恍若有所失自恨不逮古人佛印談禪坡公解帶
爾時酒甕茶鑪皆挾中冷香氣奈何不獲親見之
也越數日舟返澄江同舟憇道人者有物藏破衲
中琅琅有聲索視之則水葫蘆也朱中黃外徑五
寸許高不盈尺傍三耳銅紐連環亘丈餘三分入

環耳中一縷勾蓋上銅圈上下隨縵機轉動銅丸
一枚繫葫蘆傍其一縮蓋上怪問之秘不告人良
久謂予曰能從我乎願分中冷一斛予躍然起拱
手敬謝遂別諸子從道人上夜行船兩日抵潤州
則譙鼓鳴矣是夕上元節雨後遲月出不見然天
光初霽不甚晦冥鼓三下小舟直向郭墓石峻水
怒舟不得泊攜手彳亍躡江心石五六步石竅洞
洞然道人曰此中冷泉窟也取葫蘆沉石窟中銅
丸傍鎮葫蘆橫側下約丈許道人發縵上機則銅
丸中鎮葫蘆仰盛又發第二機則蓋下覆之筍闔

若膠漆不可解乃徐徐收銅纜啟視之水盎然滿
亟旋舟就岸烹以瓦鐺須臾沸起就道人瘦瓢微
吸之但覺清香一片從齒頰間沁入心胃二三盞
後則薰風滿兩腋頓覺塵襟滌淨乃喟然曰水哉
水哉古人誠不我欺也嗟乎天地之靈秀有所聚
必有所藏乃至拔而爲山穴而爲泉山不徒山而
峙於江心泉不徒泉而異乎江水層疊之下而顧
令屠狗賣漿菜傭僮父皆得領茲山味茲泉則人
人皆有仙氣矣今古以來真才埋沒贗鼎爭傳獨
中泠泉也乎哉次日辰刻道人別去予亦發棹渡

江而鄰舟一貴介方狐裘箕踞命俊童敲火煮井
上中冷未熟也道人姓張其先蓋閩人云

謝方連月夜汲中冷泉詩新月泉上出江華照衣
冷扁舟蕩秋槳汲取波中影昨與山僧期煮月翻
瓦鼎 余京高抄從二丈約夜汲中冷泉月黑不
果因放舟登金山詩巒湖老叟有水癖水經補注
手自芟品泉常鄙甕城俗河流渾濁土井鹹遙指
中冷近郭墓有約乘月張孤帆銀山道士路留客
網魚沽酒供饑饉帶醉下山月忽暗到灘喚渡舟
人謫爲言江黑湍溜險况復崖石多巉嵌趁趁卻

步興未竭揚舲鼓柁頭陀崑有泉螿石覆亭子大
書第一豐碑劄此泉聞道孕龍窟洪流在上如鏽
緘名高大隱反泊沒贖者遂得膺其銜垂綆汲啜
亦清冽箇中誰復分仙凡

天津泉在甘露寺西南府志明太祖幸寺時見山下汲
水題句云甘露生泉天降津旣而僧善觀見很石邊有
異掘之得美泉因取其語名之

虎跑泉在今招隱寺東南舊在寺內唐學士蔣防有碑
記今佚

鹿跑泉去虎跑泉二十餘丈有石刻蔣防泉銘今佚

珍珠泉在招隱寺北宋李廸構及泉亭於上蘇軾詩泉底珍珠濺客忙

金沙泉在八公洞左

獸窟泉在招隱洞

夾源泉在夾山

林公泉在夾山麓縣志明崇禎時林臯鑿石得泉可引至爨下太守程珣題曰林公泉

王士祿林公泉詩林公得泉處日暮僧厨通聞說

秋巖雨傳聲滿寺中 王士正林臯和尚塏院觀

林公泉詩祖堂白雲裏巖堯俯林樾昔人不可見

巖桂花猶發惟有林公泉涓涓漾明月

雙樹泉在夾山藝海珠塵張泓憶舊錄夾山雙樹泉其樹並生連膚榪中有凹隙如盃積水寸許取之不竭奇矣能愈目疾泉爲釋涵中尋出

卓錫泉在五州山因勝寺

夕聽泉在五州山取蘇東坡夕聽流泉語以名

翟公泉在鐵鑪山參政翟汝文銘

靈泉在長山上陳沂南畿志長山上有靈泉其流與練

湖通

紫金泉在城中紫金山下

古泮泉在舊府學之西府志宋元祐間郡守林希鑿井
得石刻泮泉二字明邑令龐時雍重立石曰古泮泉

京口山水志卷十三

丹陽山

丹楊山晉書地理志丹楊山多赤柳在西也太平寰宇

記丹楊以邑界楊柳生丹為名故今字從木為稱案新唐書

丹陽郡在丹楊潤州類集天寶之後謂丹陽者潤州或曲阿非兩漢六朝之丹陽也

北岡在縣西北練湖上太平寰宇記輿地志云曲阿縣

雲陽地屬朱方南徐之境秦有史官奏東南有王氣在

雲陽故鑿北岡以厭其氣又吳錄云截其道使曲故曰

曲阿案今夾岡河道是

天子道寰宇記丹陽縣天子道漢賈山上書秦爲馳
道於天下東窮燕齊南接吳楚卽此道至順鎮江志
輿地志云吳孫皓求鑿道於杜野小辛卽厭王氣之
所

觀音山一名惠山在縣東北一里漕渠東岸

王士正同楊西印副使蔡裕若秀才夜登觀音山
眺曲阿後湖放歌我昨南渡登金焦鯨魚跋浪生
風濤更上君山俯震澤長江萬里窮秋毫五日探
奇興不盡曲阿城下來登高觀音山高高百尺星
辰羅列捫層霄懸崖絕磴挂猿臂崇巒疊嶂森松

毛山巔作亭瞰飛鳥湖光山色相週遭練湖一萬
六千頃勢與江海爭迢遙淵注渟著古所歎滄桑
磨滅非前朝風景不異謝郎死我來憑眺凌寒宵
長嘯空山答山鬼驚飛鷗鶻求其曹滄波混沌接
元氣有如孟水浮堂坳馮夷擊鼓百靈集金支翠
羽光飄搖是時月黑風怒號萬弩突射錢唐潮蛟
龍鼉鱓時隱見靈胥慘淡天吳驕高麗長山互鉤
帶六州一氣回斗杓楊公蘄黃昔開府坐清江漢
真人豪蔡生白皙美無度頗能飲酒歌離騷東吳
菰蘆有君輩力鞭巨石驅神鼉練塘一勺好棲託

結鄰未卜心空勞酒闌歌罷意惆悵烟江明日橫

輕舸

廣福院在山上舊曰觀音院宋治平末賜額爲壽聖

隆興中改今名院有玉乳泉三字陳堯佐書

嘉定鎮江志

銅鐘唐楊行密將安仁義鑄宋嘉定間郡守趙善湘

易去

一碧萬頃亭元至元中創吳潛書扁

俱至順鎮江志

明丁鴻陽登觀音山亭詩絕巘孤亭許醉登重湖

入望碧波澄帆移松頂隨飛鳥寺出林間覆古藤

烟雨萬家懸雉堞水雲千頃泛漁燈汲來玉乳茶

堪煮坐月談空欲共僧

縣城在山南至順志卽古簡州城址寰宇記曲阿縣舊名雲陽屬朱

方南徐之境秦曰曲阿漢景帝四年以縣屬揚州王

莽改爲風美縣梁爲蘭陵縣唐武德二年置雲州五

年改爲簡州八年州廢爲縣復城周三里東門在斜

隸潤州天寶元年改爲丹陽縣

橋西門在縣治前南門在草堰北門在觀音山縣志
元初城廢明嘉靖二十四年知縣陳奎依舊址重築

越二年知縣史永壽增築延袤九里東門在麻巷小

東門在運河口南門在草堰小南門在新巷北門在

倉橋西門在縣治前闢水關二接內河跨漕渠

縣學 後漢書儒林傳包咸曲阿人少爲諸生師事

右師細君習魯詩論語王莽末往東海立精舍講授

光武卽位迺歸鄉里太守黃讜遣子師之舉孝廉除
郎中建武中入授皇太子論語又爲其章句拜諫議
大夫永平五年遷大鴻臚 嘉定志祥符圖經載夫
子廟在縣治東偏慶厯中依廟建學

三賢堂在縣圃祠蘇丞相頌陳修撰東蘇居士庠嘉
定志令徐文度立蘇庠勉陳東赴京手帖在焉至順
志今遷於學之西廡

劉繇城元和郡縣志在縣西南二百四十步漢末繇
爲揚州刺史揚州舊理壽春是時已爲袁術所據故
繇來建城號令江南衆數萬人後孫策東畧繇奔豫

章

經山在縣東北三十里嘉定志云古所謂金牛之山王
莊定存有經山佛殿記都穆游名山記云輿地志謂漢
時金牛出山之東馳至曲阿鄉人柵斷其道名其地為
柵口

崇教寺至順志卽經山院唐建宋治平二年賜今額

有雨華臺

舊嘗有僧講經于此
天花散墜因以名臺

金牛洞

其洞皆石壁
巖險奇怪洞

口纔可容身入則甚大中分三路漸入漸深一路直
入東南一路斜穿東向一路倒上山頂中有石座瑩
潔宛若
碁局

元薩都刺宿經山院詩山中酒熟蟹螯肥正是東

林月上時痛飲不知過夜半滿山風露下松枝

齊宣帝休安陵在縣北二十八里高帝父也追尊為

宣皇帝

案齊書帝諱承之

景帝道生永安陵在縣東北二十六里明帝父也追

尊為景皇帝

案景帝高帝次兄初封始安王卒諡貞

高帝道成泰安陵在縣東北三十一里

武帝頤景安陵在縣東三十二里

明帝鸞興安陵在縣東北二十四里

並元和郡縣志嘉定志

輿地志云泰安陵景安陵與安陵在故蘭陵東北金

牛山其中邱埭西為齊梁二代陵隧口有大石麒麟

辟邪夾道有亭有營戶守典之四時公卿行陵乘舩

鱷白方山由此入蘭陵升安車輶傳驛置以至陵所

案梁代陵在東城蕭塘諸港側近金牛山詳後

唐扶陽王桓彥範墓在經山上德鄉新唐書本傳彥範字士則潤州

丹陽人以門蔭調右翊衛張柬之將誅易之等以為羽林將軍彥範斬易之中宗復位以為侍中封譙郡公扶陽郡王武三思誣殺之

睿宗即位追復官爵諡忠烈

宋江淮都發運使邵飾墓在山下彭泉村京口耆舊傳邵飾字

夫華丹陽人天中祥符元年進士充三司鹽鐵判官除江淮都大發運使

龍圖閣直學士邵必墓通判邵約史墓樞密邵亢墓

並在山下尚德鄉耿岡京口耆舊傳必字不疑寶祐元年進士知諫院權三司使

加龍圖閣直學士知成都卒于道 又約史字公言
以恩補將作監主簿太常寺奉禮郎通判秀州卒
又亢字興宗再試開封府皆第一范仲淹以茂才異
等薦試崇政院入等除建康府節度推官遷龍圖閣
直學士知開封府拜樞密副使薨謚安
簡亢立朝與叔父必齋名世稱二邵

安撫邵彪墓在山下尙德鄉瓜渚村

京口耆舊傳彪字希文宣和三

年進士辟江淮招討使知泰州移楚州兼營內安撫卒

直秘閣知盱眙軍俞長吉墓在山下

京口耆舊傳俞康直丹徒人父

希言自歛之黟縣來居其從祖獻卿子希且亦徙丹徒希且子向向子長吉字幾先父任出官中法科隆

興初除直秘閣知盱眙軍卒

贈秘閣修撰陳東墓在山下尙德鄉桐村

宋史忠義傳陳東字

少陽鎮江丹陽人以貢人太學欽宗卽位伏闕上書論蔡京梁師成李彥朱勔王黼童貫宜誅六賊高宗

相李綱綱去上書乞留綱而罷黃潛善汪伯彥會布衣歐陽澈亦上書潛善激怒高宗乃與澈同斬于市四明李猷贖其尸瘞之時年四十三越三年追贈承事郎東無子官有服親一人及駕過鎮江遣守臣祭東墓紹興四年加朝奉郎秘閣修撰官其後二人

保信軍節度使解元墓至順志在壽安鄉下邳宋史本傳

元字善長保安軍德清砦人建炎三年隸大將韓世忠麾下權偏將紹興十年世忠為樞密使以元為鎮江府駐劄御前諸軍都統制以統其眾明年授保信軍節度使卒贈檢校少保

李家山在經山東五里

宋成都轉運判官王揚英墓在山下京口耆舊傳揚英字昭祖丹陽

人宣和六年進士紹興八年為太常博士上中興十箴遷著作郎兼吏部郎加直秘閣知眉州就除成都轉運判官罷歸以壽終

沈山在經山東七里

廣孝寺即沈山院一名處士庵至順志南唐吏部沈

彬故居也

沈彬墓在山下

陸游南唐書本傳彬洪州高安人唐末浪跡湖湘隱雲陽山烈祖輔吳表

授秘書郎俄懇求還山以吏部郎中致仕彬嘗策杖郊原手植一樹識之語其子曰吾當藏骨于此及卒伐樹掘地至丈餘得一石槨製作精麗光潔可鑑蓋上有篆云開成二年壽槨舉棺就之廣袤中度

九靈山在縣東北三十里下有桃花澗

宋參政翟汝文墓在山下

宋史本傳汝文字公異澗州丹陽人登進士第紹興

元年除參知政事秦檜劾罷

雞籠山鍊銅山隨駕山彭山水漸山黃蓮山俱縣東北

三十五里

繡球山在縣東北三十八里

陳山武山管山周山鳳山眠山寶塢山俱縣東北四十里

許山倪山卯山金雞山勝金山俱縣東北四十五里

白雲山在縣東北五十里

固山黃泥山爛石山俱縣東北五十五里

白鶴山在縣西十里

白鶴三仙廟在山下廟有孫鍾灌瓜井山下鍾墓在焉幽冥錄孫鍾家貧奉母至孝種瓜瓜熟有三人來

乞瓜鍾設瓜及飯禮敬甚殷三人臨去謂鍾曰蒙君

厚惠示子葬地使連世封侯數世天子出門化白鶴

而去鍾後生堅堅生權權生亮亮生休案三國志孫

堅傳注堅世仕吳家于富春葬于城東冢上數有光怪丹陽并墓

俗傳不足信又孫休傳休棺第六子弟亮承統亮廢

迎休即位休蓋亮之兄此云亮生休

亦誤廣輿記鍾墓在桐廬烏石山

京口山水志卷十三

京口山水志卷十四

丹陽水

練湖一名曲阿後湖水經注晉陵郡之曲阿縣下晉陳敏引水爲湖周四十里號曰曲阿後湖元和郡縣志在丹陽縣北百二十步周迴四十里晉時陳敏爲亂據有江東務修耕績令弟諧過馬林谿以溉雲陽亦謂之練塘新唐書地理志練塘周八十里與水經注元和志不同世說謝中郎經曲阿後湖問左右此是何水答曰曲阿後湖謝曰故當淵注淳審納而不流語林褚公游曲阿後湖狂

風忽起船傾褚公已醉乃曰此舫人皆無可以招天譴者唯有孫興公多塵滓正當以厭天欲耳便欲捉孫擲水中孫懼無計唯大呼曰季野卿念我太平寰宇記輿地志云曲阿出名酒皆云後湖水所釀故醇冽案湖上承丹徒高驪覆船山馬陵谿水色白味甘湖分上下上湖高於下湖下湖高於運河圖志所載屢廢屢復至國朝康熙十九年以上湖高阜處分一千餘畝給安置京口投誠人墾種餘聽徒陽二縣居民上價開墾自是上湖全廢下湖亦被附近居民開墾七千餘畝四十七年撫臣題請開復下湖所有報墾田畝地丁銀米在湖

旁民田各戶攤征 允行

東西斗門順瀆斗門上湖南北斗門下湖唐韋損置橫壩

石礎涇州石礎上湖姚婆石礎下湖亦唐有之宋熙甯中

重修令公函戴家函伍伯婆函張函堯函上湖胡頭函

洪家函新函蔡陂函觀松函龍城後函南石函秋函

下湖皆舊置宋淳熙中重修至順鎮江志京口耆舊傳蘇京

紹聖中知丹陽縣因旱募民浚湖度地之宜易置斗

門十數以時潞洩公私兩便明史劉辰傳練湖三斗

門久廢辰修築之運舟既通湖下田益稔今上湖成

田惟存下湖函洞十及石閘四嘉慶中黎襄勤世序

來守郡撤上湖廢閘石重修

道人墩在湖中上有湖心亭康熙四十七年築

唐劉晏狀轉運使劉晏狀得刺史韋損丹陽耆壽等狀上件案圖經練湖周回四十里比被丹徒百姓築隄橫截一十四里開瀆口洩水取湖下地作田其湖未被隔斷以前每至春夏雨水漲滿側近百姓引溉田苗官河水淺又得湖水灌注租庸轉運及商旅往來免用牛牽若霖雨泛濫卽開瀆洩水北流入江自被築隄以來湖中地窄無處注水橫隄壅礙不得北流秋夏雨多卽向南奔注丹陽

延陵等縣良田八九千頃嘗被淹沒稍遇亢暘近
湖田苗無水灌溉所利一百一十五頃田損三縣
百姓之地今已依舊障水爲湖官河又得通流邑
人免憂旱澇奏聞中書門下牒浙西觀察使韋損
勿使更令修築致有妨奪永泰二年四月十九日
李華練湖頌大蜡之祭辭曰土反其宅水歸其
壑先王因下流而道之故曰九川滌源因迤漚而
瀦之故曰九澤旣陂以疏天地之氣以利元元之
用崇伯汨五行而殛羽山臺駘章大澤而封汾川
洪範首之春秋載之地有廣狹事無古今大江具

區惟潤州其藪曰練湖幅員四十里菰蒲菱芡之多龜魚螺蟹之產饜飮江淮膏潤數州其旁大族強家泄流爲田專利上收畝收倍鍾富極滌衍自丹陽延陵金壇環地三百里數合五萬室旱則懸耜水則具舟人罹其害九十餘祀凡經上司紛紜與奪八十一斷嗚呼曲能掩者強者以得之老幼怨痛沉聲無告永泰元年大翦西戎西戎旣駭矣生人舒息詔公卿選賢良先除二千石以江南經用所資首任能者是歲十月二十三日拜前常州刺史京兆韋公損爲潤州聲如鸞馳先詔而至吏

人畏服男女相賀卽日上無貪刻下無冤憤公素
知截湖潤壤災甚螟螣臨事風生指期以復羣謗
雷動山震恬然中明獨裁文之以禮乃白本道觀
察使兼御史中丞韋公元甫中丞撫掌愜心如公
之謀且曰興利除害得其人而後行非常之政敢
歸叔父公乃申戒縣吏率徒闢之人不俟招呼并
從役畚鍤蓋野濬阜成蹊增理故塘繚而合之廣
湖爲八十里像月之規鑄金之固水復其所如鯨
噴射洶洶隱地雷聞泉中先程三日若海之彌望
灑灑如吞吐日月沉沉如韞畜風雨所潤者遠原

陽皆春耕者飽憂者泰於是疏爲斗門旣殺其溢
又支其澤沃堵均品河渠通流商悅奠價人勇輸
賦遐邇受利豈惟此州每歲萌陰乘陽二氣相薄
大雨時行羣潦奔流水勢所入盈而無傷龍見方
雲稼蒙其渥時前相國彭城劉公晏統東方諸侯
平其貢稅聞而悅之白三事以聞詔書褒異焉彭
城公宣命至江南捧詔授公公率元僚掾史令丞
已下至於耆艾西向拜手祈戴皇朝人心上感天
降膏澤如有神祇昭協厥志公正直而和專靜而
斷嫉惡宥過惠人察姦純鈞精堅石鍊不耗伐冰

之貴降從士禮詩云靖共爾位好是正直宜其享
福也吏人入賀公拱而謝之曰尙書劉公觀察韋
公奉行王澤也鄙何力之有焉丹陽令杜孟寅秉
公之清白延陵令李令從如公之愛人金壇令胡
圮秉公之成規及丹陽耆壽周孝環百姓湯源等
拜首而請曰兌爲澤兌說也水歸於澤而澤說於
人百年浸塞而公啟之臣哉鄰哉克諧帝休永代
是式三縣無災若不碣而刻之王命不揚於厥後
後之人無以倚負也華嘗學古見訪爲頌頌曰望
泂泂兮視冥冥鳥閒魚樂葭莖生膏腴利倍起訟

爭斯人怨抑痛無聲韋公正直動神靈百年游淀
爲溲清飢者飲兮病者寔詔書光寵恩濡榮劃然
眊瞍復皎明追琢刻頌揚芬馨 南唐知丹陽縣
呂延禎奏其畧曰當縣有練湖源出潤州高麗長
山下注官河一百二十里當縣丹徒金壇延陵並
同潤臣讀石碑得聞湖利訪諸鄉老咸曰疇昔以
湖有爲故立碑于縣門其廢於今將百年矣當爲
湖日湖水放一寸河水漲一尺旱可引灌溉澇不
致奔衝其膏田幾逾萬頃環湖而居衣食于漁者
凡數百家有斗門四所泉前唐末兵亂之後民殘

湖廢安仁義取斗門餘木以修戰備自此近湖人
戶耕湖爲田後來弓量賦稱祖籍農桑失恃漁樵
失業河渠失利租庸失計民思復湖以禦災奈何
無所實力焉苟欲訪其利病則讀碑可知觀湖可
見臣頻承條制葺陂塘切度其湖爲利甚博遂爲
材役工于古斗門基上以土堰堰捺及填補破缺
處初謗議震動謂臣弗良圖且廢湖豐已者不十
餘家有湖無災者四縣之地臣明知利害獨如弗
聞自今歲秋後不雨河道乾枯屢放湖水灌注使
命商旅舟船往來免役牛牽當縣及諸縣人戶請

水救田臣並掘破湖岸給水如將久遠須置斗門
方得通濟其斗門木植須用椶柑乞給省場板木
起建狀下所司處分昇元五年十月四日 國朝
黎世序請修練湖閘隄啟其畧曰練湖仰受高驪
長山八十四汊之水湖分上下前人于上湖之東
建石閘四水以次達于下湖又于下湖之東建石
閘四水以次達于運河運河南有呂城閘奔牛閘
北有丹徒之南閘西閘夏秋水發則閉湖閘使無
旁溢冬春水涸下閉奔牛呂城閘使無下瀉其江
口之西南二閘潮來則啟板進潮落則下板蓄水

不足則啟湖閘放水以濟運此成法也湖之西又有函洞十二冬春啟閘濟運夏秋啟函灌田民有盜決湖隄者罪比殺人明季湖禁漸弛我朝順治九年巡按秦世楨奏明開復康熙十九年丹徒鄉宦張鵬有廢湖墾田之議巡撫慕因請將上湖高阜處分撥一千餘畝給安置京口投誠人墾種餘聽徒陽縣民上價開墾自是上湖全廢下湖亦被附近居民開墾七千餘畝山水不歸練湖由馬陵一帶四處漫溢糧田動受淹浸及至旱年反失灌溉四十七年巡撫于題請下湖仍留蓄水將報

墾田畝地丁銀五百五十三兩漕米二百七十九石在湖旁民田各戶攤征濱湖之民以灌溉有資欣然樂從勒石府縣署永久遵奉在案昨經丹陽居民呈請修復湖閘當卽查勘下湖偪近運河湖底高于河底丈餘其南隄高六七尺列函洞四隄外資水灌田者四十餘村其西隄高四五尺六七尺不等列函洞六又屏水缺口一二處隄外資水灌田者五十餘村其北上湖業爲升科熟田無庸勘兩湖交界處有埂一上有廢閘三乃上湖水達于下湖之故跡其東北無函洞止長埂一上列缺

口四五處埂外資水灌田者張官渡一村由東而南湖埂連運河隄列閘四惟第四閘完整餘悉壞石工胡成芳估計折上湖廢閘石運修下湖壞閘一切工料須銀四千三百餘兩並據民稱各村田皆資湖水灌溉每歲私自按田派夫修築田一畝出夫一名工作二日湖之西南計田四萬餘畝派夫四萬餘名可得八萬工若得官爲修閘民間派夫修隄倍加踴躍自出已力無煩更籌經費等語伏查運河各閘除橫越二閘下板蓄水外餘皆片板無存加以練湖之閘失修不惟運河毫無倚賴

卽湖外數萬畝民田亦失灌溉茲居民願自築隄而修閘又止須銀四千餘兩此用費少而獲益多爲勞暫而爲利久也俯順輿情于民生漕務均爲有益 賀寬湖心亭記陽邑之有練湖也濱湖數萬田畝資灌溉焉匪湖卽歲歲歉矣而自晉迄今千三百年間廢而復復而廢者凡屢此曰官湖也吾得資其水以爲用彼亦曰官湖也吾得洩其水以爲田夫兩利不能並存則必權于多寡今練湖之興廢誠以利害之多寡計之卽盡上下兩湖全墾爲田爲畝不過一萬數千較民田之資灌溉者

曾不及半此固不問而可以知湖之無可廢矣而
惟墾田之徒常詭其辭于增課故其說偏易行而
其事因以屢更而迄無所定先是康熙十九年請
將上湖高阜召墾成田下湖低窪仍留蓄水未幾
浸及于下湖蓋下湖一萬一千餘畝弊陞者已七
千餘畝矣而湖閘久廢湖雖有水弗能蓄于是下
湖所僅存之四千餘畝亦被私墾焉康熙四十七
年 天子軫念東南水利飭修練湖四閘然後
私墾者無所容其奸而大中丞于公因有全復下
湖之請且請削除弊陞之賦額部議以下湖不可

不復而賦額不可削除也 天子是之飭濱湖

之用水田畝攤征焉著爲令夫 聖天子捐下

湖以與民且爲捐帑建閘費及數千金其蘇松常
鎮四郡水利之所關同時而議疏議築者捐帑且
十餘萬金也而豈賓賓焉計此纖微之賦額乎哉
顧以爲前之屢復而屢廢者由湖屬于官故爲人
所得爭今以此七千餘畝之賦責償于民田則官
與民交相維繫而貪利好事之徒雖欲詭增課之
說以爭而墾之更不可得從此湖永存而不廢計
田均賦每畝不及升許而歲以有秋穀可數石是

固斯民億萬載無疆之利也于是濱湖萬民築墩
湖心建亭于其上而請于蘇州太守長沙滄州陳
公大書萬世永賴之碑于亭之中將使子子孫孫
勿替引之以歌樂利答生成也而微臣生長茲邑
老歸田野慶桑梓之得所感 聖恩之罔極不
勝踴躍懽忭爰拜手稽首而爲之記

宋文帝曲阿後湖詩宵登毘陵路且過雲陽郛平
湖曠津濟孤浦迭明蕪和風翼歸采夕氛晦山嶠
驚瀾翻魚藻頽霞照桑榆 顏延之車駕幸京口

三月三日侍游曲阿後湖詩虞風載帝狩夏諺頌

王游春方動宸駕望幸傾五州山祇蹕嶠路水若

警滄流神御出瑤軫天儀降藻舟萬軸允行衛千

翼汎飛浮彤雲麗琬蓋祥飈被綵旂江南進荆豔

河激獻趙謳金練照海浦笳鼓震溟洲藐盼觀青

崖丁觀綠疇人靈騫都野鱗翰聳淵邱德禮既

普濟川嶽徧懷柔 唐權德輿侍從游後湖讌坐

詩絕境殊不遠湖塘直吾廬烟霞旦夕生泛覽誠

可娛慈顏俯見喻輟爾詩與書清旭理輕舟嬉游

散煩劬宿雨蕩殘燠惠風與之俱心靈一開曠機

巧少已疏中流有荷花花實相芬敷田田綠葉映

豔豔紅姿舒繁香好風結淨質清露瀉丹霞無容
輝嫋色亦踟躕穠香射水木欹葉游龜魚化工若
有情生植皆不如輕舟任沿泝畢景乃躊躇家人
亦恬曠稚齒皆忻愉素絃激淒清旨酒盈樽壺壽
觴旣頻獻樂極隨歌呼圓月初出海澄輝未滿湖
清光照酒酣頰仰百慮無以茲心目暢敵彼名利
途輕肥何爲者漿藿自有餘願消區中累保此湖
上居無用誠自適年年翫芙蕖 又湖上晚眺呈
惠上人詩湖上烟景好鳥飛雲自還幸因居止近
日覺性情閒獨酌乍臨水清幾常見山此時何所

憶淨侶話元關 許渾重游練湖懷舊詩西風渺

渺月連天同醉蘭舟未十年鵬鳥賦成人已沒嘉

魚詩在世空傳榮枯盡棄浮雲外哀樂猶驚逝水

前日暮長隄更回首一聲鄰笛舊山川 又湖上

鷺絲詩西風澹澹水悠悠雪照絲飄帶雨愁何事

歸心倚前閣綠蒲紅蓼練塘秋 宋蔡肇練湖詩

春入池塘綠漲初蒲根水暖戲鷗鳧雜花開處自

深淺細雨漾空如有無風外鐘聲聞遠寺柳間帆

影出平湖冥搜竟日耽佳句不負宗生來畫圖

元薩都刺練湖曲練湖七月涼風通白水蕩蕩芙

蓉紅芙蓉紅盡早霜下鴛鴦飛去何怱怱茜塘女
兒弄輕碧鳴榔聲斷無消息清波小藻出銀魚落
日吳山秋欲滴望湖樓上雲茫茫鳥飛不盡青天
長丹陽使者坐白日小吏開甕宮酒香倚闌半醉
風吹醒萬頃湖光落天影挂冠何日老江南短褐
綸巾上漁艇 又臘盡過練湖詩獨倚牙檣數客
程殘年風景促鄉情寒天半夜無人語明月滿船
聞雁聲湖上好山如有約烟中野樹不知名來朝
鳥鵲橋頭闕應是人家出郭迎

永泰寺在湖上未詳創始寺有練湖亭唐張祜有詩

張祜題丹陽永泰寺練湖亭詩小檻俯澄鮮龍宮
浸浩然孤光懸夜月一片割秋天淺派殘沙草餘
波漂岸船聊當因澹畝披拂坐潺湲

梁武帝宅基在湖上塘頭村嘉定鎮江志帝嘗幸舊
宅井上梨棗兒時所植尙存

晉劉惔宅在湖上吳融過丹陽詩水連劉尹宅基平

晉書本傳惔字真長沛國相人也
與母任氏寓居京口累遷丹陽尹

唐權德輿宅在湖上德輿憶江南詩結廬常占練湖

春唐書本傳字載之禮部尙書同平章事東都留守
卒贈左僕射諡文嘉定鎮江志臯子居丹陽練塘

權德輿送少清赴潤州參軍因思練塘舊居詩二

紀樂簞瓢烟霞暮與朝因君宦游去記得春江潮
遠別更搔首初官方折腰青門望離袂魂爲阿連
銷 又待漏假寐夢歸江東舊居寄惠閣黎茅處
士詩十年江浦卧郊園閒夜分明結夢魂舍下藤
蘿通古寺湖中烟雨到前軒南宗長老知心法東
郭先生識化源覺後忽聞清漏曉又隨簪佩入君
門 又自揚子江歸丹陽初遂閒居呈惠公詩移
疾喜無事卷簾松竹寒稍知名是累日與靜相歡
蹇淺逢機少迂疏應物難只思閒夜月共向沃州

看

許渾宅在湖上丁卯集有詩

許渾懷丹陽舊居詩兵書一篋老無功故國荆扉
在夢中藤蔓覆梨張谷暗草痕侵菊庾園空朱門
跡忝登龍客白屋心期失馬翁楚水吳山何處是
北窗殘月照屏風 又雨後懷湖上舊居詩前山
風雨涼歛馬坐垂楊何處芙蓉落南渠秋水香
宋王存宅在湖上存有宅在郡城登雲門內見嘉定
府志此蓋其舊居也

王存過丹陽舊居詩漂泊經故國繫舟欵柴扉破
屋他人居昔鄰今或非父老迎我飲祝我晝錦衣

我謝父老言朴拙非所祈一官走塵土實迫寒與
飢去鄉未幾載頓覺儔侶稀人事已可嗟况當白
首歸泚泚練塘水綠楊蔭漁磯有田尙可耕誓將
父老依

王揚英宅在湖上京口耆舊傳揚英成都轉運判官
罷歸葺湖濱之居榜曰練水草堂逍遙其間

漕河自常州奔牛十八里至縣東之呂城鎮五十里徑
縣城又北流二十五里入丹徒界又四十五里達大江
新開運河明嘉靖間縣令李學道鑿演武場達內城
西壕徑南門合簡瀆出東門橋復入運河

雲陽橋在縣東至順鎮江志宋劉宰建俗名賢橋

尹公橋在東門外跨漕渠明萬歷中知縣尹良任建

黃泥壩在縣北二十里舊有石牯知府吳撫謙造道

光九年移建張官渡

雲陽驛在縣東

明萬歷中知縣周應龍移於西門外

唐僧皎然詩行人

無數不相識獨立雲陽古驛邊

使館嘉定鎮江志在縣東五里面漕渠紹興丁卯令

蘇忠規建

今廢

普甯寺在縣南前有橋跨市河名寺前橋至順志晉

咸康五年內史王珣捨宅爲之本名顯陽寺宋祥符

中賜今額

唐張祜宅至順志在雲陽橋河岸有井處

全唐詩小傳祜字承

古清河人愛丹陽曲阿地築室卜隱性嗜水石悉力致之不畜田產爲身後計

張祜憶雲陽宅詩一別雲陽宅深愁度歲華翠濃

春檻柳紅滿夜庭花鳥影垂纖竹魚行踐淺沙聊

當因寤寐歸思浩無涯顏萱過張祜處士丹陽

故居詩憶昔爲兒逐我兄曾拋竹馬拜先生書齋

已換當時主詩壁空題故友名豈是爭權留怨敵

可憐當路盡公卿柴扉草屋無人問猶向荒田責

地征

宋洪擬宅 洪興祖宅在縣南城外河岸今其地有

洪家橋 宋史本傳擬字成季一字逸叟鎮江丹陽人登進士甲科為禮部尚書遷吏部兄子興祖

與擬上封事侵在位者俱罷起知温州卒七十五謚文憲 又儒林傳洪興祖字慶善登上舍弟為駕部

郎官秦檜當道坐嘗作故龍圖閣學士程瑀論語解序語涉怨望編管昭州卒年六十六

陳少陽祠在縣北城外河岸

梁宏偃將軍墓蔡佑雜記丹陽縣北十八里地名石

羊子有牧童見雉入土穴中告其主人夏里正即穿

其穴乃一大家碑云宏偃將軍墓梁朝人是時余官

京口日觀其事乃政和丁酉歲也

呂城在縣東五十里方輿勝覽呂蒙所築今為呂城

鎮 呂城關嘉定志四朝國史志云元祐四年知潤

州林希復呂城堰

案宋會要淳化元年廢呂城堰

置上下關以時啟

閉又四朝史曾孝蘊傳紹聖中建言揚之瓜州潤之

京口常之奔牛宜易堰為關役成公私便之

案奔牛去呂城

十八里每年糧艘畢入先閉奔牛關後啟呂城關以防水洩至今以為常

呂城夾岡二

斗門呂城石礎嘉定志紹興七年兩浙轉運使向子

謹置 泰定橋至順志泰定間重修呂城橋易名

王士正呂城雪霽詩雞鳴呂城鎮日出市橋東雪

屋迴汀口烟檣出竹中鳥飛皆貼水舟泛若乘空

古蹟成荒壘行行憶阿蒙 毛姓自呂城至丹陽

縣塗中詩仄阜高行繹沙田曲上舟管魚交插篠
踏水自翻謳楮岸通橋店紅竿隱寺樓涼風吹濁

浪京峴已清秋

孱陵侯廟在呂城鎮卽吳將呂蒙祠

宋劉宰呂城廟詩呂公遺壘枕高岡落日西風草

木荒王氣懸知南國在不妨北面儼冠裳

葛仙祠在呂城鎮元薩都刺詩呂公城下葛仙家

宋竇從周墓在呂城東南

京口耆舊傳從周字文卿丹陽人朱公熹講道建陽

往從之潤之後輩鄉方竇自從周始卒葬所居呂城之東南

九曲河在縣東北漕渠分流七十里入江

珥瀆在縣南七里流入金壇縣俗呼七里河瀆口有七

里橋明嘉靖中知縣來汝賢易名麥舟橋

取范忠宣麥舟事

珥村在縣南四十里有珥陵橋黃堰橋相距十里

橫塘堰珥村堰並在珥瀆河相距十八里

宋湯東野宅至順志在珥村

京口耆舊傳湯東野字德廣丹陽人崇德間詔

對授忠義郎陞秘閣修撰靖康中知平江苗劉作難以功拜徽猷閣待制入為工部侍郎

簡瀆在縣南五里至順志俗云晉諶母元君擲簡於此

唐置簡州以此瀆得名南通延陵一名香草河

草堰麥埤堰並在瀆上

仙臺觀在瀆上舊謂之黃堂道院嘉定志是為諶母

飛昇之地謚母者字曰嬰常居金陵丹陽郡之黃堂
潛修至道

晉延陵廢縣在縣南二十五里今爲延陵鎮元和郡
縣志晉太康二年分曲阿之延陵鄉置延陵縣蓋因
季子以立名也又漢地理志季子所居在今毘陵本
名延陵至漢始改然今縣北見有其祠或當時采地
所及其地亦曰連陵

延陵季子廟在延陵鎮太平寰宇記延陵縣東北九
里一名嘉賢廟至順志宋元祐三年知潤州楊傑奏
賜額廟有沸井四

詳後

十字碑嗚呼有吳延陵君子

之墓十字宋歐陽修集古錄曰相傳以爲孔子書案
孔子平生未嘗至吳不得親銘季子之墓諸字特大
非古簡牘可容以傳之久不可廢故錄之元吾邱衍
學古編曰按古法帖止云嗚呼有吳君子而已篆法
敦古似乎可信今此碑妄增延陵之墓四字除之字
外三字是漢人方篆不與前六字合且音君字作季
字漢器蜀郡洗郡字半邊正與此君字同用此法也
以季字音顯見其謬比干墓前有漢人篆碑亦有此
說洪氏隸辨漢隸字源辨之甚明明趙峒石墨鐫華
曰此書流傳已久故陶淵明季札讚云夫子戾止爰

詔作銘唐張從申云舊石湮滅元宗命殷仲容模榻
大厯中蕭定重刻于石又有謂李陽冰學嶧山碑得
此而後變化者據此數說則真仲尼書也歐陽公疑
仲尼未嘗至吳且其字大非古簡牘所宜又有謂原
字止曰嗚呼有吳君子而延陵之墓四字后世妄增
卽黃長睿董廣川皆以爲疑卒未有敢定其真僞者
但淳化帖所收字小而鎮江石刻字大不倫不曉何
故 晉殷仲堪梁王僧恕季子廟二碑又唐張從申
書蕭定修季子廟碑記通志金石畧在潤州 顏魯
公向李太保大夫乞米帖并范仲淹題跋石本輿地

紀勝在延陵季子廟中

晉晉陵太守殷仲堪謁廟記君諱札吳王壽夢之
少子太伯十九代孫也封于延陵號曰季子周室
蘊累仁之基有吳開至德之祚緬元流以達會啟
靈祥于一廟泰三才之妙致挺斯文而在茲君性
資上善體極黃中蘊量淵岳爭明日月仁和陽春
之德志邈秋雲之高凝雪不足擬其潔南金無以
喻其貞夫老氏同王侯于三代仲尼以名器爲大
寶非道無以通物非德無以守位吳王知君之賢
思托社稷之重三昆同逝傳國而至百姓與仁厯

數在躬而君桎梏人役臭腐英華超然高謝退耕
別墅輕千乘于鴻毛易大業于脫屣昔太伯遐舉
以違親子臧胥駕以辭國其由王業之命有托義
嗣之主非已孰能踐圓機而弗叩撫歸運而長揖
哉自古皆有讓未若君之高者也若乃內難弗與
大存宗國會仁而不持道義而忘賢深情遠概超
名節之外潛功默運無涉世之累茲謂體道忘形
與人而已愈有矣觀夫羸博之達幾乎知命領音
悟契殆盡神功解劔徐君之墓亮至信于不言捐
金採薪之士表幽人之高情以一幽顯照達徽章

榮華不能干哀樂不能滯絕塵昭曠之境獨得神
明之肆邈矣哉清明高遠弗可尙已譬猶乘太虛
而升崑崙游青霄而佩日月英風澡俗遺德在民
雖復世經五代年積千祀而墳壟勿翦廟宇常存
有晉太原陳郡殷仲堪作守茲邦懷清塵于舊壤
訊越蹤于故老踐靈階以肅感厯竹柏而棲心緬
矣長思慨然永歎以爲聖賢雖遠神想可通影迹
雖滅風趣不泯使百代之下若見其人者非夫傳
旨文言寄興音味何以致茲乃研厲樹思爲之銘
讚命民薛玖採石而刊之其辭曰百王咸泊羣動

資競邈矣上哲含靈燭鏡脫羈塵路超逸元徑明
殆庶幾達侔知命眇眇秋雲皦皦宵月惟清惟虛
既高既徹亮茲默誠昧彼庸節言發信章功深累
絕情由道屬理以神通矧伊有感承乏茲那一瞻
靈宇惆悵墳封乃刊元石傳想無窮俾爾後生濯
君高風 梁延陵縣令王僧恕謁廟記余領羣書
周求諸古古而爲讓在事多途乃或從天應命惟
允僉曰或推功有寄或授之以德茲皆天人之所
命亦以功德之宜與夫季子諱札者吳王壽夢之
少子故曰季子封於延陵太伯十九世孫也源同

紹吳系惟先哲積善餘慶風流實遠以君稟正靈
之獨秀詠微妙之困奇卓爾莫能變其操凝然無
以測其際山藏宏納何足累其曠冬日溫美甯以
喻乎仁故讓乃先天安從物議攸績攸歸在躬弗
荷而志存高退不重萬乘惟保清約豈愧黃屋遂
乃逍遙於自得之場遨遊於江楸之畔社稷無失
舊業昆兄有沖遜之義宜跡遠會深降默語結信
咸衷懸劔樹杪指金樵採流德路端詳音察俗必
審風規之趣體物機照而情與神合至德哉無能
名矣甘棠勿翦知東周之美政廟宇修存信京吳

之流慶乃增重階以背岡開修道以臨溪松楊蔭
映秋草連綿四井地穴百沸天湧封朱表以旌衢
望綠碑而駢列但路由三吳川貫百雉人馬因亞
舟舸交接小人祈福君子欽風徬徨碑隧交鐫湮
沒陳郡殷仲堪以晉太康緝守毗陵刊碑立贊於
茲百祀夫金石可滅德音無朽自大梁開闢幽明
同體風流草偃天下齊心况乎作宰茲邑彌肅虔
情觀迹訪古苔石相昧瞻陞望室遺德若存惻焉
追悵傷哉川逝聊係述于前人乃立碑于路右伊
德無窮在三甯盡率陳承教用申贊銘其辭曰淳

風旣往澆波是務五典無恆四海爭赴惟此殊途
超然異路一人冲遜天下謙悟猷哉至德邈矣清
風逍遙遐聘遠鑒衰隆惠流于外信諒存衷超然
無累善始令終惟此神極靈德自天惟彼黎庶致
感修虔忝割茲邑憑政幽賢徒言無暢鐫刻乃傳
用刊碑石流響萬年 唐潤州長史高紹謁廟記
顧野王輿地志云季子名札吳太伯十九世孫吳
王壽夢之少子長子曰諸樊次子曰餘祭次日餘
昧次日季札諸樊立爲王且死立弟餘祭欲令兄
弟傳國以及季子餘祭餘昧卒立季札乃讓不受

夏曆七月二十三日
三
退耕於延陵卽其采邑土人懷德爲之立廟云云
山謙之丹陽記季子舊有三廟南廟在晉陵東郭
外北廟在武進縣博落城西西廟卽此是也昔第
五倫爲會稽太守禁非正之祀宜歸於一故唯存
南廟而二廟被毀其後人間悉更復之南廟後有
古墓周處風土記韋陟先賢序殷仲堪季子碑皆
云此墓卽季札墓也墓前有季子廟碑者仲堪爲
晉陵太守造碑銘命縣人薛玖植碑于南廟至永
初中南廟被毀遷碑于西廟今廟前雙碑左廂者
卽仲堪所製右廂者梁天監十二年九月延陵縣

令士僧恕所建紹以開元七年自長安令左遷潤
州長史爰洎十年太歲壬戌因巡屬縣屆於延陵
與縣令吳興沈□同謁季廟申奠禮也慨靈廟之
巋然訪貞石而湮滅詢於廟祝因覩舊文雖殷王
二君其延陵而俱沒而前後雙製與高風而尙存
重鐫刻以懿之紀年月以顯之嗚呼來者觀此亦
何異乎夫子之大篆也 潤州刺史蕭定修廟記
有吳之興也太伯讓以得之有吳之衰也季子讓
以失之爲讓之情同而興衰之體異何哉太伯之
讓讓以賢也故周有天下而吳建國焉季子之讓

賢以讓也當周德之衰而吳喪邦焉或曰非所讓
而讓之使宗祀泯絕而不血食豈曰能賢斯可謂
知存而不知亡者矣夫治亂時也興亡運也故至
至而不可卻終終而不可留黃河既濁阿膠無以
正其色鹽池斯鹹弊算不能匡其味與夫當濁亂
之世召力勝之戎讓與爭孰賢乎易曰知幾其神
則季子之見可謂知幾矣季子之明可謂知進退
存亡而不失其正矣至於聽樂辨列國之興亡審
賢知世數之存歿挂劍示不言之信避國保無欲
之貞故有吳之祀寂寥而延州之響如在元風可

想至德興歎美之辭哲人其萎表墓著嗚呼之篆
向微德仁兩至則夫子不復虛二歎焉詳其精義
被物鈞深致遠之旨烏可究其津涯而窺其牆仞
哉是知讓之爲德德在于生靈不獨其子孫明矣
國有祀典人懷永思定忝列藩伯欽崇懿範於以
加敬嚴乎闕宮別閨壺之內外正衆神之序位舊
以太伯之廟在于蘇臺而制季子之祠像設東面
非由典禮諒無取焉必也正名于是乎在祈報旁
奠贄幣宜列于軒廡春秋禮薦俎豆當陳于正寢
俾觀像者識賢人之遺風可律審度者知經德之

禮秩無差末學陋詞不足頌其休烈寒來暑往敢
用同于紀年時唐大厯十四年歲己未八月二十
七日甲子記吳郡張從申書 宋劉宰延陵季子
廟十字碑亭記延陵季子之邑季子遜國之節高
天下廟祀爲宜故唐狄梁公盡毀江南諸祀獨此
不廢庶前對峙二亭下覆穹碑新舊各一其文曰
嗚呼有吳延陵君子之墓蓋舊者裂矣而新者代
之相傳以爲夫子書書之是否不可知而歷代寶
傳之必有自嘉定己卯春宰始與里中湯詠張汝
玉汝拜三山鄭甯來致敬周視庶間淫祀赫然而

亭獨壞喟然歎習俗之陋乃因友人王遂白府下
縣鎮撤像設之不經者凡八十有四已乃合衆力
屬鎮之士韋晰再葺兩亭晰好事勇于義鎮大夫
上饒蔣丙又勸相之未幾告成俾識歲月宰嘗觀
孟子論邪慝之害曰君子反經而已歐陽子之論
釋氏亦曰當修其本以勝之然則二亭之葺豈徒
以壽斯石而已哉吾黨之士必有能反三隅者

吳高陵亭侯韋昭墓寰宇記吳書云昭字宏嗣墓在

延陵縣西南去縣七里

案韋昭三國志作韋
曜注史爲晉諱改之

晉執事左中郎將守太中大夫包君墓至順志在延

陵北一里有碣

散騎常侍贈太尉周府君墓至順志在延陵西北六

里有碣

案寰宇記止云周氏墓包氏墓此蓋依碣書官究不知爲何人

昌國寺在延陵鎮至順志唐大中初建寺有銅鐘上

鑄開元年號

雲陽東西城嘉定志輿地志云在故延陵縣今延陵

鎮西三十五里與句容分界之處東西城相去七里

並在瀆南二城卽吳楚之境也又唐圖經云西城有

水道至東城而止並陳勳所立案建康實錄吳大帝

赤烏八年使校尉陳勳作屯田發屯兵三萬鑿句容

中道至雲陽西城以通吳會船艦號破岡瀆上下一
十四埭上七埭入延陵界下七埭入江甯界于是東
郡船艦不復行京江矣晉宋齊因之梁以太子名綱
廢破岡瀆開上容瀆在句容縣東南五里頂上分流
一源東南流三十里十六埭入延陵界一源西南流
二十六里五埭注句容界西流入秦淮至陳霸先又
堙上容瀆而更修破岡瀆隋既平陳詔並廢之則知
六朝都建康吳會漕輸皆自雲陽西城水道徑至都
下隋大業中煬帝幸江都欲遂東游會稽始自京口
開河至餘杭

破岡瀆在縣西南半入句容界

長岡埭在瀆上雲陽七埭之一也南史王敬則傳永泰元年敬則起兵朝廷遣左興盛胡松築壘于曲阿長岡卽其地

附 雲陽九里埭嘉定志未詳所在鮑照有詩

丁義瀆在縣南三十里通白鶴谿

唐皇甫冉皇甫曾宅在瀆口今其地有皇甫橋

新唐書文

藝傳皇甫冉字茂政與弟曾皆善詩天寶中踵登進士累遷右補闕曾字孝常監察御史名與冉相上下當時比張氏景陽孟陽云

唐張繼皇甫冉宅對酒詩流落時相見悲歡共此

情興因樽酒合愁爲故人輕亂影花侵席斜暉月
過城那知橫吹笛江外作邊聲

直瀆在縣東五十里南畿志丹陽有直瀆孫浩所開

慶亭埭在瀆上元和郡縣志慶亭壘在縣東四十七

里本蘇峻將管商攻略晉陵郗道微以此地東據要

路北當武進故遣督護李閔築此拒之今置埭晉書

郗鑒傳鑒於丹徒立大業曲阿慶亭三壘拒蘇峻

案今

皆隸丹陽大業在曲阿北大業里三國志吳主傳建安二十三年權

將如吳親乘馬射虎于慶亭卽此地

白鶴谿在縣東南三十五里一名荆谿出於縣之古荆

城徑金壇縣北入毘陵界

荆城相傳漢荆王賈所築至順志有順佑王廟卽荆

王廟

丁橋在谿上至順志或云以令威得名

梁寶寺在丁橋西至順志梁大同間建

太霄觀在丁橋至順志亦大同間建本名靈應宋治

平中改今額

明知塾江縣荆偉墓在谿上

偉字元升邑人以鄉貢對策高等授塾江令獻

賊陷城不屈死

兵部郎中荆本澈墓在谿上

澈字謙之邑人崇禎甲戌進士以職方郎監下

江軍乙酉孤軍退保浙東總兵黃斌卿
襲之遂被害兄本源二子沐滌皆死之

吳陵港在縣西十五里

吳高陵在港側三國志孫堅傳注吳錄曰尊堅廟曰
始祖墓曰高陵又孫策傳堅薨還葬

阿曲

東城港在縣東北二十五里

中邱埭在港側至順志埭西有齊梁二代陵口

梁文帝武帝父建陵在中邱埭西有碑題曰太祖文皇

帝之神道書作八分體通志金石畧作宋文帝神道
碑案宋文帝長甯陵在鍾山

蕭塘港在縣東二十五里

梁武帝修陵在港北皇基寺前

梁相國安豐縣侯蔡大寶墓至順志在修陵之北下山之陽至今曰蔡墓岡北史有傳

皇基寺至順志梁刺史王僧辯建唐改名皇業寺宋

名戒珠院

志又云寺有梁碑巋然往來達官摹打紛紛寺僧厭之沈之於塘頭西村蕭塘橋之

南數百

步水中

蕭港在縣東二十七里南至嘉山北通大江

梁簡文帝莊陵在港口寰宇記有麒麟碑尙存陵有

港名蕭港直止陵口大河

左墓港在縣南四十五里

府志以近左恢墓得名詳見金壇荆城港

呂濱港在縣東南五十四里

馬嘶港在縣東北六十里

浦里塘在縣南五里三國志吳書濮陽興傳永安三年

都尉嚴密建丹陽湖田作浦里塘

越塘在縣南四十里石城鄉

晉司徒蔡謨墓至順志在石城鄉

晉書本傳謨字道明陳留考城人領

司徒為揚州刺史卒贈侍中司空謚文穆

萬頃洋在縣西南四十五里

清水潭在縣南斜橋

金鷺池在縣治內

嘉定志夏竦初仕為丹陽邑掾一日侍母燕坐見黃鸝雙舞而俱沒于地

發之得金鷺二母取瘞之祝曰天若賜夏竦願從明中來竦因築亭其上曰金鷺尋登制科後至者發地求鷺

不可得
遂爲池

蓮池在雲陽驛中

唐許渾秋晚雲陽驛西亭蓮池詩
心憶蓮池秉燭游
葉殘花散尙維舟
烟開翠扇清風晚
水泛紅衣白露秋
神女暫來雲易散
仙人初去月難留
空懷遠道無持贈
醉倚闌干盡日愁

延陵沸井四在季子廟前齊書祥瑞志延陵令戴景度稱所領季子廟舊有涌井二所廟祝則云舊井北忽聞金石聲卽掘深三尺得沸泉其東忽有聲錚錚又掘得泉沸湧若浪至顯志云騰涌驚沸二清二濁鬻沸之聲

竇夜不絕又云毘陵志季子西廟有百井多涸廢

玉乳泉在觀音山張又新煎茶水記揚子江南零水第一無錫惠山寺石水第二蘇州虎邱寺石水第三丹陽觀音寺水第四揚州大明寺水第五吳松江水第六淮水最下第七

白鶴泉出繡球山東行二十里入九曲河

玉龍泉在陳山至順志宋朱彥章詩巨靈擘兩山飛泉擬白龍

京口山水志卷十四

京口山水志卷十五

金壇山

茅山在縣西六十五里太平寰宇記句曲山一名茅山茅君內傳云山形曲折似句字故名句曲古名岡山福地記岡山之間有三仙人住是洞庭北門又能避兵周時茅君原籍爲句曲之穴秦名句金之壇山本茅君居因以爲名南徐州記云山內有靈府洞室七塗九源交通四方有五穴第一東西北各一又云洞天三十六所句曲爲第八金壇華陽之洞又云金壇取邑界句曲之

山金壇之陵以爲號河圖云乃有地肺土良水清句曲

之山金壇之陵

案山志其地水至即浮故比之於肺福地七十有二地肺其第一也列仙

傳曰茅濛字初成咸陽人也周衰不仕師鬼谷先生授

長生術入華山修道合藥乘龍駕雲白日昇天先是邑

人謠曰神仙得者茅初成駕龍上昇入太清時下元洲

戲赤城繼業而往在我盈帝若學之瀛嘉平其孫盈得

三於金陵句曲山邦人改山爲茅君山茅君傳曰盈字

無名父祚三子盈固衷也盈以漢元帝時大官下迎來

治句曲山策爲太元真人東岳上卿司命神君

覽茅山記曰大茅山獨高處元帝命東海神

大銅鼎於山頂深八尺上有盤石鎮之又曰秦始皇三十七年遊會稽還於此山北埋白璧一雙深七尺李斯刻篆壁文云始皇聖德平章山河巡狩蒼州勒名素壁又曰王莽地皇三年七月遣使者章邕陳獻銅鐘五口黃金百鎰贈之於茅君又曰中茅山其獨高處司命君埋玉門丹砂六千斤鎮於此山深二丈上有盤石鎮之其山左右泉流下皆小赤色飲之延年益壽左真人就司命乞得一十二斤以合九華丹山頂石壇石案香爐今存又曰小茅山漢光武帝以建武元年三月遣使吳倫贖金五十斤陳獻三茅君今山頂有埋金處存焉

上有聚石山東西四十五里南北三十五里空懸百七

十丈西北屬句容縣東南屬金壇縣最高一峯曰大茅

山有衆真巖

霧豹巖

侯仙巖

太平御覽開成中高修女真侯仙姑絕穀

六十餘年壽逾百歲常棲息此山

華蓋巖

柏枝壟壟之中曰華陽

南洞

茅洞

黑虎洞

黃龍洞

玉柱洞

蓬壺洞

天窗洞

飛輪峯

寰宇記茅山記云昔東海青童乘獨飛輪車來此輪跡見在

疊玉峯

抱朴峯

山志葛洪煉丹處有葛洪井

五雲峯

道祖峯

天池

饋飲泉

靈泉

俗呼小龍池

玉蝶泉

二口泉至冬一冰

一温又名陰陽井

喜客泉

客至泉即湧躍

撫掌泉

聞鼓掌聲泉湧如沸

九

山澗

菖蒲潭一名石墨池

相傳費長房於此滌硯

楚王澗

相傳

楚威王曾

鰲於此

次日中茅山有華陽東洞 水龍洞 白

雲峯上有碁盤石下有雲根石 拱辰峪 黑虎峪

宜春澗 百尺泉 玉砂泉 鹿跑泉 又次日小茅

山有小青龍洞 桃花嶼 長隱岡一名伏龍岡 皇

甫峪 檀子谷 柳谷汧 雷轟池 朱砂泉 白李

谿 山之前後左右復以山名者積金山在大茅中茅

之間其東有華陽西洞 金菌山在積金東山後有鶴

臺澗澗上桐華源震架海西有羅姑洞高居洞 丁公

山在積金西 相傳丁令威 仙舉其上 華姥山在丁公南 龍尾

山在大茅東 吳山 竹山在大茅南 仙韭山 龍

足山 大小靈山俱在大茅西 三角山在大茅西南

海江山在大茅東南下有慶雲洞碧玉巖捫霞磴

良常山在山北垂上有洞為華陽北洞 秦望山在良

常北 方隅山在良常東南有方源洞燕口洞洗心池

三公山在方隅山燕口洞南 雷平山有陶隱君墓

前有雷平池 銜珠山 丁山 虎爪山俱與中茅近

鬱岡山一名大橫山在小茅東北山下為姜巴路山

北有柏松岡山東有古越醫王家 青山在鬱岡東

麻姑山在鬱岡西 獨公山在小茅北 雲推山在小

茅皇甫峪西 小竹山在小茅東

聖祐觀元延祐三年建明萬歷二十六年易名九霄

宮 崇壽觀晉真人任敦成道之故宅宋元嘉十一

年路太后始建壇宇齊建元二年勅立崇元館唐貞

觀初改曰崇元觀宋大中祥符七年賜名崇壽觀內

有唐石燈 元陽觀 華陽觀 元符萬安宮宋高

宗書額 崇禧萬壽宮內有寶珠林宋理宗書榜

華陽宮 以上俱在大茅山 德祐觀 昇元觀 白雲崇福

觀 清眞觀 下泊宮 以上俱在中茅山 仁祐觀 藏眞

觀 以上俱在小茅山 玉晨觀在雷平山卽晉許長史宅有

丹井左紐檜 長史手植 神仙傳許穆爲護軍長史入華陽

洞得道 華陽館在積金山梁書處士傳陶宏景字
通明丹陽秣陵人也齊永明十年上表辭祿詔許之
於是止於句曲之山永元初更築三層樓宏景處其
上弟子居其中賓客至其下與物遂絕惟一家僮得
侍其旁特愛松風每聞其響欣然爲樂梁天監四年
移居積金東澗 顧著作山房在菖蒲潭舊唐書顧
况傳况蘇州人以校書郎徵久之遷著作郎不樂求
歸山志况結屋於此自號華陽隱居 秦系山房在
菖蒲潭新唐書隱逸傳秦系字公緒會稽人客泉州
南安有九日山大松百餘章系結廬其下穴石爲研

注老子彌年不出其後東度秣陵年八十餘卒 乾

元觀在鬱岡山宋祥符中建有九層壇朱觀妙築

山中通志金石畧茅君碑孫文韜書或云張繹正書

普通三年 貞白先生陶宏景碑蕭綸文分書 上

元真人司命茅君九錫文普通三年 山志孫文韜書有碑陰

上清真人許長史舊館壇碑普通三年陶宏景文並

書有碑陰 山志長沙館碑 曲林館銘並華陽隱

居撰書 華陽隱居墓碑梁昭明太子撰書 陶先

生朱陽館碑梁元帝撰書 通志金石畧下泊宮記

盧士元書貞元十五年 華陽洞主王軌先生記王

宗書貞元中 唐太平觀主王遠知碑徐碩隸書

崇元觀碑唐孫處元撰楊幽經書 宗正觀聖祖院

碑唐徐挺古書 唐三洞景照法師韋公碑寶泉書

山志陸長源撰 顧炎武金石文字記元靖先生李君碑顏

真卿撰書大歷十二年五月都穆金薤琳琅曰碑稱

傳升元先生升元付體元先生體元付正一先生正

一付先生今考隱居先生者梁陶宏景升元為王遠

知體元為潘師正正一為司馬子微三人者唐書有

傳惟元靖無之予嘗游茅山至玉晨觀其前有雷平

池池南為伏龍岡元靖葬其上碑今在 曹昭格古要

觀中四周皆刻文字道士以亭覆之 論元靖先生碑一碑唐顏真卿文真書一碑唐柳識

文張從申行書李陽冰篆額世號三絕碑 山志貞

白先生碑陰記開元十二年司馬子微述並書 唐

國師昇真先生王法主真人立觀碑江御名撰貞上一字

觀十六年二月 唐少室仙伯王君碑銘李渤撰元

至元二十四年王博文子冕重書 桐柏真人茅山

華陽觀王先生碑銘乾封二年于敬之撰王元宗書

唐體元先生潘尊師碑陳子昂撰 唐紫陽先生

碑李白撰 崇元聖祖院碑寶歷二年賈餗撰 道

門威儀元博大師貞素先生王君碑保大王子徐鉉

撰並篆額徐鉉書 上清真人許長史丹井銘徐鉉

撰書 上清紫陽觀碑徐鉉撰楊元鼎書並篆額

靈寶院記大和三年王棲霞撰呂子元書 上清大

洞國師乾元觀妙先生幽光顯揚碑陳輔撰蔡仍書

政和乙未立石 華陽先生碑大觀二年王柱篆額

案是碑蔡卞撰書此外尚有冲隱先生墓誌銘元符萬寧宮記亦所撰書 五雲觀記慶

歷二年晏殊撰胡恢書 崇禧觀碑紹聖三年張商

英撰王古書王鞏篆額 元符觀碑崇寧五年鮑慎

辭撰 凝神庵記淳熙十年李處全書 白雲崇福

觀記嘉定四年戴溪撰黃中書曾暎篆題 洞陽館

記嘉熙丁酉張湜撰並書丁宗魏篆額 崇禧萬壽

宮記延祐七年王去疾撰趙孟頫書並篆題 華陽

道院碑元明善撰趙孟頫書 崇壽觀碑泰定元年

虞集撰並書丹題額 玉晨觀記至正十年金鑰撰

句曲山洞泉銘福鄉并銘宏道壇銘泰定甲子玉

虛子撰劉大彬篆書 大茅峯聖佑觀記宏治丁巳

楊一清撰張紳書 積金山庵碑嘉靖丙申陳沂撰

李鱗書 積金峯玉皇閣記嘉靖丙申喬宇撰李鱗

書 玉晨觀洞宮記嘉靖丁酉陳沂撰書 重修玉

晨觀碑嘉靖三年顧璘撰王逢元書

梁陶宏景答詔問詩山中何所有嶺上多白雲只

可自怡悅不堪持贈君 邵陵王綸入山尋桓清

遠不遇詩荆門邱壑多甕牖風雲入自非栖遁情
誰堪霜露溼 桓法闔初人山詩寒谷夜將晨置
賞復尋眞方壇垂密葉澈水度朱鱗杏林雖伏獸
芝田詎俟人丹成方轉石鑪變欲銷銀當知勝地
遠於此絕囂塵 沈約華陽先生登樓不下詩側
聞上士說尺木乃騰霄雲駟不展地仙居多麗譙
臥待三芝秀坐對百神朝銜書必青鳥嘉客信龍
鑣非止靈桃實方見大楓凋 唐儲光羲游茅山
詩五首十年別鄉縣西去入皇州此意在觀國不
言空遠游九衢平若水利往無輕舟北洛反初路

東江還故邨春山多秀木碧澗盡清流不見子桑
戶當從方外求世業傳儒行行成非不榮其如
懷獨善况以聞長生家近華陽洞早年深此情巾
車雲路入理棹瑤谿行天地朝光滿江山春色明
王廷有輕冕此日方知輕平生非作者望古懷
清芬心以道爲際行將時不羣茲山在人境靈貺
久傳聞遠勢一峯出近形千嶂分冬夏有茂草朝
暮多鮮雲此去亦何極但言西日曛昔賢居柱
下今我去人間良以直心曠兼之外視閑垂綸非
釣國好學異希顏落日登高嶼悠然望遠山谿流

碧水去雲帶清陰還想見中林士巖扉長不關

名嶽徵仙事清都訪道書山門入松柏天路涵空
虛南極見朝采西潭聞夜漁遠心尚雲宿浪跡出
林居爲已存實際忘形同化初此行良已矣不樂
復何如 又泛茅山東谿詩清晨登仙峯峯遠行
未極江海霽初景草木含新色而我任天和此時
聊動息望鄉白雲裏發棹清谿側松柏生深山無
心自貞直 又題華陽洞詩華陽洞口片雲飛細
雨濛濛欲溼衣玉簫徧滿仙壇上應是茅家兄弟
歸 綦母潛茅山洞口詩華陽仙洞口半嶺拂雲

端窈窕穿苔壁差池對石壇方隨地脉轉稍覺水
晶寒未果變金骨歸來茲路難 顧况思歸桃花
崦詩二首廢棄忝殘生後來亦先天詩人感風雨
長夜何時曉去國宦情無近鄉歸夢少庇身絕中
振甘靜忘外擾麗景變重陰洞山空水表靈湖若
有信寄謝西飛鳥 朝與佳人期碧樹坐紅萼暮
與佳人期飛雨灑青閣佳人宵何許中夜心寂寞
始憶花正開復驚葉初落行騎飛泉鹿臥聽雙海
鶴嘉願有所從安得處其薄 又酬韋夏卿送歸
茅山詩玉帝居金闕靈山幾處朝簡書猶有畏神

理詎能超鶴廟新家近龍門舊國遙離魂結不斷
洞府一吹簫 又山居卽事詩下泊降茅仙蕭閒
隱洞天陽君閑上法司命駐流年崦合桃花水窗
分柳谷烟抱孫看種樹倚杖問耘田世事休相擾
浮名任一邊由來謝安石不解飲靈泉 又崦裏
桃花詩崦裏桃花逢女冠林間杏葉落仙壇老人
方授上清籙夜聽步虛山月寒 韋夏卿送願况
歸茅山詩聖代爲遷客虛皇作近臣法尊稱大洞
學淺忝初真鸞鳳文章麗烟霞翰墨新羨君尋句
曲白鶴是三神 李德裕寄華陽孫鍊師詩何地

最脩然華陽第八天松風清有露蘿月淨無烟乍
警瑤臺鶴時嘶玉樹蟬欲馳千里思惟戀鳳門泉
劉長卿自紫陽觀至華陽洞簡李延陵詩石林
媚烟景句曲盤江甸南望佳氣濃峯峯遙隱見漸
臨華陽口微路入葱蒨七曜懸洞宮五雲抱深殿
銀函竟誰發金液徒堪薦千載空桃花秦人深不
見東谿喜相遇貞白如會面青鳥來去間紅霞朝
夕變一從葬貞骨萬里乘飛電蘿月延步虛松風
醉閒宴幽人卽長往茂宰應交戰明發歸琴堂知
君懶爲縣李端宿華陽洞寄袁稱詩花洞晚陰

陰仙壇隔杏林漱泉春谷冷擣藥夜窗深石上開
山酒松間對玉琴戴家谿畔住雪夜去相尋 秦
系題李尊師山房詩天師百歲少如童不到深山
竟不逢洗藥每臨新瀑水步虛時上最高峯籬根
五月留殘雪石上千年破怪松此處人寰知遠近
回看雲壑一重重 權德輿春游茅山酬杜評事
見寄詩喜得賞心處春山豈計程連谿芳草合半
嶺白雲晴絕澗飲冰碧仙壇挹灑清懷君在人境
不共此時情 又柳谷泝故居詩下馬荒郊日欲
曛潺潺石溜靜中間鳥啼花落無人處寂寞山窗

掩白雲 許渾茅山送梁尊師詩雲屋何年客青

山白日長種花春掃雪看籙夜焚香上象壺中澗
浮生夢裏忙幸承仙籍後乞取大還方 杜荀鶴

游茅山詩步步入山門仙家鳥徑分漁樵不到處

麋鹿自成羣石面迸出水松頭穿破雲道人星月

下相次禮茅君 陸龜蒙和龔美江南道中懷茅

山廣文南陽博士詩一片輕帆背夕陽望三峯拜

七真堂

自注三茅二許一陽一郭是爲七真

天寒夜漱雲牙淨雪壤

晴梳石髮香自拂烟霞安筆格獨開封檢試砂牀

莫言洞府能招隱會輾鸞輪見玉皇 皮日休寄

潤卿博士詩高眠可爲要元纁鵲尾金爐一世焚

自注陶貞白有金鵲尾香爐 塵外鄉人爲許掾山中地主是茅

君將收芝菌唯防雪欲曬圖書不奈雲若使華陽

終臥去漢家封禪用誰文 劉言史題茅山仙臺

藥院詩擾擾浮生外華陽一洞春道書金字小仙

圃玉苗新芝草迎飛燕桃花笑俗人樓臺爭僻漢

雞犬亦嫌秦願得青芽散長年住此身 趙嘏茅

山道中詩谿樹重重水亂流馬嘶殘雨晚程秋門

前便是仙山路目斷寒雲不得游 贈茅

山高拾遺詩諫獵歸來綺里歌大茅峯影薄秋波

山齋留客埽紅葉野徑送僧披綠莎長覆舊圖棋
勢盡徧添新品藥名多雲中黃鵠日千里自宿自
飛無網羅 宋范仲淹將赴南徐任游茅山詩丹
陽太守意何如先謁茅卿始下車展節事君三黜
後收心奉道五旬餘因尋靈藥逢芝圃欲叩眞關
借玉書不用從人問通塞天教吏隱接仙居 王
安石登茅峯詩三首一峯高出衆峯巔疑隔塵沙
路幾千俯視烟雲來不極仰攀蘿蔦去無前人間
已換嘉平帝地下誰通句曲天陳跡是非今草莽
紛紛流俗尙師仙 翛然杖履出塵囂雞犬無聲

到次寥欲見五芝莖葉老尙攀三鶴羽翰遙容谿
路轉迷橫約仙几風來得墮樵興罷日斜歸亦懶
更磨碑蘇認前朝 捫蘿竅到半天窮下視淮州
杳靄中物外真游來几席人間榮願付苓通白雲
坐處龍池杳明月歸時鶴馭空回首三君誰更似
子房家世有高風 又中茅石上見徐錯篆字詩
百年風雨草苔昏尙有南唐筆法存只恐終隨嶮
碑盡西風吹燒滿秋原 張商英華陽洞詩素虎
斑蚪躋紫烟幾看滄海變桑田赤城玉笥尋真後
又到華陽第八天 劉宰茅山潑墨池慶雲庵詩

路轉幾山腰地尋雙海眼澗落呂公泉橋橫蜀道
棧主人去不歸山空春事晚何時具蔬筍開門延
客飯 元薩都刺三茅山呈張伯雨外史詩碧桃
花落蓬萊宮銀屏甲帳圍春風冰簾卷水玉堂靜
日露滴月銀牀空仙人夜酌九霞酒手握北斗傾
尊中梧枝影落鳳皇語幽韻彷彿臨蒼穹伐毛洗
髓天地老火鼎夜出夫容紅呼龍洞口種瑤草采
藥忽遇松間童茅君自騎一虎去猶聞珂佩聲丁
東武華山人三載別綠袍赤杖蒼髯翁淮南江上
復相見落日淡淡天無窮明朝稽首渡江去楚水

清淺銀河通 明王守仁游山詩靈峭九千丈窮

躋亦未難江山無遁景天地此奇觀海月迎峯白

谿風振葉寒夜深凌絕嶠翹首望長安 顧璘登

茅峯詩迢遞三峯得峻躋到宮唯見衆山低天池

水碧蒼龍伏岩樹風高白鶴棲雲際瑤壇開日月

林間丹井隱虹霓仙人只在華陽境紅葉桃花咫尺迷

國朝施閏章元符宮詩雲際覆瑤宮白晝

塵氛絕恰對大茅峯晴餘半峯雪

方山在縣西南四十五里嘉定鎮江志真誥云大茅山之西南有四平山谷所謂方山者也其下有洞室名曰

方臺洞有兩口見於山外與華陽洞通其中先止者有
張祖常劉平阿呂子華蔡天生龍伯高此山去大茅山
可二十許里西南六七里有一洞口見外近有人見大
青蛇在洞中因呼爲青龍洞

宋徽猷閣待制曾統墓吏部尙書曾喚墓並在山下
京口耆舊傳曾肇入子統最知名徽猷閣待制知婺
州卒葬金壇方山之原統子惕惕子喚吏部尙書嘉
定中卒亦葬金壇

宗正丞蘇嘉墓在山西上元鄉京口耆舊傳蘇頌子
十人嘉最知名嘉字
景謨爲宗正丞建炎二年卒於
金壇葬上元鄉去茅山十里

中書侍郎諡忠穆張慤墓在山西上元鄉宋史本傳
慤字誠伯

河間樂壽人登元祐六年進士第建炎改元為戶部
尚書除同知樞密院事官至中書侍郎卒諡忠穆上
每念之謂慤謀國盡忠遇事敢諫古之遺直也京口
耆舊傳慤家金壇薨賜塋地金壇縣上元鄉望張之
原南渡上語鎮江守臣錢伯言曰張
慤在朕無此行親書祭文遣祭其墓

大理卿吳交如墓在山西上元鄉京口耆舊傳交如
字亨會丹徒人擢

紹興十五年進士乙科再中法科除刑部郎官
遷大理卿嘉定鎮江志墓在上元鄉三培之原

直寶文閣知建康府張縝墓在山下京口耆舊傳縝
字彥智丹徒人

後徙金壇祖子方進士第以太常少卿奉祠卒葬丹
徒長樂鄉縝以祖蔭入仕知揚州粘罕遣太乙李謹

等圍揚州詔許退保鎮江而縝誓以死守虜不能克
進直寶文閣除知建康府充江南東路兵馬鈐轄卒

葬縣西方
山之原

漫塘先生劉宰墓在山下沙野宋史本傳宰字平國
金壇人紹熙元年舉

進士調江陵真州司法授泰興令父喪免不樂仕
端平元年升直寶謨閣郡守以朝命趣行至吳門拜
疏徑歸又以直敷文閣知寧國府不拜進直顯謨閣
主管玉局觀訖不起尋卒鄉人罷市走送袂相屬者
五十里人人如哭其私親有漫塘文集語錄行世
京口耆舊傳葬邑之沙墅朝廷嘉其節賜諡文清
工部尙書王遂墓在山西上元鄉朱史本傳遂字去非一字穎叔樞密副使韶之元孫後爲鎮江府金壇人嘉泰二年進士官工部尙書京口耆舊傳賜諡正肅葬金壇上元鄉之白
水塘

顧龍山在縣南五里嘉定鎮江志俗呼土山下瞰思湖
龍蕩高不能五六丈而巨石盤亘瞰平湖數千頃湖之
傍山者居民占植芙蕖畧以菰蒲如錯錦繡暑風至則
荷香與偕若非凡境元一統志上有大聖塏宋咸淳間

立龍山書院

修真觀在山上順治九年知縣趙介建

明虞謙登龍山清暉閣詩峇嶷飛閣倚巖阿極目

谿山樂趣多簾捲白雲生遠岫窗含明月印澄波

丹崖有客題詩去畫舫何人載酒過幾度登臨歸

路晚數聲啼鳥隔烟蘿 張祥鸞秋日泛舟登龍

山詩蒹葭瑟瑟柳絲絲短棹無帆輕自移湖上人

家秔稻熟山腰亭子薜蘿垂天圍亂水晴逾碧秋

落遙峯瘦更奇樽酒故人清話慳得歸翻悔乞歸

遲

縣城在山北至順鎮江志門十有一東曰唐安東水

並去縣治一里南曰南昌招賢並去縣治一里西曰梓墟去縣治百五十步

北曰丹陽去縣治百五十步東南曰車去縣治一里新興去縣治三里

東北曰下塘去縣治一里百五十步西南曰朝真去縣治一里西北

曰西水去縣治一里邑志城久廢為平地明正德壬申知

縣董相重築嘉靖甲寅知縣趙圭登博石高二丈六

尺周一千二百三十四丈四尺門六東曰景陽南曰

宏化西南曰興元後改文明西曰望華西北曰拱辰後改拱極

北曰揚武後改朝天

縣學在城北隅嘉定鎮江志祥符圖經載夫子廟在

縣治東其後依廟建學有紹熙重建縣學碑葉適撰

劉宰書明倫堂額晦庵朱子書

三賢祠在學內祀張章簡公綱劉文清公宰王正肅

公遂今增入虞公謙王公樵于公孔兼于公仕廉為

七賢祠

七君子祠在學內祀鄧藩錫

崇禎甲戌進士知兗州府大兵破城不屈死

贈太僕卿事具明史忠義傳

徐有聲

戶部郎中闖賊陷京師遇害贈太僕卿事載綏寇紀畧

王明汲

乙酉州府同知

馮厚敦

江陰訓導乙酉城破死丹徒志潘文光授江陰

訓導與厚敦同日死

王明灝王榮圖

並諸生甲申間變不食死

王汝紹

布衣乙酉

投水死

案學中尙有忠義祠內有四川崑番經歷陳冊崇禎六年流寇陷城死隨州吏目沈元鑑崇禎

十四年獻賊陷城被害木工湯士鼇甲申
開變投水死宜與鄧徐諸公並祀一祠

武功臺在縣治西唐縣令姚合築至順鎮江志姚合武功縣人故名

北亭在縣治北臨河宋淳祐中縣令孫子秀立郡守

王埜書扁至順志

唐經畧使戴叔倫墓在文明門外翰林學士右補闕

梁肅譔神道碑見嘉定鎮江志新唐書本傳叔倫字幼公潤州金壇人撫

州刺史封譙縣男
遷容管經畧使

明大理寺卿虞謙墓在丹陽門外一里謙字伯益邑人洪武中以

明經貢太學官至大理
寺卿事具明史本傳

都御史諡恭簡王樵墓在山南青岡墩子布政司參

政肯堂墓在九曜寺後

樵字明逸按察副使臬子嘉靖丁未進士歷宮刑部侍郎

都察院右都御史卒贈太子

太保諡恭簡事具明史

本傳

肯堂字宇泰樵子萬歷己丑進士官檢討遷

南膳部郎出為福建布

政司參政明史附傳

光祿寺卿于孔兼墓在山下

孔兼字元時萬歷八年進士官禮部儀制司郎

中卒贈光祿寺卿

事具明史本傳

戶部侍郎于仕廉墓在城北花橋

仕廉字元貞萬歷丙戌進士官至

部侍郎

宋王遂宅在唐安門內見至順鎮江志

大涪山在縣南五十里長蕩湖中周處風土記云洮湖

中有大涪山即此嘉定鎮江志大岷山又有小岷山其

下石堂內有虎跡水澗卽見山東南屬宜興西南屬溧

陽處長蕩湖中屹然孤秀望之若浮故名匪音浮案匪符悲切無浮

音涪房尤切音浮嘉定志既云音浮自應作涪

普門寺在大涪山唐元和中僧鐵牛建溧陽志

明虞謙大涪山寺詩夏日湖心寺厄欄四面通一

山都見水萬竹盡含風石竈茶烟碧螺盃酒暈紅

勝游懷舊集歸棹夕陽中 繆樛詩湖心湧出大

涪峯一朵青蓮落鏡中老樹挾雲秋唳鶴懸崖墜

石夜驚龍波濤遠接天邊盡日月潛行地底空心

想禪關阻登眺隔川遙聽夕陽鐘

京口山水志卷十五

京口山水志卷十五

京口山水志卷十六

金壇 水

漕渠邑志金壇以古荆谿爲運道越珥村橫塘二堰乃
達諸河宋端平中劉宰建議開堰以通運河運河之通
自此始自城北逾荆谿至丹陽界徑珥濱入丹陽運河
以達京口其下流穿城沿南壩入白龍蕩

行香橋在北水關內跨河宋淳熙中糞以石改名惠
政端平中劉宰重修又名端平俗呼新橋

安定橋在南水關內跨河宋端平中重建改名清和

俗呼大橋至順鎮江志二橋並見祥符圖經

鍾秀橋在縣北三里漕河東岸俗呼鍾橋河水由此分流徑橫堰入錢資蕩

濯纓橋在縣北八里漕河西岸舊名三里岸橋明永樂間改今名河水由此分流入大谿

南壩在南水關外太虛觀前元至元十三年立至順鎮江

志

唐戴叔倫宅在南壩之東邑志太虛觀即公宅基

戴叔倫南野詩治田長山下引流坦谿曲東山有遺塋南野起新築家世素業儒子孫鄙食祿披雲

朝出耕帶月夜歸讀身勤竟忘疲團團欣在目野
芳綠可採泉美清可掬茂樹延晚涼早田候秋熟
茶烹松火紅酒吸荷杯綠解佩臨清池撫栗看修
竹此懷誰與同此樂吾所獨

思湖在縣南六里東北受荆谿水西南流十二里入大

谿

嘉定鎮

一名白龍蕩

案嘉定志別出白龍蕩以湖與蕩爲二

思湖白龍廟在湖之南大澤洲上元一統志湖與長
蕩湖相連其先有白龍化於此地旁有龍祠祈禱有

應宋嘉定間勅封孚惠靈佑王咸淳中加封順應

有廟前有明秀亭米友仁題榜

嘉定志云米友仁遊地留此題字在祠西

壁

米友仁明秀亭詩見山眼倍明臨水氣增秀二物
我所奇壯哉充宇宙

高湖在縣西北十里周百餘頃北受五中瀆水南流十

二里入大谿嘉定志太平寰宇記云此二塘梁普通五

年廬陵王記室參軍謝德威置隋日廢武德二年本州

刺史謝元超重修復

長塘湖在縣南三十里周迴一百二十里與溧陽宜興

分界一名長蕩湖又名洮湖南徐州記字書洮音姚案廣韻集韻正韻並云音遙

湖名即五湖之一周處風土記以太湖射湖貴湖溧湖洮湖為五湖此即洮湖也其水連震澤入

松江至海案水經注江南東注於具區謂之五湖口五湖謂長塘湖太湖射貴湖上湖瀟湖也風土記以射貴爲二湖未
知孰是 京口耆舊傳王康字伯壽嘗論金壇水利謂

洮湖舊有八十一浦口實受荆城延陵丁角薛步四源之水今所存惟二十有七皆淤塞不通蓋訪舊蹤浚而深之下流無壅則水不爲害人以爲當晉書王舒傳子允之行揚烈將軍韓晃南走允之追躡之於長塘湖大破之又王恭傳恭敗將奔桓元至長塘湖遇湖浦尉收之

唐張籍長塘湖詩長塘湖一斛水中半斛魚大魚如柳葉小魚如鍼鋒水濁誰能辨真龍 明朱多

正平山志卷十一
二
煙秋日泊舟長蕩湖詩蒹葭一望暮蒼蒼長蕩湖
頭烟水長怪道今朝楓葉盡夜來七十二橋霜

湖口城在湖谿村嘉定鎮江志宋秦始二年庾業至
長塘湖卽與義興太守劉延熙合於湖口夾岸築城
制遣沈懷明等東討以督護任農夫助之自延陵出
長塘力戰大破業遂棄城走

荆谿一名荆城港在縣北十八里寰宇記谿濶四十步
其上源在縣東北丹陽縣界內古荆城前自谿口入珥

瀆達丹陽漕河五十里

唐陸龜蒙有荆谿早景題
杜秀才水亭詩載至順志

荆谿官坊埭寰宇記在縣西四里齊梁之代埭北下

塘村有周鄭劉師等四姓並有官同居村坊於時其
置此埭因以為名

師墓橋在下塘村之東師墓橋見至順鎮江志蓋下塘村有周鄭劉師四姓橋以

近師姓墓得名也今邑志改作思墓謂
地近左思墓誤思墓去此尙遠詳見下

漢左恢墓左忠墓吳左思墓嘉定鎮江志並在縣北

十八里案左墓在荆城港故港側丹陽界有港名左墓邑志左恢與忠思墓並云縣北十八里思

墓橋云縣東七里自相矛盾明是師墓之訛嘉定

志毗陵先賢傳云恢字伯嚮曲阿人累拜尙書左丞

京師稱其清高後遷會稽太守忠字思和凡為七邑
所至有異政思字公行材量雄偉孝行純篤累遷會

稽餘杭長
沙三郡守

大谿在縣西十二里嘉定鎮江志南徐州記云東南流

百三十七里入長塘湖邑志卽今青菩河

東墟大橋在縣西二十里大谿上

宋司空錄尙書徐羨之墓寰宇記在縣西南二十里

邑志大谿東南地名徐墓

晉書本傳 東海郟人

宋參政諡章簡張綱墓在東墟

宋史本傳綱字彥正 潤州丹陽人入太學

以上舍及第釋褐爲吏部尙書參知政事卒諡文定 汪應辰論駁之孫釜再請特賜章簡者舊傳金壇人

直谿在縣西三十五里俗名直里河

上承茅山丁角 諸水流入漕河

唐王谿在縣西南四十里嘉定鎮江志側有唐王村故

名

方山諸水自薛步入 谿東南流入長塘湖

薛步新河牘三汊河牘明隆慶間建

邑志每年三月 開牘八月開牘

旱澇有備年久牖圯
改築土壩啟閉如舊

薛步橋至順鎮江志當山水之會宋建康通判張宗
必重螿以石

下程橋在薛步甸容交界處

宋張綱宅在谿上希墟村有喜歸亭

張綱喜歸亭詩君恩賜我老菟裘旋築池亭野趣
幽地勢曲連青嶂遠波光環匝翠烟浮興來尊酒
隨時辦客散琴書竟日留爲問標題意何在一生
心足是歸休

錢資蕩在白龍蕩東西南經方洛港入長塘湖

廢金山府太平寰宇記金壇本漢曲阿縣延陵之鄉
 隋開皇十五年別置金山府嘉定鎮江志縣故城周
 七百步唐長壽改元築萬歲通天中甃以甃後廢邑
 志今錢資蕩南岸猶有城基云

宋知樞密院事諡敏肅湯鵬舉墓在蕩東北小墟村

京口耆舊傳湯鵬舉字致遠金壇人政和戊
 戌進士知樞密院事薨年七十有八諡敏肅

東園湯鵬舉別業嘉定鎮江志張綱宅在縣西之希

墟村湯鵬舉宅在縣東之小墟村紹興丁丑二公並
 為執政邑人呼張為西府湯為東府云

天荒蕩在縣西三十里建昌圩中

邑志圩周八十四里
 中有田八萬餘畝

莊城在蕩東北

唐綦母潛有送儲
十二還莊城詩

唐儲光義宅在縣西北四十里莊城西村儲游茅山

詩十年別鄉縣又家近華陽洞莊城蓋在茅山之東

邑志莊城東村有光義墓

鮑蕩在縣西三十五里直谿西南

滕洲蕩在縣西四十里介紫陽西陽二渠之間

北渚蕩在縣北五里受漕河之流東入錢資蕩

柘蕩在北渚蕩北

燕子港在縣東四十里通長塘湖

大雲橋在港側彭期渡

至順志天歷中尹輔建宜興
溧陽皆取道於此行者便之

下湯港在縣東三十里通長塘湖

溫瀆港在縣東二十里通長塘湖

方浴港在縣南二十五里錢資蕩水入湖之口

新河港在縣南三十里薛步諸水東南徑唐王谿入湖之口

大浦港在縣南三十五里湖谿村

紙錢標橋在湖谿南

邑志相傳東壩未立時茲地為瀨陽江舟行至此標紙錢以祀

神故名

古涑瀆在縣南二十里京口耆舊傳陳亢字退叔居邑南地多沮澤古涑瀆久淤壅水為災率眾築隄延袤十

許里以便行者而浚瀆以通洮湖水患遂息

甓橋徑瀆在縣西十三里至順鎮江志晉宋舊有此瀆

隋大業初有縣令達奚明者修之於瀆南造橋以甓因

名案溧陽志甓橋距縣三十六里北受金壇之水為南

北孔道茲云縣西十三里南流三十七里方入溧陽境隋之甓橋非今橋所也景定建

康志卽有此橋則宋時已移建矣
南洲瀆在縣南七里至順志瀆口有南洲村因名

北洲瀆在縣北五里至順志瀆口有北洲村因名

高湖下口瀆在縣北八里直谿建昌圩水入漕河之口

見至順志

十字河在縣西通大谿瀆河有時干村

晉吏部東陽太守袁宏墓寰宇記在縣西十里邑志

縣西時干村墓前有廟

晉書文苑傳宏侍中猷之孫案猷陳郡陽夏人

梁中書舍人給事中王國侍郎袁興祖墓寰宇記在

縣西十三里

嘉定志興祖字道生捨所居宅爲法中平等寺勒碑紀實

蔭風河在洮湖北邑志明萬歷中知縣李宏綱鑿

吳塘在縣東二十五里至順志周回四十里梁吳遊所

造邑志半入丹陽界有利用壩厚生壩以時蓄洩

梁散騎侍郎巴陵太守潘闡之墓寰宇記在縣東二

十五里

嘉定志闡之字文昌廣識多能爲琅邪巴陵二郡太守

上塘在縣東十六里 下塘縣北七里

晉國子博士周祇墓寰宇記在縣北七里

嘉定志建康實錄祇

為國子博士宋武帝遣劉敬宣伐蜀祇以書諫帝不從果無功而還

常山太守謝篤墓寰宇記在縣東十六里

謝篤未詳

宋屯田員外郎姚闢墓

姚長官墓並在縣東唐安

鄉下塘村

京口耆舊傳姚闢字子張金壇人早從歐陽公修學皇祐元年進士屯田員外郎應

天府教授秩滿通判通州卒葬本縣唐安鄉石門阡之原內翰蘇軾以詩哭之云京口年來耆舊衰高人淪喪路人悲空聞韋叟一經在不見恬侯萬石時貧病只知為善樂逍遙卻恨棄官遲七年一別真如夢猶記蕭然瘦鶴姿族弟存許將榜進士出身族姪純孟馬涓榜進士出身時為縣令者皆稱長官二人葬金壇至今鄉人呼曰姚長官墳

單塘在縣東北二十八里至順鎮江志齊單

上御名造

謝塘在縣北二十五里至順志梁天監九年彭城令謝法崇造

南謝塘北謝塘至順志並在縣東南三十里梁普通中

廬陵王記室參軍謝德威造隋廢唐武德中謝元超重

修案嘉定鎮江志引寰宇記列此語於思湖高湖之下謂二湖曰此二塘今境內並無南北謝塘邑志云未

詳湮廢之由疑南謝塘即思湖北謝塘即高湖名湖爲塘猶練湖名練塘也二湖一南一北正符所名此言並

在縣東南三十里是下莞塘距里必傳寫之誤

莞塘在縣東南三十里至順志梁大同五年南臺侍御

史謝賀之壅水爲塘種莞其中因名

堯塘在縣東南二十五里

畫錦橋在堯塘村至順志宋知樞密院湯鵬舉爲浙
漕日邑人建是橋以榮之

强塘在縣西四十里游仙鄉

宋秘書少監譚知柔墓在强塘

京口耆舊傳譚知柔字勝仲金壇人政和

八年登進士第知興化德安茶陵縣辟通判邵州軍
事除宗正丞刑部郎中大理少卿秘書少監卒葬縣
西强塘之原生平喜爲詩有華陽居士集

白水塘在縣西五十里上元鄉茅山方山之間

案京口耆舊傳

王正肅遂葬上元鄉之
白水塘墓已見前方山

漫塘在縣西近大谿京口耆舊傳劉宰領嶽祠歸幅巾
短褐種柳植蓮於雲茅西偏之塘名塘曰漫自號漫塘

病叟

劉宰漫塘晚望詩霽色催雲作晚霞小橋卻立岸
烏紗雨餘菱芡新抽葉秋早菰蒲未著花燈影微
茫行客艇鐘聲縹緲梵王家沈吟索句輸公等我
欲臨流理釣杓

蓮陂至順鎮江志在縣西八里輿地紀勝陂多生蓮因
名

放生池至順志在縣南二里案今宏化門外二里有魚池卽其地

京口山水志卷十六

京口山水志卷十七

溧陽山

平陵山元和郡縣志在縣南十八里晉成帝時李闓圍

韓晃於此山斬之山高四十丈太平寰宇記在縣西三

十五里有子胥祠存

案晉書蘇峻傳闓斬晃於巖山山距平陵山二十餘里

平陵城金陵志在縣西三十五里平陵山下周二里

高一丈城有四門門外有濠闊六七尺勝公廟記云

固城吳時瀨渚縣楚靈王與吳戰吳軍不利遂陷此

城吳乃移瀨渚於溧陽南十里改爲陵平縣平王立

使蘇迺爲將戰敗吳軍以吳陵平縣改平陵縣

案晉書地

理志惠帝永興元年以周玘創義討石冰分丹陽之
永世置平陵凡六縣立義興郡以表玘之功並屬楊
州晉以前未聞有平陵之名平陵當是晉縣廟記不知所本

陸龜蒙笠澤叢書余

爲兒時在溧陽聞白頭書佐言孟東野貞元中授溧

陽尉溧陽昔爲平陵縣南五里有投金瀨瀨南八里

許道東有故平陵城周千餘步基址陂陀裁高三四

尺而草木勢甚盛率多大櫟合數十抱藜篠蒙翳如

塢如洞地窪下積水沮洳深處可活魚鼈輩大抵幽

邃岑寂氣候古澹可喜除里民樵置外無入者東野

得之忘歸或比日或間日乘驢後小吏驀投金渚一

往至得蔭大樸隱崑篠坐於積水之傍苦吟到日西
而還爾後滾滾去曹務多弛廢令季操卞急不佳東
野之爲立白上府請以假尉代東野分其俸以給之
東野竟以窮去

元趙孟頫題孟郊平陵圖詩騎驢眇眇入荒城積
水空林坐自清政使不容投劾去也勝塵土負平
生

射鵬堂建康志在平陵城元和初縣尉孟郊建

孟郊詩 送淡公十二首中二首 短蓑不怕雨白鷺相爭飛短

楫畫菰蒲鬪作豪橫歸笑伊水健兒浪戰求光輝

不如竹枝弓射鳴無是非 射鳴復射鳴鴨驚菰
蒲頭鴛鴦亦零落彩色難相求儂是清浪兒每踏
清浪游笑伊鄉貢郎踏土稱風流何如卯角翁至
死不裹頭

小山池亭金陵志在平陵城小山側去縣西北三十
里

孟郊與長文上人宿李秀才小山池亭詩燈盡語
不盡主人庭砌幽柳枝星影曙蘭葉露華浮塊嶺
笑羣岫片池輕衆流更聞清靜子逸唱頗難儔

附
古固城在今縣西一百三十里高淳縣境寰宇記

在溧水縣城廣二千七百五十步有楚平王祠卽

吳越春秋謂平王都於固城是也

案固城本溧陽地元和郡縣志

隋開皇十一年割溧陽之西丹陽之東置溧水固城遂屬溧水今又析屬高淳云

宋周必

大南歸錄云由三墩院三十里至溧水鄧步又十

里至東壩乃登陸行十五里至銀樹又六七里至

雙港口復登舟約十餘里至固城湖蓋數百家之

聚也是日西風動地而雨不作登妙智庵觀范同

參政父墳晚與庵僧散步固城之上父老謂之楚

王城其周數里地勢甚高但餘城基庵中石碑龜

趺乃去歲掘得之唐天寶中彌勒寺碑也建康志

紹興中溧水縣尉喻居中在固城湖湄得東漢溧陽長潘乾校官碑其地卽漢之溧陽也

燕山在縣南八里形如飛燕故名

縣城金陵志在山北五里餘

寰宇記元在溧水縣東南九十里唐天復四年

移此案 國朝雍正八年總督史貽直疏請江甯府所轄溧陽改隸鎮江府縣遂屬鎮江治如故 南

唐昇元二年築土城周四里餘河貫城中濠深五尺

濶十倍之宋建炎中西拓青安草市加廣二里建陸

門五水門二元廢明初命將士築之仍南唐舊址而

界草市青安於外越七年又命部使郭景祥加築周

九百丈有奇濬濠深丈餘四門曰東平

後改西成南東生

安後改南薰北固學士宋濂爲之記嘉靖中開躍龍壩於

學宮左而閉下水關上下水關間跨水有橋名春雨橋舊名東市宋嘉定中易今名

縣學在縣治東南江寧志漢光和中縣長潘乾立校

官唐縣令柳均興學校莫詳其處宋淳化五年知縣

事夏侯戩建宣聖廟於縣西門外皇祐四年查宗閔

徙於今處明嘉靖元年湯虺闢迎秀門鑿泮池引注

五堰之水四十二年成之

漢校官碑蓋漢三百八十有七載□□于□□

□□銘功著斯金石異誅曰溧陽長潘君諱軋字

元卓陳國長平人蓋楚太傅潘崇之末緒也君稟

資南霍之禔有天口德之絕搯髻髦克敏口學典
謨祖講詩易剖演奧藝外覽百家衆儁挈聖抱丕
測之謀秉高屯之冬屈私鷁公卽仕佐上郡位旣
畢孔武尅替疾惡義形涸風征暴報訊獲首除曲
厠尉禽姦戔猾鹵息壽歡履孤竹之廉蹈公儀之
絜察廉除茲初厲清肅賦仁義之風修口口之迹
烝化放虐岐周流愛雙虐口口親馭寶督進直返
慝帑政優優令色令儀獄黜喙嗟之寃楸黹叩肉
之結矜孤頤老表孝貞節重義輕利制戶六百省
懌正錄不賈自畢百姓心歡向不失實於是遠人

聆聲景附樂受一廛旣來安之復役三季帷泮宮
之教反共俗之禮構脩學罔宗懿招德旣安且宜
羊侯用張區豆用嗽發彼有的雅窗口閑鍾磬縣
矣丐肯樂焉乃估叙曰翼翼聖慈惠我葦蒸貽我
潘君平茲溧陽彬文烈老扶弱抑疆口刈慳雄流
惡顯忠咨疑元老師旣仕丑脩學童圃琢質繡章
寔天生德有漢將興尙且在管我君存今卽此龜
芟遂尹三梁永在支百民人所彰子子孫孫卑尔
熾昌丞沛國銓趙勳字萼伯左尉河內汲董竝字
公防右尉鷓章南昌程賜字孝遂時將仕吏名戶

三
一
一
三
暫掾楊淮議暫掾季就議暫掾梅檜戶暫史賀口

掾掾位孫祖主記史吳超門下史吳訓門下史吳

鞠門下史時球光和四季十月己丑朔廿一日己

酉造

案此據原碑搨本并王昶金石萃編攷定本

隸釋云右校官之碑

隸額靈帝光和四季溧陽爲其長潘君作紹興十

三年溧水尉喻仲遠得之固城湖中碑今在溧水

縣其間用字剗省其刀賢去其貝于侯用張者周

禮士以三耦射豸侯大射禮用干字尙且在昔者

似謂太公周公也碑以羣爲黎卑爲俾認卽從字

廡卽厲字罍卽垂字暫卽智退卽退楹卽野賓卽

賁字尊卽蔓字防卽房字 原跋云漢校官碑宋

紹興十一年溧水尉喻仲遠得於固城湖濱置之
官舍今在孔廟之大門右長樂陳長方雖嘗碑其
所得本末釋文則未之見碑以靈帝光和四年歲
在辛酉造距今凡一千一百五十三年番易洪景
伯先生出字爲之釋謂挈爲契羣爲黎卑爲俾楸
爲野賁爲責剗去其刀賢去其貝干侯與豕侯通
尙且謂太公周公可謂精審有據其餘不可辨者
尙有二十七字今觀首行自三百字以下止斯字
凡十有六字比之洪氏作釋文時又皆不可攷且

如第三行之字之下是禱字禱下闕一字有天字
敏之上是克字衆之下是雋字退之下是隱字役
之上爲復反之下爲失此之上爲卽皆隱隱可見
洪則悉以爲闕文如旣安且寔則以爲呂寔梅檜
則以爲桓檜豈當時誤於墨本而然耶溧陽志至
謂元卓爲貞是又以名乾而傳會也禧承乏于茲
暇日與士友曹國傑摩莎久之得其二三因以洪
先生釋文列於上僭附所見於其下勒諸樂石以
補前修之所未及者餘尙俟博雅君子云至順四
年龍在癸酉夏五月文學掾濟陰單禧謹識

太白酒樓李白與張旭宴游處元李坦之周子固過
此有詩載溧陽志未知廢於何時 國朝康熙八年
知縣徐一經創建於今治上水關并勒白詩非舊所
矣乾隆六年知縣吳學濂加修

李白猛虎行朝作猛虎行暮作猛虎吟腸斷非關
隴頭水淚下不爲雍門琴旌旗繽紛兩河道戰鼓
驚山欲傾倒秦人半作燕地囚胡馬翻銜洛陽草
一輪一失關下兵朝降暮叛幽薊城巨鼇未斬海
水動魚龍奔走安得宜頗似楚漢時翻覆無定止
朝過博浪沙暮入淮陰市張良未遇韓信貧劉項

存亡在兩臣暫到下邳受兵畧來投漂母作主人
賢哲栖栖古如此今時亦棄青雲士有策不敢犯
龍鱗竄身南國避胡塵寶書長劍挂高閣金鞍駿
馬散故人昨日方爲宣城客掣鈴交通二千石有
時六博快壯心繞牀三市呼一擲楚人每道張旭
奇心藏風雲世莫知三吳邦伯皆顧盼四海雄俠
兩追隨蕭曹曾作沛中吏攀龍附鳳當有時溧陽
酒樓三月春楊花茫茫愁殺人胡雛綠眼吹玉笛
吳歌白紵飛梁塵丈夫相見且爲樂椎牛擲鼓會
衆賓我從此去釣東海得魚笑寄情相親

趙葵宅在縣治南有三忠堂仇遠有詩其別業日晚香堂

宋理宗御書額從子淮宅在縣治北時號南北二府

見溧陽志

宋史趙葵傳葵字南仲京湖制置使方之子與兄范俱有志事功方器之淳祐九年

授光祿大夫右丞相兼樞密使咸淳元年加少師武

安軍節度使進封冀國公薨贈太傅諡忠靖又忠義

傳趙淮丞相葵之從子也李全之叛屢立戰功官至

淮東轉運使德祐中戍銀樹壩兵敗與其妾俱被執

至瓜州元帥阿朮使淮招李庭芝許以大官淮陽許

諾至楊城下乃大呼曰李庭芝男子死耳毋降也元

帥怒殺之棄屍江濱

元仇遠題三忠堂詩謝砌諸郎入寄奴機雲忘祖

亦忘吳一門一品而今有三世三忠自古無丞

相當年握筆時封胡羯末總佳兒後來家有無窮

事便是天仙也不知 一紙郇雲傲劫灰慈親一
見一心摧如今王謝堂前燕飛入人家更不回

金淵亭金陵志在州治後臨谿宋周必大泛舟游山
錄云乾道丁亥八月庚申雨止早至溧陽縣泊金淵
亭宰陳朋元丞趙師旦簿錢聞詩尉時作人辰倅秦
煇相訪秦惠長書及文編楚材大資政之子也劉季
高侍郎至此方數日年八十一近臥病而精明如故
謁閻德夫郎彥昭留致遠飯

報恩寺在縣東門外金陵志梁天監中建宋宣和中
爲神霄宮後改爲寺李綱書額

廣教寺在縣東門外金陵志唐長慶元年金吾衛長
史倪筠捨宅建賜額資聖院宋太平興國五年改今
額

廣法寺在縣西門外金陵志唐名零陵寺楊吳號資
福院宋太平興國中改今額寺有澄觀井井刻維唐
元和六年歲次辛卯五月甲午朔十五日戊申沙門
澄觀爲零陵寺造常住石井欄并石盆永充供養大
匠儲卿郭通讚曰此是南山石將來造井欄留傳千
万代各結佛家緣盡意修功德應無朽壤年同霑勝
福者超於彌勒前

錫華山在縣南四十五里金陵志峯崖秀出流泉縈繞登臨勝地

石屋山在縣南五十里建康志圖經云吳王使歐冶子鑄劍於此今山西有鑄劍坑

銀方山在縣南五十里

吳丞相萬彧墓建康志在山下三國志吳書孫皓傳彧以寶鼎元年為右

丞相鳳皇元年被譴憂死

青山在縣南六十里金陵志上有雲岫庵幽閭絕塵

城子山丁家山辰山金雞山庭子山甌榦山篤山縣南

十里神山泉山二十里喉山高要山二十五里金山羊

雲山氤里山鎖山田瓜山懸鼓山五十里松山天井山
寨山六十里粵山七十里

屏風山在縣東南十里

看經院一名屏風寺在山下金陵志南唐昇元元年
建

元侂遠九日屏風山上方登高詩天借重陽一日
晴因過竹院遠尋僧翠屏晚對無人共畫棟朝飛
與客登旋摘菊花浮臘醞待分貝葉讀秋燈餘生
有暇須行樂漫向松岡歎廢陵

雲泉山在縣東南三十五里金陵志山上有泉嘗出雲

氣故名一名下山

雲泉寺在山側金陵志唐名雲泉院宋治平初改爲

淨土院

南唐許堅詩地枕吳谿與越峯前朝恩賜雲泉額

竹林層建雁墉高石室幽棲幾禪伯荒榛蕪沒蒼

苔深古池香泛荷花白客有經年說二林落日猿

啼情脉脉

鐵山在縣東南五十里金陵志唐書地理志云溧陽有

鐵卽此

銅官山在縣東南六十里金陵志唐書云溧陽產銅是

也舊因產銅設官故名

三鶴山在縣東南六十里寰宇記昔有潘氏兄弟三人於此山求仙道成化爲三白鶴後爲名南有金牛嶺新婦山在縣東南五十里侯堂山陽山圖山橫山結都山六十五里

桂林山在縣西南三十里金陵志山後有大磐石二二曰太古元貞一曰留雲

盤白山在縣西南四十里金陵志下有太虛觀碑載盤白真人事真人姓李名盤桓隴西成紀人避魏武之一役隱居高遂峯之西鬢髮皤然故名盤白名高遂山山有高遂洞

泰虛觀金陵志晉盤白真人成道之地梁簡文帝詔以真人宅作觀賜額招仙宋大中祥符初改今額觀有九井云真人藏丹處溧陽志有銅鐘唐大歷六年鑄明萬歷間賜有道藏

元周子固太虛觀詩聞說江南盤白山異哉仙境在人間千年樓閣空中起一片湖山畫裏看煮藥爐邊雲氣溼步虛壇上雨聲寒明朝奉詔朝金闕好借雙谿一鶴還

三王山在縣西南五十里金陵志說苑云楚威王與眉間尺並一客同葬一山卽此

案烈士傳眉間尺名赤鼻楚人干將子其說甚誕山

名更屬
附會

伍牙山在縣西南六十里輿地廣記子胥伐楚還吳經

此山故名

案伍牙伍員之訛胡渭禹貢錐指云土音員訛為牙

一名護牙山元史

阿剌罕傳攻破銀樹東壩至護牙山

案護亦伍字轉音之訛

伍相國祠在山下

陳周經伍大夫祠詩白髮傷心事悲涼廟貌同全

吳應有恨覆楚不為功一徑埋幽草三春任落紅

冀風如可見予不厭途窮

鐵冶山一名鐵峴山在縣西南七十里建康志山謙之

丹陽記云永世縣南鐵峴山出鐵今揚州鼓鑄之又輿

地志云前代鑄錢處

朝山呂長山石門山茅尖山鳳山縣西南三十里高貴
山龍潭山板山石山從山子山義城山荆山四十里塢
山虎山仙山富山梅山五十里獨山六十里

菱山在縣西六里金陵志上有龍潭東畔石壁臨谿勢
如削成宋丞相趙南仲父子宴游於此其從子桌題石
字徑四寸筆法似晦翁南仲書則水石剝落矣

趙桌題名咸淳二年九月四日長沙趙桌偕弟潛
領客淮安劉弓壽春孫吳會雲安袁道鳴昫山邱
□艤舟洗壁間季父舊題九年矣酒數行野人以

江鮮獻乘輿遂涉山椒而眺焉榭與亭鮮澄酌村
鷹懷古包羅宇宙而入神心境融會賓主酣暢殆
忘南轅北旆之交馳也

巖山在縣西十里晉書蘇峻傳管商進攻凌亭壘李閔
擊破之商詣庾亮降餘衆歸張健健與馬雄韓晃等俱
走閔率銳兵追之及於巖山金陵志云卽此山

大石山在縣西十四里金陵志山麓有龍洞龍池雩禱
輒應頂有怪石刻龍洞二字淳祐戊申古汴趙盱夫書

元蔣時中大石龍洞詩大石山頭兀磐石下有靈
物阻深宅珠宮弄月躍泉光墨池飛雲沛甘澤瘦

藤倒挂古洞前仙壇秋靜明翠烟龍兮冬臥春乃

起素鱗聞雷飛上天

漢徐州牧溧陽侯陶謙墓在山前陶界

三國志本傳謙字恭祖丹

楊人裴注吳書曰謙死時年六十三張昭等為之哀

辭曰猗歟使君君侯將軍膺秉懿德允武允文體足

剛直守以溫仁令舒及盧遺愛于民幽牧暨徐甘棠

是均憬憬夷貊賴侯以清蠶蠹妖寇匪侯不甯唯帝

念績爵命以章既牧且侯啟土溧陽遂升上將受號

安東將平世難社稷是崇降年不永奄忽殞喪覆

失恃民知困窮曾不旬日五郡潰崩哀我人

斯將誰仰馮追思靡及仰咻皇穹嗚呼哀哉

九龍山在縣西三十里前有新婦嶺後有王母界

明彭若龍詩九龍山中風日清九龍山前湖水明

下移青松四時色長伴白雲千古情優游歲月老

將至坐歎林泉意未成安石何曾果忘世恐將虛
望繫蒼生

黃山在縣西四十里

黃山觀在山下金陵志相傳西晉時有黃鶴仙人得
道於此山唐天寶中建觀

安山在縣西四十里

明諸生謝球墓在山下球字石攻僉事鼎新次子邑諸生順治二年大兵下江

南球毀家募兵兵敗被執不屈死詳明史邱祖德傳球敗時僕劉家兆相隨不去追騎集射死妻陳氏聞夫被執赴火死嘉慶二年入祀忠孝祠見邑志

方山在縣西八十里山有白石峯象鼻峯白石洞青龍

洞石馬澗桃花界

方山寺在山下溧陽志明崇禎初建華亭董文敏題
曰小普陀寺

芝山在縣西八十一里金陵志嘗產芝草因名山有梅
仙洞相傳梅福隱此李子洞沸泉出焉燕洞產石如燕
仙人洞有石碁枰天井洞石竅通天如井黃龍洞乳水
下滴洞之大者容千人四山奇石林立梅仙洞前觀音
石狀尤異

靈寶觀在山下金陵志梅福學仙之所唐咸通二年
修宋太平興國中重修

冠山秀山縣西五里姥山投龍山漁父山十里烏山小

石山二十里鳳皇山蜒蟒山蜈蚣山谷山前山王佐山

金魚山三十里張家山子母山四十里浪罟山五十里

白茅山七十里

曹姥山一名曹山在縣西北八十里瀨水出焉

花山縣西北四十里翼山七十里鹿步山分界山

西為溧水

界八十里

玉華山在縣北六十里山東偏有石洞極幽邃

明馬一龍有玉

華山小洞天
記載邑志

馬一龍於玉華山築八角亭詩尋得蟠龍堰上湖

天留此地與狂夫山圍四面如城郭水遶孤亭在

畫圖未翦春羅花自發欲酤美酒鳥先呼祇綠野

老間來往猶帶紅塵到碧蕪

青龍山在縣北八十里山半有青龍洞

宋贈節度使諡忠壯李邈墓在山南

宋史忠義傳邈字彥思臨江軍

清江人金兵將及守真定兵不滿二千錢不滿二百萬乃諭民出財募勇敢而新集之兵皆無鬪志金人至乞師不報城破幹離不脅拜不拜以火燎其鬚眉及兩髀亦不顧乃拘於燕山府久之欲以邈知滄州不答且說以此時歸二帝尸兩河地歲取重幣如契丹以為長利金人聽其言命邈被髮左衽邈憤詆毀甚力金人搃其口猶吮血嘆之翼日遇害高宗贈招化軍節度使諡忠壯建康志邈死時建炎二年紹興二年招魂葬此葉夢得為之銘

瓦屋山在縣北八十里李太白有游溧陽北湖亭望瓦

屋山懷古詩見後北湖亭

了髻山在縣北八十里案句容志作怡嶺山山蓋界二邑之間

獨秀山縣北三十五里東安山四十五里黃金山黃鳥

山七十里

函山在縣東北二十五里洮湖之上山東為周處風土宜興界

記昔有函姥得道於此因名山巔有優曇界宋時設巡

司柵案唐韻函鳥后切山名在溧陽集韻於口切山名在陽羨漢建武中封蔣澄為函亭侯故一名函亭

山楊慎丹鉛錄函山在宜興漢函亭侯函山即其地今桐城有函山讀若偶與溧陽宜興函山同名異地

宋朱晦翁贈函山都巡舍人陳英詩古寨依山麓

頽垣近水湄有兵耕綠野無盜弄潢池歲稔村村
樂官閒事事宜我來無可饋聊遺一聯詩 汪藻

辟地西山亭野步詩今日幸無雨天空出遙岑行
行不知疲遂至春江溇沿路轉籬落人家在桑陰
平疇漲清波隴麥如人深溝畝戲鳧鶩新蒲映浮
沈我本漁樵侶對此偕初心風物豈不好悲來難
自任戰塵暗中原四海如驚禽黃屋狩萬里兩宮
隔辰參龍移螻螳窺月晦蟾蜍侵宇宙有傾覆茲
游豈嘔噉消憂賴濁醪太息誰能斟

史侯祠在山西埭頭村祀東漢溧陽侯贈司空史崇

建康志有晉永和唐貞觀二碑溧陽志宋大觀元年

賜惠顯廟額政和六年封靈濟公屢著禱雨之應時鄭威愍

驥知縣事題祠前石坊曰靈濟公神道祠內海嶽堂

朱子書額堂後卽侯墓垣周四百丈高原大林俯瞰

洮湖

明光祿寺少卿馬從謙墓在山西南明史本傳從謙字益之溧陽人

嘉靖十四年進士授工部主事轉禮部主事擢光祿寺少卿世宗從事齋醮日費數千緡提督太監杜泰

歲侵鉅萬從謙奏發之泰因誣為誹謗死杖下萬歷中贈太常寺少卿

雷公山在縣東北三十七里金陵志昔有雷公鑄劍於

此

法興寺在山下金陵志唐爲法常寺宋開寶中重建
治平初改今額寺有石洞可丈許清泉不竭

大簞山小簞山並在縣東北四十餘里洮湖之上

張汝山縣東北三十五里落霞山四十里小山六十里

京口山水志卷十七

京口山水志卷十八

溧陽水

溧水說文水出溧陽縣漢志溧陽縣下云溧水所出南

湖也建康志水北曰陽宣城南一名瀨水源出縣西北湖在固城湖北故曰溧陽

曹姥山東流入長塘湖溧陽志瀨水有二其一發源曹

湖東流過鄧步入溧陽界與曹山之水合漢志蕪湖縣

下云中江出西南東至陽羨入海夫起蕪湖至陽羨入

海舍溧陽西南一道無路可由晉谿即漢志中江無疑

自明嘉靖間於高淳東境增築下壩而蕪湖西南之水

北流大江不復東下矣案元和郡縣志溧水在溧陽縣

南六里今舊縣南六里之溧水即笠澤叢書所言縣南

五里之投金瀨知溧亦可名瀨溧或轉為淩國策范雎

日伍子胥囊載而出昭關夜行而晝伏至於淩水史記

范睢傳作陵水索隱云卽栗水栗又溧之省文溧亦轉
爲烈山謙之丹陽記江寧烈洲吳舊津所也亦曰溧洲
唐書音訓投金瀨今潁陽江寰宇記吳越春秋子胥奔
吳至溧陽女子擊綿瀨水之上子胥過而乞一餐女子
發箪飯壺漿而食之子胥餐而去謂女子曰掩子壺漿
勿令其露女子曰行矣子胥行五步還顧女子已自投
瀨江而死子胥伐楚師還過溧陽瀨上欲報以百金不
知其家乃投金瀨水而去今水際有碑李白文

舊縣城在今治西北四十五里瀨渚金陵志引戚氏
志云城已圯惟巡檢寨後小坡上有城隍廟自唐初
武德三年於此置縣至唐末天復三年移治今所後

三年唐亡則此城爲溧陽治與唐終始首尾蓋三百
年云

中江橋一名中橋跨中江金陵志宋元祐三年建

宋岳珂行抵中橋詩歷盡清灣日已曛斷虹吹浪
過平湖兒癡不識中橋影問道前山有雨無到得
中橋一徑斜岸傍沽酒兩三家長年醉臥桑陰下
鼓吹猶聞夾岸蛙

貞義女廟在瀨渚鳳皇橋溧陽志舊在縣西黃山明
宏治十一年知縣符觀改建並移宋夏侯戩所刻李
白碑於此橋亦觀建南北兩橋故又名雙橋

唐李白貞義女碑銘皇唐葉有六聖再造八極鏡
清萬方幽明咸熙天秩有禮自太古及今君君臣
臣烈士貞女采其名節尤章可激清頽俗者皆掃
地而祠之蘭蒸椒漿歲祀罔缺而茲邑貞義女光
靈翳然埋冥古遠琬琰不刻豈前修博達者爲邦
之意乎貞義女者溧陽黃山里史氏之女也以家
溧陽史闕書之歲三十弗移天于人清英潔白事
母純孝手柔荑而不龜身漂擊以自業當楚平王
時王虐忠助讒苛虐厥政芟于尙斬于奢血流于
朝赤族伍氏怨毒于人何其深哉子胥始來奔句

吳月涉星遁或七日不火傷弓于飛逼迫于昭關
匍匐于瀨渚舍車而徒告窮此女目色以臆授之
壺漿全人自沈形與口滅卓絕千古聲凌浮雲激
節必報之讐雪誠無疑之地難乎哉借如曹娥潛
波理貫于孝道聶姊殞肆概動于天倫魯姑棄子
以卻三軍之衆漂母進飯沒受千金之恩方之于
此彼或易耳卒使伍君開張闔閭傾蕩鄢郢吳師
鞭屍于楚國申胥泣血于秦庭我亡爾存亦各壯
志張英風于古今雪大憤于天地微此女之力雖
云爲之士亦焉能咆哮烜赫施于後世耶望其溺

所愴然低回而不能去每風號吳天月苦荆水響
嶺如此精魂可悲惜其投金有泉而刻石無主哀
哉邑宰滎陽鄭公名晏家康成之學世子產之才
琴清心閑百里大化有若主簿扶風竇嘉賓縣尉
廣平宋陟南郡陳然丹陽李濟清河張昭皆有卿
材霸略同事相協緬紀英淑勒銘道周雖陵頽海
竭文或不死其詞曰粲粲貞女孤生寒門上無所
天下報母恩春風三十花落無言乃如之人擊漂
清源碧流素手縈波潺湲求思不可秉節而存子
胥東奔乞食于此女分壺漿減口而死聲動列國

義形壯士入郢鞭屍還吳雪耻投金瀨汜報德稱

美明明千秋如月在水

案大白文李陽水書見建康志宋夏侯戩重刊見周

必大泛舟

游山錄

宋李綱詩楚王聽讒誅伍卿招呼二子同就烹子

胥彎弓見使者義不戴天非惜生操瓢乞食困江

表曷嘗一日忘郢城溧水之陽遇貞女壺漿簞食

欣相迎當時追捕回爾急殺身滅口意豈輕霸吳

何止服句踐破楚遂以鞭荆平倒行逆施道雖遠

復仇攄憤聖所稱郤來訪舊欲報德歎息玉質隨

流萍投金淺瀨亦何有聊以寓意通精誠哀窮進

食類漂母解劍挂墓同延陵古人已矣不可見空
有史筆垂英聲 元偃斯詩偶因一飯饋將軍滅
口沈淵信義存漫說有金堪報德卻憐無地可招
魂春風灑江蕪綠落日荒祠野樹昏滄海桑田
任遭變貞名終古照乾坤 明倪岳詩灑水迢迢
清復深穹祠精爽尙陰森壺漿聊慰將軍渴鐵石
應憐此女心慷慨半生輕九死分明一節重千金
芳魂不逐東流去貞烈名傳亘古今

北湖亭在舊縣城外

李白游溧陽北湖亭望瓦屋山懷古詩朝游北湖

亭遙望瓦屋山天清白露下始覺秋風還游子託
主人仰觀眉睫間目色送飛鴻邈然不可攀長吁
相勸勉何事來吳關聞有貞義女振窮溧水灣清
光了在眼白日如披顏高墳五六墩翠兀棲猛虎
遺蹟翳九泉芳名動千古子胥昔乞食此女傾壺
漿運開展宿憤入楚鞭平王凜冽天地間聞名若
懷霜壯夫或未達十步九太行與君拂衣去萬里

同翱翔

唐興寺在舊縣城側寺有薔薇亭孟東野詩刻石亭
上陳亮跋宋政和中改名勝因寺內建李白孟郊祠

孟郊溧陽唐興寺觀薔薇花同諸公餞陳明府詩
忽驚紅琉璃千豔萬豔開佛火不燒物淨香空徘徊
花下印文字林間詠觴盃羣官餞宰官此地車
馬來

謝公渰在縣北城下金陵志傳爲謝眺洗硯池

謝婆渰在縣南城下金陵志卽謝眺故宅

古縣渰在縣南十五里晉永世縣故址

永世城建康志周三百步遺址高一二尺俗稱古縣
吳分溧陽爲永平晉武帝太康元年更名永世惠帝
永興元年分永世置平陵見晉書地理志宋書州郡
志

葛滄滄在縣西十五里與新昌滄接周四十五里

瀨陽滄一名瀨谿在縣西北四十里

謝達滄一名前馬蕩在縣西北四十里

沙漲滄在縣北十里

宋謝朓詩緩步遵莓渚披襟帶蕙風芙蓉舞輕帶

包筍出芳叢浮雲自西北江海思無窮鳥去能傳

響見我綠琴中

元戶部尙書諡忠愍合刺普華墓溧陽志在沙漲村

元史本傳合刺普華與平山東賊世祖召給宿衛歷
官尚山鐵冶都提舉都漕運使都轉運鹽使討平陳
良臣之亂右丞峻都征古城交阻屬護餉道北至東
莞博羅二界中遇劇賊歐鍾等衆寡不敵遂遇害贈

戶部尙書

諡忠愍

下湖在縣南十里流入白雲涇

朱湖在縣東南八里郭璞江賦其旁則有具區洮沔朱
澹丹灤水經注朱湖在溧陽

千里湖在縣東南十五里陸機云千里蓴羹末下鹽豉
指此

黃山湖在縣西南三十七里黃山下周十五里

三塢湖在縣西南七十里周四十里一名梁城湖

三塢寺在湖上寺有寒光亭俯瞰梁湖周必大乾道

壬辰南歸錄云甲寅晚過溧陽縣三里宿新江陰宰

李愿送别于此乙卯風順彌望皆湖田行七十里至
三塏院院在水中有元豐時劉誼所作記三塏者相
傳僧伽過江造塏至此爲第三耳主僧宋淨等二人
寺宇敞甚後有寒光亭可望湖二三年亦廢張安國
舍人有詩詞

宋張孝祥三塏寺阻雨詩塏上一鈴語湖頭三日
風蒼山在烟外高浪與天通市迥新篔少僧殘像
教空不妨留滯好且看夕陽紅 又寒光亭詩亭
依三塏占清幽松竹環除翠欲流曉色晴開千嶂
月波光冷浸一天秋瓊瑤影裏詩僧屋雲錦香中

釣客舟風送不知何處笛雁聲驚起荻花洲 又
三埭寺阻風詞二首問訊湖邊春色重來又是三
年春風吹我過湖船楊柳絲絲拂面世路如今已
慣此心到處悠然寒光亭下水如天驚起沙鷗一
片風定灘聲未已雨來篷底先知岸邊楊柳最憐
伊記得船兒曾繫湖霧平吞白埭茅簷自有青旗
三盃春酒醉如泥天色寒呵且睡 岳珂嘉定丁
卯余守樵李召還郡人見餞于三埭灣偶至此寺
因名有賦詩往年曾佩雙湖組古剎猶題三埭灣
墮雁重尋湖浩渺斷虹渾記水回環兩州隔涉名

無改二紀棲遲老復還病衲雖無分別想經門莫
作少年看 元周子固寒光亭詩簷影流不去天
光蘸波碧開軒足清致遠山映佳夕輕風入坐隅
水紋浮枕席魚鳥喜相親灑然脫塵跡

昇平湖在縣西南七十里首受東壩之水南通梅社二
諸

戴步港在縣東南五里溧陽運道自縣南門外水次樂
登倉東行五里至戴步港又東五里出渡濟橋入荆谿
界折而西北逕丹陽以達京口

韓城港在縣西南六十五里高淳胥谿之水東流十里

身口山方志 卷一
過鄧步入溧陽界又東北十里至韓城港

橫邏瀆在縣東七里南接白雲涇北通洮湖

古瀆在縣北二十三里與灑谿通

涇瀆在縣北四十五里入洮湖

百丈溝在縣南三里一名百步溝源出燕山東流入白

雲谿舊有壩三十四儲水以灌高田歲久淤塞明宏治

初知縣楊榮濬餘八百丈中存九壩民賴其利

黃墟蕩在縣南十里周五里東北入白雲谿

練車涇連黃墟蕩

白雲谿一名白雲涇在縣東南十里東入荆谿

高友谿谷谿縣南二十里舉善谿二十里金陵谿六十里藍谿西南六十里

香蒲塘縣西南六里宋塘二十里丁家塘六十里見建康志

五堰案楊吳築五堰地屬溧水嘉靖築下壩地屬高淳久非溧陽境然其地為東南水利之大源而

梁陳以前固溧陽屬也故附錄于諸水之後景定建康志唐景福三年楊

行密據宣州孫儒圍之五月不解密將臺濛作魯陽

五堰拖輕舸饋糧故軍得不困五堰者銀林堰輿地紀勝

以石室五堰路又液鐵以錮石故曰銀淋今訛為林在溧水縣東南一百里長

二十里自銀林少東曰分水堰長十五里又東五里

曰苦李堰長八里又五里曰何家堰長九里又五里

曰余家堰長十里

胡渭禹貢錐指云元和志當塗縣有蕪湖源出丹陽湖西北流入大

江似元和以前此地已置堰故水不東經溧陽而西北入江臺濛特因而加築之耳單鏐吳中

水利書溧陽之上有五堰所以節宣宣歙金陵九陽

江之水由分水銀林二堰直趨蕪湖後水商由宣歙

販運者以五堰為艱阻罔給官長以去五堰五堰既

廢遇山水暴漲皆入於宜興而注震澤周必大乾道

壬辰南歸錄由鄧步行十餘里至東壩登陸行十五

里至銀樹

卽銀林

水泛則自此通舟至固城黃池

案據南歸

錄所云乾道韓邦憲東壩考洪武二十五年浚胥谿

時五堰已復建石牯啟閉命曰廣通鎮

案溧陽舊志明初雖通運道隨鑿溧水石河引而北

注

永樂元年蘇人吳相五奏復上壩增設溧陽溧水

壩夫守之自是宣歙諸水希入震澤而壩猶低薄水

間漏泄舟行猶能越之正統六年江水汎漲上壩大

決蘇常潦甚國稅無所出巡撫周忱集工加築禁不

得復言運河故道正德七年增築壩三丈餘嘉靖三

十五年復自壩東十里許更築一壩即古分水堰處

今謂之下壩兩壩相隔湖水絕不復東矣案永樂所

宋之銀林壩嘉靖所增下壩即宋胡渭禹貢錐指云

之東壩二壩至今如故未之有改漢志中江出蕪湖西南者即今蕪湖之縣河本中江

俗稱縣河流經市中高淳之胥谿在縣東南三十溧陽之永

東連黃池里俗稱胥河

陽江在縣北上承宜興之荆谿也自溧陽流徑縣南

溧水即瀨水又東北匯為洮湖

又東入震澤寰宇記云荆谿即漢志蕪湖之中江也漢魏間蕪湖水已不復東

故水經有北江南江而無中江韓邦憲廣通壩考曰

廣通鎮在高淳縣東五十里與溧陽接界世所謂五

堰者也西有固城石曰丹陽南湖受宣歙金陵姑孰

廣德及大江水東連三捨湖長蕩湖荆谿震澤中有

三五里頗高阜春秋時吳王闔廬伐楚用伍員計開

渠以運糧今尚名胥谿及旁有伍牙山云土音員左

傳襄公三年楚子重伐吳克鳩茲至于衡山杜注鳩茲吳邑

在丹陽吳興烏程縣南太平府志云蕪湖縣東哀公

三十里故蕪湖城即春秋吳鳩茲也亦曰臯夷

十五年楚子西子期伐吳及桐汭

杜注宣城廣德縣西南有桐水出自

石山西北入丹陽湖汭水曲也

蓋由此道鎮西有固城邑遺址則吳

所築以拒楚者也自是湖流相通東南連兩浙西入大江舟行無阻矣而漢唐來言地理者遂以爲水源本通漢書地理志云中江出蕪湖縣西南至陽羨入海後漢書郡國志云中江在蕪湖縣西孔穎達書義疏亦引漢志爲證蓋皆指吳所開者爲禹貢三江故耳或曰胥谿爲吳開出何典記曰河渠書云於楚西方則通渠漢川雲夢之際東方則通溝江淮之間於吳則通渠三江五湖蓋通江於淮卽夫差所開之邗

溝通湖於江卽闔閭所開之胥谿也石城分江水亦是此類古時大江與震澤元不相通安得以後世鑿引之枝流當禹貢三江之二哉又云古時三江不與震澤通而橫流之際江水溢入震澤此理之所有問水從何處入口卽今高淳溧水之間魯陽五堰之地是自宜興航太湖經溧陽至鄧步登岸岸上小市名東壩自東壩陸行十八里至銀林復行水路百餘里乃至蕪湖入大江銀林之港鄧步之湖止隔陸路十有八里此十八里中有三五里高阜而苦不甚高平時可以遏水之東入或遇暴漲則宣歙金陵之水皆

出荆谿人太湖此高阜者不足以遏之五堰之所以作也又云東壩斷不可廢廢東壩者多出於壩上之人至追咎蘇軾單鏹之言行廢高堰者出於泗州之人至恐潘季馴以毀陵之罪殊可痛疾善乎歐陽公有言天下事不能全利而無害惟擇利多害少者行之其此壩與堰之謂哉雖然壩上壩下之民均吾赤子也韓邦憲云以蘇松常湖諸郡所不能當之水而獨一高淳爲之壑稅入弗捐民何以堪之此亦平心之論蓋浙西諸郡財賦甲於天下權輕重而爲之高淳不得不代受其害而其稅則固可減也輕一縣之

稅以慰民心而取償於數大郡其所得不已多乎

京口山水志卷十八

京口山水志卷末

附錄

小昇城太平御覽京口記曰丹徒有小昇城

東武關屯在丹徒至順鎮江志輿地志云吳置

幽州牧齊志云南徐州鎮京口吳置幽州牧屯兵在焉

後樓都嘉定鎮江志鎮海軍節度周寶募兵號後樓都子璵統之

凌波軍嘉定志南唐竊據每歲五月許民競渡籍其

姓名盡蒐以爲兵號凌波軍

烽燧臺至順志輿地志云緣江烽燧臺基吳置並在
丹徒

千巖樓嘉定志春明退朝錄云唐成都有散花樓河
中有薰風樓綠莎廳揚州有賞心亭鄭州有夕陽樓
潤州有千巖樓今皆易其名或不復見至順志宋敏
求舍人題刁約藏春塢詩云千巖相望蔽松筠千巖
樓唐刺史王璠創

伎堂嘉定鎮江志郡城東北有謝公伎堂遺蹟唐李
德裕題北固山詩云班劍出伎堂

射堂 東堂輿地志射堂北有東堂謝元立爲游餞之所世說新語王恭始與王建武甚有情後遇袁悅之閒遂致疑隙然每至與會故有相思時忱嘗行散至京口射堂於時清露晨流新桐初引恭目之曰王大故自濯濯 太平御覽晉書曰劉毅家在京口酷貧嘗與鄉曲士大夫往東堂共射時庾悅爲司徒右長史要府州僚佐出東堂毅已先至遣與悅相問曰身並貧躋營一游甚難君如意人無處不可爲適豈能以此堂見讓耶悅素豪徑前不畚時衆人並避惟毅留射如故悅厨饌甚盛不以及毅毅旣不去悅甚

不歡毅又相問曰身今年未得子鶩豈能以殘炙見
惠悅又不會及毅貴奏解悅都督將軍官深相挫辱
悅不得志疽發背少日而卒

鎮海亭

臨江亭

桂亭至順志閩州類集三亭雜

見傳記爲登臨之勝地今皆失其處

迴賓亭至順志梁武帝大同末幸京口宴帝鄉故老
於迴賓亭見建康實錄

虎社太平御覽京口記曰虎社中村故老相傳昔有
虎於社中產因以爲名

石羊巷輿地紀勝在郡城南輿地志云劉備詣孫權

同獵因醉各據一石羊

妙善寺羅昭諫集有題潤州妙善前石羊詩又有錢

唐遇默師句云石羊妙善街甘露平泉碑

案嘉定志云妙善寺

舊在金壇宋請廢額建於通吳門外為都統司之功
德院中有紀忠堂軍帥畢再遇列陣亡將士職位名
祠之今邑志云寺有石羊失所在蓋善喜字
形相似誤以宋之妙善寺為唐之妙善寺矣

興國寺張鷟朝野僉載潤州興國寺苦鳩鴿棲梁上

穢污尊容張僧繇乃就東壁上畫一鷹西壁上畫

鷓皆側首向簷外自是鳩鴿不復敢來

晉東海王越墓邑志在城南一里

晉書本傳越高密王泰之次子也永

嘉五年薨還葬東海石勒焚越柩妃
裴氏招魂葬於廣陵墓毀改葬丹徒

徐充二州刺史贈侍中太傅褚哀墓邑志在城南七

里晉書本傳哀字季野康獻皇后父也

晉太尉郗鑒墓在城東晉書本傳鑒字道徽高平金鄉人祖約蘇峻反鑒還丹徒

立大業曲阿慶亭三壘以拒賊賊帥劉徽聚眾掠東南諸縣鑒遂城京口討平之進位太尉薨諡文成二

子愔曇

司空郗愔墓在城東晉書本傳何充輔政褚哀鎮京口皆以愔為長史愔子超傳桓

溫傾意禮待除散騎侍郎時愔在北府徐州人多勁悍溫恆云京口酒可飲兵可用邑志陳永

定中有人發愔塚見愔尸如生得古銅器十餘有鄭

康成所書箴左氏膏肓愔手注其後云得於廣固鄧

伯道鄧云石勒軍發康成塚得之

北中郎郗曇墓在城東南史陳始興王伯茂傅軍人於丹徒盜發晉郗曇墓大獲晉右將軍王羲之書及諸名賢遺跡事覺其書並沒縣官藏於秘府文帝以伯茂好古多以賜之

荆州刺史殷仲堪墓在城東晉書本傳仲堪爲桓元追兵所獲死於柞溪子簡之載喪下都葬於丹徒遂居墓側

司空何無忌墓在丹徒南宋文帝紀元嘉二十六年己亥幸丹徒癸亥使祭司空忠肅公何無忌墓

晉書

木傳無忌東海郟人都督江荆八郡軍事江州刺史封安城郡開國公加鎮南將軍盧循順流下率衆距

之衆敗無忌厲聲曰取我蘇武節來執以督
戰賊衆雲集握節死之贈侍中司空諡忠肅

宋廬陵王義真墓在城東宋書武三王傳武帝七男
孫修華生廬陵孝獻王義

真

謝靈運廬陵王墓下作曉月發雲陽落日次朱方

含悽泛廣川灑淚眺連岡眷言懷君子沈痛切中

腸道消結憤懣運開申悲涼神期恆若存德音初

不忘殂謝易永久松柏森已行延州協心許楚老

惜蘭芳解劍竟何及撫墳徒自傷平生疑若人通

蔽互相妨理感心情慟定非識所將脆促良可哀

天枉特兼常一隨往化滅安用空名揚舉聲泣已

瀝長歎不成章

衡陽王義季墓在城東

宋書武三王傳武帝曰美人生衡陽文王義季

明知資陽縣賀允選墓在丹陽

府志允選字繼登丹陽人天啟甲子舉人

授四川資陽令張獻忠犯資陽選嬰城固守城陷一門十七人俱被害

明吏部尚書張捷墓在丹陽

府志捷字前之邑人萬曆癸丑進士歷官南京

吏部尚書乙酉自經于雞鳴山寺

明教諭睦明永墓在丹陽

府志明永字嵩年丹陽人崇禎壬午舉人官華亭教

諭乙酉大兵入城自經于明倫堂

晉玉磬至順志國史纂異云唐潤州人曾得玉磬十

二以獻張率更叩其一日晉某歲所造也是歲閏月

造磬者法月數當有十二今缺其一宜於黃鐘東九尺掘必得焉求之如言而得之

蔬園玉印至順志齊志永明九年曲阿縣民廣慶宅左有園種菜輒鮮異夜嘗有白光狀似垂絹掘獲玉印紐文曰長承萬福

補遺

羅浮石至順志李德裕有題浙西公宇羅浮山石並浙西公宇奇石詩

寶峯石因話錄唐兵部員外郎李約在潤州得古鐵一片擊之清越又養一猿名生公嘗以隨逐月夜

江登山擊鐵彈琴猿必嘯和又於焦山得一石號寶
峯後載歸洛中

蘇庠書心經至順志金山龍游寺有蘇養直所書心
經及白衣觀音像並鐫於石

大河龍卵至順志宋天聖中近輔獻龍卵云得自大
河中遣中人送金山寺沈括居潤時屢見之

大江漲沙至順志江中多沙初自水底漲而出水謂
之塗泥地已而生小黃花謂之黃花雜草地自黃花
變而生蘆葦則爲良田蔡佑雜記京口江中沙田戶
每歲旦收一畝以秤水水重則是年江水大水輕則

江水小歲歲不差

京口山水志卷末